


清代傳記叢刊・綜錄類②
周駿富輯

清史列傳

(九)

卷六五至
卷七十二

清國史館原編



明文書局印行

清史列傳 卷六十五

忠義傳

勞漢 尹布等

勞漢滿洲正藍旗人姓他塔喇世居札庫木國初來歸從攻撫順以第一人先登克其城授佐領旋偕筆帖式尹布閒散球從征額黑庫倫有功尋征烏拉球隨阿蘭珠等下馬步戰所向無當其鋒者明總兵毛文龍遣部將率千餘人潛犯我汛地勞漢球率騎十八步卒二十邀擊殲之球追逃人至敖漢及之同葉臣大破其衆同雍舜等攻旅順口麾衆進遂取之球授騎都尉勞漢得賞賚天聰元年勞漢及佐領固吉納孟健從征朝鮮攻義州副都統西達爾翰衝陣流矢傷目猶手刃數人始仆勞漢夜登城戰歿二年大兵征瓦爾喀什孟健先登歿於陣四年大兵征葉赫固吉納奮勇陷陣被戕八年球尹布追剿索倫部之喀木尼哈葉雷多斬獲九年球加一雲騎尉崇德二年尹布授雲騎尉三年尹布隨貝勒岳託證明攻望都穴其城克之四年尹布晉世職爲騎都尉從都統索海薩穆什征黑龍江獲

三十餘人復隨副都統羅濟進擊杜俄臣兵羅濟中創歿尹布援之亦歿於陣六年球從大兵攻錦州松山杏山城明總督洪承疇遣兵六千夜犯我營球力戰陣亡勞漢贈騎都尉子薩喇奇襲尹布滿州鑲紅旗人姓寧古塔子宜爾特赫襲騎都尉世職球滿洲鑲紅旗人姓棟鄂固吉納與球同旗姓洪鄂球弟糾禪固吉納弟伊勒穆並襲騎都尉世職孟健滿洲鑲藍旗人姓戴佳西達爾翰滿洲人入漢軍正白旗羅濟滿洲鑲藍旗人贈廕俱無考

護穆薩 覺羅蘭泰等

護穆薩滿州正黃旗人姓賴布世居佛阿拉崇德五年五月乙巳以武備院卿從大兵征明距錦州城五里列陣以礮攻城北晾馬土臺克之七月乙酉睿親王多爾袞遣卒刈城西北禾稼明兵突出槍礮並施護穆薩與護軍參領覺羅蘭泰署護軍參領溫察力戰明兵大潰追至濠掩殺之克臺九及小凌河西岸臺二先是錦州外城蒙古貝勒諾木齊等見我兵困城志必得謀來降遂持書縋城下約內應信洩我軍至明總兵祖大壽出拒戰城內蒙古縋縋我軍援之登吹角夾攻護穆薩躍上被創卒覺羅蘭泰前鋒參領宏科俱陣歿鏖戰久明師退守內城我兵

入外城明年五月乙亥明總督洪承疇率六總兵兵六萬來援屯松山北岡我師擊斬二千其兵猶勁騎都尉旦岱參領彰庫善三等侍衛博朔岱陷陣死八月壬戌大軍駐松山杏山閒立營截大路承疇率馬步兵十三萬營松山城北亂峰岡癸亥犯我汛地輝蘭同參領囊古擊卻之參領阿福尼越衆衝突負重傷猶斬將奪幟諸軍繼之敵奔塔山我兵移營松山城外十二月甲寅承疇以兵六千夜至輝蘭奮殺既出復進擊與溫察啟心郎邁圖皆沒我兵沿濠射之殺四百餘人敵退入松山城濬濠圍之明總兵曹變蛟欲突圍出至正黃旗汛地佐領彰古力戰死變蛟亦中創奔還七年二月辛酉克松山擒承疇及明巡撫邱民仰總兵王廷臣變蛟等時明總兵吳三桂猶駐塔山鄭親王濟爾哈朗率兵至城下列紅衣礮攻之佐領崔應泰被創死參領邁色力戰陣亡城壞二十餘丈諸軍悉登遂克塔山覺羅蘭泰滿洲正紅旗人贈雲騎尉溫察滿洲鑲藍旗人姓赫舍里宏科滿洲正白旗人世居那木都魯以地爲氏邁色任護軍參領俱額駙康果理之子旦岱滿洲鑲黃旗人姓伊喇理世居葉赫授佐領率護軍越明北京攻取邊城又梯攻安肅城克之授雲騎尉至是贈一等輕車都尉子達哈塔襲三遇恩詔加至二等

男彰庫善蒙古正黃旗人贈雲騎尉弟猛色禮襲博朔岱蒙古正黃旗人姓拜葉特賜銀五百兩遣官致祭輝蘭滿洲鑲藍旗人姓舒覺羅由閒散於天聰五年隨攻大凌河擊明監軍道張春兵隨轟大敗其衆六年圍明大同略五臺山土堡克之八年復入明邊略其地出邊時偕希爾根殿兩敗阿爾沙蘭兵贈騎都尉子色赫襲阿福尼滿洲正黃旗人初襲勳舊佐領天聰三年大兵越明北京於灤州遇敵獲我兵三人阿福尼與兄札福尼奮勇救出授騎都尉世職崇德六年從征錦州因事罷職明年承疇降上召問兩軍情勢承疇奏有一衣黃甲乘花馬者奮矛衝入衆莫敢撓遂命諸將各乘馬披甲如初使承疇識之承疇指阿福尼以對上大悅復其官尋創發卒依陣亡例廕卹彰古蒙古正黃旗人姓翁果特贈雲騎尉弟孟格色珥襲邁圖滿洲正黃旗人姓納喇世居布顏崔應泰漢軍鑲黃旗人子世榮官至廣東瓊州鎮總兵

董廷元 弟廷儒 廷柏

董廷元正白旗漢軍與弟廷儒廷柏並以閒散從征天命六年大兵攻瀋陽廷元先登陷陣敗明兵上嘉其勇授寬甸守備天聰五年從征大凌河六年從征察哈

爾七年從征旅順口江華島俱有功崇德元年從征朝鮮二年四月從恭順王孔有德征皮島明總兵沈世魁陣海口廷元以小舟從北衝入明兵礮碎之廷元與家丁六人歿於海巨艦繼進遂克皮島七月兵部言皮島陣亡將士骸骨莫能辨識今合葬於通遠堡賜廷元祭葬銀六百兩廷儒積功爲大同守備順治五年大同總兵姜瓖謀叛以廷儒善騎射勇略過人爲士卒所畏愛憚不敢遽發乃佯以宴射誘廷儒至署徐語之曰山西將弁多我舊屬我振臂一呼皆響應公若助我則大事可成無憂富貴廷儒怒罵曰逆賊汝受國家厚恩不思報乃萌逆志萬死不足盡汝罪我今卽手刃汝拔佩刀與賊鬪賊羣執之廷儒罵不絕口賊剖其腹支解之併其子開國等及男婦二十七人俱被害嗣絕無可廢特贈昭武將軍祭葬如例廷柏初任驍騎校崇德五年從征明圍錦州同參領孫有光擊松山步兵敗之又敗杏山騎兵七年又與有光擊敗閩洪山守兵明兵自松山夜犯我壕塹廷柏用紅衣礮卻之進攻塔山城敍功列二等又擊杏山城敍功列一等佐領八年從攻前屯衛中後所等城皆以紅衣礮克之順治元年授雲騎尉世職二年加騎都尉從豫親王多鐸南征破流賊定河南五月克揚州六月克平湖嘉善取嘉

興府廷柏俱在事有功時明魯王朱以海據紹興大兵營錢塘江上以海所署督師大學士張國維以兵九千人夜劫我營廷柏從都統吳守進敗之六年從鄭親王濟爾哈朗征湖廣明總督何騰蛟招流賊李錦等連營拒廷柏從副都統金維城率兵至馬河力戰歿於陣詔贈騎都尉加一雲騎尉子振國襲九年恩詔加二等輕車都尉世襲振國仕至瓜洲總兵官

瑚密色 色赫等

瑚密色滿洲鑲黃旗人姓佟佳世居加哈天聰初來歸以佐領銜駐防天瑞山斬逃卒六十級擒五十人崇德元年隨貝勒阿濟格征明設伏昌平敗明騎五百趨通州斬哨兵百人偵盧溝橋敗候卒前後獲馬百餘匹還取紅衣大礮道遇明太監郭某及總兵祖大弼戰卻之旋率八旗前鋒薄明都敗其兵東略遵化擒哨騎二十復西至盧溝明師自保定來援擊敗之生擒十三人九月隨貝勒多爾袞攻明松山敗其總兵祖大壽四年攻杏山斬獲甚衆額爾克岱青部卒有陷於陣者力援出之五年從圍錦州左翼兵猝遇敵瑚密色先登奮擊明師退又敗之於杏山敘功授雲騎尉七年從奉命大將軍阿巴泰伐明次豐潤破明督師范志完兵

追至玉田明千總二人率兵夜窺我師擊走之八年大兵下山東從攻青州取其
芻卒復敗敵於德州城北明將司馬獻來援偕騎都尉色赫擊之退我兵有科爾
沁二人中刃爲敵所困瑚密色躍馬直入挾之出師旋至桑乾河結浮梁以濟志
完躡我後偕副都統納爾特還擊生擒遊擊一人明師潰因與阿爾布尼鄂碩及
副都統鄂羅塞臣殿志完復遣將追襲連卻其衆順治元年從入山海關擊流賊
敗僞總兵唐通於一片石追至安肅斬獲無算先驅至望都再殲賊復同都統譚
秦逐北數十里二年擢佐領授雲騎尉世職十月瑚密色色赫及參領王元爵隨
豫親王多鐸出征取潼關時賊結陣於山瑚密色同鄂碩奮登賊下山遁遂據其
山賊騎散而復合率前鋒兵乘勢馳下賊皆披靡別隊犯圖賚軍復助擊破之又
設伏敗賊馬步兵數千三年五月大兵下江南色赫王元爵俱在事有功瑚密色
破明兵二千餘於句容明兵復合進偪我軍瑚密色直前衝突明兵大敗色赫擊
敗明總兵黃蜚等於蘇時明魯王朱以海踞紹興浙江列郡多應之六月多羅貝
勒博洛征浙令王元爵徇湖州土兵蜂至元爵戰歿博洛次杭州魯王遣其督師
侍郎孫嘉績熊汝霖渡錢塘江來犯瑚密色色赫等擊敗嘉績兵擒其隊帥追至

江中汝霖兵殊死鬪瑚密色中槍戰歿色赫從定浙江旋下福建還過平湖遇土寇亦以中槍陣亡色赫蒙古鑲藍旗人姓墨勒濟世居哈達以佐領從圍錦州敗明總督洪承疇騎兵遂遷騎都尉王元爵漢軍正紅旗人以軍功授佐領擢參領議卹瑚密色贈二等輕車都尉子薩碧圖襲色赫王元爵並贈雲騎尉元爵子秉恭襲職從子秉政以佐領擢陝西駐防參領順治八年從征四川明桂王朱由榔所署總督龍名揚據敘州擊之陣亡贈雲騎尉

李芝桂 張泰瑞等

李芝桂奉天人順治五年以貢生授山東東平知州抵任甫二十日汶上騎賊四百營於楊柳店四出劫掠芝桂聞警令州同葛方遠等守城率家丁出城瞭探抵城東柳林村遇賊四十餘卽迎剿賊敗竄時分守兗東道劉可徵亦來援同追賊至三官廟樹木叢雜賊伏騎五百餘步賊無算芝桂奮勇入殺馬賊數人可徵兵亦殺賊十餘暮收兵芝桂已入重圍負傷陣亡事聞贈山東布政司參議廕一子入監是時大兵新定山東土寇猶竊發前後陣亡者有紳士張泰瑞趙良輔孫贊元杜之棟千總孫可誦齊振海等泰瑞淄川人明生員順治四年賊謝遷攻淄

川泰瑞倡義抵禦城陷被執脅以刃厲聲曰死則死耳肯從賊爲亂耶賊攢刺之罵不絕口死六年賊李梗攻新泰生員趙良輔以罵賊被殺八年謝遷復聚黨劫長山經淄川會功令各縣舉縉紳中才略者一人練鄉兵備寇淄南推生員孫贊元贊元聞賊肆劫單騎往禦矢斃賊二十餘矢盡以佩刀殺賊數十力竭自刎是年山寇王肖吾破郟城舉人杜之棟不屈罵賊死可誦振海並隸兗東道標千總可誦剿賊於兗州府城振海剿賊於柱子山皆力戰陣亡可誦振海俱蘭山人

王德教 王維新等

王德教奉天人順治三年任河閒知府四年土賊起河閒東至天津及渾河左右俱擾蠡縣賊率衆偪河閒府城德教與河閒兵備道王維新嬰城守委守備王丕承章羽泰分汛抵禦丕承羽泰潛通賊乘大雨引寇自南門入叛卒著白盔白甲雜寇中躍馬入市殺人德教聞變率家丁巷戰死於南門內巡檢潘柱典史邵鯤咸隨戰同日死維新縊於署後之火神廟天津賊莽寒等聚衆唐官屯肆掠天津鎮標中軍副將周天命率兵抵賊巢力戰身被刀箭面受重傷死有薛承所者亦莽寒黨居灣頭天津鎮標中軍遊擊王應春往捕獲其黨三人馬一匹行近唐官

屯賊偵知之率衆出劫槍矢並發傷應春馬首馬驚入村被鈎落馬死又土賊羅洪宇亦乘機謀攻天津先犯海防營遊擊趙成功躍馬出殺賊百餘身中三矢賊引去越數日賊三千餘復來攻成功裹創出戰力竭陣亡洪宇復糾合德平賊至寧津縣天津鎮右營遊擊孔道興駐防吳橋聞報赴援遇賊於張官店奮勇衝殺受傷落馬死又滄洲盜李祥羽肆劫吏目王廷貴率捕役鄉兵出捕至王官村馬賊二十餘步賊百餘驟至廷貴指揮鄉兵截殺鄉兵失利廷貴亦遇害次年秋土賊劉東坡肆掠渾河左右東安縣典史陶宏才奉檄會剿率民兵三百餘馳至武清界西奮力抵禦手殺數賊身中八矢被執不屈死先後事聞詔贈德教太僕寺卿維新光祿寺卿各廕一子入監天命廕都司經歷道興贈參將餘卹如例維新奉天人鯤浙江紹興人天命直隸天津人宏才浙江會稽人餘籍無考

鄺引昌 袁夢吉等

鄺引昌浙江諸暨人順治元年拔貢三年授沂州州同恭順王孔有德南征知其有幹材檄隨營時流賊餘黨李錦劉體純郝搖旗及左良玉故將馬進忠等附於明總督何騰蛟分十三營爲連絡拒守計錦等淫掠如故土寇乘閒竊發湖廣大

擾進忠攻武陵知縣袁夢吉先事集流亡繕城堞練民壯捍禦月餘城陷被執罵不絕聲進忠殺之於西關土寇破當陽戕知縣扈坤雞籠山紅旗賊李榮在土寇中最桀驁夜襲孝感知縣郜炳元典史郎元振集鄉勇守禦榮驅衆圍城矢石交集炳元志不懈賊內應夜半火起城陷炳元不屈被害妻李氏罵賊死元振亦爲賊所殺榮旋犯雲夢大兵擒斬之引昌言於有德曰王當以全力拒騰蛟其鄉堡竊發者請奉檄曉諭士民俾各練屯聚人自爲戰士寇不難破也有德從之引昌薦南漳知縣姚延儒才請與俱延儒浙江歸安人與引昌並以拔貢授職者也引昌聞攸縣諸生陳六禮以率鄉勇擊山賊被執死請表其閭遂偕延儒徧涉鄉堡曉以大義土寇多解散五年大兵擊走騰蛟收復諸郡縣有德將班師引昌請留兵守有德不從引昌旋授永州府通判有德去而湖廣復擾十一月騰蛟遣將攻永州引昌城守三月大小三十六戰城遂陷引昌同妻黃氏子尙英俱被害體純搖旗等犯南漳延儒已擢山西大同府同知未行聞寇至亟設守搖旗以礮摧城麾衆突入延儒奮罵被殺訓導賀泰來典史濮昌國並死之時流寇出沒無常繼延儒知南漳者唐士傑奉天人甫蒞任招流民復業而寇復至士傑度不能支自

忠

義

傳 卷六十五

六

二

焚死詔贈引昌夢吉延儒按察司僉事賜祭葬廕一子泰來國子監學錄昌國濟源縣主簿餘分卹有差夢吉山東榮城人坤奉天人炳元直隸長垣人泰來湖廣景陵人元振昌國籍無考

佟國仕 張國纓等

佟國仕奉天人任山西井坪路參將順治五年大同總兵姜瓖據城叛分兵陷郡縣遠近土賊應之六年瓖遣其黨周世德夜襲井坪國仕聞賊至躍馬出率衆巷戰手刃數十人賊不敢偪旣而城內外舉火聲四應國仕知兵變策馬陷陣死偏關大同左衛接壤瓖黨萬練思據之以應瓖乘署參將張柱石調剿土寇出與其黨孫珽蘇繩武猝爲亂原任偏關參將張國纓已乞病將歸聞變強起曰吾雖去官不當爲國救死耶率僕從邱裕民等寸餘人思誘執練而城中從賊者衆共執國纓羈二十日終不屈爲賊將燕元楨所殺時寧武協標營卒趙登舉楊成等三百餘人素爲瓖所陰結者亦執其副將李吉使降吉怒叱之知不免投纓死把總邱登戎戰歿河保營參將石登仕聞變登城守禦家丁賈邦虎亦黨賊率左右共執登仕脅降不屈爲邦虎所殺外委把總李茂劉世臣亦以不降遇害土賊張五

虞允應瓌圍蒲州河東道楊千古率中軍許世德禦之兵內變開門迎賊千古率親兵巷戰奪門出世德力戰陣亡方瓌初叛時有佟養昇以章京管牧馬事駐大同聞變率從役巷戰死之事聞議卹詔贈國仕副將餘優卹如例國纓奉天人順治二年武進士登戎山西寧武人石登仕佟養昇俱奉天人李吉李茂劉世臣許世德籍無考

武韜 王廷衡等

武韜山東曹縣人順治三年一甲二名武進士四年授山東蒲州營遊擊五年大同總兵姜瓌叛韜嚴設城守十一月瓌據太原晉祠鎮都司王廷衡繕戰具謀攻之賊覺燒其戰具廷衡焚死六年二月解州生員張倣等聚衆千餘應賊殺里居員外郎侯佐與其父嗣晉而蒲州接壤之絳州聞喜夏縣相繼告變五月賊薄蒲州城韜身先士卒開門迎戰大敗之越數日賊悉精銳來犯城外軍民悉爲脅從城中馬步卒不滿八百韜誓以死守與守備許世德守北門知州錢法裕守備賈斯明封汝宦守東門河東道楊千古守西門千總王綸守南門六月賊渠虞允韓昭宣等驅衆萬餘合攻汝宦陰通賊啟關叛將王躍龍縛斯明去賊大至奪法裕

印據倉庫一城大擾千古偕從者數人懷印出西門渡河乞援韜轉戰出重圍適官舟相迎揮涕曰封疆失守不死非忠也有母在而棄之非子也願決死戰再入重圍殺賊百餘力竭被執猶誓不絕聲遂遇害賊勢益張徇諸郡邑執平陽鎮標都司魯學禮迫以僞職不受俾供芻秣亦不與賊怒殺之巡捕營都司謝應舉奮臂大呼令居民勿從逆遇壞於太平樓力戰死妻孥並殉惟子天龍以先期入都獲免沂鎮營遊擊劉懋德奉檄運馬至平陽偕其弟千總懋謙及聽用官江山定等巷戰死同時死難者又有右營守備伍進學大同前衛署守備徐進第楊和道中軍守備耿烜威遠署守備李良臣殺虎堡守備趙坤威魯堡守備李長盛助馬堡守備楊宏祖守備李進忠千總宋國中寧道營千總王命新垣曲縣防城百總張從義俱不屈遇害廷衡山西陽曲人順治二年舉武鄉試第一以千總累遷都司事平議卹賜祭葬學禮應舉贈遊擊懋德贈參將進忠贈都司廷衡進學進第烜良臣坤等俱恩卹如例

周永緒 尹明廷等

周永緒安徽盱眙人順治六年進士八年定南王孔有德以廣西新定請速簡道

府以安輯兵民於是部銓永緒爲右江道而以尹明廷爲平樂知府沈倫爲梧州知府明廷江南吳縣人倫湖廣天門人皆六年進士與永緒並在部觀政故簡用之永緒駐平樂偕明廷悉心撫循民逃者盡來歸設屯堡行旅無恐巡按御史王荃可以永緒善安輯疏薦之梧州爲廣東西孔道倫儲芻茭大兵往來供億無匱而閭閻不擾時明桂王朱由榔遁安隆其故將多招集亡命聲言復取廣西居民驚徙倫乃葺學校課士子以安人心九年七月李定國陷桂林乘勝破平樂永緒不屈死明廷被執定國分兵攻梧州倫守禦力竭城陷死之定國執明廷誘以官不屈會定國移兵擾湖南明廷得脫歸巡撫陳維新新至明廷上謁備言賊形勢會總兵線國安已復平樂維新檄明廷仍知府事明廷星馳至曰民新被瘡痍稍緩恐不聊生矣取餘糧在敵營者賑恤貧乏益嚴守備十年六月定國自湖南復攻平樂國安退廣東七月城陷執明廷欲脅降之明廷大罵曰狂賊死吾分也何多言定國怒去其衣束以魚網繫磔之至死罵不絕口十二月維新以永緒明廷死事狀聞詔贈永緒光祿寺卿明廷太僕寺卿各廕一子入監明廷之死也居民感其惠政潛瘞骨於府治坊側廣西平明廷子宗文赴平樂求瘞所傍徨無所遇

有老媪指示之乃負骨歸葬宗文後以廕官河南柘城知縣

馬騰龍張順等

馬騰龍直隸宣化人順治初以武舉隨定南王孔有德屢立戰功累擢至桂林提標游擊九年七月李定國犯桂林騰龍竭力守城陷與鎮標都司張順撫標旗鼓守備暢大理提標千總楊光先把總王國用劉祿皆巷戰死騰龍弟從龍妻郭氏皆殉大理出戰時家屬並自縊官署後其僕李喜收骨歸京師光先父母見勢迫先自刎死光先乃手刃其妻妾及二幼子然後挺身出鬪殲賊五人順江南上元人大理漢軍鑲白旗人光先江寧人國用順天人祿昌平人先是五月間李定國連陷靖沅武岡有德檄諸道兵集梧州爲桂林聲援是時山谷要隘已爲敵據柳慶副將何九成方守慶遠見檄卽提兵急衝出日夜鏖戰甫達梧城身殞羅河副將沈邦清駐防羅城孤軍被困屢突不能出與把總張志雄皆力戰陣亡邦清子亦殉於桂林失其名有李養成周雄者並以千總署守備戰於融縣之沙鞏村敗俱死又有把總沈敬池州人先一月戰歿於全州許泰易州人先一年戰歿於湖南新田縣皆以禦定國死先後奏聞議卹騰龍贈一級其同時死難諸員惟九成

以不係陣亡部無議卹光先闔家慘烈詔優贈守備餘依例贈卹有差九成邦清志雄養成雄里籍俱無考

金漢蕙 郭養志等

金漢蕙浙江義烏人順治六年進士隨征廣西八年授分守右江道時李定國由湖南擾廣西九年七月圍桂林驅象來攻城陷百總郭養志戰死定國使其裨將李茂吉等分兵犯柳州漢蕙率士民拒守城陷執漢蕙赴衡州賊營十一月大兵復衡州漢蕙乘閒逸賊追及遇害於兩路口其腋下挾敕書徧染血跡廣西巡撫陳維新收得之貯布政司庫定國旋犯梧州分三隊攻官兵亦分隊應之千總蔣應泰等隨總兵線國安爲一隊於龍母廟後高岡迎戰賊以象衝陣官兵逆戰多斬馘旋聞河岸一隊失利國安分兵救之勢益單被圍數日不能出應泰與把總李得祖金大成千總趙興楚劉定邦俱陣沒大兵尋復梧州其餘孽猶據南隘美村國安遣佐領王世富等進剿賊倚山拒戰世富擊走之追至山巔有來援者槍洞腹死先後事聞詔贈漢蕙光祿寺卿廕其子以琳入監世富贈雲騎尉姪成功襲餘卹如例養志等籍俱無考

忠

義

傳

卷六十五

九

二

鄔象鼎 慎倬允等

鄔象鼎浙江仁和人順治六年進士時以兩廣新附亟需道府簡用新進士象鼎授廣東羅定兵備道猺獞多反側象鼎偕羅定知州慎倬允練鄉勇斬其渠撫餘衆猺獞遠徙民賴以安九年倬允以逋賦失徵議革職未離任十年三月明桂王將李定國窺廣東連陷州縣五月定國遣其黨吳子聖攻羅定象鼎倬允及署州同金芳署吏目陳炳新分設守禦子聖驅其衆梯登象鼎等擊卻之外委把總張九貴斃於礮六月子聖對城築礮臺飛彈入城如雨士卒多死象鼎集僚屬曰困守無益當死戰乃立賞格募死士遣中軍郭宗振及城守都司陳一明守備冷時乘等出迎敵子聖驅鄉民爲疑兵自率銳卒力鬪時宗振等戰敗俱潰圍走子聖遂入城執象鼎倬允於城樓道遇芳炳新遣人繫守之芳知守之者給入火藥局擲火焉藥發屋轟芳及凶渠俱斃平南王尙可喜遣兵救羅定子聖挾象鼎等至連灘象鼎倬允罵不絕聲以死自誓子聖並殺之炳新亦以不屈死象鼎子元裸姪聯珠元珣倬允妻莘氏殉焉十一年三月定國窺高州可喜檄遊擊陳武赴援武河南睢州人從下江南以功授浙江金華營遊擊赴調廣東可喜知其勇令同

守高州土寇有陳武者迎定國城被圍遊擊陳武方議兵食而城守副將張月懷異志與語輒不應圍益急遊擊陳武憤率兵出拒敵月卽以城降遊擊陳武轉戰數里中數創死六月定國使土寇陳武驅衆渡海破昌化外委千總李耀祖戰死攻臨高知縣劉承謨勵居民分堞守而乞援於總兵高進庫進庫方巡海洋還救不及城陷外委把總郝進山被殺土寇陳武執承謨至高州定國誘之降不屈定國怒驅象蹴殺之俶允浙江歸安人承謨湖廣沔陽人俱恩貢生芳浙江義烏人炳新山陰人九貴耀祖進山籍無考巡撫李棲鳳以象鼎等死事狀聞部議俶允係革職之員芳炳新署事部冊無名九貴耀祖進山俱外委例不予卹象鼎贈光祿寺卿承謨按察司僉事俱賜祭葬廕一子入監讀書遊擊陳武贈參將廕雲騎尉

熊應龍 子天琳 劉國泰等

熊應龍四川酆都人順治初年任浙江温州盤石衛水師游擊十五年十月海敵鄭成功聯鯨二千由泥畧山曹田窺温州十一月朔突至盤石衛登岸迫衛城應龍方請兵於外適台州遊擊王有進來援合主客兵得二千三百更番出戰者三

敵來愈多乃議嬰城守以待外援有進守北門東門應龍守西門南門次日敵布長圍攻之應龍用礮轟斃騎四往來督戰無少懈又次日敵夜半樹雲梯攻東門應龍率千總尹士奉把總蔣元與戰斃敵三百獲其械及火箭噴筒敵驚卻初五夜敵潛運柴草填河攻北門有進不能禦應龍馳助之敵始退初六日敵以大礮擊城西北隅圯者二丈應龍急運土石塞之其夜敵密布雲梯四面攻我兵矢石並發繼以長斧斃敵無數初七日敵偵應龍在北門突於西門毀堞口數十施噴筒火箭騰涌入應龍趨赴衆寡不敵遂被執應龍禦敵凡七晝夜敵欲降之卒不屈妻陳氏妾繆氏先自縊初八日敵遂殺應龍及其幼子二暴屍於南門縛其長子天琦次子天琳而去琦琳皆中道逃歸有進士奉元並重傷爲敵所擄紹興協左營把總劉國泰右營把總郭應邦山西營把總李時育俱以應援力竭死之事聞應龍贈副將給雲騎尉世職子天琳襲食俸温州衛康熙十五年耿逆僞將曾養性攻温州康親王傑書遣貝子傅喇塔率兵往禦大破之天琳力戰歿於陣贈游擊子煌襲世職遷至廣東三江口副將國泰應邦時育籍無考

祝昌 許文耀等

祝昌河南固始人順治六年進士由中書出爲福建興化府推官未赴任以父憂歸服闋除湖廣黃州府推官時滇黔用兵大軍駐江寧檄催各府糧運昌豫增價採購供額贍足以最擢戶部主事陞廣西僉事道分巡右江未及任裁缺補湖廣辰沅道逆藩吳三桂叛昌在長沙灑涕諭衆曉以大義皆感泣堅守康熙十三年賊大至城潰昌北面再拜自經死三桂之叛也所在蠢應鄖陽降調通判許文耀與在城文武士民竭力堵禦旋奉檄入山招撫叛鎮楊來嘉洪福等遇害事聞贈復原官十四年七月三桂攻漢中城陷同知汪化鼈不受僞職賊繫之十五年九月復給僞劄偪攝縣事化鼈痛哭望闕遙拜自經死十七年十月揚威大將軍簡親王喇布檄益陽縣知縣徐礪往衡州招撫三桂黨至泉溪渡爲僞將軍吳國貴所殺事聞以冒險招撫捐軀盡忠可憫詔贈湖廣按察司僉事廕一子入監讀書文耀福建貢生化鼈江南涇縣貢生礪江西安義舉人

武君烈 唐銓等

武君烈河南嵩縣人少力田奉母避流寇居中山遇土賊將殺其母君烈願以身代賊義而釋之順治初由行伍從荊州鎮總兵鄭四維駐荊州累擢至鎮標中營

都司時土寇姚黃等犯荊州衆號數十萬攻城甚急君烈縋出拔其纛率偏師誘敵斬獲無算寇怒積薪填壕君烈投火焚其薪賊又穴城君烈發火器中賊首立斃賊駭不敢偪數日援師至君烈乃開城夾擊賊大敗擒其僞將張有才姚黃逃匿夔州山中屢出肆擾君烈揚帆直上抵白帝城大破賊獲其渠魁以還湘南土寇王進才以二十萬衆犯澧州君烈奉檄往剿身先士卒突入賊營斬首數十級賊驚潰降者數萬人督撫上其功授前營遊擊鎮襄陽康熙七年鄖陽山賊竊發君烈剿之戰死西山下事聞卹如例其先君烈而死者又有唐銓成溥劉應科銓任提標左營都司溥任撫標中軍都司順治五年黃州土賊起銓溥攻之打鼓寨賊三萬餘以死拒溥奮身入銓繼之賊圍之數重皆力戰死十三年山賊據龍峒魯公寨辰常鎮總兵楊遇明遣水師營中軍都司僉書劉應科往剿賊來犯應科迎敵中槍死詔銓溥俱贈遊擊應科加一級廕一雲騎尉銓溥應科籍俱無考

高應第 劉延祉等

高應第正藍旗漢軍任雲南提標左營遊擊康熙十三年吳三桂叛命順承郡王勒爾錦討之時襄陽鎮總兵楊來嘉鄖陽副將洪福叛降三桂受僞職攻穀城犯

均州南漳以書誘南漳守備劉延祉降延祉斬使焚書擊之土地嶺陣亡十四年三月雲南提督李胡拜駐穀城防守應第及雲南提標右營遊擊田起鵬雲南都司僉書管祐祿鎮標右營遊擊和萬鍾右營遊擊李向日提標中營守備連士奇左營守備馬之才都司僉書管後營守備事張元龍右路鎮標右營守備董魁都司僉書管中路鎮標右營守備事馬九經左路左營守備李燦皆從五月來嘉福復犯南漳等處穀城失守胡拜陷賊應第起鵬祐祿力戰陣亡萬鍾中槍歿向日被執詈賊死士才之奇元龍魁九經燦俱同時殉十五年三桂遣譚洪至鄖江琵琶灘截我兵餉路鄖陽守備李邦全與戰死焉洪旋率三千艘順流圍鄖城城素圯竹山營守備管遊擊事傅桂芳射賊於圯處中槍歿先後事聞詔贈應第都督僉事廕守備延祉直隸宣化人贈游擊廕千總起鵬正藍旗漢軍贈參將祐祿鑲藍旗漢軍贈游擊萬鍾鑲白旗漢軍向日正黃旗漢軍俱贈參將廕守備士奇之才俱正藍旗漢軍俱贈都司僉書廕千總元龍正藍旗漢軍贈游擊魁鑲藍旗漢軍贈都司僉書九經正紅旗漢軍贈游擊燦直隸人贈都司僉書俱廕千總桂芳直隸永清人贈都司僉書廕守備邦全籍無考

金世爵 杜嶠等

金世爵鑲藍旗漢軍順治十四年由舉人任廣東合浦知縣康熙十四年高州總兵祖澤清叛附吳三桂世爵蒐軍實爲捍禦計八月三桂遣僞將王宏勛等率賊數萬犯廉州世爵登城固守及城陷與守備杜嶠俱不屈死又有侯進學者隸平南王尙可喜藩下先爲三桂所脅同其黨遞逆書抵廣州進學卽自首可喜以聞詔授騎都尉世職擢廣州游擊至是爲賊所得囚以木籠送至常德三桂斃之於市十五年二月賊圍肇慶開建守備翟永昌奉調赴援遇賊高要鏖戰陣歿是年逆黨高雄攻新會平南王落下左翼鎮標中軍游擊文天壽與總兵孫楷宗游擊趙天元禦之江門楷宗天元陰附賊誘天壽同降天壽叱之曰背主不忠吾錚錚丈夫豈鼠輩可脅耶遂被害沈屍海中前後議卹詔贈世爵廣東布政使參議廕一子入監嶠卹銀如例廕一子衛千總進學贈副將廕一子守備永昌贈署都司僉書廕一子衛千總天壽贈副將廕一子守備嶠江南無錫人永昌山西平陽人天壽陝西安塞人

金光 王焜等

金光浙江義烏人客登州過平南王尙可喜延之入幕尋隨可喜鎮粵至康熙十三年吳三桂叛兩粵多爲賊煽光以廣州之福山鎮商賈輻輳必有閒諜隱匿令廣州民陳士奇陰訪之得逆黨以告光旋獲僞將軍趙起龍等光自順治元年贊可喜幕幾三十年至是可喜上其功詔授鴻臚寺卿銜十五年二月可喜子之信謀逆夜半召光至私室脅與共事光不從備極酷刑光不爲動囚之絕食三日偪以刃光曰亂臣不可爲況賊子乎之信殺之榜其屍曰逆賊金光並沒其家十九年廣東撫臣以光事具題命察實給還家口歸其柩雍正六年詔祀光賢良祠令義烏令察其墓又有王焜者浙江會稽人隨兩廣總督金光祖軍營效用康熙十四年粵東告變委焜赴南雄接大兵卽隨鎮南將軍莽依圖督汛務十八年署宜山知縣時守將馬承烈之信黨也先經投誠至是復謀逆慮焜洩其謀禁密室十九年二月向焜索縣印抗不與賊怒殺焜及其弟一德於郡城之西關外詔贈焜按察司僉事廕一子入監

楊三知 孫世譽等

楊三知直隸良鄉人順治三年進士授山西榆次知縣榆次自經流賊殘破後閭

里蕭條三知撫遺黎以恩義安輯有法戶口日增五年大同鎮總兵姜瓖叛連陷州縣攻榆次三知勵吏民募鄉勇守城夜遣人斫賊營間有斬獲賊不退三知令城偃旗鼓示羸狀賊徑薄城攀堞欲登三知躍起麾衆亟發矢石斃賊甚衆賊憤甚益兵圍之相持踰六月守禦不懈會敬謹親王尼堪分兵來救賊遂敗走三知設保甲練屯聚復捐俸立社學置膳田以資膏火士民感之擢兵部主事累遷郎中康熙十一年擢按察司僉事分巡陝西神木道十三年冬入覲還至保德聞提督王輔臣叛附吳逆人情恟懼從者勸三知遲行勿渡河不聽疾馳還神木調兵實察知縣孫世譽忠直倚任之時輔臣布吳逆僞劄將弁多爲所誘分據城堡道路爲梗惟韓城知縣翟世琪嚴設守備與神木通聲援世譽鑲紅旗漢軍世琪山東益都人順治十六年進士關中並稱爲賢令者也叛黨朱龍犯神木三知率民兵卻之世譽益儲糗糧爲固守計柳溝營遊擊李師膺受僞劄鼓衆以闕餉譟世琪諭以朝廷威德衆誼呶不可制競前戕之並及其二子師膺連犯旁縣與龍合勢益熾龍復與神木守將孫崇雅潛通三知方登城守崇雅開門迎賊猝執三知於城上脅敕印不與擁之至署三知躍入井折左肱幾殞賊縋之出復甦三知度

不得死大罵幽之誘降日夜罵賊不絕遂遇害其妻妾及二女俱赴井死世譽亦抗節不屈賊羈之深室崇雅聞龍斬於陣輔臣乞降乃害世譽以滅口崇雅旋伏誅十五年八月贈三知光祿寺卿世譽布政司參議俱賜祭葬廕一子師膺降於大將軍圖海復從多羅貝勒察尼圖岳州敍招撫難民功授隨征湖廣總兵官二十一年正月御史孫必振劾師膺負恩背叛勢迫投誠在軍營並無剿賊績雖曾招撫難民不足贖倡亂之罪部議革師膺職

蕭震 張松齡等

蕭震福建侯官人順治九年進士任山西道監察御史丁父艱回籍康熙十三年逆藩耿精忠叛震謀討之事洩遇害妻林氏妾張氏媳鄭氏婢曾氏皆殉雍正四年督臣高其倬以狀聞詔入祀功臣廟林氏等建坊入節孝祠耿逆多誘致閩省紳士不屈而死者有張松齡等松齡莆田人順治十二年進士改庶吉士擢給事中尋轉四川參議時川省凋敝松齡加意撫綏流亡漸復後缺裁歸里值耿逆變迫以僞職不從羈數月終不屈死葉有挺壽寧人康熙九年進士耿逆叛避入南昌逾年由閒道歸省母賊知之迫以僞職潛走山中絕粒死施大晁福清人康熙

十二年進士聞變匿金芝山募壯士助大兵進討賊執之大晁嚼舌罵賊賊毆之嘔血數升死莆田舉人劉渭龍建寧舉人謝邦協南平舉人原任丹徒令鄒儀周皆不受僞職渭龍剪髮匿深山絕粒死邦協舉家避村落中逆黨以火攻之不出闔門遇害儀周爲耿逆所執不屈死光澤縣民毛錦生素有膽力賊躪其村邑當事飭爲練總導大兵剿賊賊設伏誘戰被害於雲際關清流縣生員李亭聞賊薄縣城隨邑令固守集鄉勇拒戰旋被執詈賊死其前後死於土寇者又有胡寶任福州千總駐永福康熙五年四月與土寇戰歿張化蛟任臨元營把總駐新平康熙八年亦以擊土寇陣亡先後議卹如例錦生亭詔並入祀昭忠祠

成國樞 王攀桂等

成國樞浙江會稽人父溥官參將陣亡國樞廕江南撫標守備遷提標遊擊康熙十三年耿精忠據福建叛遣僞將軍曾養性擾浙江土寇應之總督李之芳請濟師於江南國樞奉檄率千總王攀桂何鯉把總路魁胡威任豹援浙東時嵎縣土寇圍紹興府城知府許宏勳練鄉勇多方捍禦賊解去宏勳追至白米堰賊千餘據隘拒適國樞至左右夾擊賊大敗追至蒿壩斬獲甚衆旋偕參將洪起元破賊

於樊江進兵棗樹灣偵賊據嵯縣宏勳率步兵國樞率騎兵進剿離城數里賊迎拒宏勳設左右翼分其勢國樞馳之斬五十餘級賊棄城遁國樞遣攀桂等率兵追賊至上楊村擒十七人賊魁楊我玉遁遂復縣城宏勳以四鄉尙多賊砦而餘姚土賊據大嵐山聚衆萬餘賊恃以爲援故散而復聚宏勳乃自擣大嵐留國樞搜四鄉賊砦國樞率魁威豹等剿賊富順邨賊斷橋阻水爲固國樞由閒道進僞總兵楊四驅賊數千拒戰我兵奮擊斬賊百三十餘級會宏勳已破大嵐賊巢賊奔潰國樞令攀桂等列兵隘口賊逃至輒擒之紹興土寇悉平之芳疏稱國樞身先士卒屢立戰功其所轄員弁亦勇往敢戰上嘉之命事平議敘十月養性以賊數萬犯台州國樞自嵯踰山援台賊列營山麓衝破之賊退據水口國樞從上游渡戮賊百餘養性驅賊復至國樞擊敗之逐北十餘里賊從雲峯黃巖橋兩道夾圍乘高發礮石如雨我師以戰地狹箭不能施部下勸潰圍出國樞不可下馬短兵接賊來益衆國樞受數刃遂與攀桂鯉魁威豹均歿之芳疏請卹詔贈國樞參將卹銀四百兩廕子弟一人守備用攀桂鯉卹銀一百五十兩魁威豹卹銀一百兩各廕子弟一人衛千總用國樞子都官至福建廈門都司

嵇永仁

嵇永仁江蘇無錫人廩膳生閩浙總督范承謨之幕客也承謨事見專傳永仁策耿精忠將煽亂勸承謨早爲備乃議撥餉補兵安置逃弁興屯由並輕兵駐上游以備諸大吏多中賊餌撓之計不行賊尤銜之康熙十三年三月賊劫承謨幽別室脅永仁及其幕僚王龍光沈天成承謨族弟承譜降不從誘以官均忿罵繫獄三載志氣彌厲終不屈承謨在幽室聞之喜曰吾相知有素也十五年承謨被害永仁龍光天成承譜並見戕龍光浙江會稽人諸生有文名被執時賊授筆札令草安民檄不從天成江南華亭人繫獄時有聽鶻詩一卷永仁龍光相唱和有百苦吟見者哀其志賊脅承譜厲聲罵曰汝輩皆反賊吾寧死誓不從賊生四十七年承謨子時崇官廣東巡撫疏言前此福建撫臣楊熙爲嵇永仁等請贈銜部以生員無追贈例議寢但永仁等初無官守殉難死節仰祈特沛恩綸予以一命陪祀臣父祠以慰忠魂下部議生員嵇永仁王龍光追贈國子監助教沈天成范承譜雖庶民間散風烈可嘉應酌量追贈國子監學正並准入承謨專祠陪祀從之雍正二年特命入祀昭忠祠八年永仁妻楊氏守節撫孤欽旌建坊永仁子曾筠

建祠於無錫御書忠節流芳額以賜十一年十一月諭曰大學士嵇曾筠自簡任河道總督以來整理有方調度合宜朕念伊父之忠義伊母之節操雖已贈卹褒旌尙未膺一品封典今以特恩給予大學士應得封典以示優眷十二年楊氏卒諭曰嵇曾筠之母楊氏撫孤守節教子成名著加恩賜祭一壇賞銀千兩以爲喪事之用乾隆二年賜人倫坊表額孫璜官大學士御賜璜詩比其祖節於唐顏真卿杲卿云

張存 劉超鳳等

張存福建順昌人康熙十三年耿精忠據閩叛存糾義旅保元坑鄉精忠脅授總兵劄令率衆出江西存不從時和碩安親王岳樂駐師南昌存潛使赴軍前乞援並條機宜岳樂授存總兵劄令捍禦建昌邵武汀州等地且爲內應賊偵知急攻元坑元坑地平無險可恃存以忠義激衆屢敗賊賊恚甚遣其黨三路夾攻十五年九月元坑陷存被執死之時全閩煽動詔安營守備劉超鳳方召兵計守禦賊猝至偪降不屈自刎死南平教諭余光辰聞變忿激嘔而死賊分犯浙江時江南提督楊捷領兵赴浙有楊士祥者任鎮標中軍守備管軍餉頓兵仙霞嶺下賊突

至官兵戰潰士祥大呼馳擊死之又有開化生員鄭大來者賊犯開化城潰知縣崔華退保十六都大來募鄉勇獲賊諜數人立磔之賊棄城遁大來衛華入城賊旋招常山玉山諸寇萬餘謀夜襲城與官兵遇仙霞嶺時霾霧四塞大來單騎馳霧中手刃數十賊官兵隨擊賊少卻大來猝中槍死鄉勇鄭卓麟鄭振祥鄭有忻鄭毛鄭大卿鄭童戴甲毛徐義禮徐白古徐六十徐旦等十一人俱隨戰歿後精忠降其餘黨散竄山谷或海島結諸海賊爲寇十八年十月海賊千餘乘潮犯山陰楓亭赤塗埔時興化鎮標右營千總吳師貞帥防兵二百挺戈躍戰入賊重圍中礮死其子敦仁率十餘騎衝賊陣覓父屍亦死之是年衢州有賊黨犯處州大柘鄉右營都司張朝臣與金華協都司孫奇豹約約前後夾攻至期朝臣率兵獨進遇賊鏖戰自辰至巳後軍不至力竭死五十一年黃巖鎮標左營遊擊閻福玉出海巡哨遇賊牛頭山連戰數日中礮死後二年黃巖鎮標右營把總許文爵巡海遇賊蕭利玉等於調幫洋擊賊陣歿先後議卹詔贈存右都督廕守備福玉贈副將廕守備餘卹如例超鳳河南商邱人順治十八年武進士光辰福建福清舉人土祥江南崑山人師貞浙江山陰人朝臣直隸山海衛人福玉山東安邱人文爵

浙江人

臧世龍 陳豹等

臧世龍鑲白旗漢軍任安徽撫標左營守備康熙十三年八月江西饒州土賊連
閩寇犯徽州祁門等縣世龍奉檄與右營把總陳豹率兵二百守祁門比至賊已
壓境世龍禦之渚口賊少卻會城守千總趙宗鼎陰通賊遣百總朱龍夜入賊營
漏城內虛實并遣兵四十人導之攻城世龍督諸將分兵守宗鼎稱疾不起於是
豹守東門世龍守西門三日賊愈衆世龍未悉宗鼎奸遂與諸將謀以賊衆我寡
不出奇擊之城慮不可保部署諸將出北門躍馬揮戈自辰至午殺賊甚多宗鼎
糾逆黨樹阜幟城上朱龍在賊隊中指世龍所在圍之世龍豹戰愈力世龍被數
創猶射殺賊城上礮發世龍豹俱中礮墜陷田中爲朱龍所殺城破良禾司巡檢
張行健拔佩刀戰被執誘降不屈賊斷其兩臂罵甚厲內坎中以刃割其腹行健
呼曰我死必爲厲鬼以滅汝遂死家屬咸遇害弓兵方茂胡振亦同殉事聞詔世
龍贈遊擊廕衛千總豹廕衛千總行健贈經歷餘卹如例豹山東濰縣人行健浙

江海鹽人

忠

義

傳

卷六十五

十七

二

噶林六十等

噶林滿洲鑲藍旗人姓佟佳康熙三十五年以右衛護軍參領從撫遠大將軍費揚古出西路征噶勒丹抵圖拉時噶勒丹踞巴顏烏闌聞大兵至遁歸特呼勒洛費揚古遣兵邀擊列陣昭莫多東倚山西沿河分三隊以待右衛兵在西隊賊衆大至三隊奮勇合擊噶林率右衛兵爭先陷陣力戰死右衛護軍校六十矢貫顙門傷重死右衛前鋒薩達喀哈爾扣鄂佛和衆神保法寶色楞敦柱雅隆阿尼滿防守銜花色護軍校貝和諾披甲來色范朝儼彰柱李尙林雅爾吉代同時死議卹詔贈噶林六十俱雲騎尉噶林子納林襲六十子富海襲薩達喀哈爾扣俱贈五品官鄂佛和贈六品官衆神保法寶色楞敦柱雅隆阿尼滿貝和諾俱贈七品官來色范朝儼彰柱李尙林雅爾吉代俱贈八品官薩達喀子干柱鄂佛和子舒魯泰衆神保子伯爾屯法寶子倭和雅隆阿子滿成貝和諾子達色來色子構色范朝儼子希選彰柱子額勒木圖雅爾吉代子索什米俱如所贈官食俸六十滿洲正黃旗人姓富察薩達喀滿洲鑲黃旗人哈爾扣滿洲正白旗人鄂佛和滿洲正黃旗人衆神保法寶俱滿洲鑲白旗人衆神保姓納喇色楞敦柱蒙古鑲藍旗

人姓齊默特雅隆阿滿洲鑲黃旗人姓瓜勒佳尼滿滿洲正白旗人花色蒙古鑲黃旗人貝和諾滿洲鑲白旗人姓崇果來色滿洲鑲紅旗人姓黃佳范朝儼正黃旗漢軍彰柱蒙古鑲白旗人姓車莫忒李尙林鑲藍旗漢軍雅爾吉代蒙古正黃旗人姓洪郭爾哈爾扣色楞敦柱尼滿花色李尙林襲無考

姬登第 王大勳等

姬登第直隸邢臺人由行伍洊陞陝西寧夏廣武營遊擊雍正元年青海羅卜藏丹津叛莊浪謝勒蘇番據卓子山碁子山作亂西寧加爾多寺諸番應之二年四川提督岳鍾琪往剿登第與紅德城守遊擊王大勳等從正月逆番攻石頭溝大勳率所部奮擊中流石死時西寧東北郭隆寺喇嘛與賊通大兵毀其寺戰死者督標左營千總李郁三月大兵至柴達木羅卜藏丹津以二百餘人遁四月鍾琪率諸將由西寧分路進剿卓子山等處興漢鎮守備張先志攻加爾多寺涼州鎮西把截堡守備王伏金攻碁子山肅州鎮標守備胡上才巡關西塘新城營守備李國祥駐兵新城堡登第由西寧黃勝關擊賊於碁子山大捷乘勝至卓子山深入戰歿先志至加爾多寺道險不可入率麾下十五人偵賊壘林中伏賊突出矢

盡力戰死伏金上才亦遇賊陣亡逆番攻新城堡國祥死之方登第戰卓子山時千總傅瑾把總王谷弼從登第死瑾谷弼死戰得脫後瑾以攻石門寺死谷弼以擊逆番班馬呀等死同攻加爾多寺死者花馬池把總楊之連同攻碁子山死者莊浪營把總陳昌同遇賊於關西等處戰死者駐防布隆吉爾千總施進祿把總賀奉金又有三川營千總任斌以擊賊死於擺羊峒事平議卹登第廕守備先志廕衛千總餘卹如例大勳甘肅寧夏人郁先志俱陝西長安人先志康熙四十七年武舉人伏金陝西咸寧人上才直隸易州人國祥陝西咸陽人瑾亦陝西人谷弼之連俱甘肅寧夏人昌甘肅涼州人進祿甘肅肅州直隸州人奉金甘肅涼州人斌甘肅西寧人

冷格 邦烏禮等

冷格滿洲正黃旗人姓多爾袞官頭等侍衛雍正八年詔岳鍾琪爲奮威大將軍由西路進剿準噶爾冷格從征十二月在西寧口外噶斯坐卡賊來犯力戰陣亡同死者驍騎校邦烏禮十年正月剿賊於塔爾納沁戰死者驍騎校部委參領隴洲八品官部委參領札蘭泰先是筆帖式多爾集由松潘口出黃勝關剿熱當十

二部落有功乘勝深入被執不屈死護軍校叻卓拜擊賊於鄭海堡死皆隸岳鍾琪軍事在元年其八年從傅爾丹由北路進剿準噶爾者雲騎尉二等侍衛都斯噶爾護軍校署參領色楞護軍校部委閒散章京瑚拉驍騎校八十一皆以九年戰死於哈爾巴烏蘭驍騎校車克爾戰死於布彥圖喀倫十年賊犯察罕度爾大兵追至厄爾得尼昭殺賊萬餘陣亡者領催部委防禦瑪爾圖護衛巴圖驍騎校巴尼追賊至克爾森齊老死者參領巴忒瑪拉什布彥圖戰烏遜珠爾死者土默特管旗章京索諾木土默特副總管鎮守歸化城鄂欽土默特佐領察漢扣科爾沁護衛古里格科爾沁佐領委署參領顏扎布科爾沁佐領達穆巴議卹冷格廢雲騎尉子納齊額襲邦烏禮隴洲扎蘭泰俱贈雲騎尉襲俱無考多爾集贈主事子常泰襲都斯噶爾贈騎都尉色楞瑚拉俱贈雲騎尉襲俱無考八十一贈雲騎尉子額爾德布圖襲巴圖巴尼巴忒瑪拉什布彥圖俱贈雲騎尉索諾木贈騎都尉鄂欽察漢扣古里格顏扎布達穆巴俱贈雲騎尉襲俱無考邦烏禮滿洲鑲黃旗人隴洲滿洲鑲紅旗人扎蘭泰旗無考多爾集蒙古鑲紅旗人姓哈卜齊特叻卓拜蒙古鑲黃旗人都斯噶爾蒙古正藍旗人色楞蒙古正黃旗人八十一蒙古

忠

義

傳 卷六十五

十九

二

正紅旗人姓巴林瑚拉蒙古正藍旗人姓喀爾綽特車克爾滿洲鑲藍旗人瑪爾圖滿洲鑲紅旗人叻卓拜車克爾瑪爾圖贈襲俱無考巴圖等十一人俱外藩蒙古旗無考

劉崐 馬秉倫等

劉崐四川保寧人由武舉累陞署東烏鎮都司僉書管左營遊擊事雍正八年八月烏蒙夷祿萬福結連東川祿良珍爲逆總兵劉起元失撫禦策賊遂至城下崐率兵敗之於河堡戶鐵鑪山等處賊復大至崐督師血戰力竭死妻張氏聞變手刃二女與妾吳氏俱自殺詔贈崐遊擊廕守備妻妾二女並入祀節孝祠與崐同死者署東烏鎮守備管遊擊事馬秉倫右營把總周世美皆重傷死起元尋潰圍出奔東川城遂陷崐之與賊戰河堡戶也從者右營守備楊天階戰鐵鑪山也從者中營千總李發早又有左營把總張必宏在城守禦鎮雄營把總馮志英赴鎮考驗皆隨崐有功後護起元至荔枝河天階發早必宏志英俱戰死駐防魯甸東烏千總邵士奇與魯甸外委把總王國卿赴援被圍跳巖死九月賊分掠永善殺阿興土千戶安永長十月大軍復烏蒙安籠鎮標遊擊王弼把總鄧忠俱戰死於

高魯祿逆不靖之先茶山賊麻布朋叛普洱把總王朝選死之事在五年九月也六年二月有米貼陸氏之亂曲尋鎮副將郭壽域率把總張文俊往捕賊乘夜劫營壽域文俊皆遇害議卹秉倫贈都司僉書廕守備世美千總廕衛千總天階都司僉書發早必宏志英士奇國卿俱各加贈一級廕衛千總餘卹如例秉倫甘肅寧夏人天階雲南開化人發早雲南昆明人必宏貴州威寧人志英雲南昆明人士奇陝西人國卿雲南尋甸人永長雲南永善人弼山西太平人忠貴州安順人朝選湖廣人壽域甘肅寧夏人文俊雲南羅平人世美籍無考

蘇世爵 劉雄等

蘇世爵雲南昆明人任督標千總雍正六年六月四川雷波土司楊明義結米貼土婦陸氏爲逆陸氏就擒提督王廷桂檄調諸營兵剿雷波世爵隨鶴麗鎮總兵張耀祖參將哈元生往剿九月駐軍阿路馬同在軍中者尋霑營把總劉雄督標把總張應舉把總馬玉時四山逆蠻數千並來劫營弩箭如雨官軍奮勇衝擊殺賊無算世爵雄應舉玉皆重傷死八年西鑪口外瞻對等處賊番阿宗邦句結擦馬阿旺諸番據險爲逆八月四川提督憲德檄諸將由甘攷阿旺進剿永寧協標

左營千總馬騰剿賊至瞻對茹對江日暮賊圍之數重騰受重傷突圍出九月攻屋堵豹子寨騰裹創鏖戰賊於高巖築敵樓槍箭雨下官兵鼓勇並進賊四出衝突官兵殺賊百餘人投巖落澗死者甚衆騰與外委馬俊黔彭營外委把總楊顯若俱陣亡九年南川土賊起外委千總李洪宗隨遊擊馬守仁至大碛腦洪宗戰歿先後事聞並議卹如例雄應舉俱雲南昆明人玉貴州南籠人騰四川敘永人顯若四川彭水人俊洪宗籍無考

張玉 徐學聖等

張玉山西人由行伍累官臺灣南路營署守備雍正九年冬臺灣北路大甲溪土番林武力倡亂次年三月南路逆匪吳福生亦乘閒起事燒舊社及石井汛由淡水溪攻埤頭玉從提督王郡分三路夾攻戰於洋田玉與外委千總徐學聖外委把總鄭光宏同在中路敗其前鋒賊復集自辰至未戰數合賊潰竄生擒賊黨蕭田等八人梟營門越日福生等三十餘人亦就擒南路遂平洋田之戰中路實先登故玉與學聖光宏及兵丁陳得添等七人俱遇伏陣亡官兵旋渡大甲溪進剿北路追殺抵生番悠吾界賊遁入南日內山把總張養率兵追之峭壁峻絕樵徑

僅一綫攀援而登礮聲震山谷賊負創走養亦陣歿官兵擣賊巢北路亦平是役也右營守備彭捷北路協標外委把總劉祥中營把總葉龍俱奉檄會剿受傷死先後事聞詔贈玉守備廕衛千總學聖光宏養各卹銀如例養廕一子以外委千把總拔補龍廕一子監生餘卹如例光宏福建人捷泉州南安人祥龍俱福建人學聖養籍俱無考

李文仲 王承文等

李文仲四川巴縣人任貴州安籠鎮中營守備雍正六年廣西西隆州八達寨獯苗顏光色等倡亂右江鎮總兵段宗岳以本鎮兵單咨請安籠鎮並廣南兵協剿七月文仲馳赴八達寨營於弄高之西山泐時廣南兵尙未到盛署士卒多疾與右江鎮兵分攻賊寨文仲攻礮臺自卯至未抵賊寨與盤江營把總江承文合奮勇督戰以待諸路兵齊集奪寨弄高道險籌密諸路兵接應不至賊見文仲兵少圍之文仲力戰與承文俱死先文仲承文死者思恩協左營把總李光玉以接糧遇賊戰死右江鎮左營千總羅文光剿賊至八達寨殺數十人創重死事在六月廣西提標後營遊擊趙君良亦以奪礮臺搗石傷胸死事在九月至七年太平府

屬之鄧橫賊蠻爲亂雲貴廣西總督鄂爾泰檄左江鎮總兵蔡成貴討平之戰死者把總華乾外委把總李世雄先後事聞詔文仲贈都司僉書廕衛千總承文乾俱廕衛千總餘卹如例承文貴州南籠人君良陝西人餘籍無考

倪國正 吳嗣昌等

倪國正四川成都人康熙五十六年舉人任廣西義寧知縣乾隆六年四月土賊黃順潛入楚粵毗連之雙江結逆苗吳金銀等爲亂國正誘獲黃順置之獄遂率兵往雙江先召苗人諭以禍福賊不聽羈之國正怒罵賊碎其齒後聞大兵將至遂梃殺之棄屍龍潭事聞詔贈按察司僉事廕一子入監同時文職隨往者臨桂縣縣丞吳嗣昌下雷州吏目魯懋臨桂縣瀘田司巡檢魯器武職隨往者融懷營外委千總潘貴賊旣羈國正並偪嗣昌等諭守城者釋黃順嗣昌等不從賊悉梃殺之投尸於河於是提督譚行義率各路官軍會剿克賊巢提標千總馮選外委把總廖定邦平樂協外委把總朱國英石得勝梧州協外委把總謝名立俱戰歿事平議卹嗣昌贈衛經歷懋府知事器縣主簿各廕一子入監貴選廕把總定邦監生國英得勝名立俱把總嗣昌正紅旗漢軍拔貢生懋順天宛平籍浙江山陰

人器順天宛平人貴廣西永寧人選定邦俱廣西馬平人國英得勝俱廣西平樂人名立福建晉江人

策塔爾 常明等

策塔爾蒙古鑲黃旗人姓博速特由官學生考取筆帖式擢理藩院主事乾隆十五年隨都統傅清左都御史拉布敦駐西藏初西藏郡王頗羅鼐卒子珠爾默特那木扎勒襲封事在十二年至是擅調兵赴薩海運礮陰與所屬謀逆時四川雅州府通判常明以總督策楞檄赴藏辦餉探知逆謀密稟傅清等傅清拉布敦奏請相機擒治上密諭策楞備兵援剿珠爾默特那木扎勒通準噶爾阻我郵置軍書不達傅清等見叛跡日著決計翦除十月十三日以諭旨將至召至通司岡公署接旨甫登樓傅清拉布敦數其罪拔佩刀誅之並其從者數人逆黨羅卜藏扎什等縱火圍公署傅清被創自盡拉布敦遇害詳大臣傳策塔爾格鬪力不支亦自盡常明聞警督兵民護餉賊矢石並發身被數創越日尋歿事聞議卹奉旨策塔爾常明俱廕雲騎尉策塔爾子坦修襲常明子文善襲常明鑲藍旗漢軍

傅澤布 福太等

忠

義

傳

卷六十五

二十二

二

傅澤布滿洲鑲白旗人姓瓜勒佳雍正元年舉人由筆帖式累官戶部郎中十三年陞翰林院侍講學士乾隆十九年隨征北路軍營進剿烏梁海二十年五月隨定北將軍班第率師討平準噶爾八月降酋阿睦爾撒納逆黨克什木巴朗等糾喇嘛回人作亂班第陷賊中由固勒扎赴空格斯轉戰至烏蘭庫圖勒賊蜂集力不支自盡傅澤布從之死班第詳大臣傳是役同死者刑部郎中福太兵部郎中德克濟理藩院員外郎伊星阿太僕寺主事和達色兵部筆帖式委署主事永太內閣中書多永武詹事府筆帖式福祥工部筆帖式西爾格事聞議卹詔各廕雲騎尉傅澤布子富蘭襲福太子伊里哈襲德克濟子達貴襲伊星阿子策巴襲和達色子官岱襲永太弟永安襲多永武子成明襲福祥子噶爾秉阿西襲爾格子寶奈襲德克濟滿洲鑲黃旗人姓葉穆伊星阿蒙古正黃旗人姓額穆特立和達色滿洲正藍旗人姓富察永太多永武俱滿洲鑲紅旗人永太姓納喇多永武姓烏爾達福祥滿洲正紅旗人姓伊爾存覺羅福太滿洲鑲藍旗人西爾格滿洲正藍旗人姓俱無考

布英克 五格爾等

布英克滿洲正黃旗人姓那拉官前鋒校署章京乾隆二十一年隨副都統阿敏道出師伊犁回酋布拉呢敦霍集占有異志阿敏道往庫車城諭之入城被羈布英克與署驍騎校五格爾魯普薩翰莫克庫獎賞藍翎達什奇爾俱從二十二年阿敏道謀脫歸不克死之布英克等均被戕是年定邊將軍成袞扎布剿沙拉斯瑪唬斯賊詭就撫旋叛去副二等台吉沙克都爾扎布力戰歿於陣隨都統三格剿賊至博羅齊戰歿者二等台吉達瓦策凌獎賞藍翎署驍騎校德凌册在阿爾呼特西伯剿賊死者頭等台吉巴克扎布又有署章京扎格達剿烏梁海署驍騎校柰雅圖剿哈拉和落和爾沁追賊於塔爾巴哈台鄂林查剿賊於哈什俱力戰陣亡獎賞藍翎諾海剿嗎哈沁死於烏魯木齊二十三年又有回部伯克托克托隨靖逆將軍雅爾哈善剿逆回被害於庫車城先後事聞議卹奉旨布英克廕雲騎尉子費凌阿襲沙克都爾扎布達瓦策凌俱追贈頭等台吉巴克扎布著追封公爵俱令其子承襲達什奇爾扎格達和爾沁俱廕雲騎尉襲無考托克托伯克贈散秩大臣職銜子色的克襲餘卹如例五格爾察哈爾鑲紅旗人姓杭吉阿莫克庫索倫正紅旗人姓圖克坦柰雅圖索倫鑲黃旗人姓敖拉德凌册索倫正紅

旗人姓珠車爾和爾沁察哈爾正紅旗人姓圖克郭魯普薩翰察哈爾正紅旗人姓齊扎布襲俱無考達什奇爾打牲鑲黃旗人沙克都爾扎布察哈爾正白旗人姓襲俱無考沙克都爾扎布喀爾喀人達瓦策凌蒙古鑲白旗人巴克扎布喀爾喀人扎格達蒙古人諾海察哈爾人旗姓襲俱無考

胡邦佑 許景淹等

胡邦佑山東昌邑人父有亮官湖廣衡州協副將邦佑由廕生於乾隆八年授盛京工部主事是年裁盛京各部漢缺補刑部奉天司主事十三年選授福建龍巖州知州引見奉特旨以知府用授浙江寧波府知府二十年丁母憂二十三年服闋補貴州貴陽府知府二十七年以承修南明河無效革職三十年南巡迎鑾奉旨以同知用三十一年選授雲南永北府同知三十三年大軍征緬匪雲貴總督將軍公明瑞委辦糧餉時參贊大臣珠魯訥駐兵木邦邦佑以檄赴明瑞大營經其地三十三年正月初七日賊突至十六日同廣南府經歷許景淹俱隨珠魯訥擊賊以賊衆兵少被圍邦佑景淹埋餉銀景淹遣家人賈俊齎印信馳報大營十八日珠魯訥自盡十九日城陷邦佑景淹死之廣南營效力武舉方富戰歿事聞

議卹奉旨邦佑加贈道銜子瑀廕知縣景淹加贈鑾儀衛經歷廕一子入監讀書餘卹如例景淹直隸饒陽人富雲南寶寧人

何道深 李應芳等

何道深山西靈石人乾隆二十五年武進士授三等侍衛洊擢貴州提標右營遊擊三十二年十一月隨將軍公明瑞征緬甸由宛頂木邦渡打疊江過錫箔至蒲卡西敗賊伏兵是役死者雲南鶴麗鎮標千總李應芳貴州威寧鎮左營把總李永春大兵進抵蠻結賊立十六寨豎木柵列象陣力拒道深冒矢石攀柵先登火槍中右額紀功第一戰死者雲南提標後營遊擊邵應邨貴州定廣協右營守備程文進貴州長寨營把總文朝元提標外委李應選威寧鎮右營外委萬國榮維西協外委陳學孔大定協把總高欲平外委吳奇四川督標中營外委趙坤大兵分剿蠻化村貴州定廣協右營千總田義力戰陣歿川北鎮中營把總廖雲腦中石傷尋歿十二月明瑞督兵由天生橋河上流取道猛籠趨猛密擊賊於小猛育道深爲十二營前鋒自平明戰至日中身被數創力竭陣歿四川提標中營守備馬定坤永寧營外委周元儒同受傷並歿三十三年正月賊復聚蠻結臨元鎮左

營都司魏嶸陣歿安籠鎮中營守備馬汝良擊賊葫蘆口貴州撫標左營把總宋建勳擊賊大山南坡貴州右定協把總徐世清擊賊虎佈俱陣歿二月鶴麗鎮把總鄭維樹擊賊瓊乍里板貴州提標外委唐玉春擊賊黑水河俱陣歿丹江營外委劉有名齎摺至蠻結軍營遇賊死之安籠鎮右營千總候陞守備馬子健陷賊不屈自盡先後事聞議卹何道深加贈一級廕守備子膺綬襲應芳加贈一級廕把總子林襲永春加贈一級廕把總弟永貴襲應邨加贈一級廕守備子之保襲文進加贈一級廕衛千總朝元欲平義雲各加贈一級廕把總定坤嶸俱加贈一級廕衛千總嶸子汝惇襲汝良廕把總建勳世清維樹各加贈一級廕把總子健廕衛千總餘卹如例應芳雲南鶴慶人永春貴州威寧人應邨廣東電白人乾隆二十五年武進士二等侍衛文進貴州安順人朝元貴州大定人應選貴州安順人國榮貴州威寧人學孔雲南劍川人欲平奇俱貴州大定人坤四川華陽人義貴州遵義人雲四川閬中人定坤陝西咸寧人元儒四川越巂人嶸雲南昆明人汝良江南松江人建勳貴州貴陽人世清貴州黔西人維樹雲南鶴慶人玉春貴州安順人有名貴州施秉人子健雲南鶴慶人

楊先春 金國保等

楊先春四川成都人乾隆十年以武進士分發貴州十二年大兵征金川調貴州兵協剿先春以提標候補守備同提標前營守備金國保等俱從征十二月攻木耳金岡之左山梁撫標右營把總李如桂戰歿攻普沾碉卡提標左營把總楊自旺戰歿十三年定廣協標左營外委把總劉斌李士美從攻色底之右山梁卡撒雙碉斌於五月士美於六月皆歿於陣於是先春國保相繼攻之至七月先春陣亡國保傷亡是月攻昔嶺之三層碉死者鎮標右營外委千總趙文煥八月攻巴朗尾碉死者遵義協標左營千總卜熊攻阿利山死者黃平營外委千總王良尋霑營外委把總袁安提標中營把總張祥十二月攻右山梁巴朗平碉死者凱里營外委把總王大任議卹詔贈先春國保署都司僉書廕衛千總如桂自旺俱贈千總廕把總斌士美文煥俱廕把總熊贈署守備廕把總良安俱廕把總祥贈千總廕把總大任廕把總國保甘肅寧夏人如桂貴州修文人自旺陝西鳳翔人斌士美俱貴州定番人文煥貴州黔西人熊貴州普定武舉人良貴州黃平人安湖廣公安人祥貴州貴筑人大任貴州定番人

國興 韓世貴等

國興貴州大定人乾隆三十二年由行伍隨征緬甸三十三年補水城營外委尋授平遠協左營把總三十五年遷大定協左營千總三十六年隨威寧鎮總兵王萬邦征金川十二月大軍攻克巴朗拉將軍溫福奏貴州綠營員弁出力奉諭國興著賞戴藍翎三十七年正月參贊大臣五岱攻資哩之北山頂檄興帶勁兵爲前隊遇賊擊走之四月隨攻墨壘溝甲爾木擢雲南永北營守備五月攻東瑪大碉官兵設木卡拒賊興帶兵三百守卡賊衆乘夜來犯興滅火待之賊近卡槍礮齊發賊大敗殲擒無算諭曰國興靜俟賊番來犯猝起剿擊殲戮多人出力奮勉著賞換花翎旋擢貴州黔西協左營都司三十八年擢荔波營遊擊三十九年十月將軍阿桂督兵攻勒烏圍凱立葉諸寨興屢樹戰功四十年正月擢朗洞營參將賞圖多布巴圖魯名號四月會攻木思工噶克興用斧斫開木城衆擁入剿殺甚多克其碉奉諭國興著加一等卽行陞用賊悉衆來奪木思工噶克碉興督兵射賊賊散而復聚者七俱經官兵剿退國興負重傷越日尋歿諭圖形紫光閣列次五十功臣中命儒臣擬贊賜祭葬加贈二級廕守備弟璵襲是役同死者四

州重慶鎮標中營守備韓世貴貴州平越營把總王全鎮遠鎮標中營把總王彪古州鎮標左營外委袁成遠都勻協外委徐成貴文玉美周連甘肅涼州鎮標前營外委張全玉四川疊溪營外委朱國相議卹各如例世貴加贈一級廕千總全彪俱加贈一級廕把總襲俱無考世貴四川松潘人全貴州遵義人彪貴州安順人成遠籍無考成貴貴州普定人玉美連俱貴州都勻人全玉甘肅武威人國相四川茂州人

扎拉芬 拉托爾凱等

扎拉芬滿洲正藍旗人姓烏朗哈特乾隆二十年由健銳營前鋒出征回部凡葉爾羌喀什噶爾阿勒楚爾伊西洱庫爾淖爾諸戰皆與焉前後共得功牌十一歷任空銜藍翎長護軍校委署護軍參領副護軍參領三十三年揀發湖南以參將用三十四年補桂陽營參將三十七年陞長沙協副將八月命赴金川南路軍營三十八年以軍營出力擢永州鎮總兵三十九年正月領兵取拉科奮勇擊賊中槍傷尋歿三月前鋒拉托爾凱進攻喀利歿於陣七月賊至布達什挪參領觀新保驍騎校特特依護軍校納達齊擊之均戰歿十一月賊復擾回郭洛藍翎長博

崇烏死之先後事聞各賞卹如例恩蔭扎拉芬爲都司拉托爾凱觀新保特特依納達齊博崇烏爲雲騎尉扎拉芬子哈凌阿襲納達齊子烏爾袞布襲博崇烏弟圖經阿襲餘襲無考拉托爾凱滿洲鑲藍旗人姓達古多爾新特特依呼倫貝爾正藍旗人姓赫爾拉特納達齊滿洲正黃旗人姓赫舍里博崇烏滿洲正紅旗人姓納喇觀新保籍無考

趙文哲 王日杏等

趙文哲江蘇上海人由廩生於乾隆二十七年南巡召試賜舉人授內閣中書在軍機章京上行走三十三年以原任兩淮運使盧見曾查鈔案文哲通信寄頓革職時大軍征緬甸署雲南總督阿桂奏請帶往軍營三十五年經略大學士公傅恆以文哲遇事奮勉奏復原職三十六年隨將軍溫福征金川三十七年擢戶部主事三十八年本果木師潰死之同時被害者刑部主事王日杏新繁縣知縣徐瓚鄴都縣知縣楊夢槎合州吏目羅載堂其在各臺站被害者潼川府通判汪時漢州知州徐諗內江縣知縣許椿大竹縣知縣程蔭桂秀山縣巡檢郭良相納谿縣典史許濟其沿途被害者候補從四品王如玉候補知縣孫維龍張世永布政

司照磨倪鵬候補縣丞況霖秀山縣典史周國衡事聞議卹文哲恩贈光祿寺少卿長子秉淵經大學士舒赫德奏准以內閣中書用歷陞四川成都府知府嘉慶七年賞道銜次子秉沖見任通政使南書房行走日杏贈光祿寺少卿如玉贈太僕寺少卿瓚夢槎時諡椿蔭桂維龍世永俱贈道銜鵬霖俱贈鑾儀衛經歷載堂良相俱贈府知事濟國衡俱贈主簿日杏子光顯瓚子日簪夢槎弟乘槎時子琳椿子煌蔭桂子煥如玉子榮葵諡子方瑞世永子德標俱廕知縣良相弟良俊鵬子廷棟霖子炳載堂子啟元俱廕主簿濟子廷梓廕吏目餘廕無考日杏江蘇無錫人瓚江蘇陽湖人夢槎江蘇金匱人載堂順天宛平人時浙江錢塘人諡湖北黃岡人椿浙江嘉善人蔭桂浙江仁和人良相廣西臨桂人濟順天東安人如玉山西靈石人維龍順天宛平人世永陝西渭南人鵬直隸臨榆人霖浙江仁和人國衡順天寧河人

薛琮 張清士等

薛琮陝西咸寧人河南南陽鎮總兵翼鳳子乾隆十六年由廕生效力巡捕營期滿授四川達州營守備歷南坪營都司峨邊營游擊三十六年擢漳臘營參將八

月大學士四川總督阿爾泰檄征金川琮帶兵克納頂邊谷諸碉寨十二月定邊右副將軍溫福督兵攻巴朗拉琮奮勇出力奉諭交部從優議敘會攻卡了獲喇嘛等寨遂由東面山根沿河直取卡了克之又乘勝奪東北山梁通甲木賊巢三十七年二月攻阿仰之東山復由甲木噶爾金後山繞道取墨壘溝占木城四石卡二十一斃賊四十六四月攻墨壘溝琮督兵直進斃賊二百餘燬木柵十餘奪碉七十餘賊悉力死拒碉寨林立琮奮力仰攻被槍傷歿於陣同死者四川建昌鎮標右營都司張清士平番營都司陳定國阜和營守備虎成林督標左營千總王國英建昌鎮標左營千總魏以賢嘉順營千總劉嵩貴州黔西協左營千總王天池畢赤營千總顏登第水城營千總蘇玉貴四川峨邊營把總黃安國會川營把總陳玉龍劉千嘉順營把總劉崑龍靖遠營把總謝在洪永定協把總喻萬成貴州威寧鎮標左營把總任公望右營把總趙維月陳陞黔西協左營把總楊宗貴平遠協右營把總周啟仁四川建昌鎮左營外委鄭九品右營外委董玉林貴州威寧鎮右營外委陳英平遠協左營外委熊應林大定協右營外委姚世俊事聞諭交部從優議卹又諭曰薛琮自入軍營甚屬出力前於進攻墨壘溝效命捐

軀甚屬可憫著加恩照副將銜議卹並著查明薛琮如有子嗣卽行送部引見部議上奉旨琮加贈二級嗣子國棟廕守備清士定國成林俱廕千總國英以賢嵩天池登第玉貴安國玉龍千崑龍在洪萬成公望維月陞宗貴啟仁俱廕把總餘卹如例清士直隸無極人乾隆二十六年武進士藍翎侍衛定國四川清溪人成林四川華陽人國英四川成都人以賢四川西昌人嵩陝西漢陰人天池貴州黔西人登第貴州威寧人玉貴貴州畢節人安國四川華陽人玉龍千俱四川西昌人崑龍四川冕寧人在洪四川華陽人萬成四川西昌人公望雲南昆明人維月貴州南籠人陞貴州平遠人宗貴貴州大定人啟仁貴州貴定人九品玉林俱四川西昌人英貴州普定人應林世俊俱貴州大定人

陳聖矩 次子理 錢國佐等

陳聖矩山西太谷人乾隆四年武進士十九年選湖廣提標左營守備累陞四川黎雅營游擊三十二年隨征緬甸因在事有功加一級回任三十六年隨征金川九月攻甲金達有戰功三十八年帶兵五十駐守馬爾底六月賊衆奄至聖矩被圍度勢不能支乃盡焚火藥糧草偕次子理躍入烈燄死同時陣亡者底木達則

四川重慶鎮中營游擊錢國佐八角礮則四川會鹽營守備王汝衡科多橋則陝西興漢鎮左營把總李承本大壩溝則貴州清江協右營把總楊通陝西提標前營千總年大銀昔嶺則直隸清江協左營外委李永慶達爾圖則貴州長壩營外委李連元事聞議卹聖矩加贈一級與國佐俱廕守備汝衡廕千總餘俱把總聖矩孫德文襲國佐子元勳襲汝衡子懿襲承本子懷勇襲餘襲無考國佐雲南南寧人乾隆十年武進士由藍翎侍衛授貴州荔波營守備二十年陞陝西延綏營都司二十八年陞四川重慶鎮中營游擊汝衡四川成都人承本陝西興安人通貴州普定人大銀陝西長安人永慶直隸南宮人連元貴州畢節人

滕家瓚 族弟家泰 施錦等

滕家瓚湖南麻陽人由生員捐布政司理問職銜乾隆六十年正月乾州逆苗滋事家瓚居高村偪近賊燄同兄監生家瑞弟武生家瑤招集鄉勇三十餘名捐貲給糧設卡堵禦有功經湖廣總督福寧奏聞奉旨賜八品職官家瓚自正月至四月共打仗十八次殺賊八十餘名賊恨之專攻高村入武生滕家泰宅索家瓚所在家泰挺身頂認意圖保全一村賊遂磔家泰殺家丁九口九月家瓚禦賊新寨

殺賊二旋被刃傷歿於陣先是二月平頭司巡檢施錦以逆苗突至率鄉勇抵禦於石灰窯力戰陣亡閏二月生員王廷槐以投效軍營於亭子關擊賊陣亡五月監生吳開宗以投效軍營於大烏草河擊賊陣亡先後事聞議襲家瓚錦廕雲騎尉襲次完時俱給恩騎尉世襲罔替家瓚子國興襲錦襲無考廷槐開宗卹如例家泰奉旨以武生能知大義致遭慘害實爲可憫著查明伊子年歲奏明賞給官職旋奉旨賞其子國祥五品官職願就文武聽其自便家泰湖南麻陽人錦江蘇元和人廷槐湖南鳳凰廳人開宗四川秀山人

王一魁 饒德豐等

王一魁湖南乾州人乾隆三十四年二月由行伍拔補湖南鎮筵鎮標中營外委六月拔左營把總三十五年擢右營千總三十七年隨征金川敘功三十九年陞湖廣督標右營守備四十六年陞湖北蘄州營都司五十二年陞山東高唐營遊擊五十七年署山東濟南城守營參將是年因失察逃犯降三級以守備用五十八年銓補廣東肇慶協守備五十九年告病回籍六十年正月黔楚逆苗滋事一魁督率家丁隨總兵袁敏悉力堵禦賊陷乾州一魁被戕同時原任湖北荊門州

學正饒德豐在籍防堵罵賊遇害是年六月賊擾巖門湖南邵陽縣里田司巡檢方相袞以迎催糧餉遇害先是賊擾秀尚湖南永綏協右營額外外委杜進陣亡事聞議卹一魁德豐相袞俱廕雲騎尉世職進卹如例一魁子芳壽襲德豐子自倣襲相袞弟相宸襲德豐湖南乾州人乾隆三十七年由廩貢生選授湖南慈利縣訓導五十七年推陞本職相袞安徽桐人由監生捐從九品於乾隆四十年揀發湖北試用四十三年改撥湖南五十二年三月補本職進湖南永綏人

朱錦慶 王鳳翔等

朱錦慶湖南武陵人乾隆三十五年五月由行伍拔補湖廣提標中營外委十一月陞本標中營把總三十七年隨征金川奮勇殺賊受傷四十年七月陞本標左營千總五十二年三月陞湖北德安營守備五十六年二月調湖南永綏協左營守備六十年正月隨剿黔楚逆苗於秀尚力戰陣亡時賊攻乾州城陷湖南鎮筵鎮標前營外委王鳳翔遇害又湖南永綏協左營外委蕭世貴禦賊於排補美貴州鎮遠鎮標右營額外外委黃士得貴州銅仁協左營額外外委李廷燦禦賊於十八棧俱死之二月賊仍犯乾州及永綏鳳凰三廳湖廣提標右營千總彭正綱

提標中營把總王得鳳湖南辰州協左營把總王之智隨剿於譚江河口貴州威寧鎮標右營千總郭廷貴隨剿於嗅腦湖廣提標前營把總周上友隨剿於喜鵲山梁貴州黃平營把總龍勝榜隨剿於堡脚場貴州黃平營外委韓得智隨剿於牛郎場貴州黔西協左營外委朱良佐隨剿於璧多山貴州清江協左營外委楊光先隨剿於鵲兒嶺貴州撫標左營額外外委劉直輔隨剿於安靜關湖南永綏協右營外委杜顯奇隨剿於本汛湖南武生田慶年隨剿於黃羅坳皆力戰陣亡事聞議卹慶錦等俱廕雲騎尉世職襲次完時給予恩騎尉世襲罔替士得廷燦直輔卹如例慶錦姪安邦襲正綱子國棟襲得鳳子正官襲上友子耀宗襲餘襲無考鳳翔湖南鎮筭人世貴湖南永綏人士得貴州鎮遠人廷燦貴州銅仁人正綱得鳳俱湖南武陵人之智湖南永綏人廷貴貴州大定人上友湖南武陵人勝榜貴州思南人得智貴州黃平人良佐貴州大定人光先貴州石阡人直輔貴州龍里人顯奇湖南澧州人慶年湖南鳳凰廳人

尙維岳

尙維岳漢軍鑲藍旗人由馬甲於乾隆三十一年擢鑾儀衛整儀尉三十三年陞

治儀正三十八年選直隸倒馬關都司四十六年陞四川順慶營遊擊五十一年咨調來京承襲勳舊佐領引見後仍四川本任嘉慶元年教匪徐添德等滋事維岳以署總督英善檄赴東鄉縣軍營分路扼險堵剿賊犯泉水鋪卡都司石陣圖等擊走之賊復糾衆二千餘撲東山廟卡將奪路由東鄉與豐城場賊合維岳奮勇率兵迎敵射斃執旗賊目並殲百三十餘匪賊愈熾至維岳猝中槍陣亡事聞得旨尙維岳著照參將例加等議卹賞雲騎尉世職襲次完時以恩騎尉世襲罔替維岳子政華襲

高傑 倪占鼇

高傑四川成都人由行伍於乾隆三十三年拔城守左營額外外委三十六年補右營外委四十五年遷把總五十年陞千總五十六年保舉守備旋署提標左營中軍守備五十九年大邑縣民王應龍等滋事悉擒之奉旨以應陞之缺題補六十年從征黔楚逆苗疊攻其寨解永綏圍功最補城守右營守備嘉慶元年又於馬鞍山結石岡諸處戰甚力是年陞梁萬營都司八月派赴達州剿捕邪匪十二月賊屯柏樹場爲我兵所克盡遁入橫山子地勢險峻賊設卡三座外掘濠溝負

岫固守傑隨總兵袁國璜於二十一日大霧迷漫出不意圍其頭卡槍礮齊發並擲火彈焚其草棚賊勢急外奔遂殲焉賊衆前來迎敵總兵何元卿亦至奮勇俱上奪據山梁焚卡二座擒匪黨二十餘斬之傑因力戰受傷陣亡先是元卿剿賊小坳賊敗竄入獅子坪我兵越嶺窮追有四川松潘鎮標守備倪占鼇擒殺其魁被匪衆追及亦歿於陣先後事聞奉旨高傑倪占鼇俱照例議卹均廕雲騎尉世職襲次完時給予恩騎尉世襲罔替傑子定邦襲占鼇子開祥襲占鼇四川廣元人

石陣圖 廖廷超等

石陣圖直隸博野人由乾隆己酉科武進士以營守備用五十五年補四川重慶鎮標中營守備嘉慶元年十月賊焚掠達州東鄉之麻柳場陣圖隨刑部侍郎英善川東道李憲宜剿捕之賊乘早霧來攻泉水鋪營陣圖率衆迎截殲賊無算奏入奉旨以應陞之缺陞用十一月賊於汪家山分起屯聚我兵分路剿捕陣圖隨總兵袁國璜率弁兵由七里峽至天星橋一路進攻克之十二月賊竄入橫山子山梁負岫抗拒二十一日陣圖隨國璜乘霧潛至賊卡四面合圍焚燒草棚賊奔

竄我兵截擊之殲賊甚衆二十二日賊乘我兵營卡未定分路來攻陣圖悉力堵禦賊始退二十三日賊分五路直攻營卡陣圖隨國璜迎敵奮力追剿遇伏轉戰三日被創陣亡是月綏寧協千總廖廷超固關營把總劉佐清俱以擊賊歿於陣先後事聞得旨石陣圖著加一等議卹廖廷超劉佐清均議卹如例俱廕雲騎尉世職襲次完時給予恩騎尉世襲罔替陣圖子現瑞襲廷超子明文襲佐清子雲魁襲廷超四川成都人佐清直隸正定人

章憲 趙朝珍等

章憲廣東欽州人由行伍於乾隆四十年拔化石營外委四十二年擢欽州營把總四十七年陞千總五十七年遷四川督標左營守備嘉慶元年湖北教匪竄陝西漢中鳳縣一帶屯黃柏山恃險負隅其西北有老米山高約萬仞一線盤上可通賊巢憲隨總督福凝由小簿道嶺連攻數次不能得手復分兵繞道攻簿道嶺山尾奪卡二座總兵諸神保又從地口撲上賊卡拋擲火彈燬其屯糧乘勢四面仰攻賊墮巖死者無算遂抵老米山麓攀藤附葛魚貫而上出賊不意奮勇攻擊戮斃甚夥餘賊大潰奪其三卡其第四卡高據山頂更爲扼險憲帶兵前進仰面

上攻奮不顧身迭殲多匪以受傷歿於陣時湖北荊州城守外委趙朝珍隨尙書惠齡於黃柏山合剿林之華等匪其一扼泉涼風臺等處路甚歧雜朝珍於一扼泉進攻先躍過濠手刃數賊入其卡大兵繼之賊不能支追奔至涼風臺賊復有衆救應短兵相接戮百餘匪朝珍以深入受槍傷歿於陣四川提標前營守備曾眷隨福凝擊賊於湖北巴東縣譚家村由山徑撲其巢擒賊目二十八人眷奮擊尤力以創重陣亡四川越巂營把總羅舉睿隨總兵諸神保進剿賊從上坪下溝直犯中坪官兵營卡舉睿以受傷歿於陣先後事聞章憲曾眷羅舉睿賜卹如例趙朝珍得旨加等議卹均賞雲騎尉世職襲次完時以恩騎尉世襲罔替憲子式成襲眷子世榮襲舉睿子進連襲朝珍子光國襲眷福建霞浦人由行伍於乾隆四十八年洊陞千總五十九年陞是職舉睿四川成都人由行伍隨征金川屢戰立功拔越巂營額外外委補瀘寧營外委乾隆四十六年調是職朝珍湖北江陵人由行伍拔是職

黃應文子揆等

黃應文直隸天津人由吏員於乾隆三十五年考授八品職銜四十年捐納府經

忠

義

傳

卷六十五

三十二

二

歷分發湖北試用四十三年補德安府經歷五十二年派運閩省軍米咨部議敘五十六年署黃陂縣知縣五十八年署江夏縣知縣五十九年署巴東縣知縣嘉慶元年教匪聶傑人糾衆滋事擾及枝江宜都境而宜昌屬之宋家嘴對馬山各有衆屯聚分擾當陽遠安東湖等境與聶傑人等相接應應文奉檄帶兵四十名鄉勇四百餘名會營員堵剿尋偕東湖知縣何學青遊擊邱作訓破賊於宋家嘴殲二十餘人俘楊添祥等十一人沿途盤獲奸細楊家學等四人遂移兵攻對馬山殲賊首何宗訓及其子示能等十五人俘二十三人又敗宗訓餘黨於楊家垸殲二百餘人又敗之於羅家衝殲百餘人俘百二十餘人總督畢沅以聞諭曰署巴東縣黃應文帶兵殺賊甚屬出力已用硃筆圈出著該督撫將該員存記遇有應陞之缺陞用以示獎勵是時巡撫惠齡已擒獲聶傑人移師剿鶴灣腦逆首張正謨而傑人黨林之華等糾衆擾長陽西界及巴東歸州毗連之榔坪九洲四出焚掠且聲言欲出深衝口救應張正謨應文奉檄往剿率其長子廩生揆偕遊擊邱作訓候補縣丞林江行抵沙坪林之華遣其黨李問祥等三十四人僞作鄉民齎米肉犒師應文疑其詐執訊之究出賊欲乘夜劫營藉爲內應卽軍前斬訖戒

嚴以待是夜賊果至應文等徹夜剿禦賊敗走翌日追至查角石賊伏發於霧雨中蜂擁而至我兵槍礮齊施擊斃數百人會雨甚火藥淋溼賊圍益急邱作訓死之應文猶奮力剿殺手刃數人江並殺執旗賊目一名揆亦殲擒賊目數名衆寡不敵應文父子及江俱受重傷歿於陣時當陽縣知縣黃仁聞縣屬有教匪緝獲之甫下獄賊黨在東湖縣者約當陽城中軍流人犯及附近之書役勾通劫獄仁於倉猝間令其子士騏匿印赴總督畢沅營呈繳城陷仁被戕襄陽呂堰驛巡檢王翼孫以聶傑人餘匪由枝江竄擾率兵勇堵禦陣亡先後事聞諭曰知縣黃應文及伊子廩生黃揆殺賊捐軀殊堪憫惻著咨部加等議卹並著查明黃應文如尙有子嗣於事竣後送部引見黃仁得旨照知州例議卹王翼孫賜卹如例均賞雲騎尉世職襲次完時以恩騎尉世襲罔替應文子振襲江仁未襲翼孫子嘉福襲江浙江上虞人仁四川大竹人由舉人於乾隆五十五年選安徽銅陵縣知縣引見調補是職翼孫江蘇長州人

馮培元 江永輝等

馮培元甘肅靖遠人由武舉於乾隆四十三年分發陝甘督標以千總用四十五

忠

義

傳

卷六十五

三十三

二

年署安定營右哨把總四十六年隨征撒拉爾逆回獲賊二名四十九年隨剿伏羌雲霧山一帶及底店石峯堡五十二年補授甘肅西寧鎮標右營右哨千總五十六年擢松山營守備五十八年調波羅營中軍守備嘉慶元年檄赴湖北軍營剿捕教匪二年陞臨洮營都司嗣以姚之富股匪伏匿襄陽之夾河洲地方埋藏器械潛圖蠢動培元隨巡撫汪新馳赴雙溝就近搜捕擒獲張應朝等三十名奏入賞戴藍翎旋由箐林口進攻老木園賊匪率衆下於深谿口冉家溝野竹溪等處分路撲犯官兵營卡其衝撲深谿口一路經培元奮力堵擊殲斃前隊四十餘賊後隊卽行竄回其老木園之樵風洞緊接巢穴提督劉君輔等督率官兵從石磴陡坎曲折而上毀其卡卡內男婦百餘人悉數殲戮忽轎頂山賊匪鳴礮來援培元帶領兵勇卽於樵風洞山梁迎剿賊匪蜂擁而至我兵施放連環槍礮擊退培元攀越嶺谷追擊賊從旁突出猝被矛傷而歿時甘肅玉泉營把總江永輝擊賊於老木園亦死之是年陝西靜寧協右營千總李潤生四川提標右營右哨二司把總毛安國陝西馬營監營額外外委賈會擊賊於蓋頂坪俱陣亡先後事聞得旨馮培元著加等優卹餘賜卹如例均賞給雲騎尉世職襲次完時以恩騎尉

世襲罔替培元子琰襲永輝子芝襲潤生子奇芳襲安國子承烈襲會子希魁襲永輝潤生俱甘肅寧夏人安國四川成都人會甘肅武威人

和倫 永謙等

和倫蒙古鑲黃旗人姓杭阿坦乾隆三十六年由前鋒隨征緬甸身歷二十九戰三十八年隨征金川屢立戰功得功牌三十五年四月授甘肅瑪納斯左營千總五十四年擢涼州鎮標後營中軍守備嘉慶元年派赴四川剿捕邪匪二年正月隨陝甘總督兼管四川總督宜縣分兵圍攻太平縣屬通天觀池西之官帽山賊卡賊聚衆於卡併力抗拒施放槍礮擗石勢甚熾和倫奮不顧身首先衝突項受槍傷歿於陣是年四月陝西固原鎮標右營中軍守備永謙隨理藩院尙書惠齡等於陝西山陽縣剿捕邪匪追至馬路坪與賊力戰陣亡三年八月山西大同鎮標中營中軍守備雙德剿捕陝西西鄉縣邪匪偪至菜子溝山內老林兩面兜圍殲戮淨盡雙德奮力剿殺身受重傷歿於陣先後事聞奉旨和倫雙德著加等議卹永謙卹如例俱廢雲騎尉襲次完時給予恩騎尉世襲罔替和倫子噶爾噶蘇迪襲永謙子富森布襲雙德子達洪阿襲永謙滿洲正黃旗人姓吉立特由烏槍

護軍於乾隆五十三年補驍騎校是年七月擢本職雙德滿洲正紅旗人姓棟鄂由護軍校於乾隆五十八年授山西渾源營守備六十年調本職

陳名魁 連旭

陳名魁福建漳浦人乾隆四十六年武進士五十年選福建金門鎮標右營守備嘉慶元年護理水師提標前營遊擊巡哨至番洲洋等處獲盜十四名五年護理閩安協副將時閩浙洋面有盜匪分幫滋擾名魁隨海壇鎮總兵倪定得追捕蔡牽幫匪於蠣場洋適盜船遭風沈四十餘隻餘船竄南洋追獲其一擒譚月等十三名超陞水師提標前營遊擊仍護閩安協副將尋偕澎湖協副將何定江在閩浙交界之北關山一帶隨定海鎮總兵李長庚搜捕土盜獲犯多名下部議敘六年隨定江擊盜於四礮洋燬船一又沈其一擒陳標等三十四名獲礮械多件七年二月在緝嶼洋追捕蔡牽幫船至下日洋沈其船一擒黃拱等九十二名溺斃無算十一月蔡牽竄浮鷹洋名魁偕護理海壇鎮總兵羅江泰分路追剿至橫山洋獲其船一載二人俘三十四人是年陞廣東海門營參將八年姚亞馬等匪勾結在牌角洋行劫名魁督兵往剿盜逸追至三嶼港殲斃甚夥救出被劫余爵利

等七名焚盜船一擒盜二尋被戕嗣是九年署廣東香山協左營守備連旭擊賊於大鵬洋亦遇害先後事聞名魁賜卹如例旭得旨照守備例議卹均賞雲騎尉世職襲次完時以恩騎尉世襲罔替名魁子朝用襲旭子承宗襲旭廣東豐順人捕魚爲業以誘殺洋匪十三名生擒二名赴官投報給外委頂帶旋補左翼鎮標右營外委游陞香山協左營千總署達濠營守備疊拏洋盜多名調署是職

强克捷

强克捷陝西韓城人嘉慶十三年進士卽用知縣簽分河南旋丁母憂十五年服闋仍發原省十六年補滑縣知縣十八年九月教匪李文成聚衆謀不軌期於十五日起事克捷偵知之捕獲文成等二十五人嚴行夾訊繫於獄匪黨劉成章等糾合賊衆猝於初七日入城劫文成於獄踞城以叛克捷及家屬俱被戕事聞賜卹如例賞雲騎尉世職襲次完時以恩騎尉世襲罔替文成之將作亂也兩次至京與直隸教匪林清約同日起事清由中發文成自外應之會文成爲克捷所獲遂失期林清以外援不至亦就獲伏誅官軍圍滑縣逆黨劉愾明等引文成先遁因刑傷重不能行載以車旬餘抵輝縣司寨山距滑縣僅二百餘里官軍一鼓殲

之文成自焚死出其屍傷痕猶在上以二逆未遂期會故前後授首易如拉朽克捷首破逆謀厥功甚大照例賜卹尙不足旌死事之忠命加等照知府例賜卹入祀京師昭忠祠克捷子二人長逢泰次望泰作亂之先一月逢泰送望泰回籍完婚俱得免於難惟逢泰妻徐氏隨任城破克捷夫婦被戕徐氏抗節不辱挺身罵賊賊釘於廳柱斃割之骨棄無存克捷叔京課姪有勳徐氏叔雲章幕友李槐蔭諸自涵梁廷輝廷輝子霈泰來張炎孫鼎章冠山及家丁祁陞等共三十五人均遇害經巡撫朱勳遵旨查明奏聞諭曰克捷職膺民社能周知一縣之事首先訪獲逆黨俾林清李文成等失約敗謀先後授首實屬傑出良臣功在社稷且以身殉難闔署被害者至三十餘人深堪嘉憫覽奏揮淚不止前經降旨照知府例賜卹入祀京師昭忠祠尙不足以酬忠盡強克捷著加恩賜諡忠烈賞給騎都尉世襲罔替伊長子強逢泰卽著承襲騎都尉服闋後送部引見次子強望泰著賞給舉人一體會試長媳徐氏著賜諡節烈誥贈恭人照例建坊旌表並著朱勳遵照前旨在韓城縣建立專祠前層設強克捷牌位後層設節烈恭人牌位其從難之三十五人俱設牌從祀地方官春秋致祭以慰忠貞初次致祭著巡撫朱勳親詣

拈香至韓城縣登仕籍者有強克捷之忠良前大學士王杰正色立朝亦籍隸該縣士風淳茂宜示優旌著將文武學額各增五名著爲例又命於滑縣亦爲克捷建祠與難者一併從祀逢泰於二十一年服闋引見以未嫻弓馬乞就文職上以克捷功烈偉著特命以主事用在軍機處學習尋補工部主事旋授福建督糧道望泰於二十二年會試不第欽賜進士改翰林院庶吉士習國書二十四年散館三等是科考列三等者俱歸班銓選望泰蒙恩授內閣中書四川忠州直隸州知州

蘇超 李珍等

蘇超陝西韓城人寄籍廣西由武舉效力督標隨剿湖北教匪卓有戰績擢右營千總嘉慶五年遷梧州協右營守備七年陞陝西寧波右營都司十年調高家堡都司十一年寧陝新兵滋事檄往剿事竣回任十八年岐山郿縣匪徒聚衆焚掠竄盤屋檄赴堵剿追擊至白石峽太白嶺地極險峻馬不能前超率兵勇徒步躡蹤敗之賊匪於地牢一帶逃匿超由廟溝窮追又敗之於古礫墩擒國富等十八人餘匪潰迫至辛口峪螞蟻溝花石巖殲戮無算行抵寧陝廳四畝地分路搜剿

首逆龔貴吳抓抓張占鼈以次殲擒凱撤敘功賞陞一等先換頂帶二十年陞甘肅西寧鎮標右營遊擊道光二年調俄卜嶺營遊擊五年赴喀什噶爾換防六年逆回張格爾入卡滋事犯新疆各城超在防守禦偕西寧鎮標右營外委李珍沈友俱戰歿事聞均賜卹如例賞雲騎尉世職襲次完時以恩騎尉世襲罔替超子盛元襲珍弟芳襲友子廷甲襲珍甘肅貴德廳人由行伍拔是職友大通人由行伍隨剿貴德一帶番賊道光五年拔是職

烏雲布 倭克金泰等

烏雲布白佳氏滿洲正黃旗人駐防伊犁嘉慶十九年由委前鋒校補驍騎校道光元年陞防禦五年二月陞佐領九月因逆裔張格爾入卡滋事調赴喀什噶爾出征六年四月設伏於雅滿山逆奇比勒迪突至我兵擊敗之六月張逆糾衆數萬由大河沿一帶直犯喀城參贊大臣慶祥偕領隊大臣烏凌阿穆克登布各率所部官兵分三營拒守爲賊所乘烏雲布與防禦倭克金泰驍騎校達三布前鋒校圖們泰葉布鏗額同時力戰陣歿事聞均賜卹如例賞雲騎尉世職烏雲布世職未襲倭克金泰子果爾明阿襲達三布子蘇勒通阿襲圖們泰子納勒本襲葉

布鏗額子鄂者狼襲倭克金泰李佳氏蒙古正黃旗人駐防伊犁惠遠城嘉慶二十五年由委前鋒校補驍騎校道光二年陞本職達三布李佳氏滿洲正藍旗人駐防伊犁巴彥岱道光三年由催總補本職圖們泰徐佳氏滿洲鑲白旗人道光三年由前鋒小旗陞本職五年出征喀城葉布鏗額擺雅刺氏滿洲鑲黃旗人道光五年由前鋒小旗隨征喀城六年陞本職

方振聲 沈志勇等

方振聲順天大興人由兵部供事議敘從九品於嘉慶十六年選授福建閩縣閩安鎮巡檢二十年調同安縣灌口司巡檢道光元年調臺灣府嘉義縣佳興里巡檢七年臺俸期滿加主簿銜八年調署羅漢門巡檢兼署臺灣縣典史十年臺俸三年再滿以主簿陞銜遇缺卽補十一年陞嘉義縣斗六門縣丞十二年九月嘉義縣閩粵莊民因釁械鬪匪徒張丙乘機糾衆焚掠斗六門最爲偏近振聲樹柵濬渠督率兵勇防堵十一月賊首黃城率匪黨攻撲斗六門振聲與署守備馬步衢等協力守禦賊資夜縱火蠡擁入柵振聲持刀巷戰戮賊數人力竭遇害妻張氏罵賊不屈被剗割鼻舌與其幼女皆死之幕友沈志勇志勇子聯輝及家丁江

承惠曾大祥等四名亦皆遇害事聞上覽奏墮淚諭曰該故員盡心守禦效節死綏其家屬幕友人等深明大義從難捐軀尤宜特沛恩施以昭激勸尋振聲照陣亡知府例賜卹予諡義烈賞騎都尉世職世襲罔替張氏予諡節烈贈淑人並賞沈志勇六品職銜聯輝七品職銜卽照銜賜卹振聲入祀京師昭忠祠張氏給祭建坊又命於斗六門擇地建立專祠前楹祀振聲以沈志勇沈聯輝配後楹祀張氏以其幼女配家丁江承惠等附祀兩廡春秋致祭當振聲殉難時其子維善甫五歲僕婦攜之伏林莽中得免事平疆吏以聞命卽承襲騎都尉世職

楊延亮 子宏萬等 楊成鼎等

楊延亮湖南長沙人嘉慶二十五年進士以知縣卽用籤分山西道光元年補趙城縣知縣七年縣民董得升以伊甥孟蘭鎖被賈月喜等謀殺致斃等詞赴都察院具控命禮部尙書湯金釗刑部侍郎鍾昌馳往查辦因原讞傷痕不符將延亮解任質審尋訊明延亮實無徇縱別情飭令回任仍以勘驗不實請交部議處議鑄二級准其抵銷十五年二月推陞雲南南安州知州時趙城有奸民曹順以治病爲名傳習先天教妖言惑衆妄生逆志與其黨韓鑑韓奇等謀爲不軌斂錢打

造軍器潛約是年八月分往平陽府霍州洪洞縣及趙城縣同時起事三月延亮
尙未謝趙城縣任偵得其狀卽飭差役查拏曹順等知其謀洩乃糾合匪黨潛入
城內夤夜焚搶縣署劫放獄囚延亮死之其母妻四子二女暨幕友楊成鼎均同
時遇害又殺斃家丁二婢女一事聞上憫延亮因訪拏教匪致全家被害並無激
變情事命照強克捷例奏明給銜賜卹在該縣城建立專祠其母妻子女幕友家
丁婢一併分別附祀並著查明延亮原籍有無子孫奏明候旨飭令嚴緝首逆曹
順務獲訊明動手戕官之犯摘心致祭以慰忠魂尋經吏部查例具奏諭曰楊延
亮職膺民社訪問習教匪徒立時查辦及賊起倉卒以身殉難閭署被害者十有
三人深堪嘉憫著卽照知府例子卹在該縣城建立專祠並准入祀京師昭忠祠
照例賜諡賞騎都尉世職襲次完時以恩騎尉世襲罔替尋賜諡昭節曹順等旣
殺延亮擾及霍州洪洞官軍旋討平之訊明動手戕官之韓鑑韓奇郭世杰摘心
致祭曹順竄至山東觀城縣被獲伏誅七月山西巡撫鄂順安奏言遵旨查明楊
延亮之父楊世懷見將延亮胞姪楊澤萬繼爲延亮嗣疏入命賞世懷四品頂帶
澤萬年未及歲特准承襲騎都尉世職在籍食俸

忠

義

傳

卷六十五

三十八

二

朱貴 子昭甫

朱貴甘肅河州人由武生入伍循化營嘉慶五年川陝楚三省邪匪不靖隨經略大臣額勒登保出征秦州徽縣等處以功拔補榆林右營額外外委六年隨四川總督勒保剿藍號股匪於盧家灣擒賊渠冉學勝九年調補河州定羌汛額外外委十一年陝西新兵滋事貴以檄往協剿補河州鎮標右營經制外委十二年五月青海野番滋擾檄赴軍營差遣六月隨總兵游棟雲截剿賊匪於三札灘七月賊屯什葛干我軍由左面山梁鈔上分路夾攻賊竄甘壩乘勝尾擊之俘馘甚衆八月截擊於什尖里幹九月克沙卜浪焚燬賊巢剿捕殆盡貴俱在事有功十七年拔補右營把總十八年河南滑縣教匪李文成嘯聚蔓延道口隨河北鎮總兵楊芳進剿奮力截殺受槍傷陞右營千總十九年正月陝西三才峽廂匪聚衆滋擾賊黨尤九陳四東竄商州貴隨河州鎮總兵馬元截剿迭有斬獲道光二年四月青海賊番復出劫掠隨河州鎮總兵多隆武由烏化圖進攻遇賊於博格洛貢殲賊百餘奪獲牛羊無算仍跟蹤追躡及之烏蘭哈達大敗其衆事平敘功賞戴藍翎旋補涼州左營守備六年逆裔張格爾入卡倡亂調貴往回疆隨同揚威將

軍長齡剝辦七年三月敗之於沙布都爾回莊四月進兵阿瓦巴特克之閏五月張逆向拉克沙逃遁我兵偵蹤追至色勒庫爾有馬步賊數百人從溝內突出撲營搶占沙山貴領步隊從右鈔截殲賊匪二百餘捷入賞換花翎尋陞峽口營都司八年逆酋張格爾成擒西陲底定命以遊擊陞用九年補玉泉營遊擊十年調左營遊擊十二年軍需報銷完竣經陝甘總督楊遇春保奏得旨朱貴著以參將遇缺儘先卽補十五年補陝西西安城守營參將十八年署察漢托洛亥駐防副將二十一年授浙江金華協副將二十二年英人內犯浙洋貴率領陝甘官兵禦賊於慈谿大寶山身先士卒奮勇直前力戰死之其子朱昭南同時戰歿事聞諭曰浙江金華協副將朱貴身受三處槍傷臨陣戰歿其子武生朱昭南隨同打仗身受兩槍同時殉難實屬忠勇可嘉朱貴著照總兵例賜卹朱昭南著一併議卹仍著該將軍等查明朱貴見尙有子幾人及朱昭南有無子嗣之處卽行具奏候朕施恩奏入又諭曰朱昭南隨同伊父朱貴同時陣亡忠勇可嘉茲據奕經等遵旨查明朱昭南之子朱綱年甫四歲見在原籍著俟及歲時由該原籍督撫送部帶領引見候朕施恩貴昭南均賜卹如例賞騎都尉世職貴子廷瑞襲

韋逢甲 顏履敬等

韋逢甲山東齊河人道光十六年進士以知縣用分發浙江歷署宣平餘杭浦江等縣知縣二十年英人犯浙江據定海擾及沿海各州縣二十一年正月逢甲調赴鎮海督鑄大礮九月赴乍浦團練鄉勇十一月署乍浦同知辦理支應局務雇募商船並驗收各路募船以備堵剿十二月英軍擾乍浦洋面二十二年英軍陷乍浦逢甲率鄉勇禦於西行汛死之先是敵窺慈谿卽用知縣顏履敬以辦糧臺赴軍營遇敵於大寶山歿於陣敵犯定海總兵張朝發復諫撤守署知縣姚懷祥與典史全福分募鄉勇爲死守計朝發敗敵大至礮圯南門懷祥帶傷仗劍立城上呼召兵勇無應者乃投城外成仁塘死全福亦死敵據定海延擾鎮海縣丞李向陽自經死事聞均賜卹如例賞雲騎尉世職逢甲子預襲履敬無子嗣子學優襲懷祥子廷璋襲向陽子章襲福子毓英襲履敬甘肅皋蘭人道光二十年進士浙江卽用知縣懷祥福建侯官人嘉慶二十三年舉人道光十五年大挑一等浙江試用知縣歷署象山龍游嵗縣定海等縣知縣向陽雲南趙州人捐納縣丞道光二十一年選補是職福甘肅武威人由涼州後營字識換防英吉沙爾道光十

年安集延流寓逆回滋事以隨同官兵守城出力給六品頂帶嗣以修理城垣勞績議敘未入流十七年選是職

麥廷章

麥廷章廣東鶴山人道光十年由行伍拔補水師提標右營外委十一年陞把總十二年四月連州猺匪糾黨遙應楚猺助勢煽亂官兵分路剿捕廷章首先奮勇入山殲賊甚衆十月隨提督李增階巡洋先後拏獲尖頭魚船及賊匪黃猛等數十名十三年三月陞千總旋署中營守備十二月陞海口營水師守備十五年護本營參將十六年陞碣石鎮右營都司十九年署提標左營游擊時欽差大臣林則徐查辦英人躉船鴉片煙土檄廷章偕參將賴恩爵帶領師船在九龍山口岸查禁接濟防護礮臺遇英領義律乘船妄遞稟信廷章等曲爲開導英人輒肆鴟張礮火齊發我兵施放大礮擊翻雙桅英船英人紛紛落水嗣英船蜂集我兵用網紗避礮仍奮勇對擊轟斃英人多名義律潛約土密兵船前來協助廷章率弁兵奮剿俾前後不能接應英船悉遁出外洋二十年正月陞署左營遊擊三月因籌辦洋務出力賞戴花翎加參將銜二十一年二月隨提督關天培防守靖遠礮

忠

義

傳 卷六十五

四十

一

臺英船擁入三門口衝近排樁斷其練樁盡拔以火箭燬官廠民房廷章隨天培擊退會南風作英船以大隊圍橫檔永安兩礮臺先截援道乘風施礮風益猛礮臺陷進犯虎門廷章據礮臺奮勇轉戰力竭歿於陣事聞諭曰英人攻擊虎門礮臺及烏涌卡座遊擊麥廷章被害殊堪憫惻著加恩賜卹三月復奉諭曰麥廷章著加恩照游擊例賜卹該員統領士卒爲國捐軀著卽在遇害地方建立專祠以慰忠魂而彰節義尋賜祭葬賞雲騎尉世職襲次完時以恩騎尉世襲罔替子岐芳襲

繆志林 趙發元等

繆志林雲南昆明人嘉慶二十三年由行伍隨征臨安賊匪在芭蕉嶺龍岔河等處迭有斬獲二十五年拔補撫標右營額外外委道光二年授外委尋調督標右營外委十一年遷中營右哨二司把總十七年陞右營千總二十二年雲貴總督桂良以志林緝捕出力保舉以守備陞用二十三年閏七月護送緬甸貢使入京十二月引見奉旨回任候陞二十四年署龍陵協右營守備二十五年正月補順雲營右軍守備十一月署龍陵協中軍都司二十六年二月永昌回匪滋事志林

赴軍營協剿三月攻賊於官坡進至長灣力戰陣亡同時署鶴麗鎮標中營守備趙發元剿賊於飛石口永昌協左營千總趙得和剿賊於大力哨俱力戰陣亡十二月署騰越鎮標中營千總廣西營外委陸春在象山菜園等處剿賊永昌協右營千總毛文元在鐵茄山等處剿賊俱受礮傷陣亡先後事聞均賜卹如例賞雲騎尉世職襲次完時以恩騎尉世襲罔替志林子承勳襲發元子生員以文襲得和子佑忠襲文元子飛鵬襲春子安邦襲發元趙州人嘉慶十五年武舉效力提標道光三年補鶴麗鎮標中營把總二十五年署中營守備得和太和人道光十七年由行伍拔補提標右營額外外委十八年授左營外委二十一年陞中營把總二十五年正月檄赴雲龍州堵截裸匪八月赴永昌軍營九月帶領練兵在金雞村禦賊殲斃多名並奪獲旗幟敍功拔補是職文元維西廳人父齡維西協外委以剿捕裸匪受傷病歿照三等軍功例廕八品監生嘉慶十八年文元以廕生入行伍學習二十五年期滿補維西協右營外委道光十三年署左營左哨二司把總十八年補鶴麗鎮標左營右哨頭司把總二十六年二月隨征永昌逆匪追賊於牛角關奪獲器械無算尋攻克大力山梁進剿烏鴉河施放槍礮斃賊多名

忠

義

傳

卷六十五

四十一

二

經雲南提督張必祿以打仗奮勇委署中營千總五月進攻猛庭寨燬賊巢旋凱撤九月擢賓州汛千總十月調補永昌協右營千總尋署騰越鎮標中營千總復赴永昌軍營協剿回匪擊賊於觀音閣河壩等處迭著勞績春開化人道光二十六年三月由行伍隨開化鎮總兵李能臣剿辦永昌逆匪以打仗出力拔補廣西營外委二十七年調署騰越鎮標中營千總

唐樹義

唐樹義貴州遵義人嘉慶二十一年舉人道光六年大挑一等以知縣用分湖北十年以協同鞠案出力得旨儘先補用尋補咸豐縣知縣十一年調監利縣知縣十二年六月調江夏縣知縣十二月以辦理隄工並防汛出力賞知州銜十四年陞漢陽府同知十五年陞甘肅鞏昌府知府十八年調蘭州府知府二十一年擢蘭州道二十三年以剿辦西寧番案總理糧務事竣經陝甘總督富呢揚阿保奏賞戴花翎二十五年遷陝西按察使二十六年署布政使二十七年陞湖北布政使二十九年四月護理巡撫時值雨多水漲沔陽等州縣民隄被漫樹義偕湖廣總督裕泰疏請撥款修築並開倉碾穀設廠平糶以恤災黎十月因病陳請開缺

回籍調理允之咸豐三年二月命在籍辦理團練事務尋經署湖廣總督張亮基湖北巡撫駱秉章以樹義熟悉湖北情形奏請調往武昌幫辦撫輯事宜詔如所請五月抵武昌七月河南捻匪竄逼湖北樹義帶兵至隨州應山一帶扼要堵剿時湖北按察使江忠源奉命幫辦軍務統兵赴援江西樹義署按察使九月命以二品頂帶實授會粵逆陷安慶楚疆益震樹義帶兵扼防江北陸路駐軍廣濟逆衆由水路上竄遽陷連家鎮江忠源自江西折回救援不及遂與樹義會兵謀赴武昌十月以黃州漢陽俱被陷賊麇集薄武昌江路阻絕樹義偕江忠源疏稱擬馳赴漢陽以圖收復旋聞逆匪有分竄德安之信移兵赴剿時省中待援甚急總督吳文鎔等以兩臬司統帶大兵轉稱北顧爲重竟赴德安置省城於不顧疏劾之有旨疊飭樹義等迅速渡江援應省垣復諭以倘不能前進卽爲收復漢陽之計樹義偕江忠源於中途探知匪衆未至德安卽帶兵南指進軍漢陽之澗口逆匪乘夜揚帆下駛我兵尾追之遂復漢陽十二月吳文鎔督兵由陸路赴剿黃州逆匪樹義督帶水師礮船會合前進疊有斬獲四年正月接戰失利陸營火起兵潰樹義遂以礮船退至葉家洲尋撤回省城上切責之褫職暫留本任仍帶兵剿

賊二月督帶舟師進至金口地方礮船被賊擊破死之事聞諭曰二品頂帶湖北按察使唐樹義著開復革職處分照按察使例賜卹尋賜卹如例賞騎都尉世職襲次完時以恩騎尉世襲罔替同治十年總督李瀚章奏請與殉難總督吳文鎔等在湖北省城合建一祠並言樹義殉難慘烈請加恩賜諡均允之予諡威恪

曾國華

曾國華湖南湘鄉人由監生捐同知咸豐五年粵西會匪由湖北通城竄江西句結廣東匪徒復自湖南茶陵州竄入與逆首石達開會於新昌連陷瑞州臨江袁州三府六年春又陷吉安等府國華兄兵部右侍郎曾國藩方督師剿賊飭國華馳赴湖北武昌乞援經巡撫胡林翼奏委國華統帶湘勇偕副將普承堯等統諸軍赴援時江西與湖南北道梗國華起程後賊復由江西竄入上游阻遏援軍國華由咸寧蒲圻羊樓峒等處沿路迎剿連戰皆捷擊沈賊船二殲斃多匪十月復偕承堯等分路進剿陰崗嶺傅家墟等處均獲勝賊退竄入上高縣國華由萬載縣境進攻連復上高新昌等六城江西兩湖路始通遂進圍瑞州與國藩定計環城掘壕斷賊接濟七年復瑞州尋國藩丁父憂回籍治喪上命國華暫帶湖南兵

勇八年六月浙江布政使李續賓奏調國華幫辦湖北軍務尋攻克潛山太湖舒城桐城四縣復與續賓進攻安徽廬州賊匪駐紮三河鎮先是逆匪以三河鎮爲舒廬衝要築城一座堅壘九座九月國華督兵勇攻剿皆下之適大股髮逆自六合廬江來援並糾合捻逆十餘萬自廬州兼程進逼金牛鎮連營數十里鈔我軍後路時續賓部下除留九江舒桐外隨征不過五千餘人因更番血戰銳卒損傷過多檄防兵策應未至而賊已麇集我軍整隊迎擊賊稍卻突有逆衆數萬從左路乘霧來撲我軍回戈奮擊前後受敵國華力竭死之十二月湖廣總督官文奏入諭曰候選同知曾國華著追贈道銜照道員例從優議卹並准在長沙本籍入祀昭忠祠尋賜卹如例九年正月國藩以國華殉難情形入奏略言自上年皖北三河之敗臣卽知弟殉難傳聞鮮據旋因各路報稱三河營壘被圍李續賓赴敵死臣弟以謀人之軍義不獨生亦衝騎赴敵死之溯臣弟以新募之衆來援江西與十餘萬賊鏖戰於酷暑烈日之中節節攻打江西湖南北驛遞始通嗣以克復瑞州復調赴湖北與李續賓講求戎政晨夕商酌意見多合十月初九日猶以家書寄臣稱援賊麇至各軍皆欲退保國華與主帥堅持不退豈料發信之次日卽

爲授命之秋而其堅持不撓之計卽爲全軍並殉之機也七年曾奉上諭有一門忠義實深嘉尙之褒跪讀之下感激涕零今幸臨變不苟仰副生成之德特以臣叔父曾驥雲年齒日高倚閭望切孤姪曾紀壽幼穉無依臣思昔年若無國華援救臣軍無以圖全江西亦無以轉危爲安憫念勲勞不忍不瀆陳於聖主之前疏入得旨曾國華著加恩給予伊父曾驥雲二品封典以示褒嘉曾紀壽俟及歲時由部帶領引見十一年復經官文奏請賜諡予諡愍烈給騎都尉世職襲次完時以恩騎尉世襲罔替同治三年克復金陵賜祭軍興以來死事諸臣國華與焉並恩賞加一雲騎尉世職

邵懿辰

邵懿辰浙江仁和人由舉人於道光二十一年考取內閣中書尋補官二十五年充軍機章京二十六年陞起居注主事二十八年由軍機處奏保以員外郎陞用分刑部尋補官二十九年捐備本籍賑需下部議敘咸豐三年二月命發往東河交河道總督福濟差委並諭以到工後隨同福濟巡查黃河口岸時粵匪由江蘇分竄河南三月懿辰借詹事府少詹事王履謙分駐河干辦理防務六月歸德府

失守諭曰邵懿辰係朕特派之員並傳諭實力嚴防該員於歸德失陷時將劉家口船隻收歸北岸尙未疏防惟於燒燬船隻後輒離防守咎實難辭著交部議處尋降二級調用九年以在籍辦理團練操防出力經巡撫胡興仁保奏開復原官十一年粵匪再陷杭州省城懿辰死之同治四年浙江巡撫馬新貽奏言自粵逆再犯杭城懿辰方丁憂家居與前撫臣王有齡共籌守禦會賊氛益熾圍城數十重糧盡援絕懿辰方著禮經通論未成日食半菽猶重加編訂城外礮聲如雷火光徹夜處之坦然語其子順年曰曩有謂我無死事責者不知死分也命也讀聖賢書所學何事今日之事潰敗如此與其求免而辱何如一死殉城猶爲心之所安乎其子知義不可奪亦不敢言去如是者經月遂給其妻子乘間出走曰無以細弱累我及城陷懿辰被執賊酋訪知其爲杭州宿望迫令從逆懿辰仰天大笑曰我固早拚一死速殺我尙何言賊不忍加害環守甚密懿辰罵愈厲賊怒甚以巨杵擊碎頭顱加刃於胸遂遭慘害時距城陷後三日耳此上年杭州克復後順年訪諸其舊鄰居梓人羅占魁自賊中逸出備述當日日擊之情形也懿辰方年未冠時卽期以著述傳世讀書日數行下博覽羣籍研究義理每謂漢宋諸儒學

問不可偏廢尤諳練國朝掌故洞悉源流前直軍機處凡遇大典禮頒發詔諭每屬稿上必稱旨旋以防河因公罣誤杜門不出著書自娛咸豐十年杭城初次被圍時懿辰母猶在堂乃於圍城中取間道奉母避居紹興迨十一年母歿歸葬卽守制舊居矢志不復出每曰前此之避亂他徙以有母在也自此不求幸免矣孰意遭時多難嬰城喋血竟以身殉良堪痛惜臣下車之始訪諸里人均無異詞旋據邵順年稟陳顛末並准兩江督臣曾國藩咨請具奏查懿辰學問淵深志趣卓越昔在京邸與曾國藩爲道義交逮曾國藩駐師祁門懿辰以故舊相訪縱論兵事有意見不合處持論弗爲苟同故曾國藩屢稱之而臣亦習聞之茲復廉得其死事情狀真有先儒之範而兼烈士之風惜手纂遺書多遭兵燹而其慷慨就義大節凜然自足千古應請照陣亡例從優議卹疏入諭曰前任刑部員外郎邵懿辰於杭城失陷時罵賊被害實屬慷慨就義大節凜然著照陣亡例從優議卹從祀杭州本籍昭忠祠其生平事實著宣付國史館立傳以表宿學而褒忠節其子媳邵順年之妻伊氏投井殉難孝節兼全著交部照例旌表尋賜卹如例贈道銜賞雲騎尉世職襲次完時以恩騎尉世襲罔替

蕭啟江

蕭啟江湖南湘鄉人由監生隨湖南提督塔齊布剿辦廣西會匪咸豐四年逆匪竄陷湖南岳州啟江隨同官軍進剿克之賞戴藍翎以府經歷縣丞選用又隨同克復武昌漢陽興國大冶蘄州各府州縣敘功以州同儘先選用五年逆匪竄擾江西弋陽並犯興安啟江偕寧紹台道羅澤南往剿先後收復兩縣並廣信府城賞換花翎以同知卽選六年瑞州新昌上高臨江各匪糾約圖陷萬載啟江與都司田興恕迎戰敗之其由崇通南竄之匪復糾集股匪來撲我軍營壘啟江督勇衝突又敗之追抵江南八角亭毀其壘時同知銜曾國華等已由瀏陽馳至偕啟江由洪塘新昌上高以擣瑞州前隊至登龍橋適袁州踞匪率衆迎抗我軍奮力擊退進攻新昌縣城拔之乘勝並收復上高縣城巡撫駱秉章上其功以知府歸部卽選七年臨江逆匪被剿窮蹙潛約撫建新淦之賊於羅墟太平阜田等處分路來擾啟江偕卽補道劉長佑於距太平圩五里地方遇賊接仗分兩翼衝入匪衆披靡我軍乘勢踏平逆壘追抵黃岡是役也共破賊營四十餘座擒斬無算得旨以道員卽選時臨江踞匪經我軍疊次環攻勢不能支出城乞降惟首逆仍負

隅抗拒我軍誘其出戰啟江等督兵疾進薄城而登將餘匪搜殺殆盡遂復臨江府城敘功賞按察使銜旋以撫州府城同時收復復賞布政使銜九年逆匪陷南安復聚衆數萬由南康直犯贛州占踞新城墟及池江地方啟江飭知縣周慶榕等設伏誘之自統大隊分路兜擊正鏖戰間又突出悍賊數千來撲我軍奮力死戰敗之隨將新城墟池江小溪鳳凰城等處逆壘一律平燬逆匪退入南安府城啟江率所部進駐青隴黃隴一帶賊仍抗拒我軍分數路而進賊亦迎敵我軍奮勇兜剿大破之賊潰入城我軍攀堞而登賊由西門奪路奔竄追擊數十里殲戮無算捷聞賞額埒斯圖巴圖魯名號復統軍馳抵距新豐三十里之大小窩約會總兵遮克敦布進攻吳家嶺等處各匪啟江自率中營接應直擣吳家嶺下逆衆萬餘來撲我軍痛殲之復分路進剿行抵先溪橋踏破賊壘信豐城內兵勇乘勢出擊城圍立解時逆股石達開自寶慶受創後仍聚匪盤踞東路啟江統軍進剿至東安破之復會合各軍追襲擒僞將軍楊家廷僞先鋒馬繼昌於陣賊乘夜竄越闌入廣西全州興安地界逼近桂林啟江督勇長驅直進分途圍殺復派所部由南門文昌門分投剿殺賊敗退桂林之圍亦解捷上記名以按察使簡用十年

命帶兵赴四川助剿尋因病卒於軍總督曾望顏奏聞諭曰布政使銜記名按察使蕭啟江防剿湖南等省賊匪所向克捷戰功卓著見復帶兵前赴四川助剿方期指日蕩平迅殲羣醜乃聞在營病故憫惻殊深蕭啟江著追贈巡撫銜照軍營病故例從優議卹以慰忠魂復諭曰蕭啟江自咸豐三年帶勇打仗克復江西袁州臨江撫州南安四府並援剿湖南廣西四川等省戰功懋著洵屬忠勇可嘉著加恩賜諡並於湖南江西省城及湘鄉縣原籍建立專祠尋賜卹如例予諡壯果廕一子以知州用同治元年穆宗毅皇帝御極追念忠節諸臣各賜祭一壇啟江與焉

褚汝航

褚汝航江蘇吳縣人道光二十八年由監生報捐布政司經歷分發廣西咸豐元年粵匪倡亂汝航於金田及新墟等處剿擊出力賞戴藍翎以知州陞用二年正月復以攻克新墟賊巢欽差大臣大學士賽尙阿上其功得旨以同知補用並賞換花翎嗣賊撲桂林省城汝航隨大兵擊賊獲勝省城圍解巡撫鄒鳴鶴請獎得旨俟補缺後以知府卽用四年三月賊踞湖南湘潭縣城水陸分布汝航管帶舟

忠

義

傳 卷六十五

四十六

師偕陸路官軍進剿四月親督戰船馳擊手然巨礮殪賊目數十名兵勇奮力爭先遂復湘潭巡撫駱秉章等奏入得旨以知府儘先補用並賞加道銜逆衆復麇聚岳州負隅拒守六月提督塔齊布前禮部侍郎曾國藩分統水陸軍馳剿汝航等管領師船進撲鹿角並與陸兵約期並進水師分隊設伏先以疑兵誘戰賊船蠢擁出追伏兵起汝航飛棹駛進礮殪執旗賊目賊潰亂自相撞擊官軍乘勝疾追殲賊無算賊宵遁遂復岳州府城七月賊率三四百船溯流來犯甫過城陵磯卽與官軍前隊遇汝航偕升用同知夏鑾分三路齊進槍礮兼施先將賊前舟奪獲殪僞丞相汪得勝等八名餘衆遁汝航等乘勢窮追斬擒焚溺殆盡捷聞上以汝航綜理水師營務疊著戰功命以道員儘先選用尋賊復由擂鼓臺連檣上竄汝航等督兵迎擊殲賊甚夥越日賊復以二百餘艘伏城陵磯其羅山對岸之夾洲亦泊舟千餘欲誘官軍深入汝航偕夏鑾暨都司楊載福等督兵直偪城陵磯逆衆方欲鈔截陸軍伏兵四起水軍復分途迎擊賊大潰夾洲泊船亦被延燬上嘉汝航躬親督戰膽力俱壯賞加鹽運使銜嗣仍剿賊於城陵磯下游一帶總兵陳輝龍率所部水師前擊汝航等統戰艦繼進排陣合攻多所殲斃並火其舟賊

下竄時風逆舟膠賊艘復蟻集兜裏兵勇陷入重圍陳輝龍及遊擊沙鎮邦等俱陣歿汝航與夏鑾督軍馳救均被鉅創死之事聞諭曰道員褚汝航屢次督戰疊獲勝仗茲以奮勇殞命著交部照升銜議卹尋賜卹如例賞騎都尉世職襲次完時以恩騎尉世襲罔替

福咸

福咸烏齊格里氏蒙古正紅旗人父倭仁文華殿大學士自有傳福咸由拔貢生於道光三十年分發河南以知縣用咸豐三年以守城出力巡撫陸應穀奏保賞知州銜四年援例以直隸州知州在任候選旋署孟津縣知縣辦理河防五年左副都御史王履謙以福咸防守河岸兩載有餘彈壓稽查均無貽誤奏請留於河南以直隸州知州用詔如所請尋援例捐道員八年授江蘇鹽法道九年署安徽徽寧池太廣道十年粵匪大股由江浙竄撲寧國其時江皖上下千里皆爲賊踞寧國孤立其間兵單餉乏岌岌難支福咸偕提督周天受等激勵兵勇登陣固守並設法籌備米糧以濟軍食晝夜不懈者七十餘日城陷福咸率隊巷戰死之幕友從九品王榮昌家丁鄭榮陳陞劉祥隨同殺賊均歿於陣事聞諭曰福咸巷戰

忠

義

傳

卷六十五

四十七

二

受傷旋卽殉難著從優議卹附祀周天受寧國專祠以慰忠魂尋賜卹如例賞騎都尉世職襲次完時以恩騎尉世襲罔替同治十三年安徽巡撫英翰奏稱福成見危授命大節凜然請於寧國府城建立專祠並將隨同陣亡之王榮昌鄭榮等分別附祀得旨允行子衡峻戶部員外郎襲衡瑞欽賜舉人

豐陞額 德安

豐陞額烏蘇氏滿洲鑲白旗人吉林駐防咸豐三年奉調隨征髮逆賊自廣西竄入湖南豐陞額隨剿於黃蠟山力戰獲勝斬馘甚多欽差大臣湖廣總督官文保奏賞六品藍翎旋補披甲十年賊踞湖北麻城縣官軍進攻敗之豐陞額在事有功以驍騎校補用十一年八月隨同楚軍援皖擊桐城賊奮力血戰疊有斬擒捷入賞換花翎十一月擊賊於廬江等處有功晉防禦同治元年大兵攻桐城宿松兩城連克之豐陞額戰績最著得旨以佐領卽補尋以協領儘先補用二年隨營移剿陝西賊轉戰於臨潼高陵等處旣而賊衆大至豐陞額等奮不顧身卒以衆寡不敵偕鑲黃旗協領銜卽補佐領德安歿於陣事聞均得旨下部議卹尋賜卹如例賞雲騎尉世職襲次完時以恩騎尉世襲罔替豐陞額子祿全襲德安無嗣

未承襲德安溫佳氏滿洲鑲黃旗人吉林駐防咸豐二年由披甲隨征江南十一年偕楚軍追剿援賊陳玉成進攻桐城宿松等處克之以驍騎校儘先卽補同治元年大軍克廬州敘功免補驍騎校以佐領儘先補用二年隨官軍移剿陝西逆回攻毀王閣村羌白鎮等處回巢賞加協領銜

李鶴章

李鶴章安徽合肥人咸豐三年由廩生倡舉本籍團練八月粵匪自長江入裕溪口助官軍擊走之九月以團練著有成效得旨嘉獎五年敘擊廬州援賊功賞戴藍翎六年敘克無爲州功加五品銜七年援例以州同選用十一年官軍蕩平淩湖賊壘收復安慶鶴章在事有功以知縣留於湖北補用並賞換花翎同治元年其兄江蘇巡撫李鴻章由上海進兵規復青浦以鶴章率親兵督戰八月湖州賊僞慕王譚紹洸等截我後路薄北新涇營蔓延二三十里援兵不能達鏖戰經月軍糧火藥垂罄鶴章分軍之半留守以其餘急趨賊後奮擊獲勝解北新涇圍九月會各軍克嘉定十月譚逆等糾賊十餘萬自崑山分股並進一由北路安亭竄方泰鎮撲南翔欲截嘉定後路一由南路蟠龍鎮竄四江口圖撲黃渡以扼青浦

要隘鶴章擊北路賊於陸家行敗之南路賊甚勁官軍被圍急鶴章疾馳至黃渡約總兵程學啓合軍夾擊賊始披靡官軍偪壘苦戰突有悍賊出拒鶴章等三路圍剿賊潰毀其營二百餘座四江口圍解十二月錢森仁以常熟昭文納款鶴章勒兵應之復其城並拔福山許浦各海口上以四江口圍解鶴章擊退援賊與在事員弁功足相埒鴻章引嫌未經請獎敕令查明勞績一體議敘二年二月鴻章疏言鶴章隨同剿賊乃義所當爲不敢邀敘諭曰五品銜分發補用知縣李鶴章戰功卓著豈可沒其微勞著賞加四品銜以知州用三月太倉踞賊蔡沅隆詐降列隊迎官軍入伏發鶴章中槍子傷賊勢張甚程學啟等力戰卻之鶴章裹創偕進斬僞將十九人悍逆以百計毀卡三破石壘二礮裂城垣糜衆畢登擒蔡沅隆誅之遂復太倉五月鴻章規取蘇州以鶴章當常熟進江陰之路駐軍王莊賊黨數萬赴救鶴章令中右會軍伏河岸僞欲潛渡而水師急進南瀾焚其礮船夜半襲賊營以大隊截要口火發賊奔潰官軍鼓譟進拔北瀾麥市南瀾賊營八十五座比曉江陰無錫賊來援鶴章飭各軍以小隊衝陣大隊圍裏之賊反奔窮追盡毀其壘擒逆酋百餘顧山以西縱橫七八十里埽除一清八月偕總兵郭松林

等下江陰累功擢知府晉三品銜九月賊犯大橋角營鶴章馳援解其圍十月敗梅村西倉茅塘橋賊復偕提督劉銘傳轉戰十晝夜破賊壘百餘時大軍克復蘇州鶴章方進取無錫金匱蘇州敗賊麴至力戰卻之而城賊黃子澹父子負嵎死守鶴章令知州丁日昌手然開花礮燒賊帳乘其震恐督率道員張樹聲等破亭子橋復連破東北南三門賊營十餘座及西南二營分飭水陸各軍奮勇登城黃逆棄城走官軍追擒之復無錫金匱捷入命交軍機處記名遇有道員缺出請旨簡放旋諭曰李鶴章能與其兄同心戮力爲國宣勤此次未行破格之獎正爲該員係李鴻章之弟以示該撫功不自私俾得推勞將士鼓舞衆心李鶴章當益自勉勵指日常郡金陵次第奏捷克成全功更當與劉銘傳郭松林等同膺懋賞時鶴章督趨常州襲破城東石營二座餘營次第悉毀鶴章復約提督劉銘傳會攻拔北門外土城分兵拔孟河汛賊大股來援鶴章自督諸將迎擊敗之十二月官軍駐奔牛者爲賊所困鶴章拔隊馳援少失利增兵戰益力三年正月遂解奔牛之圍三月偕提督郭松林等遏賊三河口斷其浮橋賊棄械乞降數以萬計乃偕劉銘傳等合攻常州四月克之盡殲其衆捷聞賞穿黃馬褂九月授甘肅甘涼道

忠

義

傳 卷六十五

四十九

二

十月湖北餘賊由黃孝竄擾德安兩江總督曾國藩奏調鶴章領軍入楚四年正月以甘肅回亂命往助剿三月命迅赴本任鶴章傷發未遽行四月疾甚乞假回籍五月曾國藩疏請開甘涼道缺襄辦行營事務允之尋以傷疾交作在籍養病光緒五年捐助山西賑金賞二品銜六年卒七年陝甘總督曾國荃疏言鶴章不緣勦闕獨當一面咸豐三年隨其父兄帶練剿賊聲威著於淮甸九年隨臣兄曾國藩大營疊著勞績同治元年檄赴上海助李鴻章剿辦蘇常諸路之賊卒使悍豎授首名城恢復鶴章無役不從淮軍名將以程學啟爲最著鶴章統率一路與程學啟方駕並軌戰功事蹟宜宣付國史館立傳並請於立功地方建立專祠從之八年安徽巡撫裕祿疏言鶴章以書生毀家紓難首辦民團咸豐三年夏村土匪夏金書作亂結定遠縣土匪陸遐林約期大舉鶴章立率百餘人親往圍捕格殺金書父子解散亂黨千人增立東北鄉團防陸逆不敢窺伺居民安堵遠近各練鄉兵擒治匪徒不致蔓延貽害者皆由鶴章聯結鄉民辦團防剿之力是時鄉團日廣官無資糧可發鶴章勸殷戶輸資壯夫效力相持年餘人無懈心泊大軍進駐廬州深知練勇可恃堵剿兼資其力所向有功鶴章身親督戰往往出奇制

勝履險如夷巢湖之役東關之防暨收復旁近州縣擊退大股援賊戰績赫赫在人耳目曾國藩謂其戰守之才超越時賢奏調襄辦營務論其捍災禦患固不止廬州一隅而功在桑梓尤足動人思慕至建修文廟考棚書院創立義倉積穀捐資贍族發粟濟貧猶爲餘事合肥士民自願集資建祠籲懇奏附祀典由地方官春秋致祭疏入得旨允行

王鑫

王鑫湖南湘鄉人咸豐三年粵匪竄擾湖南永州一帶鑫以生員防堵出力署巡撫潘鐸保奏以縣丞歸部卽選七月桂東永興等處土匪滋擾鑫奉檄馳赴大汾墟盤獲奸細盧元泮等三名供出逆匪屯聚竹坑因分路進攻悉數掃除適廣東樂昌土匪竄至興寧境內復由水路撲城鑫迎擊殺賊甚夥生擒頭目奪獲器械多件復會同各路守卡兵勇殲擒多名興寧肅清湖南巡撫駱秉章以鑫倍道赴援尤爲奮勇奏保得旨以同知直隸州陞用先換頂帶並賞戴藍翎四年三月鑫規取岳州督勇由湘陰進攻遇賊杉木橋敗之毀其船十餘號沿途疊有斬獲遂克岳州旋以出境追剿賊乘機回竄官軍失利岳州復陷駱秉章劾其疏於防範

忠

義

傳
卷六十五

五十

二

奏入上以鑫平素剿賊尙屬奮勉革職留營效力四月克復湘潭十一月賊復竄
徧永郴所屬各縣鑫偕參將周雲耀等星馳赴援分道追討累戰皆捷圍盡解湖
南南界次第肅清以功開復原官並賞換花翎五年正月會剿潛竄道州之賊陣
斬數百名生擒逆首歐玉洸等七名復敗賊馬山生擒羅天燦等三名奪獲刀矛
器械無算會另股賊匪自古城西嶺攻陷廣西富川鑫偕周雲耀等各帶兵勇追
剿疊獲勝仗賊復分股勾合連州敗匪從龍虎關竄徧湖南漫山遍野勢張甚鑫
等卷甲疾趨奮勇衝殺斃賊二千餘並頭目多名餘匪逃竄駱秉章保奏奉旨以
知府遇缺卽選六月廣西灌陽賊朱洪英遣其黨陷東安鑫督帶湘勇會同廣西
遊擊王海清署金州知州蘇鳳文等克復灌陽復偕周雲耀等馳赴東安搜伏而
進至城下乘勝環攻賊勢不支由南門竄出遂復東安其竄出之賊由浦里橋與
僞定南王胡有祿合謀竄四明山鑫等分路鈔擊生擒胡有祿等六十餘名其竄
入四明山之賊亦悉數剿除事聞上嘉其奮勇出力命以道員選用六年正月駱
秉章奏言自賊竄湖南以來蔓延郴州桂陽等處鑫等由耒陽進剿先後接仗二
十餘次斃五千餘匪立克堅城並將由廣西灌陽竄攻永明之賊剿殺殆盡洵屬

異常出力請賞給伊父母四品封典允之三月論克復郴州江華功諭曰王鑫督勇剿賊厥功最著著以道員歸部卽選並免其繳納前次捐復銀兩嗣因剿辦湖北克復通城等縣賞加按察使銜並以湖北道員記名簡放駱秉章以鑫帶兵分駐岳州練團搜匪相機進剿正屬得力請俟軍務告竣再行請旨簡放允之七年六月鑫軍進規江西吉安攻破水東賊壘而寧都賊首胡壽階由沙溪來援鑫分隊迎擊大敗之陣斬胡壽階及大小賊目六七十名生擒二百餘名斃匪六千名駱秉章暨江西巡撫耆齡先後奏聞上嘉其以寡擊衆殲除巨寇賞給愛什蘭巴圖魯名號旋因馳抵永豐由沙溪追賊積勞成疾九月卒於軍奏入諭曰王鑫由湖南生員帶勇剿除衡永郴桂各屬土匪兩粵會匪並越境進剿湖北江西逆匪紀律嚴明身經數百戰前後殺賊十餘萬克復城池二十餘處厥功甚偉著加恩晉贈布政使銜卽照二品例從優議卹並准其予諡仍於湖南江西地方建立專祠該故員父母賞給二品封典以獎勵勞而褒忠義尋賜卹如例子諡壯武廕一子入監讀書期滿以知州用同治元年上追念死事諸臣命各賜祭一壇鑫與焉子詩正候選知州

溫紹原

溫紹原湖北江夏人道光二十五年以捐輸議敘鹽運司經歷分發兩淮補用二十七年捐輸米石奏獎以知縣歸雙月選用二十九年復捐備經費以知縣分發江蘇補用咸豐二年署六合縣知縣時粵匪陷湖北武昌駸駸南下紹原以六合爲南北要隘乃勸紳民捐儲義穀庀工修城垣治樓櫓頒團練法於鄉嚴整齊一聯百餘堡爲一氣別募壯士數百人躬教之皆可戰三年二月江寧陷賊遊騎至境輒殲於鄉團俄而大至禦之龍池以兵單退保南關會日暮賊營火發率衆猛攻之斬僞丞相一僞統制四餘衆悉殲紹原益增守阨塞浚品字坑伏地雷以斷賊徑賊至隨機禦之每戰擒斬過當賊憚其威不敢偪欽差大臣向榮兩江總督怡良先後上其功得旨以知府用並賞戴花翎仍留本任辦理防剿自是截賊江上七戰皆捷進破南岸七里洲賊壘聚其船燬之賊不得北渡乃出陸路竄高資港下蜀街築堅壘重濠環之巡撫吉爾杭阿檄紹原會攻紹原以其弟同知溫綸將千餘人往賊望見輒潰走盡平其壘會揚州大營潰賊陷江浦進犯浦口踞六合葛塘集紹原會總兵張國樑戰於龍池大破之追至藏軍營盤城集再破之連

復江浦浦口捷入詔以道員補用未幾賊再陷江浦進犯六合紹原水陸禦之賊不得逞相驚以爲鐵鑄六合四年賊營九泐洲結木簾長數十丈築壘其上旁置巨礮翼以戰艦蔽江而下次八卦洲紹原夜以小舟載火器襲之火發率勇士躍入斬賊無算木簾既燼乃移師攻九泐洲賊營借署江浦縣知縣曾勉禮水師總兵武慶等分帶水陸兵勇由金湯門外五路進剿時值重霧官軍架浮橋以渡奮勇爭先轟斃執黃旗賊目多名逆匪紛竄自相踐踏遂平其壘江寧將軍托明阿錄其功入告五年以捐輸兵餉皆下部議敘賊既不得志於六合銜紹原甚糾集悍黨意在必逞屢自浦口來犯紹原隨機堵禦且戰且守時大江以南名城要隘盡爲賊踞而六合以蕞爾彈丸巍然無恙且時分其兵力搜剿伏莽統軍諸大帥亦深倚任之檄在任兼署江寧府知府督辦江寧所屬團練事宜時江寧陷賊久卽以六合爲僑治也七年安徽天長梟匪來安山匪突踞縣西紹原激勵軍士進討一日三戰大破之因列上諸將戰績欽差大臣德興阿以越境邀功置弗錄紹原力爭遂以干預保舉疏劾之奉旨革職仍留六合帶勇防堵旋以兩江總督何桂清疏辨命先行開復知府四月紹原隨大軍進剿克復來安縣城經德興阿奏

忠

義

傳

卷六十五

五十二

入賞加鹽運使銜九月賊又傾巢來撲紹原鞞刀帕首嬰城固守卒以援師未至衆寡不敵力竭城陷死之十月德興阿奏聞諭曰溫紹原督團募勇六載守城久爲江北重鎮此次賊圍六合嬰城固守幾及一月卒以援師未集力竭捐軀殊深憫惜候補道溫紹原著追贈布政使銜照陣亡例從優議卹並於六合縣地方建立專祠以慰忠魂尋賜卹如例予諡壯勇賞騎都尉世職襲次完時以恩騎尉世襲罔替同治元年上以死事諸臣勲績卓著著各賜祭一壇紹原與焉

王懿榮

王懿榮山東福山人原籍雲南光緒六年進士改翰林院庶吉士九年散館授職編修十年二月奏請以古本尙書附入十三經注疏與今本尙書並行略謂伏查前山東督糧道孫星衍撰尙書今古文注疏三十卷搜輯前漢古今文及各家古注之僅存者編輯成書又採前人傳記之涉書義者備疏其下不逞私臆最稱矜慎所錄古文爲真古文所採古注爲真古注就今本區別言之猶兩唐書兩五代史之當分稱新舊不得以古文之名名之伏請法高宗純皇帝以舊唐書舊五代史附入二十四史並行之意敕下武英殿及今補刊羣書板葉之時行文江蘇

學臣徵取其書刊附十三經之內使與今本尙書並行並請特旨通飭各省督撫學政凡遇大小考試命題尙書一經准其兩本並行頒爲功令用資久遠以存二帝三王遺書逸文之真以見我皇上法祖同天之美又奏京員津貼請敕各省妥籌閒款更定名目作正開銷以端政體維士風疏曰竊臣伏見去年部臣以議給京員津貼銀兩入奏得旨允准各省督撫通籌外銷閒款相繼登覆或有不擇名目及未作正開銷者以朝廷寬厚正大之舉而臣下擬議乃爲苟且敷衍一時之計言之無文行之不遠政體何存士風何在是以詹事府右春坊右庶子宗室盛昱山西巡撫張之洞踴躍難安先後上言屬詞微至然臣猶惜其或激或諒陳義不古臣維君臣之論以道相合見知聞知昔爲一體三代而下臣節日卑自漢以來以文學得官始於叔孫通請太常試士首自公孫宏寢及後世士風儒氣蕩焉無存史典深文自然流露始曰尊賢漸曰用人始曰重道漸曰察廉下士承流味其本誼日不見書習焉若忘萬鍾禮義不辨久矣豈知講學習業所託甚尊一命初膺詎便稍褻夫自視太薄者予人亦將不厚臣節日卑則臣道不古臣道不立則出治難期竊維我朝大化涵濡二百餘年上之待士與士之自立當不出此臣

忠

義

傳

卷六十五

五十二

二

家累世受國厚恩八代生計皆資官祿臣之值此豈敢重有所矯蓋有所重矯者必有所甚貪有所甚貪遂不可問臣固病之伏請皇太后皇上宸衷獨斷敕下部臣及各省督撫將此項銀兩妥籌閒款更定名目作正開銷既維士風亦端政體正名之義自昔所重取與之際始節必嚴臣職爲京員此項銀兩固在受之之列不得不先事請命以臣愚見何足尙論明知臣此疏一出望者嫌怨議者違駁至於譏彈亦所不避誠以一介雖微所關者大欲潔先亂魯論有誅若臣當此隱忍弗言同乎流俗誠恐一世士風江河日下詎復有所底止儻臣此言幸存卽令格於吏議俾不得行至執禮經少賤之說以相糾繩臣固無所逃命然使天下後世知當時朝廷崇儒重道之意與一時士大夫抱道自重之心以及所以上答天恩下立臣極臣萬死何辭臣爲政體士風起見謹具疏奏聞不勝惶悚待罪之至均得旨交部議奏十五年奉旨記名以御史用十九年簡放河南鄉試正考官二十年京察一等記名以道府用四月大考一等詔以侍讀陞用旋補侍讀五月命在南書房行走是冬中東戰起日本兵寇山東甚急懿榮父祖源成豐間曾由部員奏調回籍辦登州海疆一帶團練至是懿榮自請回籍辦團並請調記名提督王

鴻發軍馳援威海鴻發懿榮從父弟也二十一年正月疏入奉 上諭翰林院侍讀王懿榮奏請回籍幫辦團練並請酌帶援兵一摺王懿榮著准其回籍辦理登州團練事宜以衛桑梓至請帶記名提督王鴻發馳援一節王鴻發係總兵馬心勝營中分統此軍已歸牛師韓統帶業經劉坤一調赴榆關所請著勿庸議尋陞補國子監祭酒二十二年正月丁母憂二十四年服闋命仍在南書房行走旋以會典全書過半懿榮曾充總纂賞加二品銜二十六年五月拳匪倡亂京師戒嚴派充團練大臣七月聯軍陷東便門激勵團勇巷戰移時潰兵塞途人心惶亂遂不能軍歸顧家人曰吾身渥受國恩又膺備衛之責今城破義不可苟生家人環跪泣勸厲斥之遂仰藥未卽絕復投井中死其妻謝氏及其長子婦張氏亦同時殉難其案上遺絕命詞文曰主憂臣辱主辱臣死於止知其所止斯爲近之事聞諭曰二品銜國子監祭酒王懿榮敦品績學持躬清正侍從南齋疊承恩眷平日素懷忠義思濟時艱本年七月間臨難捐軀從容就義洵屬大節凜然加恩追贈侍郎銜照侍郎例賜卹其妻謝氏及其長子婦張氏亦同時殉難忠烈孝義萃於一門允宜特予褒揚以彰貞節王謝氏王張氏均准其旌表伊長孫王福坤俟服闋

後以主事分部行走尋賜卹如例廕一子以知州候銓予諡文敏

成肇慶

成肇慶江蘇寶應人父孺諸生列儒林傳肇慶由舉人於光緒六年大挑知縣分發直隸十七年敘籌賑功賞加同知銜十八年直隸總督李鴻章檄辦熱河教匪善後事宜奏保補缺後以直隸州知州用十九年署滄州知州二十二年署靜海縣所至皆有治績二十五年補靈壽縣縣固僻遠多盜賊肇慶誅破姦猾殄其支黨然後興學校養生徒潔己修禮志行之士莫不宗之未數月風教大洽二十六年拳匪變起聯軍入京師縱兵旁掠延及靈壽責供牲畜糧芻甚厲肇慶壹不應又自念義不受辱作絕命詩見志中有屈已全民命捐軀表素懷之語即於二十七年三月初一日投井死將死時自繕遺牒附絕命詩由閒道達府具言連日洋兵紛至西向力攻自係大局決裂若再接待供應是以臣子助攻君父私心何安守土之義避無可避勢處萬難祇有一死總督李鴻章據以入告疏稱洋兵入犯以來所過殘破各郡縣因先奉布政使廷雍檄飭禮待冀免騷臣不顯言峻斥者以非我族類所欲不遂必至焚殺相仍與其激怒之而肆彼凶殘不如優柔之

而使之馴擾然而官民畏禍所至靡然反顏事仇四維垂盡此風俗人心之大可慮而臣獨居深念所憤鬱難解者也今成肇慶獨能伸此大義精忠亮節昭若日星使天下後世知臣子效忠理當如此則泰山之重與被迫戕生者不可同年語矣況彼族聯旆長驅臣身在局中尙不敢謂要盟之可信成肇慶身居僻壤見勢之不可止遏乃以一死報我朝廷苟非忠赤性生安能從容若此臣旣傷良吏云亡復慨世風日下且欽且憫悼歎奚窮奏入諭曰直隸靈壽縣知縣成肇慶恪守官箴夙懷忠憤本年二月閒見大局阡危地方蹂躪深維守土效忠之義勢處萬難誓以一死報國洵屬從容就義大節凜然深堪褒尙著照知府例從優賜卹並加恩予諡准於死事地方建立專祠宣付國史館立傳以彰忠節尋贈太僕寺卿銜予諡恭恪賞雲騎尉世職襲次完時以恩騎尉世襲罔替並廕一子入監以知縣候銓二十八年直隸總督袁世凱復疏請追贈布政使陞銜照布政使例從優議卹並在直隸省城添建專祠以示旌異奉旨著准其於直隸省城添建專祠二十九年兩江總督魏光燾江蘇巡撫恩壽復循江蘇紳民請於原籍捐建專祠春秋官爲致祭據以上聞俞旨可之子一靜生難廕知縣

忠

義

傳

卷六十五

五十五

清史列傳 卷六十六

儒林傳上一

孫奇逢 子博雅 魏一黿 趙御衆

孫奇逢字啟泰直隸容城人少儻好奇節而內行篤修負經世之學欲以功業自著年十四謁尙寶楊補庭問曰設在圍城中外無救援內無糧芻如之何對曰效死勿去補庭奇之年十七舉明萬曆二十八年鄉試與定興鹿善繼講學一室默對以聖賢相期許既連丁父母憂哀毀成疾廬墓六年家故貧饔飧不給巨室以金粟餽婉卻之嘗自言於哀慟窮苦中證取本來面目覺向來氣質之偏其學問實得力於此後入京師見曹于汴舉仁體以告恍然此心與天地萬物相通左光斗魏大中周順昌皆與定交天啟末魏忠賢竊柄左魏被逮遣子弟相投奇逢與善繼之父正及張果中共調護之時善繼贊大學士孫承宗軍事奇逢上書承宗責以大義請急營救承宗疏請入覲忠賢懼繞御牀哭詔止承宗獄益急坐賊酷拷奇逢復與正果中集士民釀金代輸至都左魏已死逾年周順昌被逮釀金

一如左魏時俄而順昌又死奇逢正果中咸傾身護濟使得歸骨世所稱范陽三烈士也孫承宗以奇逢有經世才欲以職方題授命茅元儀致意奇逢辭不就謂元儀曰朝野倚重者關門一片地將相不調未有能立功於外者君文士與二三大帥共事儻一有見才之心便不能容人人肯爲我用乎元儀服其言後祖大壽以疑懼東奔元儀鼓勵馬世龍追還得和衷共事奇逢一言之力也崇禎時督學李蕃舉孝行建坊旌表御史黃宗昌給事中王正志成交章保薦大兵薄畿輔容城被圍土垣將圯奇逢率宗黨矢志守禦城賴以完巡撫張其平甚器之疏請擢用尙書范景文亦以軍務聘並辭不赴時畿內盜賊數驚乃攜家入易州五峰山門人親故相保者數百家奇逢爲條教部署守禦又以其暇賦詩習禮絃歌聲相聞寇盜屏迹國朝順治二年祭酒薛所蘊具疏讓官以元許衡吳澄相擬有旨徵爲國子監祭酒奇逢以病辭三年移居新安縣七年南徙輝縣之蘇門九年工部郎中馬光裕奉以夏峰田廬乃闢兼山堂讀易其中率子弟躬耕自給四方來學願留者亦授田使耕所居遂成聚居夏峰二十五年屢徵不起奇逢之學原本象山陽明而兼采程朱之旨以彌闕失其論學以慎獨爲宗以體認天理爲要以日

用倫常爲實際而其大本主於窮則勵行出則經世其治身務自刻勵而於人無
町畦有問學者隨其高下淺深必開以性之所近使自力於庸行上自公卿大夫
下及野人牧豎武夫悍卒壹以誠意接之用此名在天下而人無忌嫉嘗學易於
雄縣李對及老乃撮其體要以象傳通一卦之旨由一卦通六十四卦之義發明
義理切近人事所言皆關法戒著讀易大旨四卷又於四子書挈其要領統論大
指閒引先儒之說以證異同著四書近指二十卷又表周程張邵朱陸及薛瑄王
守仁羅洪先顧憲成爲十一子以爲直接道統之傳別爲諸儒考附之著理學宗
傳二十六卷他著有尙書近指聖學錄兩大案錄甲申大難錄乙丙紀事孫文正
年譜歲寒居文集答問日譜畿輔人物考中州人物考孝友堂家規四禮酌等書
凡百餘卷奇逢之學盛於北方與李容黃宗羲鼎足年踰耆耄講道不倦嘗自言
六十以後工夫每十年而較密生平於姻族故舊恩意篤厚聞節孝事必爲之表
揚閨門肅穆寂若無聲每晨興拜謁家祠退坐空齋終日無惰容子孫甥姪數十
人揖讓進退皆有成法康熙十四年卒年九十二河南北學者祀之百泉書院容
城與劉因楊繼盛同祠保定與孫承宗鹿善繼並祠道光八年奉上諭孫奇逢學

術中正醇篤力行孝弟其講學著書以慎獨存誠闡明道德實足扶持名教不愧先儒著從祀文廟西廡以崇儒術而闡幽光子六人博雅最知名弟子甚衆而新安魏一黿灤州趙御衆清苑高鏞范陽耿極從遊最早睢州湯斌登封耿介皆以仕至監司歸里後往受業焉 博雅字君僑奇逢第四子明亡絕意仕進奇逢遷蘇門獨留奉母母歿三年不見齒奇逢年老重聽諸弟子問難必藉博雅轉達閒有未暢輒援據經傳發言外之意聞者往往灑然解悟逢奇著書不下數百卷編摩訂正博雅力居多康熙八年郡守程啟朱以山林隱逸薦以父老辭奇逢卒哀毀骨立廬墓三年十五年弟韻雅坐事逮繫刑部博雅竭產供弟凡四年往來省視徒步烈日中兩足皆腫或遇雨雪飢渴僵仆於途卒以致病病時假寐口中喃喃皆其弟事也及彌留猶張目曰吾弟免矣遂卒年五十五卒後數日弟事漸解蔚州魏象樞稱其愛弟忘身成仁取義云所著有約齋集 魏一黿字蓮陸河南新安人明舉人官山西忻州知州有惠政搜訪遺逸折節下士去官之日匹馬雙童而已少從奇逢遊遭時喪亂共患難者三十餘年及奇逢遷蘇門一黿自山右歸率閒歲一至每至必數月留後構雪亭於夏峰爲奇逢訂正年譜白雪盈山孤

證午夜上下古今視千秋如日暮故及門問答一鼈爲多嘗記其所聞爲雪亭夢語奇逢命一鼈輯北學編命湯斌輯洛學編及斌官京師一鼈策蹇訪之見斌繩牀破被數椽不蔽風雨慨然曰此猶見雪亭風味也斌嘗稱一鼈才大而養之以靜學博而守之以約世俗升沈得失無足介其胸中後日必爲師門顏子所著有四書偶錄詩經偶錄雪亭詩草康熙三十一年卒 趙御衆字寬夫直隸灤州人諸生少從孫奇逢遊絕意仕進於六經及秦漢以來諸大儒書多所發明與湯斌魏一鼈並稱高弟子奇逢嘗曰湯孔伯之端亮趙寬夫之善補過求之古人亦不多得手輯夏峰遺書爲傳信錄二十五卷以志淵源又輯奇逢粹語爲夏峰答問五卷又錄其所見以合於師教爲弗措錄又著困亨錄大旨以事心爲主謂人之事心如事天但敬吾心使之潔淨光明遇事卽以此應之一切順逆成敗惟天所命不宜參以畔援希冀之意故曰天下本無事居恆懍懍如恐失之嘗自誦曰垂名千古易無愧一心難他著又有山曉堂集時密縣錢佳選亦從奇逢學所居超化邨洧綏交流有林泉之勝上蔡張沐及耿介御衆常相寄處卒後密人卽其講聚之地立祠祀焉高鏞字淵穎振奇慕義好遊名山水著有淵穎集四卷耿極字

保汝與兄權並以孝友稱太康耿炳慕其爲人訂爲兄弟割田宅與居與御衆交最善奇逢懷友詩云渾穆稱保汝不以窮失意其見重如此湯斌仕至工部尙書謚文正見列傳耿介別有傳

刁包 杜越

刁包字蒙古直隸祁州人明天啟七年舉人李自成躡畿西包散家財糾衆禦之祁得不破賊退流民載路包設屋養之疾傷者予之藥或護而歸諸其家自成建僞號以官授包包以死拒之賊敗乃免入國朝遂不仕爲齋曰潛室亭曰肥遯著書養母凡二十餘年包少有志聖賢之學聞容城孫奇逢講良知心向之奇逢南遊過祁館之二年與相質正又與張羅喆王餘祐諸人講學爲上谷會語既讀高攀龍書大喜曰不讀此書幾虛過一生矣爲主奉之有過卽跪主前自訟其學由高顧羅薛上溯程朱而以謹言行爲要嘗曰君子之道三言語不苟取與不苟出處不苟又曰吾日三省吾身心無乃有妄念言無乃有妄發事無乃有妄爲乎其勇於自克如此初居父喪哀毀鬚髮盡白三年不飲酒不食肉不入內及母卒號慟嘔血日待罪餘生恃老母在耳母逝矣惟齊衰報本從母而已尋卒年六十六

時康熙六年也生平著書一以明道爲主嘗讀易傳有得曰天地閒有一部易經合當有一部程傳著易酌十四卷推闡易理明白正大足以羽翼程朱又有四書翼注十六卷辨道錄八卷用六集十二卷斯文正統九十六卷其潛室筭記二卷多躬行心得之言世謂醇正勝奇逢書云 杜越字君異直隸定興人明諸生少師鹿善繼究極理奧善繼異之因字曰君異與奇逢友善互相砥礪左魏諸人被逮倡同志釀金納贖又匿魏學泚朱祖文復壁閒不少避家貧布衣蔬食授徒自給一時名彥咸師事之亂後居新安新安人化之風俗一變爲學不立門戶每舉羅念菴答何善山蔣道林兩書示學者總歸脫凡近遊高明之旨而大本在孝弟得力在分晰義利生平志行高潔以禮進退嚴於取與卽弟子以一紈爲壽亦拒不受然性和易年八十餘未嘗一日不樂新城王士禎稱邵子居洛四十載未嘗攢眉越殆庶幾云康熙十八年舉博學鴻儒以老病不就試特旨與傅山俱授內閣中書二十一年卒年八十七著有紫峰集十四卷

沈國模 史孝咸 王朝式 韓孔當 邵曾可

沈國模字叔則浙江餘姚人明諸生餘姚自王守仁講學得山陰王畿泰州王艮

遂風行天下良傳吉安顏鈞鈞傳南城羅汝芳汝芳傳嵯縣周汝登國模少見傳習錄心好之問於汝登汝登契之曰吾老矣越城陶爽齡劉宗周今之學者也子其相與發明之何患吾道不興乎國模至越遂請爽齡宗周主教事爲會於古小學證人社所由起也既歸以明道爲己任創姚江書院與同里管宗聖史孝咸輩講明良知之說其所學或以爲近禪而言行敦潔皎然不欺其志故推醇儒與山陰祁彪佳友彪佳以御史按江東一日杖大憨數人適國模至欣然述之國模瞠目字祁曰世培亦聞曾子言哀矜勿喜乎後彪佳嘗語人曰吾每慮囚必念國模言恐倉卒喜怒過當也明亡聞宗周死節爲位哭之慟而講學益勤性平易近人雖村叟頑童能得其意皆曰近從沈先生學不敢爲惡時學其學者不絕也順治十三年卒年八十有二 史孝咸字子虛亦餘姚人明諸生少思以文章名世而於良知之旨尤爲篤好宗周家居時孝咸往謁恨相見晚宗周創證人社復以書招孝咸與爽齡同主講居恆與弟孝復互相取益有簞瓢不改之致家貧日食一粥泊如也後繼國模主姚江書院嘗曰良知非致不真又曰空談易對境難於居處恭執事敬與人忠三語精察而力行之其庶幾乎同時純潔之士多歸之順治

十六年卒將卒召及門曰吾七十八年浮生於茲盡矣所恃窮理盡性以無負聖賢之訓於心稍慊耳然必如程朱之銖黍弗渝斯爲無弊汝等識之 王朝式字金如浙江山陰人國模弟子嘗入證人社宗周主誠意朝式守致知曰學不從良知入必有誠非所誠之弊岷縣饑朝式往賑全活四萬餘又與蘇元璞鄭錫元營立姚江書院順治初卒年三十八 韓孔當字仁父餘姚人亦國模弟子自沈史歿書院輟講垂十年康熙九年孔當復主院事以倡明理學自任弟子七十餘人其學兼綜諸儒以致知爲宗求友改過爲輔尤嚴於儒佛之辨家貧甚破衣孟粥終身晏如未嘗向人稱貸痛近世吉凶不遵古禮風俗敝而物力殫曰志聖人之學當自立身處家始出陸梭山居家四則示學者曰能仿此亦自足用也人有過於講學時以危言動之而不明言其過聞者內愧沾汗退而相語曰比從韓先生來不覺自失卒年七十三疾亟謂弟子曰吾於陽明宗旨覺有心得然檢點於心終無受用小子識之味其言則知其學不尊守仁而尊朱子矣 邵曾可字子唯亦餘姚人孝咸弟子也性孝友愷悌少好書畫一日讀孟子至伯夷聖之清者也忽有悟悉棄去壹志於學初立姚江書院人頗迂笑之曾可厲色曰不如是便虛

度此生遂往學其初以主敬爲宗自師孝咸後專守良知嘗曰於今乃知知之不可以已日月有明容光必照不爾日用跬步鮮不買買者矣孝咸病走十餘里叩牀下問疾不食而反如是月餘亦病同儕推爲篤行年五十一卒

張履祥 凌克貞 何汝霖 張嘉玲 祝淦 陳梓

張履祥字考夫浙江桐鄉人九歲喪父哀毀如成人家貧母沈教之曰孔孟亦兩家無父兒也祇因有志便做到聖賢及長與同里顏統錢寅海鹽吳蕃昌輩以文行相砥時東南社事方興各立門戶統與履祥戒勿往年三十二見漳浦黃道周於杭州道周以近名爲戒履祥謹誌之年三十四如山陰受業劉宗周之門歸而自謂有得年三十九友人規之曰欲誠其意先致其知因覺人譜獨體猶染陽明遂一意程朱之學與烏程凌克貞海鹽何汝霖歸安沈磊切劇講習專務躬行其學大要以仁爲本以修己爲務而以中庸爲歸窮理居敬宗法考亭知行並進內外夾持無一念非學問無一事非學問與汝霖書曰承喻頭腦之說按論語一書謹言慎行爲多不亟亟於頭腦也顏子述善誘之功則曰博文約禮而已請爲仁之目則曰非禮勿視聽言動而已此卽所謂約禮之實也曾子一貫之旨則曰忠

恕而已子思受曾子之學者也中庸所述與論語曾子之言如合符節故曰忠恕
違道不遠孟子傳子思之學者也其言曰居仁由義曰求放心其曰求其志無暴
其氣卽求放心之謂也求放心則中庸戒慎恐懼之謂而論語日省其身臨淵履
冰之旨也仁義二字論語未嘗並舉易傳則曰立人之道曰仁與義中庸則曰仁
者人也義者宜也則亦夫子之言也至云反身而誠樂莫大焉強恕而行求仁莫
近焉則與曾子子思先後一轍矣三代而下濂溪則曰主靜立人極關中則曰知
禮成性程門則曰敬義夾持曰存心致知曰理一分殊朱子則曰居敬窮理要而
論之豈有異旨哉居敬所以存心也窮理所以致知也惟居敬故能直其內惟窮
理故能方其外惟內之直故能立天下之大本惟外之方故能行天下之達道然
居敬窮理又非截然有兩種工夫也博學審問慎思明辨是爲窮理其不敢苟且
從事勤始怠終及參以二三卽爲居敬故又曰學者用功當在分殊上其曰知禮
成性卽約禮之謂親親之殺尊賢之等皆天理也故曰禮所生也三百三千所從
出也所謂分殊其曰主靜立極者定之以中正仁義而已也仁義不軌於中正則
仁或流於兼愛義或流於爲我而人極不立矣禮以敬爲本敬則自無非僻之干

人欲退而天理還矣欲退理還則終日言言所當言終日行行所無事而靜矣故又曰無欲故靜然則濂溪橫渠雖不言主敬而敬在其中矣由是而上質之鄒魯豈不同條而共貫哉吾人學問舍居仁由義更無所謂學問吾人工夫舍居敬窮理更無所謂工夫凡先儒之言若志伊尹之所志學顏子之所學若爲天地立心爲生民立命若以興起斯文爲己任種種道術舉不外是更何有於頭腦之求古人騎驢覓驢之喻是之謂矣特患居敬之不熟而有或得或失之憂窮理之未精而有或然或不然之慮要亦無他道也有不熟則勉進於熟而已有未精則勉求其精而已平日工夫惟在涵養其本原以爲制事酬物之主爾矣朋友講習養也獨居思索亦養也讀書考究養也飲食動作亦養也念茲在茲釋茲在茲如伏雌之抱卵其退不舍其進不銳如日月之貞恆修其疆畔時其耕耘如農夫之力穡而後可致其精也而後可幾於熟也必若先儒云滿腔子皆惻隱之心盎然若太和元氣之流行於天地之間必若先儒云在我之權度精切不差截然如萬物之各正性命子思所云擇善固執孟子所云深造自得其或以此也歟夫學問者將以盡性命之理也苟不本於天之所賦物之所受非學問之正也安可使之有兩

截乎事物者身心之準則也苟事至物來而處之不當其分正身心之病也安可
視爲兩途乎事物之不能不日至者勢也迎之非也拒之亦非也以其皆不免於
自私而用智也非順應之道也無事則讀書讀書者所以維持此心而不使其或
怠也非以務博也默坐則思索思索者所以檢點其身而不使其有闕也非以耽
寂也事至則泛應泛應者所以推行天理於事事物物而不使其有過不及也非
以外馳也無衆寡無小大無敢慢則一矣無有事無事無有人無人無敢慢則一
矣一則窮通一矣壽夭亦一矣死生亦一矣晚爲汝霖評王氏傳習錄以爲讀其
書使長傲文過輕自大而無得又曰一部傳習錄驕吝二字足以蔽之所自著備
忘錄篤實正大足救俗學之弊論者比之河津讀書續錄他著有願學記讀易筆
記讀史偶記言行見聞錄經正錄初學備忘近鑑近古錄訓子語補農書喪葬雜
錄訓門人語及詩文集凡四十五卷履祥少有大志明亡乃避世畏聲利若浼以
訓蒙自給交友盡規而不喜講學來學之士一以友道處之黃宗羲方以紹述宗
周鼓動天下履祥曰此名士非儒者也歲耕田數十畝草履箬笠提筐佐饁嘗曰
許魯齋言學者以治生爲急愚謂治生當以稼穡爲先能稼穡則無求於人而廉

恥立知稼穡艱難則不妄取於人而禮讓興廉恥立禮讓興世道可復古矣又嘗言嘉郡水利不講時被旱潦其要在濬吳淞江其後嘉善柯聳建議濬之本履祥說也康熙十三年卒年六十四同治十年禮部奏請從祀文廟在東廡先儒孫奇逢之次奉旨依議初履祥弱冠時兄事統周鍾之寓桐鄉也至其門者踵接統曰鍾爲人浮僞不宜爲所惑履祥嘗曰自得統而始聞過余不失足於周鍾張溥之門者皆其力也及從宗周遊與寅偕宗周曰二子有親乎對曰俱幼喪父宗周色動徐曰修身所以事親也海寧祝淵抗疏論宗周被逮履祥與寅送之吳門寅造履端謹寇盜充斥不廢學與統俱早卒 凌克貞字渝安浙江烏程人交履祥三十年誼最篤履祥嘗曰錢寅旣歿復得克貞不幸中之幸也克貞爲學篤守程朱嘗與履祥書謂學者入手當思有著力處便求超脫不得又言古今人物史册外何限修身立行當懷遜世不見知之心讀書論世應具不受前人欺之見又言今日人士不患不聰明患不篤實士不篤實聰明愈多適以濟其僞見貧士不事課授卽不樂或勸其治生答曰授徒卽吾之治生也履祥卒克貞序其遺書以行何汝霖字商隱浙江海鹽人隱居澉浦紫雲村與履祥志同道合相交十七年嘗

語友人曰周程張朱一脈吾輩不可令斷絕居喪三年自臥疾外未嘗飲酒食肉
嗣弟歿家破遺孤無託汝霖衣食教誨爲安定其室家履祥嘗命子維恭受業於
克貞汝霖及秀水呂璜嘉興屠安世同邑邱雲曰數人皆深造自得君子人也吾
切磋受益爲多其見重如此履祥病革以全稿託汝霖及卒汝霖經紀其喪率友
朋弟子數十人爲會葬焉 張嘉玲字佩葱江南吳江人居父喪三日不食小祥
內蔬食水飲三年中衰麻不去身未嘗沐浴入內室履祥聞而敬之嘉玲介克貞
執贄往見固求納拜不許逾五年致書汝霖乞正師弟之稱仍不許履祥嘗曰佩
葱質敏而志剛行修而氣下肫肫有德君子也又與友人書曰近得畏友佩葱庶
慰日暮之懷以其能策頽惰耳吾人德業不及後生大爲可恥嘉玲從履祥久所
詣獨粹世比之黃勉齋其講學排陸王而宗程朱嘗曰陸王學術之可憂本爲賢
智之過今之言陸王者皆出於愚不肖之不及所以爲患愈深方欲有所論著病
作遂卒年僅三十四惟與履祥答問一卷刻楊園全書中其後私淑履祥者有海
寧祝淦餘姚陳梓 祝淦字貽孫乾隆元年舉人四歲喪父母日取數字教之每
課必首人字曰人須是頂天立地淦感動遂自號人齋及長嗜理學書讀履祥集

謂其昌言貞教與朱子一揆因取備忘錄增刪之爲淑艾錄十四卷又由履祥而上溯朱子掇取文集語類分十四門編次之爲下學編十四卷又嘗爲友人刪節禮記注疏兼博考諸家擇其長說爲書七十卷未及訂正二十四年卒年五十八

陳梓字俯恭少讀書有大志書體古別與李鐸齊名時稱南陳北李吳江姚瑚曾及履祥之門梓弱冠從瑚遊與祝淦交最契私淑履祥撰四書質疑以教學者隱居事親不求聞達雍正二年舉孝廉方正辭不就晚居臨山聚徒講學海昌范鯤表彰履祥遺書梓復爲訂定年譜他著有刪後文集乾隆二十四年卒年七十七

沈昀 陳確 屠安世 鄭宏 葉敦良 惲日初 劉洵 洵子茂林

沈昀字朗思原名蘭先字甸華浙江仁和人明諸生父之龍以學行著聞昀讀書好古聞劉宗周講學葢山渡江往聽遂爲正學室無容榻桁無懸衣披帙覽書凝坐終日以貧故與父皆教授於外及侍親庭動循法度不苟言笑其學以誠敬爲宗以適用爲主專宗考亭不雜金谿姚江之緒於二氏則辭而闢之晚節見習之者多亦不與較辨也平居日有課月有程每月則綜其所得與同人相質難聞四

方有賢士卽書其姓氏置夾袋中冀一見之然不肯妄交於取與尤介連日絕炊掘階前馬蘭草食之鄰有餽之米者昫宛轉謝辭憊而仆其人駭走良久始蘇因笑曰其意可感然適以困我耳同邑應搗謙與昫友善嘗歎曰辭受一節生平自謂不苟然以視沈先生猶覺愧之宗周卒後傳其學者頗滋諍訟昫曰尼父言躬行君子若勝其口說以求勝非所望於吾輩也遭明亡棄舉業誨二子止令下學弗令干祿雖極困躓不變疾革門人問曰此時先生誠敬之功當無稍閒昫曰唯唯至夜半遂卒年六十三時康熙十九年也卒後貧無以殮搗謙至涕泣不知所出曰我不敢輕受賻襚以汙先生其門人姚宏任趨進曰若宏任者可以殮先生乎搗謙曰子篤行殆可也乃殮而葬焉昫著有宋五子要言四先生輯略四書宗法七經評論名臣言行錄居求編等書以貧累無副本搗謙所見不過數卷後全祖望求其遺書竟不可得昫居父喪時訂士喪禮薈萃先儒之言定其可行者以授門人錢塘陸寅寅字冠周康熙二十七年進士性孝友嘗因家禍繫獄與兄爭取重索自繫而讓其輕者後以父圻遯迹去走萬里尋之竟以勞卒著有玉照堂集並佚不傳時浙中從宗周遊者有海寧陳確秀水屠安世海鹽鄭宏西安葉敦

良 陳確字乾初明諸生少讀書卓犖不喜理學家言如是者四十年已問學宗周乃刮磨舊習宗周卒確得其遺書盡讀之憬然而喻著性解禪障大學辨其言性謂性善之說本於孔子得孟子而益明迄諸儒而轉晦孟子言人性無不善於擴充盡才後見之故諄諄教人存心求放心充無欲害人之心無穿窬之心不一而足易繼善成性皆體道之全功正對仁智之偏而言繼之即須臾不離戒懼慎獨之事成之即中和位育之能在孟子則居仁由義有事勿妄者繼之之功反身而誠萬物咸備者成之之候從來解者昧此乃求父母未生以前幾何不胥天下而禪乎又曰資始流行天之生物也各正性命天之成物也物成而後性正人成然後性全物之成以氣人之成以學又曰本體二字不見經傳此宋儒從佛氏脫胎來者又曰樂記人生而靜天之性也二語本是禪宗其書大半在荀子不意遂爲聖學淵源可怪也又曰周子無欲之教亦近禪吾儒祇言寡欲不言無欲嘗與餘姚黃宗羲書曰世儒習氣敢於誣孔孟必不敢背程朱言之痛心宗羲稱其於聖學已見頭腦惟主張太過不善會諸儒意者有之同時張履祥輩貽書諍之確不顧也確居家有法度天未明機杼之聲達於外男僕味爽操事無游惰之色子

姪力行孝友雍雍然於朋友有過正色相告社集講會亦謂行行醉飽無益身心
議禮尤精痛地理惑人著葬論一篇履祥舉葬親社特請確爲賓福王時行鬻爵
令童試者納銀免郡縣考確曰此輸銀就試之心卽異日迎賊獻降之本也父兄
令子弟以是進取必不以節義相勉人心如此天下何幸乎明亡杜門息影足不
及中庭者二十年康熙十六年卒年七十四 屠安世字子威年二十一聞宗周
講學喜曰苟不聞道虛生何爲遂執贄內拜焉宗周既歿從父兄偕隱於海鹽之
鄉病作不粒食者十七年得宗周書力疾鈔錄反躬責己無時或怠嘗曰朝聞夕
死何敢不勉卒年四十六 鄭宏字休仲明諡端簡曉曾孫與弟寶俱從宗周受
業篤於友愛子弟有失互加懲責不爲嫌明亡絕意進取躬灌園蔬養母屢空晏
如不肯見富貴人雖故人仕宦勿與通嘗徒跣行雨中人不能識也卒年五十六
葉敦艮字靜遠少遊宗周之門時宗周已老教之曰學者立身總不可自家輕
易放了一些出路敦艮謹誌其言性端重每讀一書必盥手奉置几上再拜而後
開卷若先聖先師則四拜晚貽書陸世儀討論學術世儀喜曰證人尙有緒言吾
得慰未見之憾矣又訪張履祥何汝霖於海濱履祥謂敦艮能尊所聞因述所親

炙儀刑於宗周者與交勉焉 惲日初字仲升江南武進人明副貢生亦宗周弟子黃宗羲嘗稱爲宗周門下第一人崇禎末年應詔上備邊五策不報遂歸宗周殉國難爲位以哭順治十一年拜宗周墓於下蔣纂劉子節要十四卷無錫高世泰重葺東林書院日初與同志習禮其閒因作高劉兩先生正學說知府駱鍾麟屢求見不納去官後與一見言中庸要領喜而去曰不圖今日得聞大儒緒論也康熙十七年卒年七十八著有駁陸桴亭論性書一卷野乘五卷見則堂四書講義語錄遜庵詩文集 劉洵字伯繩浙江山陰人宗周子宗周講學諸弟子聞教未達輒私於洵洵應機開譬具有條理嘗語葉敦良曰學問之要只是於倫常日用閒事事不輕放過自然造到廣大高明田地宗周殉國難明唐魯二王皆遣使祭廕洵官洵辭治喪畢隱剡溪之秀峰手輯宗周文集語錄撰年譜二卷數易稿皆精楷日爲損明順治九年張履祥至山陰見洵蔬布如居喪時勸之曰禮有疾飲酒食肉三年內猶得行之洵曰不敢吾大痛於心不忍食也凡杜門絕人事者二十年康熙三年卒年五十二臨卒戒其子曰若等安貧讀書守人譜終身足矣人譜者宗周所著書也所臥榻假之祁氏彊起易之曰吾豈可終於祁氏之榻初

宗周欲著禮經考次一書屬洵撰成洵日夕編纂以夏小正爲首編而附月令帝王所以治曆明時也次丹書而附王制正己以正朝廷百官萬民也於是原禮之所由起而次禮運焉推禮之行於事而次禮器焉驗樂之所以成而次樂記焉然後述孔子之言次哀公問次燕居閒居坊記表記設爲禮典次以祭法祭義祭統大傳施於喪葬次以喪大記喪服小記雜記申以曾子問檀弓奔喪問喪終之以閒傳三年問喪服四制而喪禮無遺矣君子常服深衣雅歌投壺不可不講也則次以深衣投壺男女冠笄婚姻所有事則次以冠義昏義而鄉飲酒義射義燕義聘義合三十篇謂之禮經別分曲禮少儀內則玉藻文王世子學記七篇謂之曲禮垂老未卒業其子茂林始克成之凡正集十四卷分集四卷 茂林字子本幼侍宗周聞慎獨之旨既長移居證人書院靜驗獨體闡用絕學與外父黃宗羲復興證人社講學不輟晚歲詣益純著吾屯子微言內外六十四篇分上下十二卷內篇以闡天人性命陰陽理氣修己立誠之道外篇以道綱常倫紀禮樂刑政致君澤民之務又著九經翼原一書茂林孝友性成就兢自守惟期克揚先業云

陸世儀 陳瑚 盛敬 江士韶

陸世儀字道威江南太倉州人年十六父勗之曰一飲一食常維經義可以收放心或坐或臥如對聖賢可以卻邪念世儀揭之座隅年二十七爲主敬之學慮敬之或至散漫時奉一天以臨之功乃大進嘗欲從劉宗周問學不果後與同里陳瑚盛敬江士韶諸人倡明正學慮驚世駭俗深自韜祕或橫經論難或卽事窮理反覆以求一是甚有商榷未定徹夜忘寢質明而後斷或未斷而復辨者世儀之學篤守程朱自言初有得於心爲嚴師隨事精察八字謂心爲嚴師卽居敬隨事精察卽窮理既有得於理一分殊四字謂聖賢工夫隨事精察是起手一以貫之是究竟而此四字自精察而造一貫之階梯也旣而曠觀天地古今無有不貫謂邵子遇物皆成四片此祇是於陰陽老少處看得熟然終落氣數若見得理一分殊親切則遇物一片亦可千萬片亦可其論太極圖說謂主敬二字是立人極之本中正仁義又是主靜之實落處周子自注云無欲故靜無欲則純乎理是以天理爲靜人欲爲動乃知仁義中正之外別無主靜也其論性謂孟子祇就四端發現處言不必說到渾然至善又謂論性離不得氣質一離氣質便要離天地蓋天地亦氣質也離天地則於陰陽外別尋太極太極不落空虛卽同於一物世儀不

喜陳王之學然能平心以論之其論白沙曰世多以白沙爲禪宗非也白沙曾點之流其意一主於灑脫曠閒以爲受用故與禪思相近其靜中養出端倪之說中庸有之然不言戒懼慎獨與惟詠歌舞蹈以養之則近於手持足行無非道妙之意矣不言睹聞見顯而惟端倪之是求則近於莫度金鍼之意矣白沙本與敬齋俱學於吳氏皆以居敬爲主後來自成一家始以自然爲宗而敬齋則終身無所轉移此狂狷之分其實白沙所謂自然者誠也稍有一毫之不誠則粉飾造作便非自然或者以率略放誕爲自然非也其論陽明日陽明之學原自窮理讀書中來不然龍場一悟安得六經皆溱泊但其謂庭前格竹七日而病是則禪家參竹筮之法原非朱子格物之說陽明自誤會耳蓋陽明少時實嘗從事禪宗而正學工夫尙寡初官京師雖與甘泉講道非有深造居南中三載始覺有得而才氣過高遽爲致良知之說自樹一幟是後畢生執掌軍旅之中雖到處講學然終屬聰明用事而少時之熟處難忘不免逗漏出來要之致良知固可入聖然切勿打破敬字乃是壞良知也其致之亦豈能廢窮理讀書然陽明之意主於簡易直捷以救支離之失故聰明者厭窮理讀書之繁動云一切放下直下承當心龜膽大祇

爲斷送一敬字不知卽此簡易直捷之一念便已放鬆腳根也論者謂其洞見得失足廢諸家紛爭之說生平於象緯律曆及禮樂政事異同無所不究所著思辨錄疏證剖析蓋數百萬言分小學大學立志居敬格致誠正修齊治平天道人道諸儒異學經史子籍十四門凡三十五卷大旨主於敦守禮法不虛談誠敬之旨施行實政不空爲心性之功於近代講學諸家最爲篤實故其言曰天下無講學之人此世道之衰天下皆講學之人亦世道之衰嘉隆之間書院徧天下呼朋引類動輒千人甚有借以行其私者此所謂處士橫議也又曰今所當學者不止於六藝如天文地理河渠兵法之類皆切於用世不可不講其言足砭虛僑之弊後儀封張伯行序其書謂世稱世儀爲朱子後一人余不敢知然其於內聖外王之道思辨有素不可謂非正學干城云明季流寇事亟世儀謂平賊在良將尤在良有司宜大破成格凡進士貢監諸生不拘資地但有文武幹略者輒與便宜委以治兵積粟守城之事有功卽以爲其地之牧令如此則將兵者所至有呼應今拘以吏部之法重以賄賂隨人充數是賣封疆也時不能用明亡不復出鑿地十畝築亭其中不通賓客自號桴亭順治十五年始應學政張能鱗聘爲輯儒宗理要

十七年應諸生之請講學東林康熙五年復講學毘陵已復歸講里中當事屢欲薦之力辭十一年卒年六十二他著有論學酬答宗禮典禮折衷禮衡易窺詩鑑書鑑春秋考論等四十餘種國朝諸儒恪守程朱家法者世推二陸謂世儀及隴其也光緒元年禮部議覆江蘇巡撫張樹聲疏奏奉旨從祀文廟 陳瑚字言夏亦太倉州人明崇禎十六年舉人世儀作格致篇首提敬天二字瑚由此用力遂得要領每日課程以敬怠善過自考嘗與世人論致中和工夫瑚答之曰工夫全在存養省察玩注中約之精之二語約之有漸漸收斂入內意精之有漸漸擴充向外意卽如戒慎恐懼何得偏擇所謂不睹不聞者而用功祇是持敬於己不問其睹聞與否步步存天理於胸中然後漸漸收斂直至夢寐所不及簡精神所不及持純是一團天理此之謂約之此之謂致中慎獨則先從己所獨知之地用力然後推向外去自一事一物以至萬事萬物無不各當絕無一毫人欲此之謂精之此之謂致和世儀諸人皆然其言著聖學入門書分小學爲六入孝出悌謹行信言親愛學文大學爲六格致誠意正心修身齊家治平謂小學先行後知大學先知後行小學之終卽大學之始瑚之學博大精深尤講求經濟大略暇則橫槩

舞劍彎弓注矢其擊刺妙天下值婁江堙塞江南大饑瑚上當事救荒書其預備之政四曰慎災眚早奏報懲浮惰勸節省補苴之政四曰通商勸分興役弭亂軫恤之政四曰招流亡緩徵索審刑獄恤病因又陳支吾三議其議食四條曰勸義助勤轉輸招商米優米肆議兵八條曰嚴保甲練鄉民設偵探勸習射練夫役練牙兵備城守之人備城守之器議信六條曰勵士節和大戶巡郊野安典肆清獄囚嚴督察又籌江南二策曰定常賦以絕蠹漁此治標之法興水利以闢田疇此治本之法皆精切可施行時不能用其論理財謂管子富國之法大約籠山澤之利操輕重之權可施之一國不可施之天下苟利吾國鄰國雖害不恤也爲天下則不然此有餘彼不足不足者亦王土也此享其利彼受其敝敝者亦王民也故桑孔用之漢而耗王呂用之宋而亡時稱爲篤論瑚嘗自言其學如醫之治病求之於古猶方藥也求之於今猶切脈也按脈求病按病定方按方用藥故百發不爽然主人諱疾則良醫亦束手矣明亡絕意仕進奉父寓崑山之蔚村田沮洳瑚導鄉人築岸禦水用兵家束伍法不日而成歲獲豐稔又立孝弟力田爲善三約衆皆悅從父病刺血籲天願以身代父卒遺產悉讓之弟康熙八年詔舉隱逸知

州白登明將以其名上瑚力辭乃已遊其門者多俊偉英略之士十四年卒年六十三卒後村人立祠祀之巡撫湯斌卽其居爲安道書院他著有求道錄淮雲問答築圍說治病說救荒定議等書其孫搜輯彙編爲五十八卷 盛敬字聖傳亦太倉州人諸生長世儀一歲矢志存誠主敬之學篤於孝友居喪三年不飲酒食肉有弟遇之無禮敬始終怡怡家貧齋鹽不給讀書窮晝夜瑚嘗稱其深思靜氣學力日進雖論事或有未當而嚴儒釋之分敬怠之辨至爲精密 江士韶字虞九亦太倉州人諸生其學以世儀爲歸盛敬嘗以世儀開闢士韶懇到稱之同時諸人多務著述士韶以爲三代聖賢之旨盡於昔儒論說惟在躬行而已晚年取所作焚之故不傳於後惟世儀所著思辨錄未有倫次士韶纂輯精要類分而書之遂行於世

芮長恤 蔡所性 吳光 張怡 雷士俊

芮長恤字蒿子原名城江蘇溧陽人明諸生博極羣書文行爲一時冠有書賈挾二十一史截僻句挑之應聲指卷葉無一錯買不取直而去與同邑陳名夏趙理之吳穎彭旭史燧馬世傑世俊等合社講學以忠孝大義相切劘稱瀨上十三子

名夏世俊並師事之甲申之變名夏自給事中污僞命長恤悲咤忿恨賦滄浪吟數十篇福王稱制捕諸從逆者名夏逃歸里詣長恤長恤面壁臥曰君亡不死安用子見爲名夏跪且哭曰嘗再縊不幸爲救者誤長恤厲聲曰胡不三亟麾令去曰吾不忍鳴汝罪也時彭旭率諸同學訐名夏名夏既入國朝修舊郟中旭以法成獄矣會名夏奉命來江南長恤肩輿往扁其外名夏喜出迎叩何言長恤隔帷語曰從公乞彭旭耳名夏諾卽釋旭然訖不一見而返自是耕窮山中足不履城市四十年名夏以大學士還鄉求一面卒不可得貽書候問亦不發視曰山澤之懼一與貴人接便失所守矣時日爲真隱長恤在明時初以制藝名既潛心理學曰學者自有富貴大路安用科第爲然欲得程朱真傳者須取太極圖西銘易傳敘春秋傳敘四篇精研討究豁然無疑然後可以上問濂洛關閩之學又曰昌黎一代儒宗其學雜駁故不見滿二程若學者求爲韓子不求爲朱子未可與言道也生平端方一言一動必軌於道學者多宗之其爲學博而能醇經史疑義考證尤精嘗以綱目分注爲趙師淵作不出朱子手乃取分注之刪削通鑑失其本事者悉列原文於前而推求事理考辨於後著綱目分注補遺四卷論者謂元汪克

寬力崇道學篤信新安而作考異一篇訂僞正舛至今與綱目並列長恤是書證
佐分明具有條理非憑虛肆辨如姚江末流者比可稱綱目功臣他著又有易象
傳解四詩正言禮記通識匏瓜錄 蔡所性字仲全江蘇武進人少喜讀儒先語
錄通五經明亡絕意干祿研究諸史及曆算律呂皇極洪範等書以絕學自任友
人從之講五經同異所性踞高坐言如河漢聽者皆屏息又嘗訪陸世儀於婁中
諸賢與接席者無不稱歎性孝友父病日舐以舌病結以指導糞居喪蔬食異寢
如古禮脩脯所入輒代弟完通賦然有機權談言能微中大盜高三倭官兵莫敢
近所性往說之卽詣城中降里中人素有城府者見所性無不立化也時人以比
康節西山著有律呂解 吳光字與嚴亦武進人明諸生十齡喪母哀毀如成人
及長日誦數千言爲文說理而華旣究心經濟博綜典墳及九流百氏自成一家
言明亡太息流涕取所著付諸火結廬於滬東僻壤玩易自適作野翁傳以見志
盤屋李容至常州與光論學甚契容稱光所著易柏十箋象數易理兼詣其極足
爲來學指南他著有大學格致辨中庸臆說論孟合參各一卷弄丸吟一卷時同
縣陸卿鵠楊瑀皆嘗與容論學爲容所稱卿鵠字儁公明副榜貢生瑀字雪臣與

崑山顧炎武友善炎武著日知錄每就正焉嘗與瑀書曰僕所以深服先生者在不刻文字不與時名教子博探文籍而不求仕進又曰讀書爲己探賾洞微吾不如雪臣其傾倒如此 張怡字瑤星初名鹿徵江蘇上元人父可大明登萊總兵毛文龍被殺邊兵叛可大死之怡以諸生蔭錦衣衛千戶闖賊陷京師偪怡降怡大罵曰吾父子受國厚恩恨不能滅汝以報負罪多矣肯降汝耶賊怒械之不食求死其黨或異而逸之久之歸里隱攝山僧舍不入城市杜戶著書自號白雲山人當事高其節數招之不往或造謁卽踰垣走雖再三不得見也怡性嗜學惡喧喜晏坐其學務淹博而兼主姚江良知之說所著述數十百卷或請貳之弗許曰吾以盡吾年耳已市二甕下棺則並藏焉康熙三十年卒年八十八病革友人遺以美木怡聞之泣曰先將軍致命海島無人視含斂吾受茲忍乎趨易之乃卒著有讀易私鈔二十卷尙書策取十五卷白雲言詩十二卷三禮合纂二十八卷四書會通十六卷大學古本鈔二卷中庸通一解二卷史繫二十四卷諮聞隨筆續筆八卷金陵私乘八卷蠡酌四十八卷志林二卷上律篇四卷詩文集二十餘卷 雷士俊字伯籲江蘇江都人先世居陝西涇陽明諸生少攻古文專力經史已

究心性理書著讀大學孟子二篇其言合於濂洛關閩之旨又謂欲亦原於天天
有理有氣人得其理以成性得其氣以成形有形而有欲使無欲理亦無從附而
見又何殊於釋氏絕色聲香味而歸於虛無寂滅之道哉漳浦黃道周以劾宰輔
抵罪客或譏其好名士俊斥之著好名辨南都立著甲申私議謂宜正位號樹藩
衛飭紀綱上之史可法明亡築室艾陵湖上閉戶著書惟施閏章王士禎諸人始
得相通問年五十八卒著有艾陵文集二十八卷同里張問達字天民明末爲諸
生高傑欲屯兵揚州城內問達詣史可法軍門力陳不可可法怒將斬之或呼曰
此壯士也不可殺召入論時事改容謝焉問達爲學得力於致良知之說刻文成
全集以志私淑著有易經辨疑七卷左傳分國紀事河道末議後舉康熙五年鄉
試官趙城知縣

李容 按中孚名願史館因避諱改作容

李容字中孚陝西盩厔人父可從爲明材官崇禎十五年張獻忠寇鄖西巡撫汪
喬年總督三邊軍務可從隨征討賊臨行抉一齒與容母彭曰如不捷吾當委骨
子善教兒矣兵敗死之容母葬其齒時容年十六母日言忠孝節義以督之容事

母孝飢寒清苦無所憑藉而自拔流俗以昌明關學爲己任自經史子集以至二氏書無不博觀而不滯於訓詁文義曠然見其會通其學以尊德性爲本體以道問學爲工夫以悔過自新爲始基以靜坐觀心爲入手關學自馮從吾後漸替容日與其徒講論不輟當事慕其名踵門求見力辭不得則一見之不報謁曰庶人不可入公府也有餽遺者雖十反不受或曰交道接禮孟子不卻容曰我輩百不能學孟子卽此一事不守孟子家法正自無害陝撫欲薦之哀籲得免然關中利害在民者亦未嘗不爲當事言之也先是容欲求父遺骸以母老而止旣而母歿廬墓三年乃徒步之襄城徧覓不得服斬衰晝夜哭知縣張允中感其孝爲其父立祠且造塚戰場名之曰義林常州府知府駱鍾麟官陝時嘗師事容謂祠未能旦夕竣請南下詣道南書院發顧高遺書且講學以慰東林學者之望容赴之凡講於無錫於江陰於靖江宜興所至學者雲集旣而幡然悔曰不孝此行何事而喋喋於此卽戒行赴襄城常州人士思慕之爲建延陵書院肖像其中容旣至襄城適祠成乃哭祭招魂取塚土西歸附諸墓持服如初喪康熙十二年陝督鄂善以隱逸薦有詔起之固辭以疾十七年詔舉博學鴻儒禮部以海內眞儒薦大吏

親至其家促之起舛牀至省容絕粒六日至拔刀自刺大吏駭去乃得予假治病容戒其子曰我日抱痛自期永棲聖室平生心迹頗在聖室錄感一書萬一見偏而死斂以粗衣白棺勿受弔也自是閉關不與人接惟崑山顧炎武及同邑惠思誠至則款之思誠容四十年所心交也四十二年聖祖西巡召容見時容已衰老遣子慎言詣行在陳情以所著四書反身錄二曲集奏進上謂慎言曰爾父讀書守志可謂完節特賜御書志操高潔及詩幅以獎之容學亦出姚江謂學者當先觀陸九淵楊簡王守仁陳獻章之書闡明心性然後取二程朱子以及吳與弼薛瑄呂柟羅欽順之書以盡踐履之功初有志濟世著帝學宏綱經筵僭擬經世蠡測時務急策等書既而盡焚其稿又著十三經注疏糾繆二十一史糾繆易說象數蠡測亦謂無當身心不以示人居恆教人一以反身實踐爲事謂孔曾思孟立言垂訓蓋欲學者體諸身見諸行充之爲天德達之爲王道有體有用有補於世否則假途干進豈聖賢立言之初心國家期望之本意耶時容城孫奇逢之學盛於北餘姚黃宗羲之學盛於南與容鼎足世稱三大儒惟容起自孤根上接關學之傳尤爲難及云晚年寓富平有富平答問四十四年卒年七十六門人王心敬

傳其學其四書反身錄七卷二曲集二十二卷亦心敬所撫次

白奐彩 党湛 李士瓊 馬棫士

白奐彩字含章陝西華州人明諸生其伯兄嘗及馮從吾之門奐彩聞其緒論私竊嚮往遂棄帖括息進取一反之於經玩易洗心詩禮春秋多所自得明末與馬嗣煜論學寄園律身愈嚴康熙七年聞李容倡道盤屋奐彩與同州党湛李士瓊王四服馬林張珥及蒲城王化泰迎容於家諸人皆年長於容折節北面請教惟謹奐彩於進修之要靡不究極最後以向上一機請容欣然告以安身立命之旨脫去支離直探原本奐彩錄之以告同學題曰學髓後編入二曲集中容既西去奐彩率同志結社切劘恪守師說不入城市不謁官府終日晏坐一室手不釋卷同知郝斌式廬聆其論議歎曰關中宿儒也二十三年卒年七十八奐彩與化泰四服及湛皆先容歿容嘗致書守令表三人墓曰高士表湛墓曰理學孝子 党湛字子澄陝西同州人嘗言人生須作天地間第一等事爲天地間第一等人故自號兩一性至孝父病癩家人莫敢近湛侍養不離側及歿廬墓三年根究理道玩諸儒論學語揭其會心者於壁居恆默坐土室澄心反觀久之恍然有契自是

動靜云爲卓有把持及從容學盤桓日夜未嘗有惰容卒年八十四 李士璜字文伯亦同州人以諸生貢太學天性孝友父疽發於背口吮之而愈親歿喪葬一遵文公家禮篤好正學容至同州示以學髓喜躍如狂自是凝神內照研究先儒語錄二十年如一日嘗四舉鄉飲大賓州守表其閭曰關中文獻年九十卒著有大學正譜二卷羣書舉要二卷孝經要義二卷四書要諦四卷小學約言一卷理學宗言二卷王陳宗言二卷詩餘小譜一卷問疑錄一卷玉山前後集十卷 馬穉士字相九亦同州人父嗣煜生平以正學自許著有五經初說寄園會語羣玉閣集明崇禎閒守武定州殉難死贈太僕少卿穉士少孤力學由廩生充貢既而歎曰聖賢之學不在是也乃一意闇修根極性命之要行不徑坐不倚雖酷暑未嘗解衣痛父殉國難忌日哭泣不食與族祖祿同師李容容爲析經書同異之辨穉士頓悟或詰其故曰無聲無臭六經之所以出亦六經之所以歸也穉士事容尤謹康熙十七年容迫詔命謝絕人事惟穉士及富平惠靈嗣昕夕侍側卒年八十著有白樓存草卷石齋集關學初以馬嗣煜嗣馮從吾後李容出奐彩及穉士諸人同師事容有名於時而郿縣馮雲程武功張承烈朝邑關獨可咸寧羅魁韓

城程良受蒲城寧維垣邠州王吉相淳化宋振麟皆篤志勵學得知行合一之旨至乾隆間武功孫景烈亦能接關中學者之傳

王夫之

王夫之字而農湖南衡陽人兄介之邃於經學明亡匿不復出著有周易本義質四卷詩經違序十卷春秋四傳質十二卷夫之少負儁才讀書十行俱下與兄介之同舉崇禎十五年鄉試流賊張獻忠陷衡州設僞官招夫之夫之走匿賊執其父爲質夫之引刀自刺肢體昇往易父賊見其創也免之父子俱得脫歸既而何騰蛟屯湖南堵允錫屯湖北不相能夫之上書章曠請調和兩軍曠不能用順治四年大兵下湖南夫之入桂林依大學士瞿式耜嘗三上疏劾王化澄化澄欲殺之會有救者得不死聞母病乃閒道歸築土室石船山名曰觀生居杜門著述其學深博無涯涘以漢儒爲門戶以宋五子爲堂奧所作大學衍中庸衍皆力闢致良知之說以羽翼朱子而於正蒙一書尤有神契精繹而暢衍之爲正蒙注九卷思問錄內外篇各一卷以爲張子之學上承孔孟之志下救來茲之失如皎日麗天無幽不燭聖人復起未之能易惟其門人未有殆庶世之信從者寡道之誠然

者不著是以不百年而異說興又不二百年而邪說熾因推本陰陽法象之狀往來原反之故反覆辨論所以歸咎上蔡象山姚江者甚峻所著諸經有易書詩春秋稗疏共十四卷其說易不信陳搏之學亦不信京房之術於先天諸圖及緯書雜說排之甚力而亦不空談元妙附合老莊之旨其說尙書詮釋經文多出新意駁蘇軾傳及蔡傳之失大都辭有根據不同游談其說詩辨正名物訓詁以補傳箋諸說之遺不爲臆斷辨叶韻一篇持論明通足解諸家之轆轤其說春秋考證地理多可以糾杜注之失國朝經學繼起者無慮百十家然諸家所著有輒爲夫之所已言者如子糾爲齊襄公子之說梁錫璵據爲新義輦不書族定妣非諡之說葉酉亦據爲新義皆未見其書也他著有周易內外傳大象解尙書引義詩廣傳禮記章句春秋家說世論續左氏傳博議四書稗疏訓義詳解讀四書大全說諸經考異說文廣義讀通鑑論宋論永曆實錄及注釋老莊呂覽淮南楚辭薑齋詩文集等書凡三百餘卷後人彙刊之爲船山遺書康熙間吳逆在衡湘夫之又逃入深山吳逆平巡撫鄭端嘉之餽粟帛請見夫之以病辭受粟反帛三十一年卒年七十四時海內儒碩推餘姚黃宗羲崑山顧炎武夫之多聞博學志節皎然

世謂相亞云夫之同時又有郴州喻國人辰溪米元倜衡山譚瓊英劉宗源皆以明亡不仕講學衡湘閒著書授徒成就甚衆

謝文洊 甘京 封藩 黃熙 宋之盛 之盛孫士宗

謝文洊字秋水江西南豐人明諸生年二十餘入廣昌之香山閱佛書好之後讀王畿及王守仁書大悔遂與友講陽明之學會於新城之神童峰有王聖瑞者力攻陽明文洊與爭辨累日爲所動取羅欽順困知記讀之始一意程朱邑城西有程山在獨孤及彈琴馬退石之左文洊闢學舍其間名其堂曰尊洛與其徒敦實行修古禮晝之所爲宵必書之考業記過朔望相質訂出入循循里中人不問而知爲程山弟子也時寧都易堂九子節行文章爲海內所重星子髻山七子亦以節概名文洊獨反己闇修務求自得髻山宋之盛過訪文洊文洊遂邀易堂魏禧彭任會程山講學旬餘皆推文洊謂其篤躬行識道本所著有大學中庸切己錄二卷首以君子有三畏講義一篇發明張子主敬之旨以爲爲學之要畏天命一言盡之矣聖人一生戰兢惕厲無非畏天命之心法學者常當提持此語注目而視唯此傾耳而聽唯此稍有一念之私急須當下提醒痛責速自洗滌以無犯帝

天之怒工夫既久樂天境地可得而臻也次爲程山十則亦以躬行實踐爲主末附西銘解一篇謂此爲學者究竟指歸因尊之曰事天謨自言八九易藁乃定竊欲折衷先儒啟發來學云他著又有易學緒言二卷風雅倫音二卷左傳濟變錄二卷大臣法則八卷程門主敬錄一卷初學先言二卷義正編一卷兵法類案十二卷程山集十八卷康熙二十年卒年六十七同邑甘京與文洙友少文洙七歲已而服其誠也遂師之 甘京字健齋南豐人諸生好學能詩文負氣慷慨慕陳同甫之爲人講求有用之學嘗區畫田賦上下上有司行之值邑荒亂京請免荒稅均賦役賑饑平寇又潛身走山砦下知賊中險易陳策請剽人稱其經濟閩中令聞其名欲以重金聘入幕中弗應及師文洙立身砥行溫潤栗理魏禧兄事之其論學謂朱陸歸宿不異所趨之塗異塗異自有失護其失而爭之則害矣著有通鑑類事鈔一百二十卷軸園彙十卷不焚草二卷無名高士傳一卷京與同邑封濬黃熙曾曰都危龍光湯其仁同師文洙時號程山六君子 封濬字禹成順治間貢生性孝友父病祈天請代兄不得於父爲慰解而曲成之年二十四教授里中生徒且百人至四十師文洙少文洙五歲執禮恂恂如未成人性耐勞勤爲

人排難解紛秩秩有次序值清丈邑田濬與黃熙任其事毋敢干以私後彭士望以出位爲戒因自號位齋 黃熙字維緝順治十五年進士官臨川教諭以親老乞養歸文洙長熙僅六歲熙服弟子之事常與及門之最幼者旅進退朔望四拜侍食起饋唯諾步趨維謹彭士望比之朱子之事延平文洙於人少許可獨引熙爲入室弟子性至孝父歿蔬食三年後奉母居山砦母喪山居延燎熙撫棺大慟願以身同燼俄而風返火滅人以爲孝感卒年六十二著有做園遺藁魏禧嘗曰程山之門濬爲最長其德宇尤大醇篤行有道君子也又曰曰都毅而介其仁和而有守京與龍光坦中而好義熙虛己而摯此五君子者性情行己不同而孝友於家廉於財不苟且於言行學古賢者之學而缺然以爲若將弗及則無不同其推挹甚至云 宋之盛字未有江西星子人崇禎十二年舉人少孤事兩兄如父國變後足不入城市結廬警山與同里查轍吳一聖余暉查世球夏偉及門人周祥發講學時稱警山七隱其學以明道爲宗識仁爲要於二氏微言奧旨皆能抉摘異同與文洙交最篤嘗與甘京論祭立尸喪復之禮不可廢魏禧亟稱之禧語京學道必工文章使其言可法可傳之盛非之曰若是則教儒者以作文矣晚讀

胡居仁居業錄持敬之功益密康熙七年卒著有求仁編丙午山間語錄程山問辨髻山語錄孫士宗能傳其學 士宗字司秩雍正四年舉人官南豐教諭乾隆元年舉博學鴻詞以部駁不與試士宗學守程朱謂陸王與老佛之言日與吾黨爭理卽濂洛關閩復生不能驟起而勝也著學統存二十四卷又有史學正藏五卷

彭士望 彭任

彭士望字達生江西南昌人明諸生少與新建歐陽斌元相厲爲有用之學父哲聞漳浦黃道周平臺召對語歎曰鐵漢也臨卒語士望師之道周爲江西布政都事以黨禍逮士望周旋緹騎閒慷慨不撓明年太學生涂仲吉上疏訟道周冤並下獄辭連士望幾不測道周論戍事乃解史可法督師揚州招士望斌元已先在士望至則進奇策請用高左兵清君側之惡斌元助之可法不能用遂辭歸會金聲桓入南昌士望乃挈妻子走寧都贛州破故職方司主事楊廷麟以孤屬諸生彭錕錕死孤爲兵所掠士望贖之遂與同郡林時益依魏禧兄弟居翠微峰講學易堂與程山謝文游髻山宋之盛諸人相往復嘗攜其子壻讀書程山獨孤之琴

臺與文洵論學爲日記其學以陽明念庵爲宗謂從二先生書以仰溯周程朱陸其源無不同者其有不同僅循途之蹟或舟或車或馬或步然並達於所詣之地又謂陽明致良知體用完備從萬死一生得來非可倖致念庵表之曰世間那有現成良知此最足救龍溪輩狂禪之弊晚講求實用與之盛書曰天下五六十年患虛病極矣其下者不足言文章經義名譽氣節皆虛病也相延而至於理學之議論郭廓經濟之影響雲霧袞袞坐談行義高舉顧爲世之龍肉醴泉而不能爲世之布帛菽粟於民生之酷烈飢寒氣運之傾危陷溺則相與從容拱手恃虛美以救之謂可以易天下亦徒見其迂疏憤亂至困弊而莫之救而相隨以死也其真欲救之者亦惟覈名實黜浮僞專事功省議論畢力於有用之實學膽識以充器量以宏精神以斂博雜以去彊力以優以生爲寄以死爲歸以溝壑爲家以忠信才敏之友爲性命操練精熟寵辱不驚庶足以任宇宙之大常大變無所於撓耳時之盛文洵頗不謂然士望自信益堅不自悔也生平嗜朋友海內宿望結納殆徧規諍過失竦切深痛而樂道人之善至老不衰著有手評春秋五傳通鑑及詩文集二十八卷卒年七十四 彭任字中叔江西寧都人諸生少與同邑溫應

搏友邑少年尙兵鬪應搏欲以講學弭之爲亂民所害時寇盜縱橫人不敢晝行任獨往購其屍哭殮之連遭內外喪疑大小戴記喪服諸篇多雜亂無序乃分類次輯爲禮記類編十卷隱居甘貧約結廬巖山名所居曰草亭足不履城市嘗訪其友謝文洊甘京於程山魏禧集同志彭士望等九人講學易堂任其一也任務爲有用之學論朱陸異同謂學者之病不在辨之不紊而在於行之不篤持論頗平著有理學弗措錄十卷周易解說四卷文集一卷年八十四卒任之後有星子干特高安吳瑗俱爲象山之學爲臨川李紱所稱

張自勳張時爲

張自勳字不兢江西宜春人兄自烈字爾公博物洽聞與同里袁繼成善繼成爲山西提學遭誣獲罪自烈上書訟其寃後繼成督師江上招自烈爲助不赴明亡隱居廬山累徵不就年七十七卒著有四書大全辨四十卷正字通十二卷芑山文集自勳與自烈齊名端方孝友重然諾慎取予少卽潛心性理論學以求放心爲本謂陽明言良知是偶有所見故從此推出遂主張立說不若言正心尤爲探本窮源之論著卓庵心書四卷宣城施閏章官江西重建昌黎白鷺兩書院集多

士會講其中自勳與論學閨章推服無閒言生平博極羣書性恥蹈襲絕無剿說以綱目一書非惟分注非朱子手定卽正綱亦多出趙師淵手劉友益誤以晚年未定之本爲中年已定之本遂不求端訊末強辨誣真因詳加考證辨別是非著綱目續麟二十卷校正凡例一卷附錄一卷彙覽三卷如唐以前太子卽位皆書名至唐獨不書劉友益曲爲之說自勳則以爲太子卽位前史皆書名至唐書本紀獨否綱目不過誤從史文不必強爲穿鑿又唐貞觀元年書徵隋祕書監劉子翼不至劉友益尹起莘俱以爲美之自勳據唐書劉禕之傳載子翼後復召拜吳王府功曹參軍終著作郎宏文館直學士謂綱目失考誤以爲陶潛一例如斯之類皆鑿鑿有徵足破陋儒附會之說他著有五經大全正誤四書衆解合糾朱陸折衷二十一史獨斷二十一卷 張時爲字景明江西餘干人幼孤育於祖母旣長傭耕以養好學不輟明福王時舉貢憮然曰仕以爲親也而養不逮栖栖何爲遂棄去性方嚴以道自任讀禮至頭容直日容端憬然心省自是一從事於禮自題讀書處曰內續欲內力相續不間斷也及耄復悟曰專求諸內有徑約之失乃取主一無適之旨密求之無事則存養此心有事則念不他及又隨所得作筭記

曰六一寤言謂前此夢今始覺也他著有爲學約言四卷讀近思錄紀言一卷喪禮去非一卷江右之學多宗陸氏時爲生胡居仁之鄉獨從居仁宗朱子故其言平正篤實爲多又有語錄一卷讀左言一卷詩文集六卷

朱用純 王喆生 陸求可

朱用純字致一江蘇崑山人明諸生父集璜以諸生貢太學大兵下江東城陷不屈死用純恫焉慕王哀攀柏之義自號曰柏廬授徒贍母潛心宋儒書其學確守程朱知行並進而一以主敬爲程長洲徐枋言先須發悟而後可以言學用純曰聖賢之道不離乎事事物物卽事事物物而道在卽事事物物而學在苟欲先得乎道而後言學則離道與事物而二之亦析學與道而二之矣又曰聖賢之學不外一敬敬猶長隄巨防滴水不漏敬之至也一敬而天下之理得天下能事畢變通鼓舞盡利盡神希聖希天之學俱在於是居平精神寧謐動止有常晨起謁家祠卽莊誦孝經友愛諸弟白首無間爲學戒十則以教學者雖祁寒酷暑講論終日無倦容已復作輟講語曰中庸成已成物祇是一誠字統括實實做得聖賢學問不踰一分實實盡得聖賢道理不欠一分方始是誠余今自反果能如是否而

欲安居慕比多見其不知量也又曰今人日用常行無非種種惡習人心中祇辦得卑鄙二字倫理上祇辦得苟且二字必須勘破從前魔障跳出坑坎更從上面探討精微方可進道諸君猛力向前某亦願拜下風何必鄙言是聽哉鄉里爭曲直得用純一言卽解嘗曰識得天理熟當機立應如離弦之矢更不擬議更不矜張真是何思何慮真是行所無事病革語弟子曰學問在性命事業在忠孝言盡此矣康熙二十七年卒年七十二著有刪補易經蒙引四書講義無欺困衡諸錄媿訥集其家訓一篇海內稱誦焉同里弟子王喆生能得其傳 王喆生字醇叔亦崑山人康熙二十一年進士改翰林院庶吉士散館授編修二十四年充會試同考官尋乞養歸少孤母撫之成立初師用純後遊長洲彭定求之門讀書敦行經義性理日有筭記以自檢考歸後兩任邑中清田事爲巡撫趙士麟宋犖所推重其爲學遵程朱而攻陸王謂孫奇逢初守程朱甚篤自鹿善繼誘以文成講習遂復異趣嘗邀講學諸人結會每一會靜坐七晝夜以驗心學著七規一卷又著懿言日錄四卷儀封張伯行稱其精深博大比之抑戒卒年八十一又有素巖文稿二十六卷 陸求可字咸一江蘇山陽人十齡而孤事祖母與母極孝篤志好

學貫通經史順治十二年進士授河南裕州知州時大兵一日數至赭陽一驛事增於前十倍而費減十之八求可貸軍府子錢市馬六十充急發民力遂甦舊額墾田一萬九千三百餘頃近墾八百餘頃而已又以塞河之役逃荒三百餘頃求可設法誘墾汙萊之田二而當一确瘠之田三而當一人勸於農又爲之減鹽引新學校民以父母歌之以最入爲刑部員外郎歷郎中陞福建提學僉事轉布政司參議康熙十八年卒年六十三求可爲學以主敬爲先務而本乎治心言必述六經而所宗者朱子餘錄其長去其短上自象山下至陽明諸弟子未嘗排擊持論甚平而其大旨在兼善天下嘗謂君子所養要令暴慢之氣不設於身體居官必操切擊斷之意少而平易中和之政多又謂理爲事之本事爲理之用臨事不爲私意所動所藉平日有居敬窮理之學然矣秀水朱彝尊稱儒者講學之效見諸行事求可有焉著有語錄四卷密庵文集二十卷詩集八卷

費密

費密字此度四川新繁人父經虞明雲南昆明縣知縣密年十四父病醫言嘗糞甘苦可知生死密嘗而苦父病果起未幾流賊張獻忠犯蜀密上書巡按御史劉

之勃陳戰守之策不省已而全蜀皆陷密輾轉窮山中會有人傳其父消息聞之痛哭遂去家入滇奉父歸至建昌衛爲囚者蠻所得賂之乃脫廣元伯楊展聞密名遣使致聘密說展曰賊亂數年民無食今非屯田無以救蜀民且兵不能自立展納其言命子總兵璟新偕密屯田於榮經瓦屋山之楊村以次舉其法行諸州縣後展爲袁韜武大定所殺密與璟新整師爲復仇計嘗與賊戰躬自擐甲左手爲刃所傷時璟新營於峨眉裨將有與花溪民毆爭者稱言花溪居民下石擊吾營勢且反璟新欲引兵誅之密力爭曰花溪吾民也方與賊戰而殺吾民彼變從賊是益賊也璟新乃止全活者數百家後密還成都省墓至新津爲武大定所掠欲殺之以計得免密歎曰旣不能報國又不能庇親及身不如舍而他去遂奉父北行入秦溯漢江下吳越流寓泰州家焉密父邃於經著毛詩廣義雅論諸書以漢儒注說爲宗密盡傳父業又博證學士大夫與王復禮毛牲閻若璩交後往蘇門謁孫奇逢稱弟子逾月歸奇逢題吾道其南四字爲贈奇逢卒密哭於泰州設主受弔二十一日始焚主然心喪未去懷也杜門三十年著書甚多謂宋人以周程接孔孟盡黜二千餘年儒者爲未聞道乃上稽古經正史旁及羣書著中傳正

紀百二十卷序儒者授受源流爲傳八百餘篇儒林二千有奇自子夏始又著宏道書十卷曰統典論曰輔弼錄明大統必歸帝王不得以儒生干之也曰道傳述明七十子及漢唐諸儒功不可沒也曰古經旨論曰原教明聖道具於經無所謂不傳祕也曰聖門育材論明聖人取人甚寬不可舉一廢百也曰祀先聖禮樂舊制議曰七十子爲後議曰從祀舊制議明漢唐以來學制不可廢先儒不可黜不可予漢唐過薄而予宋儒過厚也曰聖門言道述曰先儒言道述明聖人授受有舊章不可雜不可改易也曰吾道述明聖教不同於二氏也又有古今篤論四卷朝野諍論四卷中旨定錄四卷中旨辨錄四卷中旨申惑四卷皆申明宏道書之旨又有尙書說一卷周官注論一卷二南偶說一卷中庸大學駁義一卷四禮補篇十卷史記箋十卷古史正十卷歷代選舉合議二卷奢亂紀略一卷蠶北遺錄二卷荒書四卷二氏論一卷家訓四卷集四十卷密一足跛工詩古文晚歲取給於授徒賣文人咸重其品悲其遇揚州守爲之除徭役年七十七卒子錫琮錫璜世其學初新城王士禎賞密詩遂與定交後錫琮錫璜並以詩名至今談蜀詩者推費氏爲大宗

耿介陳恪

耿介字介石初名冲璧讀北山移文至耿介拔俗之句遂更今名河南登封人順治九年進士改翰林院庶吉士在館中與睢州湯斌共處一室以澹泊寧靜相砥礪授內祕書院檢討出爲福建按察司副使巡視海道歷福興泉漳延建六府所過禁迎送餽遺造船命下介入山採木監造未嘗告勞大兵復閩安檄築城海上介晝督工役夜備海盜四十餘日成表裏石城三百六十丈復修營房二百餘間屹爲重鎮康熙元年轉江西湖東道缺裁改直隸大名道所至除積弊革冗費戒貪墨恩威大著時方嚴旗逃之令株連動三四十人介惻然曰功令固嚴曲全由我獨不可行仁於法中乎在任期年清三百餘案不牽一人民咸感之丁母憂歸服除不出詣蘇門受業孫奇逢執弟子禮甚堅篤志躬行以昌明絕學爲己任體明道內主於敬而行之以恕語以敬恕名其堂興復嵩陽書院定講課汲引不倦來學者衆二十五年斌疏薦介賦質剛方踐履篤實家居澹泊潛心經傳學有淵源召爲侍講學士旋陞詹事府少詹事特命輔導皇太子嘗命書字介書孔門言仁言孝蓋仁孝一理仁者孝之本體孝者仁之發用不言仁無以見孝之廣大

不言孝無以見仁之切實四十三字以進上悅書存誠二大字賜之會斌被劾介引疾乞休詹事尹泰劾介詐疾並劾斌不當薦介部議革職奉旨耿介免革職依原道員品級休致在朝凡五十三日遂歸歸後仍主嵩陽講學不輟介之學大旨以朱子爲宗嘗與斌書以爲道本中庸作不得一些聰明執不得一些意見逞不得一些精采斌然其言所著孝經易知斌開府吳中頒行所屬他著有中州道學編理學要旨敬恕堂存稿二十七年卒於家時中州講學者有上蔡張沐新安陳榕沐見循史傳 陳榕字元熙康熙三年進士官馬邑知縣邊陲殘破榕招集流亡賑貧卹孤民困漸蘇旋以告歸少專意宋儒之學檢身制行以邑先達孟化鯉呂維祺爲法病學者悖謬朱注潛心體認著四書認注說歸後主嵩陽以所注性理諸書講授問業者滿戶外後以疾卒於家介著中州道學編凡五十七人始二程子終於榕

崔蔚林 張潛

崔蔚林字夏章直隸新安人順治十五年進士改翰林院庶吉士同年孝感熊賜履倡明理學蔚林與之遊遂研究諸儒書曰道在是矣逾年散館授檢討遷宏文

院侍讀晉侍學讀士轉翰林院侍讀學士康熙初遷侍講學士乞假歸時年甫三十曰吾歸事吾學耳既歸研究諸經尤潛心於易已往蘇門從孫奇逢遊登獻臺歷邵窩觀梅弄竹自謂有春風舞雩之樂尋丁繼母憂服闋補原官充日講起居注官詔撰易經講義蔚林閉門謝客覃竭思慮冀有所裨助上嘗問家居時有何著作蔚林書致知格物說進上命之講既畢上曰然則朱王之說皆非與對曰臣不敢以爲非但臣十年體認如此尋以疾告歸初論學謂學有三關義利毀譽死生晚而所得邃深曰其實義利二字盡之矣戒著書太早不輕立言有四書講義解易蔚州魏象樞睢州湯斌道義交也蔚林聞其先後卒傷悼不止疾益篤二十六年卒年五十三 張潛字上若直隸磁州人明兵部尙書鏡心子崇禎末寇躡河朔奉母行遁崎嶇二千里追尋其父於姑湖順治六年成進士授內宏文院庶吉士在館中與湯斌切磨爲聖賢之學聞母病卽告歸日夜侍湯藥偕妻劉弟衍割股以進既連丁內外艱哀毀骨立念妻孝於姑妻卒終身不再娶家居二十年不妄交遊惟與孫奇逢往復論學嘗曰真學問在行誼若知而不行猶未知也又曰除忠孝倫常外別無道學年五十八卒著有讀書堂集十卷

馬光裕 曹續祖

馬光裕字玉筍山西安邑人順治四年進士五年授工部都水司主事六年奉使管理衛河力督疏濬著衛河圖說林慮山寇據險自固爲民患光裕致書總鎮謂宜懾以威撫以恩使知投戈爲良總鎮如其言山寇遂降九年使竣轉吏部文選司主事陞考功司員外郎晉稽勳司郎中歷驗封考功凡五遷在文選日會推大臣侃侃持正爲公論所服在考功日議天下官吏功罪悉平心以處柱聯有事必告天心惟向日語十三年正月掌計典竭七日夜逐人逐事剖析注册錄手夾誌之時以爲煩及上問降級不同之故光裕據手夾一夕疏成咸駭爲神奇尋以母老乞養歸光裕幼莊雅步履不苟而渾厚中有風采無敢以褻狎見者其學以主敬爲把柄以明倫反己爲工夫奉使時訪容城孫奇逢於蘇門官京師與蔚州魏象樞比鄰皆往復辨論期體之冠衣蔬醴寢興坐立之際嘗作康窩記謂願爲君子之居易不爲小人之戚戚庶幾理順心安雖有他嗜好弗移此樂又言人一念悚惕不爲私累便是理欲分界便是人定勝天其潛修自反如此歸里後日依母側必得歡心處袒免以下至於里黨一以至誠惻怛相流通建育德書院集邑之

才俊月三會崇正學黜浮詞人咸興起焉晚年誠子曰天地惟無物不有無物不容所以成其大若有一毫計較便生間隔與天地生物之心便不相似象樞言交光裕二十年其反躬實踐往往自愧弗逮可謂醇儒康熙十年卒年六十一著有止齋集 曹續祖字子成山西鄉寧人順治十一年舉人性至孝既舉於鄉念母春秋高閉門侍養終身不出母歿自始喪暨虞儀節悉遵家禮妻死亦然且爲帖辭殺牲贖錢之奠洪洞范鄙鼎嘗錄其事入理學備考中雅嗜讀書尤專精理學家言嘗作原命謂天之命以天道而言天命之以天道之及於人物者而言命體也命之用也體用一原不得區而二之又作原性謂在天曰理在人曰性性卽理也一理而二其名非二其名而不一其理又作原心謂心爲形氣之屬而獨號神明所以能具衆理而應萬事能具衆理者心之量能應萬事者心之才非此心之外別有一心然非聰明睿知如聖人學問開拓之功必不容已孟子以其心爲同然義理之心於其放也必學問求之又曰盡其心充其心是明以理不外氣必用功夫以全本體而後能立此大者也彼靜坐之學有流而爲瞑目入定者良知之學有流而爲披剝參方者因而祇言冥悟不事詩書直將腔中之物置爲死地而

心之爲心皆追逐於無何有之鄉心學顧如是耶續祖隱居城西之臥雲洞凡二十年於實事實理推勘到極精細處年八十猶莊誦宋六子書不少輟有四書綱領四書竊疑易書啟蒙約義太極通書薛錄等書而文集則皆闡發義理之言

范鄩鼎 李生光 党成

范鄩鼎字彪山西洪洞人康熙六年進士祖宏嗣父芸茂俱及絳州辛全之門芸茂天性孝友力行全所講執敬之學崇禎末負母避寇又隻身代父入見僞官俱得免明亡杜門不出卒於家鄩鼎少時父授以全所著養心錄曰此辛先生第一書也初以五經應試嗜左國秦漢之文務爲奇奧旣而曰人不爲理學將爲何如人文不爲理學將爲何如文自是益究心濂洛關閩諸書闡明辛全之學性至孝父往見僞官時牽衣仆地竟夜乃蘇及通籍養母不仕閉戶讀書立希賢書院置學田贍學者河汾人士多從受經與錢塘應樞謙蓋屋李容以理學著於南北十八年太常寺卿朱裴薦舉博學鴻儒以母老辭四十二年聖祖西巡鄩鼎迎駕進所輯理學書御書山林雲鶴四字賜之後卒於家鄩鼎爲學不開講堂不事著作不主一家言惟彙輯古今嘉言懿行以教學者初輯理學備考劄取辛全孫奇

逢書十卷續補已說六卷後復剋取熊賜履張夏黃宗羲書合三十四卷嘗以寄平湖陸隴其及李容隴其謂薛胡王陳不當并列容則謂姚江一變至道孫鍾元明日張膽主張姚江可謂卓見然鄒鼎復新城王士禎書云馮恭定有言除卻氣節事功文章將於何處見道學近人指文成爲異端狎侮前哲訕謗學官先生謂其無羞惡之心僕更謂其失爲下不倍之道也至於黃梨洲學案屬意專在文成亦屬偏見僕取其收羅宏富自敘處不諱淺深各得醇疵互見之意耳蕭山毛奇齡序其書謂鄒鼎無偏陂之見存於中云他著有五經堂文集五卷語錄一卷三晉詩選一卷又以祖宏嗣有晉垂棘編作續編十九卷鄒鼎初得世祖所頒勸善要言牛戒彙鈔刊布鄉里故垂棘續篇兼言感應之說然網羅放失山右文獻賴之 李生光字闇章山西絳州人幼端方不與羣兒伍未冠爲諸生聞辛全倡學河間遂往受業篤於內行事親至孝全深重之明亡絕意仕進自號汾曲逸民構一草堂日夕讀書其中以二南大義程朱微言訓門弟子著有儒林辨正崇正關邪彙編凡萬餘言衛道之力甚勇學者多傳誦之 党成字憲公亦絳州人幼爲學有志聖賢村居鍵戶日誦濂洛關閩書以身體之其學以明理去私爲本生平

不求人知鄙鼎曾揚之於人意甚不憚時日爲狷者家貧取與不苟與人語悉本諸經嘗爲友人作一齋解云朱子曰一者誠而已矣周子曰聖可學乎曰可有要乎曰一爲要一者無欲也經傳所載若一德若一貫誠之說也所謂聖也若惟一若克一無欲之說也所謂學聖者也致力於無欲則聖可學矣鄙鼎嘗稱其言其辨朱陸異同謂論者多以陸爲尊德性朱爲道問學此言殊未然蓋朱子之道問學實以尊德性也陸氏則自錮其德性矣何尊之可云陸子嘗曰不求根本馳心外物理豈在於外物乎此告子義外之學也朱子曰本心物理原無內外以外物爲外者是告子義外之學也卽此數語可以見二家之異同矣其辨析精當類如此蔚州魏象樞聞其名敦請講學三返卒不答象樞益高之著有學庸澹言日知錄等書弟子同里李毓秀傳其學毓秀字子潛謹守師說嘗曰西銘太極相爲表裏西銘言其當然太極言其所以然西銘猶大學太極猶中庸也年八十三卒

胡承諾 彭大壽 蕭企昭

胡承諾字君信湖北天門人明崇禎舉人入國朝隱居不仕臥天門巾栝閒順治十二年部銓縣職康熙五年檄徵入都六年至京師以老乞歸構石莊於西村自

號石莊老人窮年誦讀於書無所不窺而深自韜晦晚著繹志繹志者繹己所志也由聖賢修身立命以及帝王之任官行政制事治人名臣賢士之所以持躬成業凡民之所以居室盡倫莫不兼綜條貫原本道德切近人情考據古今推準時會爲有體有用之學自志學至自敘凡六十一篇二十餘萬言其言有曰性原於天其體常明非物欲所能蔽其或蔽之則以學埽除之命通於性其理常定非吉凶所能侵其或侵之則以學持守之故學者性所由盡命所由正也人有蔽塞求通則通矣以其知學也物無求通之志故蔽塞自如以其不知學也然則爲學之功非直通塞之關又人物之別也又曰性授於情而後有益於天下情依於性而後無害於天下又曰醉飽傷生多於飢渴文字伐性甚於顛蒙法令誨奸捷於教導又曰根本未固不必豐其枝葉親戚多怨不必問其交遊言行多疾不必觀其事業不見敬於州里不必論其立於朝廷臨於民庶也又曰物必有措置之所措諸其所聖人不能易也義者事之所也事有常有變而義以爲中常之所宜聖人用其中非用其常也故處常足以應變變之所宜聖人從其中不從其變也故應變所以守常又曰六經者復性之書也其議道也以聖人爲則其制法也以衆人

爲心於聖人見道之極於衆人見道之同衆人之所同卽天心也治法盡是矣舍此求治必秦漢以下任勢之爲不久而遂敝似治而實亂又曰欲立法度先正人心欲明號令先慎起居欲用刑辟先崇教化欲撥亂興治先使一綱舉而萬目張又曰聖王之有用舍所以變化人才不但澄清流品意在澄清則綜覈之念多於愛養官常雖勵僥倖者亦叨竊其閒意在愛養者長育之指旣切名實之辨自著賢者無不遂其志不肖者有改悔之益又曰法之將壞紕繆居多如繩之將絕不能縛物也有司更加以苟且是引將絕之繩縛難繫之物健者放逸莫追所繫縛者跛蹙而已又曰古之人不敢輕言變法必有明哲之德於精粗之理無所不昭不獨精者爲之地卽粗者亦爲之地有和悅之氣於異同之見無所不容不獨同者樂其然卽異者亦樂其然然後可奪其久安之法授以更新之制而不驚顧不謹譁也又曰能聚斂者未必能富國也能富國者未必能安天下也富在筐篋府庫則上溢而下漏富在大夫之家則本顛而末蹶富在市廛則金生而粟死必也富在四野然後貨財流天下安矣又曰欲富國者當使君民之力皆常有餘民之餘力生於君之約取君之餘力生於民之各足皆根柢經史旁羅百姓而折衷於

周程張朱之說承諾自擬其書於徐幹中論顏之推家訓然其精粹奧衍非二書所及也二十六年卒年七十五別有讀書說六卷文體類淮南抱朴鱗雜細碎隨事觀理而體察之殆繹志取材之餘與是書相表裏又有菊佳軒詩今不傳彭大壽字松友湖北孝感人明諸生少端謹及長有志伊洛之學博探先儒語錄參考經傳寒暑不輟入國朝絕意進取授徒自給屢空晏如有邀之會講者辭曰我輩閉戶潛修固貴同志商訂然徒僕僕都邑互相標榜意將何爲大吏聞其名冀一見俱以老辭康熙二十九年卒年七十九著有大易詩經春秋合解魯岡通禮等書共一百三十四卷其魯岡或問四卷言身心治道有功聖學同縣程大純字漢舒康熙中貢生黃岡縣教諭好學敦行誼獎訓士類多所成就所著筆記二卷皆講學之言謂陸王雖矯枉過正然用以救口耳之學不爲無功所見殊爲平允

蕭企昭字文超湖北漢陽人順治十四年副榜貢生少稟異姿博聞強記下筆數千言與孝感熊賜履友善銳志正學嘗游京師與賜履辨儒佛之邪正朱陸之異同賜履見其功夫精進畏服非常彼此箴規拳拳不已企昭之學尊法朱子排斥陸王而心平氣和無明人喧闐之習其東林要錄序曰當其始也出於士大夫

意見之相歧聲名之相奪而其後也舉國家之大命隨之其同時尙論錄書後曰當日東林魏璫之門戶牢結而不可破一勝一敗正不敵邪遂至殺戮忠良剝削元氣感召災祲醞釀盜賊雖食小人之肉而寢其皮寧足以紓其恨哉然而小人不足責也彼所稱爲君子者持意見快恩讐以和衷易處之事爲諛語相加之行激而生變禍貽於國又安得盡歸罪於小人乎均平心之論體清羸善病而潛心著述康熙八年卒年三十三著有客窗隨筆一卷再筆二卷日記一卷雜筆一卷後人哀爲一編總名性理譜又閤修齋稿一卷

曹本榮 陳大章 萬年茂 劉夢鵬

曹本榮字木欣湖北黃岡人順治六年進士改翰林院庶吉士布袍蔬食以清節自勵八年授祕書院編修九年應詔上聖學疏千言其略云皇上得二帝三王之統則當以二帝三王之學爲學誠宜開張聖聽修德勤學舉四書五經及通鑑中有裨身心要務治平大道者內則深宮燕閒朝夕討論外則經筵進講敷對周詳君德旣修祈天永命必基於此有詔嘉納十年擢右春坊右贊善尋陞國子監司業以正學爲六館倡刊白鹿洞規以教士十一年轉中允十二年世祖章皇帝甄

拔詞臣品端學裕者充日講官本榮與焉十三年陞祕書院侍講左春坊左庶子兼侍讀日侍講幄辨論經義世祖章皇帝諭曰易自魏王弼唐孔穎達有注與正義宋程頤有傳朱熹本義出學者宗之明永樂間命儒臣合元以前諸儒之說彙爲大全皆於易理多所發明但其中同異互存不無繁而可刪華而寡要且迄今幾三百年儒生學士發揮經義者亦不乏人當加採擇折衷諸論簡切洞達輯成一編昭示來茲乃敕本榮與傅以漸撰易經通注九卷鎔鑄衆說詞簡理明爲說經之圭臬本榮素善病上遣醫診視御筆仿巨然畫賜之上一日讀孟子人知之亦囂囂顧本榮曰自得無欲汝足當之十四年充順天鄉試正考官九月充經筵講官十一月以失察同考官作弊吏部議革職上以其侍從講幄日久宥之十八年遷翰林院侍講學士轉侍讀學士改國史院侍讀學士康熙四年以病乞歸卒於揚州年四十四本榮之學從陽明致良知入而加以踐履篤實之功嘗謂明德與仁皆心之妙用性原不睹不聞見此之謂見道聞此之謂聞道又謂顏子不改其樂從戒慎恐懼中來初著居學錄自序謂孩穉知能而同然之仁義已達墟墓哀敬而百千之禮制以生仁體事而皆存心隨處而各具又著五大儒語要以程

朱薛與陸王並敍又著王羅擇編二溪之後附以白沙他著有周張精義格物致知說及書紳錄十卷奏議稽詢四十四卷病亟時行李蕭然門生計東在側猶教以窮理盡性之學其卒也容城孫奇逢哭之比之元許衡子宜溥由廕生薦舉博學鴻儒試授檢討本榮之後黃州學者有陳大章萬年茂劉夢鵬 陳大章字仲夔亦黃岡人康熙二十七年進士改翰林院庶吉士以母老乞歸少侍父官粵交梁佩蘭陳恭尹工詩古文歸後築室松湖鍵戶讀書究心天人之理學益邃深於毛詩著詩傳名物集覽一百卷凡三易稿乃成後摘錄鳥獸蟲豸鱗介草木十二卷附梓徵引繁富可爲多識之助他著又有讀史隨筆抱節軒類記玉照亭詩北山文鈔卒年六十九 萬年茂字少懷亦黃岡人乾隆元年進士改翰林院庶吉士散館授編修澹於榮利與趙青藜蔡新輩以道義相切劘時史館例進經義年茂指陳時事不避忌諱掌院鄂爾泰讓之不爲動六年充山東鄉試正考官七年充會試同考官梁國治劉墉皆出其門尋擢御史遇事敢言如請免蘇州米豆稅鬪毆未及丁請勿償皆議行越二年上疏劾于振陳邦彥其略曰廉恥爲國之維大學士列清華之長頃者皇上賜宴瀛臺殊恩異數千載一時際此隆施正當深

自砥礪詎有侍讀學士于振陳邦彥向侍郎傅恆越禮獻媚近前屈膝觀禮之場衆目驚駭請予罷斥俾知無禮之逐共敦羞惡之心奏入上因其語稍戇抑之遂免歸後修高宗實錄仁宗覽其疏命勿諱歸後主講麟山涑水鷺洲豫章河東岳麓江漢各書院學者咸尊仰之著有周易圖說六卷發體用一源之旨楊名時見而歎曰歷聖心傳在是矣五十七年重宴鹿鳴卒年九十 劉夢鵬字雲翼蘄水人乾隆十六年進士官直隸饒陽縣知縣饒故多姦猾夢鵬緝之力案無留牘緩徭役免浮稅造士撫民循聲卓著以丁艱歸尋卒著有春秋義解十二卷大旨推本公穀謂公穀比事屬辭義不詭於儒者又著有屈子章句

張貞生 張烈 張能鱗

張貞生字幹臣江西廬陵人少入塾受經卽有志聖賢之學順治十五年進士改翰林院庶吉士散館授編修居京邸以苦節稱嘗上諫止游畋一疏論者以比陸宣公擢國子監司業課諸生嚴正尋遷侍讀康熙十年充日講起居注官在經筵講書陳說無餘上命之賦詩貞生辭以小道不足爲涖侍講學士時議遣大臣巡方貞生言徒擾百姓無益察吏安民當責成督撫以出位言事降二級然卒罷

巡方之差貞生初闡陽明良知之說後讀羅欽順困知記乃專宗考亭以慎獨主敬爲歸粹然一出於正與孝感熊賜履並以理學名嘗與賜履書曰若提明善二字謂可包知行姚江復起將有詞於我矣蔚州魏象樞問孔顏樂處從何處尋貞生曰下學上達克己復禮因舉山居聯語曰孔子何以樂發憤忘食顏子何以樂既竭吾才嘗謂學問有漸進工夫別無頓悟法門又謂諸家言自然言頓悟不問元氣虛實專用表散之劑不害人不止矣所居蓬蒿滿徑突無炊煙大書座右曰最危是人禽之界喫緊在義利一關歸時不能具裝故人餽饍一無所受家居構我師祠祠薛胡羅高四先生又捐宅爲誠意書院自於玉山下葺頽垣居之十四年奉旨召用至京卒年五十三病篤友人候之猶惓惓言學不已著有唾居隨錄四卷庸書二十卷玉山遺響六卷後平湖陸隴其見其書深爲嘉與稱貞生氣能抗萬乘之威力足卻紛華之習乃區區整庵一書遂退然自下盡改其故學非天下大勇其孰能之因鈔其粹語入集中隴其同輩中最嘉與者有張烈 張烈字武承順天大興人康熙九年進士授內閣中書十八年舉博學鴻儒試列一等三名改翰林院編修預修明史二十一年充會試同考官二十四年遷左春坊左贊

善尋卒年六十四烈少聰穎讀書日數行下及長潛心理學事繼母至孝委曲承順無閒言居官以清白自勵不屑世俗榮利純如也在史館時作史法質疑一書通論史體分纂孝武兩朝劉健李東陽等傳時推其有史遷筆意又修明史典訓及四書講義諸書編輯精當其學以程朱爲宗深疾陽儒陰釋之徒以閑邪衛道爲己任謂人之心非別有一物在窈窈冥冥中視聽言動皆心所在也善治心者治視聽言動卽治心也治倫物政事卽治心也象山陽明言本心言良知以下學講習爲支離無本領此禪門直指人心之說聖門無是也著王學質疑六卷分五篇一辨性卽理之說一辨致知格物之說一辨知行合一之說一爲雜論一爲總論其攻擊姚江甚力陸隴其序謂其能盡埽王畿周汝登之毒羅欽順陳建後此最爲深切著明同時宗洛閩者皆奉爲圭臬惟持之太過以明之亡國歸罪守仁未免鍛鍊云生平著述皆有關人心世道之文於經尤邃於易所著讀易日鈔六卷刪改四十餘過易箒前數日猶合蒙引通典存疑諸書補訂知來藏往二義其書一宗朱子本義因象設事就事陳理說易家之不支蔓者也又有攷堂文集二卷 張能麟字玉甲亦大興人順治四年進士除浙江仁和縣知縣洊陞四川按

察司副使康熙十八年舉博學鴻儒試罷歸其學宗程朱於金谿姚江直指爲禪陸隴其亦甚稱之嘗督學江南著儒宗理要孝經衍義二書以教學者又有詩經傳說取裁十二卷西山文集九卷

應搆謙 姚宏任 秦雲爽

應搆謙字嗣寅浙江仁和人明諸生生而有文在手曰八卦左耳重輪右日重瞳少卽以斯道爲己任年二十三作君子自勉論殫心理學以躬行實踐爲主與錢塘虞鈞蔣志春等爲猿社取有所不爲也性至孝授徒養母三旬未娶人問之曰娶則無以養母鰥居可俟也歸安沈士毅慕其義妻以兄女資使奉養搆謙終不肯入私室母歿除喪始成禮家居足不出百里隘屋短垣貧甚淡如也杭州府知府嵇宗孟數式廬欲有所贈囁嚅未出及讀搆謙所作無悶先生傳乃不敢言海寧知縣許西山請主書院造廬者再搆謙辭曰使君學道但從事於愛人以德足矣康熙十七年詔徵博學鴻儒內閣學士項景襄李天馥交章薦搆謙輿牀以告客有勸者曰昔太山孫明復嘗因石介等請以成丞相之賢何果於卻薦哉搆謙正色曰我不能以我之不可學明復之可巡撫爲言實老病不能行乃免徵搆謙

爲學不喜陸王家言嘗謂陽明之功譎而不正又謂陽明自少獨學無師堅於自用其論性論太極亦頗與程朱不同然其教人用功必以窮理格物爲本謹守朱子家法讀書務窮底蘊所著述二十八種於經有周易集解詩傳翼書傳拾遺春秋傳考禮學彙編論孟拾遺學庸本義孝經辨定而古樂書二卷議論醇正考訂簡覈深得要領自序曰夫樂何爲而作也民受天地之生稟陰陽之氣有清濁之聲而性情形焉聲之變有萬而不離於五喉音宮齒音商牙音角舌音徵唇音羽五者備矣無中聲則不發中氣實矣無五者則不聲此民之具於天者也然此五者惟中土之人得其中九州之外偏氣所極皆得其一方之音而不能變至於禽蟲則唯具一聲聖人懼人之習於偏音而失其中性乃取十二月之中氣命神瞽考中聲而量之以制此十二律所由起也其聲之下而濁者至黃鐘而極高而清者至應鐘而極彼此旋宮因時發歛大聲不至震越小聲不至哀細使天下之人皆以爲節聽而法之以和其聲以平其心然後耳目聰明血氣流行風俗變化師訟不興職是故也今宗伯不考聲學宮不正律使俗樂恣行於天地之間以敗亂人心而蠱惑風俗嗚呼豈不痛哉又著性理大全二十八卷因性理大全增損之

而退太極圖說於末卷其論陽明一卷陸隴其嘗特表之曰王學考又教養全書四十一卷分選舉學校治官田賦水利國計漕運治河師役鹽法十考略仿文獻通考而於明代事實尤詳其不載律算者以徐光啟已有成書不載輿地者以顧炎武顧祖禹方事纂輯也又潛齋文集十卷康熙二十二年卒年六十九門人錢塘凌嘉印沈士則能傳其學而姚宏任尤以篤行稱嘉印字文衡著有春秋集解緒餘一卷春秋提要補遺一卷康熙三十七年卒年六十一士則字志可深於禮學後嘉印之卒三年 姚宏任字敬恆亦錢塘人少孤隱市廛其母偶見買絲銀下劣慍甚曰汝亦爲此乎宏任長跪謝願得改行乃授學於搗謙日誦大學一過一言一行服膺師說搗謙不輕受人物惟宏任餽不辭曰吾知其非不義也然宏任不敢多有所將每時其乏而致之終身不倦搗謙歿宏任執喪如古師弟子之禮餘姚黃宗炎稱之曰是獨行傳中人也晚年以非罪陷縲綫憲使閱囚入獄宏任方朗誦大學異之入其室案上皆程朱書與語大驚即日釋之然卒以貧死秦雲爽字開地亦錢塘人受業於同里虞鈞鈞之學兼取陸王而以朱子爲正雲爽始從事陽明之學後頗疑朱子晚年定論之說乃著紫陽大旨八卷分八門一

曰朱子初學二曰論已發未發三曰論涵養本源四曰論居敬窮理五曰論致知格物六曰論性七曰論心八曰論太極大旨以第一卷爲未定之論二卷以下則眞知灼見粹然一出於正然其謂陽明之弊在以無善無惡爲心之體若良知之說不可謂非孟子性善之旨又謂陽明獨崇大學古本能絕支離之宿障有功吾道又謂先儒所見各有不同吾人最急無如爲己若陽竊衛道之虛名竟立相持之門戶開罪名教不敢效尤其說頗涉調停雲爽與應搆謙交數十年搆謙初爲之序後屢貽書相諍陸隴其亦貽書雲爽以爲於王學埽除未盡云同里施相字贊伯亦學於鈔明亡棄諸生隱居河渚爲小閣祀鈔與搆謙雲爽及萬斯選徐狷石等數譚讌其閒相與論學不分門戶不標宗旨所著書燬於火僅存遺詩一卷

汪佑 吳曰慎 施璜 汪璉

汪佑字啟我安徽休寧人十歲讀孟子夜夢天日晦冥舉手麾之覺而詢諸師師曰汝今所讀正人心息邪說孟子良爲此也稍長慕元劉因所評周程張邵朱呂之說以幸生朱子鄉願私淑終身篤好小學近思錄遵朱子半日靜坐半日讀書法明崇禎末寇事棘佑憂之著平寇十六策思效伊川詣闕上書故事後以時不

可爲不果上遂隱居事親教授生徒以供甘旨友人邀講還古書院佑見所講多雜陸王說乃與同人發明正學以陳建學部通辨互相研究嘗曰至善無惡性之體有善有惡情之動知善知惡爲良知爲善去惡爲良能擴而充之盡其才窮理盡性至於命斯爲大中至正斯爲至誠無妄乃陽明反以無善無惡爲心之體何耶顧端文有言釋藏十三部五千四百八十卷一言以蔽之曰無善無惡其禍可勝言哉佑爲學以實心窮實理實功成實修二語自警歛汪知默汪德元江恆胡鼎講學紫陽書院佑以紫陽者明道之壇坵乃與知默等訂六邑同人振興其會歲以朱子生日行釋菜禮講學三日遵白鹿遺規天寧誨言嚴斥歧趨使循正軌知默等輯會講語名理學歸一以寄無錫高世泰世泰合魏裔介刁包諸人語並梓之爲紫陽通志錄當時徽州學者崇尙朱子佑功爲多著有易傳闡要禮記問答大樂嘉成四書講錄五子近思錄星溪文集其尤注意者明儒通考一書世泰千里借鈔謂得見此書瞑目無憾焉 吳曰慎字徽仲安徽歙縣人諸生篤行好學尤致力宋五子書其學以敬爲主故號曰敬庵嘗作性情說謂孟子道性善當時有異論蓋未嘗爲氣質之說以通之然推孟子口之於味之類而曰性也又曰

動心忍性則亦就形氣嗜欲而言又犬之性不若牛之性牛之性不若人之性亦謂氣稟之殊是孟子雖未言氣質而其意已躍如言外也性囿於氣質發而爲情不能盡善欲理性情非治心不可欲治心非敬義不可蓋中和者性情之德敬者所以中義者所以和中庸之戒懼敬也慎獨義也敬義者所以變化氣質克己復禮之道也又以金谿之徒援儒入釋非痛切明辨無以盡絕根株悉祛障蔽因著就正錄敬庵存稿諸編嘗游梁谿從高世泰游後還歙會講紫陽興起甚衆著書三十餘種易學尤深有周易本義翼周易集粹爻徵數十卷爻徵取史以證象尤曉然於貞勝之旨御纂周易折中曾取其書數十則 施璜字虹玉安徽休寧人少應郡試入紫陽書院聽講瞿然曰學者當如是矣遂棄舉業發憤躬行已而會講推璜璜先一日齋宿務設誠以感人教學者九容養外九思養內以造於誠先後主講垂四十餘年康熙三十二年聖祖賜學達性天額於紫陽書院璜因輯書院志十卷初璜好學不敢自是聞四方名賢徒步千里嘗過梁谿訪高世泰將歸與世泰約期某年月日當赴講及期世泰設榻以待或曰千里之期能必信乎世泰曰施生篤行君子也言未終璜果至又嘗應聘金陵與孝感熊賜履論學尤相

契賜履稱其易說西銘問答太極圖注翼有功經傳及賜履再用璜遺之書曰國家歲漕東南粟輸京師累費巨萬如使畿甸及齊晉之地相水利以興稻田則數百萬之粟可取之如反掌也賜履善其言其學以復性爲宗旨主敬爲工夫自爲日記立存心行事讀書接人吐論五日注其旁曰無錄息也錄善掩不善欺也息則恥欺則甚恥每日從朝至暮以所行所得注於下題曰思誠錄如是者亦四十餘年又以文成之道不熄朱子之道不著講論之餘悉力排擊論者謂其崇尚正學與汪佑同功他著有誠齋問答性理發明易書詩四書釋注五經臆說訂學庸或問辨學彙言四禮要規新安塾講錄紫陽通志續錄其五子近思錄發明小學發明二書尤爲海內傳誦 汪璩字文儀亦休寧人十歲通經史十六卽潛心性理書力於躬行一言一動必秉成法平生不妄交游所師友者高世泰吳曰慎諸人爲學一遵朱子而得力尤在學部通辨一書主講東林力嚴陽儒陰釋之辨深於易著讀易質疑二十卷凡八易稿乃成熊賜履極稱之湘潭陳鵬年與論易璩爲反覆於吉凶消長進退存亡之道及鵬年作令西安猶貽書勉以古之循吏卒年七十四他著有周易補注大學章句繹義語餘漫錄悠然草詩文集後儀封張

伯行見汪佑吳曰慎施璜及璜所著書謂佑五子近思錄擇朱子書之精粹而纂集之其惓惓爲道之心甚至曰慎晰理精解經密不淆於俗而能救俗之蔽璜見道卓行道勇衛道力不愧爲紫陽嫡系因編曰慎文集爲六卷璜文集爲四卷刊以行世而璜讀易質疑語餘漫錄亦謂其理本程朱足以信今傳後云

湯之錡 金敞 顧培

湯之錡字世調江蘇宜興人年二十四遭國變屏居田野至性純篤居親喪一循古禮事諸父如父於儒先書無所不讀而以周子主靜之說爲宗嘗寓居無錫四方來學者衆之錡仿高攀龍復七規春秋兩會教以默識大原實體倫物常州知府駱鍾麟請整屋李容講學東林遣使聘之不赴後又延主東林延陵諸講席亦不就嘗論出處之道曰潛龍勿用潛要確不確則遯世不見知而悔矣爲學專務切近無緣飾或問朱陸異同之錡曰顧力行何如耳多辨論何益年六十二卒及門武進金敞無錫顧培建書院惠山之麓奉主祀之著有偶然云集十卷 金敞字廓明少負氣節有經濟才嘗從魯王海上顛沛流離不忘忠孝大兵定浙江乃易服歸鄉里從之錡游敞長之錡三歲執禮恭謹搜輯顧高遺書謂聖賢爲必可

學之錡歿後卜居梁谿立山居會約興起甚衆疾革時呼弟子取缶吐血盈器曰一腔熱血盡矣遂卒著有閤修集十二卷 顧培字昀滋與族弟整同從之錡問學之錡歿築共學山居以延敞朝夕講貫守高攀龍靜坐說默識未發之中久之遂篤信性善之旨張伯行撫吳詣東林講學頗以靜坐爲疑培往復千言暢高氏之旨伯行無以難之整字雋生習靜三十年與培共主講席雖嚴毅而誠意懇摯亦爲學者所服

高愈嚴毅 張夏 華學泉

高愈字紫超江南無錫人諸生明左都御史攀龍從孫東林高顧子弟入國朝後頗傳其學攀龍從子世泰字彙旃少侍講席學甚該究嘗著五朝三楚文獻錄學者重之攀龍歿後與嘉善陳龍正訂正遺書崇禎十年成進士授禮部主事歷官湖北提學僉事明亡不仕晚年以東林先緒爲己任葺道南祠麗澤堂於梁谿一時同志恪遵遺規祁州刁包聞聲謁之相與論學時稱南梁北祁整屋李容至常州與會講於東林書院歡若平生同時顧樞字庸庵憲成長孫天啟元年舉人嘗從攀龍講性命之學明亡閉戶讀書足不入城市與世泰俱以理學名著有西疇

日鈔二卷世泰有高子節要十四卷紫陽通志錄四卷愈十歲讀攀龍遺書卽知嚮學及壯日誦遺經及先儒語錄孝友肫懇言動不苟攀龍嘗作靜坐說示學者愈私淑前徽平居體安氣和雖子弟未嘗譙訶終日凝坐不欠伸當盛暑不裸跣其忿爭者至愈前輒愧悔縣中人好以道學相詆譏獨稱愈曰君子尤嚴取舍之辨嘗曰士求自立須自不忘溝壑始巡撫張伯行延主東林講席辭以疾有司饋之人蔑不受年七十門弟子以新冠爲壽亦卻之旣而大困餒粥七日矣挈其子登城上眺望充然樂也治經精密尤長於禮保德姜櫛佐督學高裔校閱賞其文語人曰江南宿學之士愈及桐城方苞而已同縣顧棟高嘗從愈游說經娓娓不倦棟高歎曰便便之腹眞五經笥但不爲假臥耳卒年七十八著有高註周禮二十二卷又小學纂註六卷乾隆中督學尹會一以小學取士頒行其書 嚴穀字佩之亦無錫人性孝友家貧屏跡不出篤學好古經史百家靡不研究嘗讀高子遺書歎曰吾舍是將安歸高世泰推爲東林主講督學張能鱗欲禮致之不赴貽以力扶正學額不受或勸以野服謝亦不答所著有易說易同春秋論春秋集說尙書講義四書講義生軒存稿 張夏字秋紹亦無錫人明諸生隱居菰川孝友

力學初受業於馬世奇博通經史後從高世泰學歸本自治積十餘年遂入世泰之室世泰歿其子弟相與立夏爲師事之如世泰湯斌撫吳至東林與夏講學躋其言聘講孝經小學於學宮退而著孝經衍義小學淪注其論學謂東林顧高兩先生一提性善以破無善一提格物以救空知辨析絲毫俾夜復旦著雜聞源流錄十九卷取有明一代講學之儒分別其門戶大旨闡洛閩之緒而力闢新會姚江之說然於陸氏之派亦節取所長又以東林之學始宋楊時因重輯楊文靖年譜二卷又著錫山宦賢考略三卷 華學泉字天沐亦無錫人鍵戶讀書窮日夜不倦與高愈友善所著儀禮喪服答問愈極稱之又著春秋類考十二卷春秋疑義一卷大旨崇尚宋儒尤多主胡傳張伯行撫吳延主東林講會謝不赴後數年卒年七十八

王宏撰 王建常 康呂賜

王宏撰字山史陝西華陰人明南京兵部侍郎之良子少與兄宏學宏嘉互相師友博雅能古文尤深於易隱居華山下築讀易廬居之其論易關焦京之術闡周文之理推本經義一以朱子邵子爲歸尤究心濂洛關閩之學嘗以周子無極之

說陸九淵爭之於前朱子格物之說王守仁軋之於後宏撰則謂格物當以朱子所注爲是無極則以陸九淵所辨爲是又謂崇朱學者稱先朝之亂由於學術不正其首禍爲陽明崇陸學者稱無極二字出於老子爲周子真賊實犯其說皆爲太過又謂陽明之定論予不敢以爲定篁墩之道一予不敢以爲一卽陳建之通辨亦閒有已甚之詞又謂學者爲學以平心靜氣爲第一義凡讀書論人當求其實爲吾所最尊之人或有一失不必爲之掩爲吾所深排之人或有一得不必爲之廢本諸天地之理證諸聖賢經傳反之爲心惟求其是而已初與李因篤不識一日邂逅長安茶肆各以意擬姓名及詢之皆不謬遂定交焉崑山顧炎武徧觀四方至華陰謂秦人慕經學重處士持清議他邦所少欲定居宏撰爲營齋舍炎武曰好學不倦篤於朋友吾不如山史嘗一至延安著延安屯田議謂今延安綏德宜君等處各設兵防人不下數千大亂之後閒田頗廣誠諭令所在地方有司並鎮守將官一心規畫設給牛糧每軍一人量給閒田若干務有餘裕期年之間將變荒磧爲豐壤易流徙爲樂康足食足兵莫善於此又著延安紡織議謂延安布帛價貴於西安數倍生計日蹙國稅日逋非盡其民之情無教之紡織者耳今

當於每州縣各發紡織具令有司依式造成散給里下募外郡能織者爲師卽以民之勤惰工拙爲有司殿最一二年閒民享其利將自爲之不煩程督矣康熙十八年舉博學鴻儒徵至京師居城西昊天寺不謁貴游左都御史魏象樞招之亦不往遂以老病不能試罷歸卒後睢州湯斌題其像曰胸懷淵穆立行介確蓋具經綸天下之才而退藏不見其崖略也其推挹如此古文簡潔有法汪琬稱其得史遷遺意當時關中碑誌非三李則宏撰而宏撰工書法故尤多於三李三李者因篤及容柏也著有周易筮述八卷正學隅見述一卷山志六卷砥齋集宏學字而時嘗及馮從吾之門履規蹈矩惟宋儒是程鄉里咸敬之著有孔時圖達天說九章石渠閣文集入國朝與弟宏嘉俱隱居力學不復仕王建常字仲復陝西朝邑人明贈刑部侍郎之宋從子少失怙恃事繼母以孝聞年二十爲諸生已乃棄去銳意正學顧炎武寓華下慕之數以疑義相質見所著律呂圖說二卷歎曰吳中未有也李因篤王宏撰數稱其名於當道督學許孫荃持金幣爲壽不受贈以詩請和亦不答題其門曰真隱其學以主敬存誠爲功窮理守道爲務生平注意尤在小學句讀記四卷以此爲入德之門嘗自言年三十時遭國變卽謝絕世

故啖齋讀書至年近八十又值歲饑或日不舉火然泰然自得未嘗啟口告人蓋幸聞朱子述其師延平之語後同邑李元春稱建常氣節足維世風理學足翼聖道其純正在李容上云著有大學直解一卷論語輯說十卷詩經會編五卷尙書要義六卷春秋要義四卷太極圖集解一卷四禮慎行一卷思誠錄一卷復齋錄六卷別錄一卷日記二卷餘稿六卷 康呂賜字復齋陝西武功人爲諸生絕意仕進思欲倡明正學刻苦數十年自謂有得以致良知爲宗主慎獨爲功夫以體用一原內外兩忘爲究竟謂陽明以格物致良知此知行並進自是切實周詳又謂中庸揭出慎獨卽孔子修己以敬血脈陽明更提撥明快督學朱軾訪士於涇陽王承烈以呂賜及王心敬對軾造廬訪焉然呂賜居遠謝交游世未之識也所著有大學中庸目錄二卷南阿集二卷

李因篤 李柏

李因篤字天生陝西富平人明諸生時天下大亂因篤走塞上求勇敢士殲賊以報國無應者歸而閉戶讀書博聞強記貫串注疏康熙閒詔舉博學鴻儒因篤夙負重名公卿交薦母勸之行試列一等授翰林院檢討未逾月以母老乞養疏曰

臣竊惟幼學壯行者人臣之盛節辭榮乞養者人子之苦心故求賢雖有國之經而教孝實人倫之本比者內閣學士項景襄李天馥大理寺少卿張雲翼等旁采虛聲聯塵薦牘陝西巡撫促臣赴京臣自念臣母年逾七十屬歲多病困頓牀褥轉側需人臣止一弟因材從幼過繼臣年四十有九並無兒女跬步難離屢具呈辭疊奉部駁竊思己病或可僞言親老豈容假借臣雖不肖詎忍藉口所生指爲推卸之端乎痛思臣母垂暮之年不幸身嬰殘疾臣若貪承恩詔背母遠行必致倚門倚閭夙病增劇況衰齡七十久困扶牀輦路三千難通齧指一旦禱北辰而已遠回西景以無期萬一有爲人子所不忍言者則是毛義之捧檄不逮其親温嶠之絕裾自忘其母風木之悲何及餅壘之恥奚償臣永爲名教罪人不惟始進已乖無顏以對皇上而循陔負咎躁進貽譏則於薦臣亦爲有覲面目去歲臺司郡邑絡繹遣臣長行急若風火臣趨朝之限雖迫於戴星問寢之私倍懸於愛日然呼天莫應號泣就途志緒荒迷如墮雲霧低頭轉瞬輒見臣母在前寢食俱忘肝腸迸裂其不可瀆官常而干祿位也明矣況皇上至仁至孝遠邁前朝而甘違老親致傷風化有臣如此安所用之乃臣自抵都以來屢次具呈具疏九重嚴邃

情壅上聞隨於三月朔扶病考試復蒙聖恩授職檢討纂修明史受恩深重何忍言歸惟是臣自去秋入京奄更十月數接家信臣母以晝夜思子流涕無已雙目失明臣仰圖報君俯迫諭母欲留不可欲去未能瞻望闕廷進退維谷查見行事例凡在京官員家無次丁聽其終養臣身爲獨子與例正符伏祈特沛恩慈許臣歸養以終天年臣母子銜環鏤骨永矢畢生矣疏入詔許歸養母歿仍不出因篤性忱直然尙氣節急人之急顧炎武在山左被誣陷因篤走三千里爲脫其難嘗著詩說炎武稱之曰毛鄭有嗣音矣又著春秋說汪琬見之亦折服與毛奇齡論古韻不合奇齡強辨炎武是因篤而非奇齡所著音學五書因篤與有力焉歸後岐山令及淳化宋振麟等請講學於朝陽書院因篤首發橫渠以禮教人之旨次論有守有爲之義而斷之於審幾以著思誠之體其論學必縮以經說經必貫以史使表裏參伍互相發明當時學者灑然有得因記之爲會講錄尤熟於有明事蹟王鴻緒史稿成就正因篤時老病臥牀褥令二人讀稿命之竄易半載而畢由是史稿知名他著有受祺堂集三十五卷漢詩音注五卷漢詩評五卷古今均考一卷 李柏字雪木陝西郿縣人九歲失怙事母至孝備歷艱辛而色養不衰稍

長讀小學曰道在是矣遂盡焚帖括日誦古書嘗東登首陽拜夷齊墓歸而師扑之曰汝欲學古人吾必令汝學今人也則應曰必學古人師再三扑之應如前以母命一就試遂補諸生母卒入太白山中布衣蔬食極人之所不堪時自誦曰貧賤在我實有其門出我門死入我門存又曰牛被繡鸞刀就又曰古之人有七日不火食者有三旬九殮者有食木子橡栗者有屑榆者有一日長坐者有餐氈齧雪十九年者蓋有主於中不動於外所謂不忘溝壑也年四十八將貢或勸之行愴然曰昔爲吾母應此役今奚戀耶康熙三十三年卒年七十一著有榭葉集十卷盤厓李容與因篤及柏相善康熙間關中稱儒者咸曰三李也

王心敬 康乃心

王心敬字爾緝陝西鄠縣人爲諸生督學待之不以禮棄去從李容遊講明正學其論學以明新止至善爲歸謂諸儒主靜識仁窮理居敬立大本致良知諸旨總不出明新止至善之範圍至推闡易理尤爲篤實謂學易可以無大過是孔子明易之切於人身卽是可知四聖人繫易之本旨又謂漢唐之易祇成訓詁宋明之易多簸弄聰明訓詁非易而易在聰明亂易而易亡著豐川易說十卷明白正大

切近人事有裨學者督學朱軾數造廬問業總督額倫特年羹堯先後以隱逸薦不赴羹堯嘗招心敬亦不往世宗聞而重之乾隆元年舉孝廉方正以老病不赴京大學士鄂爾泰嘗寄聲問安否其見重當世如此心敬爲學明體達用西陲邊釁初開卽致書戎行將吏籌畫精詳所言多驗集中選舉餉兵馬政區田法圃田法井利說井利補說諸篇皆可起行桂林陳宏謀官陝時聞其緒論小試輒效所著又有尙書質疑八卷詩說二十卷禮記彙篇八卷春秋原經二卷關學編五卷豐川全集二十八卷續集三十四卷 康乃心字孟謀陝西郃陽人康熙三十八年舉人父姬冕砥德礪操李容稱爲獨行君子乃心少稟庭訓能詩文姬冕使從容游戒空談敦實行進退辭讓一以聖賢爲準則時崑山顧炎武往來關中與容及王宏撰等讀書講道乃心復與之游新城王士禎奉使祭告西岳見所題秦襄王墓絕句於慈恩塔上亟稱之翌日詩名徧長安而乃心不知也性耿介家貧而自守甚峻司土之吏望風式閤時侃侃陳利弊有功於人四十二年聖祖西巡問經明行修之士韓城劉蔭樞以乃心對上嘉許焉秦人語曰關中二李不及一康其見重如此四十六年卒年六十五著有毛詩箋家祭私議莘野集韓城平遙二

縣志

彭隴子定求 饒民

彭隴字雲客江蘇長洲人少喜讀先儒語錄方言矩步同輩事之如嚴師與宋實穎弟兄及尤侗汪琬吳敬生爲慎交社年近四十以貢入成均黃岡曹本榮見之喜曰此載道器也順治十六年成進士授廣東長寧知縣縣在荒山中又當前任朶削之後隴革火耗恤里排戢衙役息詞訟興文教民漸蘇息尋以廉直忤知府罷歸隴自少壯迄老惟以讀書爲務初頗參二氏年六十餘得梁谿高顧二家書讀之迺悚然歎曰始吾涉獵汎濫好語渾同此騎牆見耳今得所依歸矣自是屏棄玩好專尋繹宋儒書晝考夜思勤篤甚於諸生時常攜子定求過錫山謁道南祠會講東林益大感發歸遂取主一之義自號一庵又自稱信好老人署所居曰志矩齋年七十語定求曰聖學至窮神達化究歸一矩故吾黨爲學居敬窮理須臾不容少懈尙何曠逸之敢耽馳騫之敢逞耶無錫張夏過其居見其凝塵滿榻靜對穆如問曰比者亦登虎阜乎曰二十年不到矣指庭中拳石曰此我之虎阜諸山也性孝友常謁選忽心動遽歸歸則父疾已革遺兄喪爲罷秋試湯斌撫吳

重其道誼時屏騶從就質所疑移晷乃去及入朝上詢吳中士大夫斌首舉瓏以對斌歿瓏歲時往拜其祠輒欷歔久之曰吾不復見正人矣康熙二十八年卒年七十七 定求字勤止年二十餘瓏被誣落職定求除夕冒雪往溯灘涉嶺崎嶇四千餘里不四旬至粵見瓏抱哭士民皆感動康熙二十五年一甲一名進士初置第三聖祖以策末有勸勉朕躬語擢第一授修撰尋請歸省居二年瓏促之入京充纂修兩朝聖訓官日講起居注官遷國子監司業編孝經旁訓翻譯國書頒示八旗官學生立月課條約禁吏胥括索考到出咨不受一錢晉侍講復乞假歸未至瓏卒抵家撫棺慟絕自是忌日前半月齋居哀慕如喪時終其身聖祖南巡命中使賜御書傳旨云汝學問好品行好家世好不管閒事並問病痊否已命就揚州書局與校全唐詩許銷假照現任官陞轉定求在局二載竣事卽還亦未嘗銷假也初瓏授定求以梁谿高氏之學定求又師事湯斌後讀傳習錄於陽明良知之說憬然深省自是以陸王爲宗嘗作高望吟七章以慕七賢七賢者陳獻章王守仁鄒守益羅洪先顧憲成劉宗周黃道周也其與門人林雲翥書曰有願進於足下者二一曰無遽求高遠而略庸近吾夫子以庸德庸言自勉勉人孟子曰

堯舜之道孝弟而已矣然則舍現前實地而鈎深索隱以爲聖人之道有出於人心同然之外者必反流入異端堅僻之行矣一日無徇聲聞而遺踐履陸子鵝湖之會講義利章聞者流涕陽明拔本塞源論直接孟子正人心之義深切著明白沙曰名節者道之藩籬固未有理學而不名節者也若徒紛論異同自附壇坫迹其趨向正在鄉愿之窠窟而自絕於狂狷之羽翼中行縱使著書等身正蹈程子玩物喪志之戒可墮其術中乎又曰鞭辟近裏工夫舍致良知三字蔑由伐毛洗髓邇來真儒得力於此者惟夏峯二曲深信不疑大約聖學必動靜合一而下學之始須由靜坐延平未發以前氣象的是師傅心法也時陸隴其書出附和之者多以排擊陽明爲功故定求云然定求沈潛篤志初乞假歸省跪請曰兒願得閉門讀書如童子入塾時庶少補前過乎及家居禁絕鼓吹時舉豆腐會招老友談道竟日著有學易纂錄儒門法語密證錄姚江釋毀錄周忠介遺事及南畝文彙十二卷五十八年卒年七十五定求孫啟豐啟豐子紹升頗傳家學然彭氏學參朱陸識兼頓漸啟豐紹升遂流入於禪休寧戴震嘗移書紹升辨之啟豐雍正五年一甲一名進士官至兵部尙書自有傳 錢民字子仁江蘇嘉定人早孤棄書

學賈數爲鄉里所侮年三十慨然有學聖之志聞青浦有孔子衣冠墓齋戒往謁讀四子書務求心得題所居室曰存養塵陸隴其宰嘉定從之論學又五年自謂所學已成復往平湖相質隴其怪其不合民曰公從朱子入民從孔孟入耳嘗與友人書曰先聖之學貴乎本末兼盡始終有序大學所謂知本者作聖之基也誠正者作聖之功中庸所謂尊德性先也本也道問學後也末也卽物窮理其誤在於無本六經注我其誤在於無末又曰堯舜之知不能徧物況初學乎朱子教初學者卽責以知盡而後意誠此未合乎孟子也又曰今之學者不知追求孔孟之實而紛紛焉爭朱陸之異同是謂舍己田而芸人之田終亦必亡而已矣民之學從靜坐入自謂直追孔孟然說者終以其近陸不甚宗之也康熙中卒

陸元輔 周象明

陸元輔字翼王江蘇嘉定人康熙十八年召試博學鴻儒罷歸少師同里黃淳耀在直言社中小有指摘必痛悔流涕淳耀稱其學行尤研精經術常夏夜斗室中聚蠹如雷同學過之見元輔危坐讀儀禮汗流被肘呼之不應因勸少休元輔曰果熱耶吾心入書中不自覺也明亡棄諸生以經學教授宋德宜徐乾學徐元文

葉方藹皆以兄禮事之力趣入都都中士大夫就質經義典故無虛日稱陸先生而不名宛平王崇簡孫承澤蔚州魏象樞江寧王宏澤皆遣子弟授經常購宋元明人經說至數十種泝其淵源剖其得失輒爲題跋秀水朱彝尊經義考多取其言爲據又常爲納蘭性德撰合訂刪補大易集義粹言陳民禮記集說補正二書共百餘卷先後客京師幾二十年其論學雖本淳耀晚益充實不雜佛老常與友人書謂六經千聖之道法四書六籍之精華當循序致精一一返諸己自早年以存誠主敬自勵至老而自強不息有得於濂溪所云學聖以一爲要者期自寡欲進於無欲以實踐斯言又論明代理學以方正學薛文清胡敬齋羅整庵爲正白沙之後流爲甘泉陽明之後流爲龍溪近谿泰州卓吾山農心隱狂瀾旣倒迴之者惟無錫高忠憲顧涇陽東莞陳清瀾閩中陳仲好武水陳幾亭數賢至若周海門聖學宗傳一書併驅伏羲以來諸聖賢俱入二氏尤無忌憚後有真儒火其書可也陸隴其宰嘉定見元輔稱以爲博聞樸實君子常爲友人校閱同事有抹獸人司原句者恐直言之不悅因曰依稀記得此語出左傳令取韻書查得之隴其曰元輔直而婉處世之良法也篤於師友淳耀歿圖其像懸之室晨起必肅揖並

搜其遺稿付梓所自著有十三經注疏類鈔續經籍考明季爭光錄菊隱紀聞及文集三十年卒年七十五周象明字懸著江蘇太倉州人康熙十一年舉人家貧力學髫年卽爲童子師性耿介父歿以遺產讓弟外祖龔氏無子所遺資卻不受置後而歸之鄉舉後不再上公車憺舍虞山下僻處荒祠廢冢間家無僮石嘯傲自如常從同里黃與堅遊與論圖書之奧與堅曰予易學尙可爲汝師他非所及也臺司延請講學象明正容就席爲說洪範九疇大旨及先賢敬一箴精切詳明一時父老子弟無不拱聽著有七經同異考三十四卷其體例近黃東發日鈔章如愚山堂考索又有事物考辨性理發微尙友編蘇松田賦考共數百卷三十年卒年五十八卒後門人春秋祀之

竇克勤 子容邃 田蘭芳 徐鄰唐 湯準

竇克勤字敏修河南柘城人父大任諸生爲學以不欺爲本喜成就後學克勤少讀大學章句序躍然曰道在是矣自是益研究先儒書作槃水歌以自警聞登封耿介講學嵩陽從遊者六年鄉舉後至京師謁睢州湯斌日夕講業斌言師道不正由校官不職勸克勤就教職選泌陽教諭泌陽地小而荒人鮮知學克勤立五

社長月朔稽善過而勸懲之每月五日集童子習禮儀稍長教之性理人皆力學
興行公餘讀書饘粥不繼晏如也康熙二十七年成進士改翰林院庶吉士丁母
憂歸服闋散館授檢討會順天學政李光地遭母喪有請假九月之疏克勤忿陳
書給事中彭鵬劾之及鵬謫河工勒限出京克勤賦海外孤鴻來一章祖於道三
十九年充會試同考官有貴顯干以私克勤力拒之聖祖命翰林作楷書克勤書
治法堯舜是爲至治學宗孔孟是爲正學有天德便可語王道其要祇在慎獨數
語以進再試皇太后萬壽無疆賦稱旨賜御書加俸金所居狹隘僮僕皆辭去使
諸子應門暇則繞坐授經蠡縣李塉曰克勤位望俱重而最謹飭可法也尋以父
老乞歸先是克勤於柘城東郊立朱陽書院倡導正學及歸遠近來學講舍不能
容中州自夏峯嵩陽外朱陽學者稱盛矣大吏重其行克勤爲陳鄉邦疾苦多賴
以更除四十七年卒年五十六士友悲慟門弟子心喪三年邑之餓夫頑人亦匍
匍赴哭而去其感人如此克勤學術淵源考亭於金谿姚江辨析必求至當不爲
附和之詞著理學宗傳十五卷始宋周子終明薛瑄凡十五人自序云尙有邵康
節蔡元定書侯學者旣通六經而後可及又著有孝經闡義四書闡義泌陽學條

規事親庸言尋樂堂家規文集等子容遂能承其家學 容遂字聞子康熙四十四年舉人官兵部主事改授四川新寧縣知縣縣處西徼百務凋敝始至誓於神曰令有不明惟神啟之令有不公惟神殛之一時利輿弊絕稱極治剏宕渠書院立學規以教其子弟人皆興起洊陞山西忻州知州以疾告歸歸後主朱陽講席四十年其學以誠敬爲宗以日用倫常爲實際澄心危坐衣冠肅然接引後進亶亶不倦乾隆十九年卒年七十三著有孝經管窺二思編敬義堂集 田蘭芳字梁紫河南睢州人諸生少聰穎而豪放自喜人多側目疾之年四十乃悔其失研心性理一以不自欺爲根柢與商邱徐鄰唐上蔡張沐參稽互考不憚馳驅湯斌謝病歸往來論學遠如朱陸近如龍溪念庵析疑辨惑絕無一毫蓋藏斌常言求友四方所中心嚮往者蘭芳而外無多人也平湖陸隴其見所作呻吟語序深服其學問淵源惟以語及陽明爲疑蘭芳聞之與陳子萬書曰僕初通文字便覺王學蹊蹊讀學蔀通辨愈心朗目開但生平不敢強所不知必自信於心然後立說竊謂伯安當日見人讀書支離使反而求諸自心大聲疾呼不啻如病瘡之在身其學或未免有弊原其始念決非爲惑人而設今時之患唯利之一字蝕人心最

深一切當爲舉皆視爲不急彘倫日敦廉恥日喪風俗日偷率由於此似不因講良知讀傳習錄然後成此世界也我輩於今祇當於日用之間本分所當爲者無所爲而極力以爲之在己既盡然後見人陷溺示以解脫則不必言朱人已入朱之室不必斥王人自不墮王之弊矣蘭芳事繼母余氏以孝聞食貧處約不干求於人常食薄粥糲餅日取半飽行盡矣閉門待斃自以爲乾淨還天地潔白還祖宗也晚歲學益粹從遊者甚衆康熙四十年卒年七十四著有逸德軒文集弟子同里張森能傳其學森字玉標亦諸生著有周易探旨五卷春秋衷義八卷皇極韻譜三卷律呂津梁一卷 徐鄰唐字邇黃河南商邱人歲貢生幼力學經傳百家無不綜貫古文奇崛貽盪同里侯方域邀與宋犖徐作肅賈開宗諸人爲文社久之疑所學未得指歸乃求所以爲聖賢之道謝絕交遊研求宋儒書或謂之曰聖賢豈閉戶爲之哉不答靜坐返觀驗諸行事常嘆以爲人之所以役役者不知有我也著我庵傳以見意崑山顧炎武與書有駁正陽明之說鄰唐復之曰我輩喫緊在察自己身心不必較量他人是非今之儒者往往自己百孔千瘡全不料理終日嘵嘵在口頭上爭勝負究竟有何干涉其篤實如此自是惡爲詞章田蘭

芳初見之偶以一賦相質不喜也蘭芳悔之遂受業焉年六十九卒生平不事著書卒後蘭芳輯其筆札爲我庵語略 湯準字穉平父斌官至工部尙書諡文正自有傳準年十三書聖賢自可師字斌喜勗以正學遂體究儒先書作勵志居敬體仁懲忿遷善窮理六箴以自警生平澹泊自甘不慕榮仕務實踐不立講學名所著贅言十卷近裏著己不作愉悅高明狀蓋斌晚年有得朱子之學一歸確實準濡染者深也又著有臨漪園稿二十八卷準常與兄溥佐斌修明史性孝友居喪毀幾滅性侍諸兄疾若痛在身雍正元年舉賢良方正辭不就十三年卒年六十五從子之旭字孟升康熙四十五年進士由編修官至左通政丁外憂歸以毀卒之旭講學以求誠爲本生平無一毫涉於欺罔居官不尙威猛而風采肅然有祖風

冉觀祖 李經世

冉觀祖字永光河南中牟人先賢伯牛之裔生而靜重寡言明季父於兵燹中授章句沈潛服習年十一父卒號慟依柩旁昏夜獨居無懼色少而多藝汶上袁生精等韻之學五日盡得其傳中歲屏除殆盡究心濂洛關閩之書康熙二年舉於

鄉十八年詔舉博學鴻儒巡撫將薦之欲一見觀祖曰是求薦也堅不往登封耿介延主嵩陽書院生徒雲集講孟子一章剖天人理欲之界衆皆悚然三十年成進士改翰林院庶吉士散館授檢討是歲聖祖徧試翰林御西煖閣詢觀祖家世學業甚詳有氣度老成之衰越旬日賜宴瀛臺上獨識之曰爾是河南解元耶三十六年充會試同考官尋乞假歸儀封張伯行創請見書院延主講席觀祖以太極西銘指示聖學脈絡嚮道者益衆假滿補原官越二年告歸觀祖之學壹尊程朱於陸王不少假借著天理主敬圖一卷上標天理明性道之重中列存養省察講學力行四項爲體道之功下書一敬字示心法之要蓋爲姚江言超悟者而發其訓釋宋儒書有性理纂要八卷正蒙補訓四卷主嵩陽時著爲學大指十八則以示學者又著一本論三篇以闢異教死生之說大旨謂乾父坤母陰陽之氣合而生萬物父乾道母坤道陰陽之氣合而生子謂父母之氣不通於天地之氣非也譬之掘地爲井井之水猶然地中之水而此井與彼井甘苦不同味盈涸不同時天地父母皆本也天地者本之大公父母者本之至真者也至真無二故曰一也於四書集註覃研二十年章求其旨字求其解句求其訓訂正羣言歸於一是

著四書玩注詳說又著易書詩禮記春秋詳說兼采漢宋諸儒亦時出以己意時方纂修五經安溪李光地以聞上命取其書以供採擇他著有孝經詳說陽明疑案孔子生卒考及詩文雜著觀祖性淡退惟以讀書爲事絕慾三十餘年晨夕起居伴以兩僮晚歲作四時讀書樂詩遇風日晴和偕門弟子過魯廟諸邨徜徉倡和及暮而歸行道者以爲神仙中人五十七年卒年八十二伯行與觀祖最契其卒也兩爲文祭之稱生平義利之辨邪正之分屢遭困阨而信愈堅皆觀祖教誨之力云 李經世字函子河南禹州人諸生明末州人任德辰煽亂父出與語賊感德解去州守疑之拘入獄經世方弱冠號諸庭曰必吾父與賊通爾時當隨去公焉可得執執不可白其無他乎遂得直親歿走大冶值流寇至橫刃脅之徐徐言曰爾爲飢寒困耳奈何遂至此拂衣從容去亂定歸里乃求性命之學晝夜默坐忘寢食者數月旣以爲近禪出從上蔡張沐遊究心宋儒書其學以仁孝爲本而主於敬或問敬與靜孰要曰敬乃所以爲靜也靜固靜動亦靜非敬何由矣方吾流離時安所得靜吾持吾敬志定氣亦定卽所謂靜也沐因顏其室曰靜庵晚歲師耿介冉觀祖康熙三十七年曳杖庭中作逍遙歌踰二日正襟就枕卒年七

十三著有尋樂集一得錄

李來章 劉宗泗

李來章本名灼然以字行河南襄城人康熙十四年舉人明諡恭靖敏之後敏嘗於縣西南紫雲山創立書院講學其中至曾孫繼業復興之立爲學程規一遵敏教世推理學來章繼業曾孫生有神識嘗觀石工集庭中斷石輾轉弗合語之曰去宿土當自合是卽吾學人心道心之謂聞者異之及長以光復先緒爲己任就學孫奇逢會李容來襄招魂葬父來章與襄其事復就容學後遊魏象樞門聞象樞言欲除妄念莫如立志作書紳語略時奇逢講學百泉來章與耿介冉觀祖講學嵩陽兩河相望一時稱盛已主南陽書院作南陽學規以教學者尋以母老謝歸重葺紫雲書院讀書其中學者多自遠至母病日來章夙興舐之目復明四十二年選廣東連山縣知縣連山民僅七村丁二千餘皆獠戶大排五小排十七數盈萬又重岡複嶺田裁十之一時甫經獠亂猶弗靖來章慨然曰獠雖異類亦有人性當推誠待之乃仿明王守仁遺意日延耆老問疾苦招流亡勸之開墾薄其賦復深入獠穴親與設誓焚妖書平物價禁搶掠解仇忿殷勤誥戒復爲之設約

延師訓其弟子又剏連山書院進糶民之秀者親教之行之三年誦讀聲徹巖谷督撫交獎之曰忠信篤敬蠻貊信可行矣四十八年行取授兵部主事監北新倉革運官餽遺尋引疾歸侍郎田從典李先復交章以實學可大用薦得旨徵召辭不出六十年卒年六十八來章幼讀二程遺書沈潛反覆積三十餘年嘗作嵩陽書院記曰道者非他卽易之所謂太極書之所謂中大學之所謂至善其實皆一天也故董子言道之大原出於天然自有生以後去天漸遠其能全而無失者必出於聰明睿智之聖而大賢以下率必由學問思辨以致其精篤行固執以致其一戒慎恐懼以貫其終始則踐履旣久性命流行行止動靜無非天理斯所謂下學而上達也故其爲學以合天爲歸克己爲要慎獨爲先嘗以質之耿介介然之因著衾影錄達天錄其教人以小學近思錄曰天地間一大缺陷事無如廢卻小學使一團天真盡爲功利誇詐之俗所奪後雖欲收其放心亦扞格而不入又曰近思錄一書爲周孔真命脈學者不從此入手皆斷港絕潢欲求至道難矣及官連山讀白沙全集謂其直捷痛快然下學之功略焉不講時縣人衛立組著白沙要語補來章序之以爲當再取陽明傳習錄採其要語爲之補正晚歲尤篤實答

李容書云學求自信若有一毫求人說好之念便如優伶登場塗飾粉黛徒求觀者喝采心術豈復可問此實人鬼關頭學者須先辨取不然雖讀破萬卷於爲學無涉也他著有洛學編紫雲連山兩書院志連陽八排風土記嶺海拾遺京華見聞錄隨筆等書古文摹仿歐曾不失典型有禮山園集八卷 劉宗泗字恭叔亦襄城人康熙二十九年舉人仲兄恩廣十歲時父爲流寇所害號呼奔救賊截其耳鼻不肯去卒負父屍而歸宗泗性孝友與兩兄同居養母四十餘年恩廣病默禱於神願以身代母歿兩兄以毀卒宗泗撫遺孤勉之學皆克成立居家有法類唐柳氏宋司馬氏無晚近薄陋習李容至襄城宗泗與談道尤相契容去爲其父捐良田樹墓木歲時祠祀五十年如一日鄆縣王心敬奉容命過襄城謁於寢廬北面稱弟子宗泗學宗程朱持己謙恕尤以篤行孝弟爲先時容講學關中盛有名宗泗獨守其學修之身以施於家年七十七卒著有中州道學存真錄恕齋語錄抱膝廬文集子青蓮青芝皆能世其家學以友愛著聲青蓮字華嶽歲貢生遂於經有學禮闕疑八卷

劉源淥 范明徵 孫若羣 劉以貴

劉源淥字崑石山東安邱人生五歲問身所從來父奇之十四歲而孤事母至孝遇難負母逃卒免於禍年二十餘值明季盜賊蠡起與仲兄率鄉人列堡而守賊至守者多死仲兄身中九矢戰益力源淥從之發數十矢矢盡仲兄麾之去源淥大呼曰離兄一步非死所乃斬二渠帥獲馬六匹賊遁去亂定以力耕致富既而推膏腴與仲兄以其餘爲長兄立後兼贍亡姊家仲兄疾籲天請代及卒水漿不入口三日源淥入國朝後伏處海濱購經史及宋儒書日夜讀之尤篤好朱子書反覆推究四十餘年葺朱子祠於東郭祭必致其誠與弟子講論每至夜分有所得輒筭記積數萬言而大要歸於主敬集義其論主敬以戒懼慎獨爲始而歸之於參前倚衡論集義以致知格物爲先而極之於不獲其身不見其人嘗曰學者居敬窮理二者皆法文王而已矣小心翼翼昭事上帝居敬之功也不識不知順帝之則窮理之功也又曰二程恐懼憂勤故周子令尋孔顏樂處今人宜先收定此心不放周子令二程尋樂吾今欲世人尋苦又曰學者推測道理似能覺悟及發言處世便多窒礙故朱子臨終諄諄教門弟子云惟事上審求其是決去其非積習久之心與理一自然所發皆無私曲學者離物與形而求道終無得也生平

所服膺者在明惟薛瑄在國朝惟陸隴其自敍其學謂始去外物而見身繼去身而見心又去心而見理蓋自道其實云以喪祭禮廢俗日偷斟酌古今定爲品式邑人化之又爲鄉人置義倉儉歲煮粥以待餓者曰人與我一天也何畛域之有康熙三十九年卒年八十二著有近思續錄四卷讀書日記四卷冷語三卷冷語詆劉安世爲姦邪謂其害甚章惇邢恕則以其與程頤不協而未見盡言集也同時爲理學者有范明徵孫若羣劉以貴 范明徵字仲亮山東霑化人少慕古學九歲通左氏傳及長貫穿經史及宋儒書由博返約折衷諸家之論而一以大公爲斷康熙十八年開史局秉筆者多齟齬陽明明徵憤之作朱陸異同或問其略曰象山尊德性而畧問學是蹊於禪者也豈聖賢之旨乎曰此非象山意也使尊德性而舍問學之道亦非所以尊德性矣自禪宗有不立文字之說而曹溪之書遂滿天下有謂不必識字而可明心見性者今謂象山不識一字也可乎試觀象山集所載未嘗不教人讀書窮理使之理會文字也考亭固以道問學爲事者而言非存心無以致知何嘗不尊德性乎陽明之是象上也皆其求之心而自得者也旣自得於心而成其爲陽明以之事君取友建功立業卓然於天地可傳於後

世安在其異於孔孟而謂之爲禪耶曰象山謂告子亦有高處此象山自爲告子之學已異於孟子矣曰此未足爲象山病也孟子曰告子未嘗知義以其外之也是言告子之勇辨不察未嘗以告子爲楊墨也湍水杞柳應口而斥其言生之謂性孟子不遽斥之以此語未大失也失在於猶白之謂白也白之謂白猶未大失也失在於等雪與玉羽而一之則誣矣使謂犬牛與人各有所生之性亦復奚失哉孟子不云形色天性乎象山所以高告子者以爲非孟子不能折之陽明謂告子毫釐之差亦以爲非孟子不能辨之也胡敬齋考亭之孝子也謂告子亦自認爲聖門全體之學但先著性體之見云云遂內外兩截而本原失矣其論猶之陽明也時崑山徐元文爲監修官明徵遺書論于謙復辟事及張居正相業又著孔子王號辨力詆吳沈張璠之非皆超越常論生平事親孝葬祭皆準古禮鄉人化之有不善惟懼明徵知新城王士禎稱以爲通經學古大儒年八十卒著有天文圖文廟崇祀考雪崖集 孫若羣山東淄川人品端學瞻言動有則鄉里稱爲小聖人康熙三年進士謁選在都刑部侍郎任克溥延之課子供張豐腴若羣坐不易牀食不兼味雖盛暑亦衣冠襜如如見大賓有二子應童試克溥與山東學政

善欲爲之地而不知其名屢欲請之憚其嚴不敢發平居端默有問難者指畫滔滔不倦尤善論文窮通壽夭皆能以文決之出知山西交城縣多異政秩滿遷四川知州卒於官 劉以貴字滄嵐山東濰縣人康熙二十七年進士官廣西蒼梧縣知縣縣獠獍雜處號難治以貴革除陋習營茶山書院以詩書爲教年四十告歸杜門著述常謂鄭康成之罷從祀成於張璠而實始於程敏政敏政博利之徒著道一編舉朱陸緒論顛倒年月謂其早異晚同姚江因之成朱子晚年定論之說蓋始以私智議先儒後遂以學術教人心其流弊不可勝言又謂世譏康成信緯不知康成所據之緯書之醇者也且如三綱五常之說尙書緯之文也朱子以之注論語周子三百六十五度四分度之一易緯之文也蔡氏以之注尙書後人不議論朱蔡獨毀康成何耶其論與朱彝尊康成不當罷從祀議皆爲卓識至雍正二年遂復奉旨從祀著有古本周易十六卷析疑二十卷於注疏外旁搜一百四十餘家而考其異同辨其得失又有藜乘集三卷初學正鵠正命錄萊州名賢志等書卒年六十五

詹明章 鄭文炳 陳九齡

詹明章字幾士福建海澄人隱居自樂不求聞達嘗遊廣西值滇黔師興爲當事設輓輸法客瓊州佐平黎峒終身不言功後徙建昌作兼山樓以居漳浦蔡璧嘗謂子世遠曰明章隱君子也在都門嘗爲我言河洛之學甚粹儀封張伯行撫閩聞其名問於世遠曰是家君子所敬畏也時同邑鄭亦鄒亦薦明章伯行乃聘使修書周張朱子之編多所手定晚還漳州知府魏荔彤爲築景雲樓月餽以粟屬以參訂其父裔介所輯四書朱子全義用進乙覽安溪李光地假歸將禮聘之以老病辭久之貧甚遭大風壞屋廬景雲樓亦傾世遠往候之見明章居斗室中日不再食諸孫多有飢色顧蕭然自得也生平力學不倦貫穿六經諸史不肯爲無用之學而於易尤深著有易經提要易義先後卦說河洛通解洛範啟要四書提要等二十餘種荔彤嘗欲取其書繕寫進呈未及行而明章卒年九十三時康熙五十九年也世遠爲表其墓曰兼山先生 鄭文炳字慕斯福建莆田人諸生少有志操長探性命之學要以洛閩爲歸父光春客遊四方音問久絕文炳問於母記其狀貌輾轉蹤跡至滇南忽相見號泣請還不果父趣之歸未幾父卒復奔赴負遺骸歸子身跋涉萬餘里一笠一橐露宿草行傍徨江楚黔蜀間屢瀕於死人

日爲孝子事母尤備極色養母歿椎胸嘔血廬墓三年張伯行撫閩重其學行選入鼇峯書院使從蔡世遠遊伯行撫江蘇復遣使請之至講學年餘而歸雍正乾隆間兩舉孝廉方正皆不就晚主洞橋書院訓迪不倦年八十六卒文炳爲學講明踐履嘗取文之有關五倫者敬錄而服習之爲明倫初集五卷續集五卷所自著有周易要義性理廣義省心堂家訓文集其後嗣皆守道能文鄉里咸曰鄭孝子家 陳九齡字希江福建福清人康熙中隨父就學張伯行伯行授以濂洛關閩書謹守不忘後從蔡世遠遊以第一等人相勗嘗謂程朱守一敬字我輩尤當致力乾隆元年成進士授四川琪縣知縣下車拜范符山孝子坊爲邦人士勸民有訟不假筮楚進士於塾躬自爲師以丁憂去官士民走送百里外服闋補江南銅陵卻例金修民隄令民輸錢於匱吏不得染指潘思築移撫閩問治民之策九齡曰鼇峯爲人材根本多一二立志爲己之學者臺灣爲全閩要害得一二實心爲民之將吏其庶幾乎尋改教歸年七十八卒著有易卦發明二卷詩經發明八卷左氏發明四卷四書發明十八卷小學發明六卷綱目發明二卷

張鵬翼 林赤章 李夢箕 夢箕子圖南 童能靈

張鵬翼字蜚子福建連城人歲貢生幼嗜學塾師教以作文取科第心疑之十四歲熟讀四書大全忽悟曰心當在身內身當在心內值明亡播遷饑饉而學不廢閩疆既定以親老復求進取年四十遭耿逆變乃返初志連城處萬山中無師友鵬翼銳志問學同邑林赤章授以近思錄朱子全集幡然曰學者舍朱子而他求卽與下喬木入幽谷何異又十年見薛瑄讀書錄學益進嘗曰讀書當實踐毋徒事文藝又曰考亭易簣之時乃我下帷之始蓋俛焉日有孳孳不知其老且耄也平居自治嚴整終日端坐雖跬步不苟盛暑不袒裼事親養志無違居喪蔬食三年不內寢不外遊所居鄉曰新泉男女往來分二橋市中交易先讓客其禮教行於鄉如此鵬翼爲學宗主程朱不濡染明季學術嘗自識心得爲讀經說略又輯濂洛關閩要旨爲理學入門又采歷代名臣爲將相諫臣三譜又考古今疆域九邊阨塞黃河原委爲中華世統說又取史籍舊事仿讞獄之法每一條爲一案而以己意斷之爲芝壇史案五卷他著有孝子傳芝壇雜說芝壇日讀小記聖道元亨頌皆切於日用倫常之道考其得力戴記爲多又有芝壇集二卷其詩文亦皆以講學爲宗康熙五十四年卒年八十三漳浦蔡世遠嘗書醇學二字表其閩寧

化雷鏃亦言閩汀學者以鵬翼爲冠云 林赤章字霞起亦連城人歲貢生隱居冠豸山中山無水禱而得泉嘗與鵬翼論心性之學謂鵬翼曰求道之要盡在論語矣耿逆之亂僞將劉應麟聞其善鼓琴攜至郡赤章白衣抱琴入長揖不拜曰此非鼓琴所拂袖竟去著有易辨書經約旨讀禮私言四書遵注小訓私淑錄愛蓮堂集 李夢箕字季豹亦連城人歲貢生年十五而孤卽知崇尚朱子之學以孝友著稱耿逆之亂脅就僞職脫儒冠遯山中性介潔不事干謁自號穩臥先生教人輒言爲善最樂人易而忽之夢箕曰爲之難汝爲之否乎繼善成性善之原仁義忠信善之實善不擇則不明不固執則不能得而弗失人問曰其樂何如曰不愧不怍曰孰與孔顏之樂曰熟之而已矣家苦儉然好施與或倡於人而力助之曰苟利於物惠無小也能成其惠不必出於己也每語諸子以氣質之偏使知變化易簣時謂所親曰吾生平竭力檢身將母有不及省者第言之得聞過而終亦幸矣卒年八十二著有四書訓蒙穩臥軒集子圖南能傳其學 圖南字開士康熙六十一年舉人初工詩古文旣而歎曰吾學自有身心性命所急可以虛名驚乎居連峯點石諸山者久之究心濂洛關閩書以反躬切己爲務嘗曰學者惟

利名之念爲害最大越此庶可與共學雍正九年吏部檄天下舉人需次縣令者先赴京學習政事圖南至隸戶部湖廣司以母病亟歸十年卒年五十七嘗與蔡世遠講明修身窮理之要世遠甚重之又與雷鉉論學意相激切鉉謂學聖人必自狷者始圖南庶幾近之又謂余喜暢談圖南贈余靜穆二字然氣質難變以此甚愧云著有簡庵集 童能靈字龍濤亦連城人貢生乾隆元年舉博學鴻詞累舉優行皆以母老辭母年九十兄弟白首同居居喪以禮化及鄉人年六十三卒能靈爲學守程朱家法不失尺寸自以僻處寡聞嘗遊金陵考先朝遺跡訪武彞精舍廣求朱子遺書歸而築室冠豸山下潛心探討十餘年默契誠意致知之學以朱子早晚異同之辨大要數端曰一貫忠恕曰未發已發曰太極動靜曰仁曰心性曰體用曰理一分殊曰空妙曰實理曰默識而存曰循序而進因考其爲學次第分年記載加以案語爲朱子爲學考三卷又於日用體驗間筭記其言心言性言仁言情者爲理學疑問四卷嘗與雷鉉論易能靈主河圖以明象數之學著周易賸義二卷其論樂律謂洛書爲五音之本河圖爲洛書之源河圖圓而爲氣洛書方而爲體五音者氣也氣凝爲體體以聚氣然後聲音出焉蔡氏律呂新書

沿淮南子漢書之說誤以亥爲黃鐘之實惟所約寸分釐毫絲忽之法其數合於史記律書因取其說爲之推究原委著樂律古義二卷他著有洪範賸義詩大小序辨三禮分釋中天河洛太極辨微朱陸淵源考五倫說冠豸山堂文集連城理學始自宋之邱鱗明之童昱而鵬翼能靈繼之力敦倫紀嚴辨朱陸異同儀封張伯行撫閩時建文溪書院祀鱗昱後增建五賢書院祀宋五子而以鵬翼能靈配焉

顏元 王源

顏元字易直直隸博野人明末父戍遼東歿於關外元年五十貧無立錐百計負骨歸葬世稱孝子居喪守朱子家禮惟謹古禮初喪朝一溢米夕一溢米食之無算家禮刪去無算句元遵之過朝夕不敢食當朝夕遇哀至又不能食病幾殆又喪服傳既練舍外寢始食菜果飯素食哭無時家禮改爲練後止朝夕哭惟朔望未除服者會哭凡哀至皆制不哭元亦遵之既覺其過抑情校以古喪禮非是因歎先王制禮盡人之性後儒無德無位不可作也其爲學以堯舜之道在六府三事周公教士以三物孔子以四教非主靜專誦讀流爲禪宗俗學者所可託乃易

靜坐以習恭內而敬直外而九容交攝讀書擇經史有用者餘不盡究嚴課孝弟謹信稽禮樂兵農之允宜今古者爲倡六藝以教來學又置日記自省時下一圈心慊則書白否則黑與蠡縣劉崇文王養粹李塏等以聖賢相勉每會各出日記相質勸善規過或諍譏致愧赧無以自容元嘗欲置妾爲媒所欺塏責之亦卽屈服也同時容城孫奇逢講學百泉山中元嘗上書辨論謂不宜徒爲和通朱陸之說又與祁州刁包上蔡張沐辨學謂世儒躐講性天非孔子不可得聞之教法且聖門經世之撰皆廢失何以學成致用因著存性篇二卷大旨謂孟子言性善孔子言性相近習相遠語異而意同宋儒誤解相近之意以善爲天命之性相近爲氣質之性遂使爲惡者誘之氣質不知理卽氣之理氣卽理之氣清濁厚薄純駁偏全萬有不齊總歸一善其惡者引蔽習染耳譬之於目光明能視則目之性其視之也則情之善視之詳略遠近則才之強弱皆不可謂之惡惟有邪色引動然後有淫視是所謂非才之罪是卽所謂習又謂性之相近如真金輕重多寡雖不同其謂金俱相若也惟其有差等故不曰同惟其同一善故曰近舉天下不一之姿以性相近一言包之是卽性善是卽人皆可以爲堯舜舉世人引蔽習染無窮

之罪惡以習相遠一言包之是卽非才之罪是卽非天之降材爾殊其說雖稍異先儒而於孔孟之旨會通一理同時陸世儀李光地頗見及之而牽於程張不能決乾隆中休寧戴震作孟子字義疏證始本此說而暢其旨又存學編四卷大旨謂聖賢立教所以別於異端者以異端之學空談心性而聖賢之學則事事徵諸實用自儒者失其本原以心性爲宗一切視爲末務其學遂與異端近如無極太極河洛先後天之說皆出自道家而以之當聖人言性與天道至謂與伏羲畫卦同功宜其參雜二氏而不自知也又存治編一卷大旨欲全復井田封建學校徵辟肉刑及寓兵於農之法又存人編四卷大旨戒愚民奉佛及儒者談禪肥鄉有漳南書院邑人郝文燦請元往教元爲立規制有文事武備經史藝文等科從遊者數十人會天大雨漳水溢堂舍悉歿元歎曰天不欲行吾道也乃辭歸康熙四十三年卒年七十李塉弱冠與元交年三十一乃投門人刺與元門人王源同編元年譜二卷鍾鏐又輯言行錄二卷關異錄二卷元之學大抵亦出姚江而加以刻苦介然自成一家以明季諸儒崇尚心學無補於時馴至大亂士腐而靡兵專而弱故其學主於勵實行濟實用常謂後人動詆宰我樊遲季路冉求子貢子張

游夏諸子而欲陞周程與顏曾接席然聖門弟子以兢業爲本惟在實學實行實用之天下後儒薄事功故其視諸賢甚卑也又常語友人曰如天不廢予將以七字富天下墾荒均田興水利以六字強天下人皆兵官皆將以九字安天下舉人材正大經興禮樂其自負如此然矯枉過正攻駁先儒未免已甚其欲復三代之制亦近於泥古云 王源字崑繩順天大興人兄潔少從梁以樟游以樟談宋儒學源方髫齡聞之不首肯唯喜習知前代典要及關塞險隘攻守方略常從寧都魏禧學古文自謂必傳於世年四十餘遊京師公卿皆降爵齒與之交與鄞萬斯同訂明史稿兵志源所作也或病其不爲時文源笑曰是尙須學而能乎因就有司求試中康熙三十二年舉人或勸更應禮部試謝曰吾寄焉爲謀生計使無詬厲已耳崑山徐乾學開書院於洞庭山招致天下名士源與焉於儕輩獨與劉獻庭善日討論天地陰陽之變伯王大略兵法文章典制古今興亡之故近代人才邪正其意見皆相同獻庭歿言之輒流涕未幾遇李塉大悅之曰自獻庭歿豈意復見君乎塉微言聖學源聞之沛然因持塉所著大學辨業去是之塉乃爲極言顏元明親之道源曰吾知所歸矣遂介塉往博野執贄元門時年五十六矣效元

爲日記立省身錄以糾身心得失習禮終日正衣冠對僕隸必肅然然自負經世之略益堅每曰吾所學乃今始可見之行事非虛言也康熙四十九年客死山陽年六十三著有易傳十卷平書十卷兵論二卷文集二十卷或庵評春秋三傳三卷後元門人築道傳祠祀元源配焉

李塏 惲鶴生 程廷祚

李塏字剛主直隸蠡縣人康熙二十九年舉人年六十選通州學正居官八十餘日以病告歸父明性明諸生入國朝不與試以孝行旌與博野顏元善元見其所輯性理諸書深歎服焉卒年六十九塏弱冠學禮於元又學琴於張而素學射於趙思光學數於劉見田學書於彭通學兵法於王餘祐於田賦禘祫郊社宗廟諸大典靡不研究摺摭史志所載經史大略爲瘳志編以備用旣而深服元六藝之教遂執贄稱弟子友人郭金湯知桐鄉縣邀塏往議政遂之蕭山學樂於毛奇齡盡得其舊所傳五聲二變四清七始九歌十二律諸遺法並受其經學時與往復論易辨太極圖河洛之僞論尙書辨攻古文爲僞之誤論詩言小序不可廢奇齡常稱爲蓋世一人尋遊京都交鄞萬斯同斯同見所著大學辨業爲之序時四方

名士競聚都門斯同夙有講會每講皆顯宦主供張翰林部郎處士數十人環聽一日塏往斯同揖衆言曰此李先生也負聖學正傳請先講以爲求道者路塏遜謝去已而諸人復固請講塏乃暢發以周官大司徒三物解大學格物之旨曰人受天地之中以生則有仁義禮智之性性先見於行則爲子臣弟友行實以事則爲禮樂兵農周公以三物教天下三物之六德有聖忠和猶是四德而分其名也六行有睦婣任卹五倫所推及也六藝有射御書數兵農禮樂之分判也非六德無以善六行非六行無以成六德而非六藝則無以盡六德六行之實事三者乃本末兼賅之道外此則異端曲學烏可訓哉衆皆曰然友人楊勤知富平縣復邀塏往卽至陳光陞黎宋淳魯登闕蔡麟張中等皆從之遊時會諸名士於寓相與論學塏喜曰光陞學易宋淳學禮登闕學樂麟學兵中學平書吾道其遂興乎平書者大興王源所著塏訂之爲分民分土建官取士制田武備六政者也安溪李光地聞塏學行使徐用錫招之不往已而諸王交聘皆避去晚交桐城方苞苞與塏所學不同而志相得其遊如家人時有謗塏者苞釋之爲作釋言苞嘗以程朱之學規塏塏雖引以自責然不能革也塏性至孝父在時與嫡母鄉居留塏及生

母居城率四弟課讀每朔望前一日薄暮步二十五里至鄉省安夙興拜父母各四乃返城拜生母父歿擗踊痛絕三日不食歛葬虞祭皆如禮雍正十一年卒年七十五著有周易傳注七卷筮考一卷郊社考辨一卷論語傳注二卷大學傳注一卷中庸傳注一卷傳注問一卷李氏學樂錄二卷大學辨業四卷聖經學規纂二卷論語二卷小學稽業五卷擬太平第七卷閱史都視五卷恕谷後集十三卷塏之學出於元時稱顏李然塏廣交遊有名於時其學務以實用爲主惟自命太高於程朱講習陸王證悟皆謂之空談蓋自明季心學盛行儒禪淆雜其曲謹者反關於事情沿及國初猶存餘說故元及塏獨力以務實相爭存其說可補諸儒枵腹高談之弊其解釋經義多與宋儒相反然其論易以觀象爲主兼用互體謂聖教罕言性天乾坤四德必歸人事屯蒙以下亦皆以人事立言陳搏龍圖劉牧鉤隱以及探無極推先天者皆使易道入於無用其說頗醇實不涉支離恍惚之談其於大學所爭在以格物爲周禮三物謂孔子時三物教法尙存人人所習不必再言惟以明德親民標其目以誠意指其入手而已格物一傳可不必補奇齡獨惡其說異已作逸講箋以攻之然當時多躉塏說焉塏弟子甚衆清苑馮辰威

縣劉調贊皆能傳其學辰爲撰年譜四卷調贊又續一卷 惲鶴生字臬聞江蘇武進人康熙四十七年舉人官金壇教諭少師常熟錢陸燦爲詩文初喜禪學既讀宋儒書服膺主靜之旨又疑儒者之盛莫如宋而勢之孱亦莫如宋以朱子過稱張浚大非之後遊蠡交李塉見顏元及塉所著書大折服以爲宋世之不振皆學術無用之故遂爲顏李之學嘗與塉會京師出日記相質塉稱其乾乾惕厲謂可與共明斯道也生平研究經術著有讀易譜三卷禹貢解一卷思誠堂說詩十二卷春秋解屬辭比事說六卷大學正業一卷先民易用二卷文集五卷其詩說初尊毛駁鄭塉貽書諍之乃改從其說並以毛鄭爲宗卒年七十九 程廷祚初名默字啟生江蘇上元人諸生初識惲鶴生聞顏李之學康熙五十九年塉南遊金陵廷祚屢過問學讀顏元存學編題其後曰古之害道出於儒之外今之害道出於儒之中顏氏起於燕趙當四海倡和翕然同風之日乃能折衷至當而有以斥其非蓋五百年一人而已故嘗謂爲顏氏者其勢難於孟子其功倍於孟子於是力屏異說以顏元爲主而參以顧炎武黃宗羲讀書極博而皆歸實用乾隆元年召試博學鴻詞有要人慕其名曰主我翰林可得也廷祚拒之卒報罷十六年

江蘇巡撫雅爾哈善復以經學薦亦罷歸三十二年卒年七十七廷祚深於經學能確然言其所言無所依附嘗曰墨守宋學已非墨守漢學尤非其論易力排象數惟以義理爲宗於漢人爻變互體飛伏納甲諸法宋人河洛先天諸圖及乘承比應諸例悉埽而空之著大易擇言三十六卷易通十四卷易說辨正四卷他著又有尙書通議三十卷青溪詩說二十卷禮說二卷春秋識小錄九卷魯論說四卷於書攻毛奇齡古文冤詞之說於春秋考官名地名頗爲精核惟學宗顏李好非議程朱後桐城姚鼐見所著書稱廷祚好學深思博聞強識而持論稍偏與休寧戴震頗相似云

清史列傳 卷六十七

儒林傳上二

勞史桑調元 茅星來

勞史字麟書浙江餘姚人世爲農史幼而端凝不與羣兒伍未就塾輒從旁舍耳誦十三經及長躬耕養父母夜則披卷莊誦年十七反復朱子大學中庸序遂慨然立志爲眞儒舉動必依於禮繼讀朱子近思錄立起設香案北面稽首曰吾師在是矣嘗館上虞顧氏有藏書數萬卷三年卒讀自是研極性理常自刻責謂天之命我者若君之詔臣父之詔子一廢職卽膺嚴譴一墜家業卽窮無所歸可不慎哉其論學以爲下學之功始於不妄語不妄動極之至誠無歇手處接後學委曲盡誠雖傭工下隸皆引之嚮道曰盡爾職分務實做去終身不懈卽聖賢矣勿過自薄也聞者多化之里中負販者近史居不敢貨僞物芻兒牧童或折棄贈繳毀機穽有鬪爭者就史質往往置酒求解晚年涵養益沖粹預知死期沐浴更衣移臥正寢無疾而逝年五十九時康熙五十二年也史之學精於易嘗謂易之爲

道細無不該遠無不屈故其所著述多本易理以推人物之性有餘山遺書十卷門人桑調元汪鑑編次付梓鑑字津夫亦餘姚人父死於雲南鑑護喪歸至漢川遇大風舟且覆抱棺大哭誓以身殉忽風回閣沙渚乃免衆呼爲孝子爲人尙氣節史戒之曰英氣客氣也其學以鎔之自是研心朱子之學粹然儒者矣史之歿也鑑實左右焉 桑調元字伊佐浙江錢塘人父天顯性至孝親病膈合羊脂和粥以進親死抱鐺而哭人爲繪抱鐺圖調元少有異才下筆千言屈其儕輩年十五受業於史得聞性理之學性耿介不妄交人尤嚴取與之辨雍正四年舉順天鄉試十一年會試後遴選舉人之明習性理者得八人調元與焉特旨賜進士授工部主事丁父憂廬墓三年服闋補官釐正規約吏餽以羨金卻不受旋引疾歸嘗主九江濂溪書院構須友堂祠史以著淵源有自又闢餘山書屋於東皋別業友教四方之士一以程朱爲法晚主灤源書院益暢師說著有論語說二卷所言皆闡集注未盡之義頗爲細密又躬行實踐錄十五卷言敬言仁一宗程朱持論亦極醇正其詩文縱橫排奐自成一家有弢甫集八十四卷乾隆三十六年卒年七十七同時爲程朱之學有歸安茅星來 茅星來字豈宿諸生少銳志爲學研

究經史欲以著述自見初讀書圓義精舍覽近思錄有得於科舉奪志一語遂棄帖括潛心是書三十餘年以葉采集解粗淺舛錯乃參校同異薈萃衆說於治道治法逐一疏證名物訓詁亦必析其本末著近思錄集注十四卷其後序云自宋史分道學儒林爲二而言程朱之學者但求之身心性命間不復以通經學古爲事竊嘗論之馬鄭賈孔之說經譬則百貨之所聚也程朱諸先生之說經譬則操權度以平百貨之輕重長短也微權度則貨之輕重長短不見而非百貨所聚則雖有權度無所用之故欲求程朱之學者必自馬鄭諸傳疏始愚於是編備著漢唐諸家之說以見程朱諸先生之有本俾空疏者毋得而藉口焉其持論光明洞達足觀心術之正星來工古文辭嘗曰爲詩文之用而讀書不雜則陋必去其有所爲之意而後可與語於古遊京師桐城方苞溧陽任蘭枝見其稿譽之不容口性迂執復口吃故無敢薦達之者又嘗游滋陽土人不知食鱓羸而署中人食之星來愀然爲述明道爲上元主簿教民勿持竿黏飛鳥爲戒乾隆十三年卒年七十一又著有鈍叟文集

邵廷采

邵廷采字念魯浙江餘姚人諸生曾可孫幼時曾可偶舉宋儒語教之興曰其人安往耶願師事之曾可以爲有志卽送之姚江書院時沈國模年八十爲諸生設講廷采立聽久之執卷詣曰孩提不學不慮堯舜不思不勉同乎國模歎曰孺子知良知矣能敬以恕吾何加焉自是從韓孔當受業又問學於黃宗羲初讀傳習錄無所得旣讀劉宗周人譜曰吾知王氏學所始事矣蠡縣李塉貽書問明儒異同廷采答曰致良知者主誠意陽明而後願學戴山又嘗與人論學廷采曰天泉四言陽明原本無極之說儒也龍溪浸淫無生之旨釋也孝感熊賜履以闢王學爲己任廷采曰是不足辨願在力行耳廷采雖講學好求經世大略論改學校曰重經術廢時文如試頌說可也用徵辟嚴保舉罰其不稱可也立明師養歲貢如經義治事分課可也行科目復對策如賢良方正三試可也又曰學校兼騎射然後用之可以當大事今西北之人不知耕東南之人不知戰皆危事也生平於秣算占候陣圖擊刺無不學嘗與將軍施琅縱談沿海要害琅奇之旣游西北走潼關講學於黃岡之姚江書院復入京師商邱宋犖鄞萬經欲招入一統志館以老辭晚歲思託著述以自見以爲陽明扶世翼教作王子傳戴山功主慎獨忠清節

義作劉子傳王學盛行而良畿躡雜羅楊詭亂務使合乎規矩作王門弟子傳金鉉祁彪佳張兆鼈黃宗羲等確守師說作劉門弟子傳嘗從宗羲問逸事於明末諸臣尤能該其本末所作宋明遺民所知傳倪文正施忠愍諸傳凡數十篇欲勒成一書未竟有東南紀事十二卷西南紀事十二卷康熙五十年卒年六十四弟子刻其文爲思復堂集十卷又姚江書院志略四卷

沈佳向璿

沈佳字昭嗣浙江仁和人康熙二十七年進士初知湖廣監利縣調安化卒於官佳兒時卽有志伊洛之學及長研窮性理嘗與柘城竇克勤鞏姚爾申及錢塘王廷燦秀水范景俱及睢州湯斌之門斌集中語錄佳諸人所手述也然佳之學雖出於斌斌參酌朱陸之間佳則一宗朱子以餘姚黃宗羲明儒學案於姚江末流頗爲回護乃著明儒言行錄十卷續錄二卷以補救其偏其書仿朱子名臣言行錄例大旨以薛瑄爲宗於陳獻章則頗致不滿雖收王守仁於正錄而守仁弟子刪汰甚嚴王畿王艮咸不預焉同里應撫謙稱其書去取至慎有所不足仍載先儒論定之言以爲斷甚不得已始出己說以微示其旨鄞萬斯大宗羲弟子也平

生篤守師說然序是書亦但微以過嚴爲說不能攻擊其失蓋心許之云佳好學深思考訂博洽嘗貽書搆謙論易四德及禮禘祫義所居名學士園自少壯至老未嘗輟書卷他著有禮樂全書四十卷易大象玩易解春秋學大全粹語明代人物考樂府中聲省讐錄復齋遺集 向璿字荆山浙江山陰人五歲母口授四子書卽了大義及居母喪哀毀逾禮事父以孝聞聞郡城陽明後裔王行九講良知之學卽糾同人爲輔仁會沈酣其說者六七年人目爲癡因著癡人傳以自況後得薛瑄高攀龍書反覆玩味知王學之非自是確守程朱嘗言爲學大綱不外居敬窮理力行三者而以居敬爲本窮理而不以敬知必不精力行而不以敬行必不篤又言人一刻不畏天便是罪過一事不反躬便涉怨尤故其平居雖小過自責甚嚴日之所爲夜必告天家貧授徒自給或終日不舉火處之怡然又善啟發人亦未嘗強聒也雍正九年卒年五十著有四書記疑志學後錄

徐世沐黃商衡 華希閔 張雲章 王步青

徐世沐字爾瀚江蘇江陰人諸生少孤力學自立見太極西銘諸書發憤志道年二十餘往見太倉陸世儀讀所著酬答理要深信之世儀謂衆人之學不汎濫文

詞卽沿習二氏惟世沐讀書窮理以求自得又謂世沐好推伊川不畏拘檢所向甚正因申言理一分殊之旨以示世沐世沐又與無錫高世泰諸人往來論學以資其益其爲學篤信朱子切己反求辨別異同務歸於下學實踐俾人無惑歧途而後已蓋屋李容南遊與世沐論學容曰子學篤而行未廣世沐曰先生行高而學不醇其不苟同如此後得容四書反身錄讀之曰容學從陸王入而出入於程朱四子余學從程朱入而準則於周宋八賢雖沐染南風剛峻良有不逮而古人所云醇正則當仁不欲多讓因著四書惜陰錄二十一卷大旨以爲聖賢之學隨知隨行若知而不行雖盡讀經史徒敝精神其光陰可惜尤深痛舉業之驅人入鄙欲學者實從事於聖賢之道而勿務空知一章之中三致意焉晚歲以子恪選拔攜入都仇兆鼈見而驚歎言於衆安溪李光地遂與訂交平湖陸隴其嘉其篤學摘錄中精要語置行篋中爲之跋康熙五十六年疾革遺命勿作佛事息心靜氣以卒年八十八他著有易書詩三禮春秋惜陰錄共八十四卷又周易存義錄十二卷周易惜陰詩集三卷性理吟二卷世沐之後有長洲黃商衡無錫華希閔嘉定張雲章金壇王步青 黃商衡原名師憲字景淑父農以孝子旌商衡少孤

奉母教刻苦於學夜寢刻香繫鐵錘下承銅盤香盡錘墮擊盤聲鏗然卽驚起讀達旦年四十餘補諸生不復進取日讀儒先書尤好戴山人極圖說推衍其義貫以論語大學中庸及橫渠考亭緒言輯爲一書題曰困學錄自命又次學人乾隆六年卒年六十五 華希閔字豫原康熙五十九年舉人乾隆元年舉博學鴻詞不赴試十六年年八十高宗南巡迎駕惠山賜知縣尋卒希閔嗜學能古文以力扶正學爲己任生平慷慨尙氣節巡撫張伯行與總督噶禮互揭主其獄者爲張鵬翮欲庇噶禮罪伯行希閔上書斥之幾罹禍後伯行劾布政使牟欽元鵬翮復劾伯行狂妄革職逮鎮江希閔冒死入獄與伯行相勞苦鵬翮舊視學江左有聲吳人祠之江陰至是鵬翮坐伯行挾詐欺公議斬吳人聞之涕泣希閔因言伯行摧折狀遂共燬鵬翮祠以此名聞江淮間家素裕於義舉無不爲撫幼弟成立卽以父遺金畀之布政使鄂爾泰設春風亭招致賢俊希閔與沈德潛同以耆德見重著有大學約言中庸臚語論孟講義易書詩禮春秋集語性理注釋延綠閣集張雲章字漢瞻太學生嘗從陸隴其遊講學論道有悠然自得之趣遊京師客徐乾學家爲校勘宋元經解張伯行撫吳延纂禮經成服制四卷性靜默不馳逐

聲氣惟以名節相砥礪隴其爲當路所排雲章上書乾學以救之及伯行與噶禮互劾奏讞久未決復上書李光地責其別白是非爲桐城方苞所推重後與修尙書彙纂書成議敘知縣不謁選伯行總督倉場留主潞河書院踰年辭歸雍正初舉孝廉方正以老辭四年卒年七十九所爲文宗南宋服膺朱子暨南軒東萊止齋同甫諸家著有樸邨集二十卷 王步青字漢階雍正元年進士改翰林院庶吉士散館授檢討以告歸步青長身玉立少以文名然覃心正學張伯行撫吳集十五郡知名士講學紫陽書院課以語錄步青三試皆第一伯行稱其能窺道之本原契聖賢之旨趣嘗與桂林陳宏謀書十餘通皆以道義相勸興正學整吏治勵風俗期以一代名臣宏謀謂步青以濂洛關閩爲宗傳以日用倫常爲實際躬行心得不徒飾以空言其教學者一遵白鹿洞遺規晚尤勤學顏其齋曰無逸所謂我朝用經義取士士子當因文見道著朱子四書本義滙參四十五卷又著有己山文集十卷別集四卷乾隆十六年卒年八十

焦袁熹楊履基

焦袁熹字廣期江蘇金山人康熙三十五年舉人袁熹穿穴經傳於諸經注疏皆

有筆記其說易專主義理說禮推言禮意而於春秋尤邃著春秋闕如編八卷自穀梁發常事不書之例孫復衍有貶無褒之文後代承流轉相摹倣務以刻酷爲經義遂使游夏贊之而不能者申韓爲之而有餘袁熹獨酌情理之平立褒貶之準謹持大義刊削煩苛如謂隱公盟蔑繼好息民猶愈於相虞相詐至七年伐邾事由後起不容逆料而加貶辭謂會潛之戎本雜處中國修好亦衰世之常事褒貶俱無可加謂無駭之書名若後世帝室之胄不繫以姓非貶而去之謂書齊侯弟年見齊之重我使其親貴非譏過寵其弟謂書螟爲蟲傷稼卽當留意補助不以此一事便爲惡如此之類皆一洗曲說至於武氏子求賻乃魯不共命天王詰責豈敢反譏天王家父求車乃天子責貢賦有闕經婉其文曰求車不應舍其下責上尤大義凜然非陋儒所及又著此木軒四書說九卷疏理簡明引據典確閒與章句集注小有出入要能釐然有當於人心性至孝事親著書不求聞達鄉薦後自以非用世材遂不會試五十二年李光地王頊齡俱以實學通經薦以親老固辭後銓授山陽教諭仍乞終養不赴生平心師陸隴其不名不字而不走其門王鴻緒纂輯明史招袁熹預其事月餘以持論不合辭去嘗自作經生歌云章句

微細必無豪賢可哀哉說經鏗鏗乃畢吾之餘生其志不近名學問篤實如此雍正十三年卒年七十六又著有經說彙編六卷讀四書注疏八卷太極圖說就正編一卷太玄經解一卷潛虛解一卷九歌解二卷紀年略五卷經世輯論五卷雜著八卷談佛乘贅語五卷尙志錄一卷詩文集二十餘卷 楊履基初名開基字

履德亦金山人優貢生生而穎敏五歲授漢魏六朝詩卽能成誦高宗南巡召試詩賦取入二等有內府文綺之賜生平博涉羣書從平湖陸奎勳遊私淑陸隴其以隴其松陽講義爲晚年手定之書張伯行刪本殊失初意因重編其書附以己意爲二卷事親孝居喪一遵家禮儀節嘗與友人論喪禮謂記云居喪未葬讀喪禮旣葬讀祭禮此爲平日未讀禮者言也張子言居喪他書不可觀蓋謂非聖之書讀聖賢之書未必越於禮外聖賢之學豈以居喪而遂忘之耶著有三禮臆說觀禮編春秋四傳存疑律呂指掌圖鐵齋偶筆詩文集乾隆四十年卒年六十有三

張自超劉齊 劉捷 姜兆錫

張自超字彞歎江蘇高淳人康熙四十二年進士少孤課耕奉母博通經史以躬

行實踐爲主視人世所歆羨泊如也爲諸生負重名迨通籍年已五十長洲韓莖欲其就館職以母老辭又以己非用世材不謁選遂歸無子母病篤爲買妾命入側室泣曰兒方寸亂矣雖入室不能歡合成子姓天果不絕張氏兒何患無子後終母喪數年妾卒不孕人服其知命不惑治經尤長春秋著春秋宗朱辨義十二卷大旨本朱子據事直書之旨不爲隱深阻晦之說惟就經文前後參觀以求其義篇首總論二十條頗得比事屬辭之旨其中如單伯逆王姬則從王氏之說以爲魯之大夫於秦獲晉侯辨所以不書名之故於宋師敗績辨所以不書公之故於司馬華孫來盟辨胡傳義不係乎名之說於盟宋罪趙武之致弱於楚公子比公子棄疾弑立書法見春秋微顯之義於齊殺高厚謂非說晉而於衛人立晉一條尤得春秋深意雖以宗朱爲名而博參經傳務求心得實非南宋以來穿鑿附會之說後桐城方苞作春秋通論多取材是書所爲詩古文皆從經學中出而未嘗爭名於時歸後授經講學文行日著浙撫徐元夢聘主萬松書院一以程朱遺法教人董邦達汪由敦皆出其門性明決所不爲衆莫能奪所欲爲雖困不悔高淳故湖壩以圩障水於外而耕其中歲大潦隄潰自超獨毀其船以板築隄隄完

大有年衆歸其值不受後歲連禱道殣相藉自超與知縣籌賑先賤價賣其田捐二百金爲富室倡時有孔某餉以金作詩卻之曰衆飢天所災獨飽忌鬼神孔得詩卽出粟助賑晚歲家日落然不受饋遺鄉人有不善常畏其知五十六年崑山徐乾學以經學薦召入都行至在平無疾而卒年六十餘方苞嘗以自超與大興王源無錫劉齊上元劉捷並稱四君子源附顏元傳 劉齊字言潔拔貢生性耿介初入太學徐乾學方收召後進齊閉門修業與友三數人誠勿往應順天試有欲援進者作閨女詞謝之教習期滿以不謁吏部侍郎某授州佐或勸納粟爲教官齊曰教官雖微當爲諸生明義利之辨奈何先以納粟進遂歸年四十七卒方苞初薄視宋儒書及交齊勸以講索乃深嗜焉齊卒後苞題其墓曰狷者 劉捷字月三康熙五十年舉人年羹堯巡撫四川請與偕議加賦力爭而止遂以他故行曰其心神外我矣能守吾言以期月乎張鵬翮督學江南招入使院有故人夜詣出千金請事峻拒之卒年六十九方苞與四人交最久而捷兄輝祖及青陽徐念祖宿松朱書亦與方苞善苞嘗言志趨之近者則自超齊捷念祖術業之近者則源書輝祖云 姜兆錫字上均江蘇丹陽人康熙二十九年舉人乾隆元年以

大學士鄂爾泰薦充三禮館纂修官兆錫采輯羣書折衷衆說寅入申出以勤博稱時方苞長於三禮與兆錫集議多不合苞據書望於山川釋四望爲山川之祭兆錫謂大司樂四望與山川異樂典瑞四望與山川異玉當從鄭說苞謂春人序官奄二人恐不給用意周室后夫人節儉躬率嬪御任春揄之事兆錫謂司厲女子入於春彙係罪人不可限以數寧寡母多本職奄與女奚止九人者約舉之詞耳王后以陰禮婦職統嬪御安得自任春揄諸如此例日有數端然兆錫論出苞亦不能難也兆錫自壯年鑽研三禮後益殫精著述有書經蔡傳參義六卷周禮輯義十二卷儀禮經傳內編二十三卷外編五卷禮記章義十卷春秋公穀彙義十二卷胡傳參義十二卷孝經本義一卷爾雅參義六卷自題曰九經補注謂補朱子所未註也其禮記章義謂漢儒掇拾成章往往誤斷誤連當分章以明義其所指謬多有考證較陳澧集說爲密其公穀彙義謂二傳主於發義與左傳主於記事者不同然有混其文以害義者有泥其文以害義者並有竄其文而事與義俱害者惟正終以正始貴道不貴惠之屬固卓乎道義之權衡聖哲之軌範也因彙編二傳異同之處別白其是非而左氏發例釋經之文附見焉於三家褒貶之

例無所偏主足資參考又有周易本義述蘊四卷周易蘊義圖考二卷詩蘊四卷大戴禮刪翼四卷春秋事義慎考十四卷家語正義十卷孔叢子正義五卷所居白鶴溪之藤村姜氏族將萬人兆錫以孝友忠信爲祠正十年卒年八十高宗南巡孫奭以其所著書進賜文綺

陳遷鶴子萬笈

陳遷鶴字聲士福建龍巖人康熙二十四年進士改翰林院庶吉士散館授編修歷官至左春坊左庶子入直南書房四十七年年七十致仕歸又六年卒遷鶴遂於經學不墨守前人成說嘗爲太極無極說曰周子曰無極而太極邵子曰道爲太極心爲無極異端者流竊此爲空虛之說至理晦焉愚謂天地之道動靜而已舍動靜無所爲天地者人心之妙亦動靜而已舍動靜無所爲人心者必曰有物立乎動靜之先思之不得其解遂以冥漠無爲者當之是爲佛老張其幟也夫天地之道純粹精也所謂太極以其純粹者而動萬物生焉得名之曰陽以其純粹者而靜萬物成焉得名之曰陰太極卽在陰陽中也人心具仁義禮智之全德太極也靜而斂精固神陰也動而舉事宣謀陽也太極卽在動靜中也是故陰陽者

生成之器也太極者生成之理也氣存理周先後無次然天地將生萬物始有溫氣將成萬物乃有肅氣理先氣後無次而微有次者也生者出也因時呈見之謂既不得謂陰陽本無因太極始有又不得謂有生於無太極乃無也安溪李光地見其說驚異曰經生中有是人耶遂與接席談論晨夕不倦遷鶴治易自王韓注孔疏旁及胡蘇諸說而折衷於程朱以卦意推爻辭別其時位與才紛互錯綜歸於一是治詩謂毛詩朱傳大旨不甚相遠然二程張子楊時胡安國呂祖謙真德秀黃幹引詩皆用序至於馬貴與護序尤力詩序實不可廢治春秋疑胡傳深文臆斷不盡出聖人之意因讀韓愈詩春秋書王法不誅其人身及言春秋據事跡實錄而善惡自見怡然有得乃上考三傳下逮啖趙陸張窮討端緒而條辨之其言日記曰春秋之失亂非聖經錯亂難讀釋經者亂之也孔子綜二百四十二年之事而紀其終始大義數十炳如日星中間或抑或揚或進或退奧蹟難知揭其大要莫過於正名分明王法而已是故荆楚雖有小善紀其事而非進之也以其僭王之罪大也君雖無道非人臣所得弑也以天澤之分不可踰也紛紛戰伐總以王法爲斷能尊周而攘楚斥秦敗狄者皆予之也以恩怨別曲直者私情而非

王法也孟子曰春秋天子之事蓋挈大權而歸之天子而非孔子自王視孔子太高儼然奉天命行天討袞冕南面而黜陟辟公恐孔子不敢居也曾子曰夫子之道忠恕而已矣春秋立法甚嚴而待人甚寬刑人殺人剗人刵人動輒得罪至於無所容恐聖人意不如是刻也其論春秋書人書爵不可一律拘論春秋無誅意之法無治黨與之法皆爲有見光地嘗謂人曰聲士五十窮經經學甚明要在志堅而力果耳何患晚暮哉歸里後猶矻矻訂所著書有易說十五卷尙書私記一卷毛詩國風釋一卷春秋紀疑三卷閒居咫聞一卷小學疏意大全二卷文集四卷自海上軍興泉州有里長大當之費胥役緣爲奸富室多破產及海上平弊猶存遷鶴請於總督興永朝釐革之又海濱居民避賊內徙荒其田名曰界外而蠲其賦比臺灣平有司按籍徵科民莫知其業大困遷鶴請就現耕地履畝定稅界外之人甦焉子萬策能傳其學 萬策字對初康熙五十七年進士改翰林院庶吉士散館授編修歷詹事府詹事以事降檢討復累遷侍講學士雍正十二年卒於官年六十八萬策少奇慧九歲能屬文鄉試後困公車者二十六年從李光地遊講究經學及六書九數莫不該貫助光地分修御纂周易折中創爲啟蒙諸圖

多前人所未發又修性理精義欽定詩經傳說彙纂善爲進奉文通籍後撰祭告諸文皆稱旨桐城張廷玉嘗言讀陳學士文輒能發人意每舉以爲後進式又嘗受算法於梅文鼎所著近道齋文集六卷其論中西算法異同能究其所以然又有館閣絲綸二卷詩集四卷

李光坡從弟光塙 光型 從子鍾倫 鍾倫子清馥

李光坡字耜卿福建安溪人父兆慶明諸生究心程朱之學兄光地官至大學士自有傳光坡生五歲與伯叔兄弟俱陷賊壘會仲父日爆糾衆與戰乃得拔歸少受學家庭宗尙宋儒及鄉先正蒙引存疑諸書弱冠爲諸生次第講治十三經濂洛關閩書旁及子史質不甚敏以勤苦致熟其論學主程朱論易主邵子兼取揚雄太元以爲雄僭經雖有罪而存易則有功壯歲專意三禮以三禮之學至宋而微至明幾絕儀禮尤世所罕習積四十年成周禮述注二十四卷儀禮述注十七卷禮記述注二十八卷其書以鄭注爲主疏解簡明不蹈支離亦不侈奧博自成一家言其禮記述注自序云始讀陳氏集說疑其未盡及讀注疏又疑其未誠如禮器篇斥後代封禪爲鄭祖緯啟之秦皇漢武前鄭數百年亦鄭注啟之乎又譏

漢唐儒者說理如夢此程朱進人以知本吾儕非其分也今於禮運則輕其出於老氏樂記則少其言理而不及數其他多指爲漢儒之附會而訓禮運之本仁以聚亦曰萬殊一本一本萬殊仲尼燕居之仁鬼神仁昭穆亦曰克去己私以全心德欲以方軼前人恐未能使退舍也其論實能持是非之公心埽門戶之私見康熙四十五年入都與兄光地講貫著性論三篇辨論理氣先後動靜以訂近儒之差及歸光地貽以詩曰後生茂起須家法我老栖遲望子傳其惓惓光坡如此光地嘗論崑山顧炎武與光坡皆數十年用心經學精勤不輟卓然可傳云臺灣卽平詔督撫大臣籌度機宜光坡謂防海之道有慎設其守者有探止泊而遏之者有度要需而絕之者因爲策上之性至孝父病篤焚香禱天燃及於掌不知也母老多病日夕侍寢居喪十旬內祇飲勺水哀慕終身雍正元年舉孝廉方正有司以光坡應已寢疾矣是年卒年七十三又著有皋軒文編四卷從弟光塿光型光塿字廣卿好讀書嘗入高會山中結茅力學自六經子史及宋儒書皆披覽融貫康熙六十年成進士改翰林院庶吉士散館授檢討旋請終養歸後入都充一統志八旗人物志纂修官乾隆元年進三年喪議上深嘉之是冬朝臣以宿學者

儒薦出督山東學政奏兩闈春秋合題非經指春秋四傳宜並習不宜獨宗胡傳又以前氏學宜徧習五經不得專習毛詩均如所請刊宋儒學要語頒教行教經之條以訓士尋擢國子監司業充纂修三禮官卒年六十九光墀與弟光型齊名時稱二李著有二李經說儀封張伯行撫閩時爲序以行又與臨川李紱桐城方苞論學老而彌篤他著有考工發明黃庭二景互注瀋餘詩文集 光型字儀卿事父母以色養稱少與兄光墀問學於光地研究性理尤得力於西銘雍正四年舉人十一年詔舉理學大臣以光型薦特賜進士出爲河南彰德府同知著農書輯要以教民忠信慈惠有古循吏風乾隆元年舉博學鴻詞試罷尋擢刑部主事充三禮館律呂館纂修官卒年七十九光型深通經術得其本原能繼光地一家之學所作易通正洪範解詩六義說文王世子解天問解皆見稱於時有趨庭錄臺灣私議崇雅堂文集 李鍾倫字世德光地長子康熙三十二年舉人幼異敏甫十歲卽知孝敬侍大父母父母疾夜闌僕憊猶親視藥物篤志經學以身體之書禮記九容於壁間以自警嘗云人於苦處不能尋樂如何於樂處有得初受三禮於叔父光坡又與宣城梅文鼎長洲何焯宿遷徐用錫河間王之銳同縣陳萬

策等互相討論其學窮極幽渺具有本原文鼎所謂無膏肓之疾者也著有周禮訓纂二十一卷於五官詮釋大義惟考工記不釋以所補非古經也其父光地嘗著周官筆記叔光坡亦著周禮述注皆標舉要旨弗以考證辨論爲長與鍾倫書相近蓋其家學如是然如辨禘祫社稷學校諸篇及論司馬法車乘士卒之數亦皆考證精覈鍾倫通算律甲數乙數本以赤道求黃道嘗準其法以黃求赤作爲圖論又製器以象之其訓大司徒土圭之法謂百六十餘里景已差一寸亦得諸實測非講學家之空言他著有尙書典謨說四書節記菜園遺書四十五年卒年四十四子清馥 清馥字根侯生四歲而孤光地授以太極圖解通書西銘正蒙等書卽知以古學自期桐城方苞稱其質厚安雅氣度於光地爲近以廕授盛京戶部員外郎遷戶部四川司郎中出知直隸大名府調廣平以疾告歸清馥居官以廉正著聲門人有因節致餽者卻之不肯去受餅餌二籠旋悔之分給胥役後常指以爲戒嘗以二程之學自楊時羅從彥李侗及朱子輾轉授受多在閩中因述楊時以下分別支流下迄元明凡某派傳某人某人又分某派其中家學相承以及友而不師者亦皆並列以明其學所自來著閩中理學淵源考九十二卷其

例每人各爲小傳而以語錄文集論學之語摘錄於後考據特爲詳覈又著閩學志略十七卷仿湯斌洛學編之例而大旨以朱子爲宗他著又有榕村譜錄合考清溪李氏世學考道南講授溫陵學略等書安溪李氏代有撰述光地次子鍾佐鍾佐子清植清植子宗文皆能傳其學清植宗文俱官至禮部侍郎光地季弟鼎徵鼎徵子天寵鍾僑鍾旺天寵子清時亦以經術稱於時清時字授侯乾隆七年進士由編修官至山東巡撫以治水著稱尤深於易及宋五子書著有周易經義十二卷朱子語類或問合纂二十二卷

方邁

方邁字子向福建閩縣人爲諸生有才名仗義負氣爲儉人羅織下獄郡守與按察使愛其才援之得免康熙三十二年成進士知蕭山縣調蘭谿以不善事長官罷歸邁論學謂周子太極圖說出於陳搏本之參同契水火匡郭三五至精二圖而增益之爲太極先天合一之圖蓋道家升降陰陽抽添水火之術周子以其陰陽五行化生萬物之說可與易理相發明故爲之說然陳搏作圖自有陳搏之說周子說圖卽成周子之圖但周子原文首句乃是自無極而爲太極見宋史本傳

此發端之詞猶云自無而有也其後收以太極本無極一言猶云有本於無也故結之曰原始要終故知死生之說自朱子刻於乾道間去自爲二字遂失立言本意蓋有自爲二字則是流行語無極字輕而歸重於太極去自爲二字則是對待語無極與太極更無賓主異同之見由此蠱生成聚訟矣又辨陸王之學謂象山得力於孟子以先立其大爲主其自言功力以人情物理事勢言之正與紫陽窮理致知反躬實踐之論互相印證紫陽固欲引象山爲益友而後人乃反以仇敵視之此豈紫陽意耶陽明少泛濫於詞章馳騁於孫吳苦紫陽格物窮理之學爲煩雜乃究心佛老鍊習伏藏得其見性抱一之旨自謂有悟遂取孟子良知一言合之大學致知之解自立一說朱子以天下之方員皆有定理必外之物格而後內之知致陽明則以事務之理皆不外於一念之良知規矩在我而天下之方員不可勝用卽象山亦言束書不觀游談無根而陽明則以爲禮樂名物古今事變皆不必學是陽明與朱陸皆爲冰炭也然陽明猶善修飾至其徒王畿則登堂說法至李贄遂公然髡首儒服李斯凶斃謂爲荀卿教之豈誣也哉其說經謂易大衍之數與河圖無異五十者大衍之數五十有五者天地之數如謂大衍法天地

則何以去五不用謂虛其六以當六爻則大衍止是五十而用四十九所虛者一耳以天地之五合大衍之一以當六爻恐無此事外牽連之法又謂乾鑿度以乾坤巽艮四隅卦爲四門坎離震兌四方卦爲四正皆伏羲所定則在漢時皆以帝出乎震八卦次序爲羲畫原文固非文王所改邵子以先天爲伏羲八卦然經明云水火不相射圖則水火相射矣圖與經反恐伏羲不如是悖孔子贊易不如是疏又謂伏羲畫卦明白簡易止有八與六十四三畫與六畫而已無所謂一畫二畫四畫五畫及十六卦三十二卦之紛紜舛錯也其卦象則祇以父母六子相生爲次序亦並無東西南北方隅位數之殊也先天卦位方圖員圖諸法皆宋儒之易非庖羲之易又謂書泰誓惟十有三年春十三者連文王九年言之蔡傳以爲武王之十三年大戴禮文王十五而生武王則文王殂時武王已八十三歲明年卽位若又十三年已死四年矣文王受命改元稱王之說宋儒力闢其謬受命之說本出後人推原或未必然惟改元則於事理非謬蓋文王於囚羑里後失國再復後改元年多方曰天惟五年須暇之子孫誕作民主則武王立五年而卽伐紂其所謂十三年者果武合文年無疑也若稱王之說夫子之言有之周公追王太

王王季不及文王已稱王故也又謂衛康叔之封出於成王書傳往往有之蔡傳謂成王告叔不當稱弟且不當至此時始封不知康叔在武王時已封於康爲畿內諸侯至營洛邑遷殷頑乃封於衛康誥之稱弟者非成王弟之周公攝政實假王命曰朕其弟者周公弟之也又謂韓詩外傳紀召伯在朝有司請營召以居召伯曰以吾一身而勞民此非吾先君文王之志也然則召伯之封召在文王後朱子謂出自文王此未可信又謂風雅頌者詩之三體王卽有雅有頌奈何不容其有風朱子云黍離降爲國風而雅亡者亦非又謂春秋許世子止之惡書法甚明止實自用藥以殺其父無異於操刃胡氏歐陽氏金仁山乃責其不擇醫不躬進藥憐止之不幸其說爲愼又謂胡安國以私意解春秋欲以書人書字書爵名號時地之間爲聖人用意之所存聖人用意不如是之淺或又以爲春秋聖人之寓意則直以爲莊列之放言非聖人之大法於春秋之旨愈求愈遠其說皆能析疑破滯官蕭山時與毛奇齡往復問難凡所駁摘咸有依據其他所說繁縟絡繹不減范蔡惟不信周禮儀禮以爲互校三禮彼此舛異疑戰國所依託其持論類呂坤之四禮疑問通人以是病之邁嘗取中庸九經條纂之以配大學衍義爲九經

衍義一百卷又著經義考異七卷四書講義六卷春秋補傳十二卷五燈摘謬一卷考證資治通鑑前編十八卷古今通韻輯要六卷文集三卷詩集一卷

陳法

陳法字定齋貴州安平人康熙五十二年進士改翰林院庶吉士散館授檢討五十六年充順天鄉試同考官五十七年充會試同考官雍正初特旨舉翰林才堪部務者改刑部郎中八年授直隸順德府知府所屬平鄉牛產子一角龍鱗而牛蹠知縣以爲麟將上之法抑不許尋引疾歸高宗登極以孫嘉淦薦授山東登州府知府擢運河道調江南廬鳳道復調淮陽道法考論河務著河干問答謂河濟爲北紀江淮爲南紀不可易置今河淮二瀆交流爲害宜導河自張秋以東入大清河循濟漯之故瀆以入於海嘉淦見其書善之乾隆十年調直隸大名道是歲河決江南陳家浦河督白鍾山被劾去責令賠補法念舊與鍾山同事不可使獨受譴牒部科自引咎且爲鍾山辨析奉旨下部議革職發軍臺效力法以四駱駝負書數萬卷赴第十六臺日著書自娛臺舊無井法示其地掘之得泉而甘人號陳公井以子慶升呈懇爲父贖罪得旨放歸法居官爲政以教養爲先興利除弊

力輓頽風公牘文告皆手治情詞懇款既久人猶感誦之生平潛心性理尤服膺朱子之學其伯父嘗棄諸生入深山中求道靜坐月餘云忽見此心光明洞澈與天地萬物爲一體法疑之後以憂歸里於山寺中徧觀楞嚴圓覺法華諸經乃知象山陽明之說實類禪宗因著明辨錄以闢其非謂象山心學卽釋氏直指人心以頓悟爲道妙本集中於楊慈湖有雙明閣之悟於詹子南有下樓之悟於徐仲誠有槐堂鏡中觀花之悟此卽廖子晦靜坐中見所謂充周而洞達者萬物在其中各各呈露朱子斥之以爲此思慮泯絕恍惚間瞥見心性影象與聖賢真實知見不同者也陽明在龍場端居默坐一夕大悟汗出踴躍若狂卽錢緒山蔣道林羅念庵凡學墮於禪者無不有此頓悟之機與子晦所見無二子晦得朱子就正乃悟所見之非象山獨學無師而於孟子所謂本心所謂求放心者有契合焉然其言求放心則遺學問言先立乎其大則廢思俱未暇深求其義而於其本心之明或靜中體究或因事感觸此知覺之知恍惚呈露蓋不難矣遂於此而謂此心本靈此理本明云收拾精神自作主宰當惻隱卽惻隱當羞惡卽羞惡誰能欺得是此心已全乎仁義禮智發之無不當如大舜之由仁義行更何俟四端之擴充

豈孟子教人之旨乎夫聖賢所謂復其本心者復其皆備之心象山所謂復其本心者復其虛靈知覺之心則一心之外無餘事故詆格致爲支離視集義爲外義本源既差功效自不能不異而儒釋遂以此分矣又謂良知之說本之孟子惟孟子本愛敬而言陽明離愛敬而言是假良知之名以文其靈覺之知也陽明既曰良知卽理又曰良知所知之天理是以歧而二之矣既曰良知卽性又曰佛氏本來面目卽儒門所謂良知佛氏本來面目果性耶天理耶其所謂致者一若不假推致之力純任自然無往非道孔子生安猶至七十而始不踰矩今欲人人不學不慮坐致於此其不致猖狂妄行者幾希此任心廢學之弊也其論格致謂程子以格訓至如祖考來格之格卽書所謂格於上下之格羅整庵引呂成公通澈無閒之義極爲得之夫子孫之精神卽祖考之精神當其未格不能無幽明之異格則精神訢合而無閒矣物之理卽吾心之理當其未格不能無彼此之間格則理皆渾合而無閒矣而陽明以爲至物不可通此泥於訓詁之失也書凡十篇辨論至明哲居軍臺時著易箋八卷取程朱傳義發明之大旨以人事爲主而深闢來知德錯綜之說桂林陳宏謀與法最契迎居蘇撫署中嘗應詔舉賢再疏薦法法

無意仕進歸主貴山書院十有八年而卒又著有內心齋稿

李文炤王元復

李文炤字元朗湖南善化人康熙五十二年舉人母孕十六月而生幼讀書過目成誦時稱神童及長潛心理學與同邑熊超寧鄉張鳴珂邵陽車旡咎王元復等相切劘其學遂於經而於天文地理子史百家及釋氏書亦必批其根柢嘗言不察二氏之所以非安知吾儒之所以是不觀諸子之有醇有駁安知吾儒之醇乎其醇不審秦漢以下之成敗得失安知三代以上帝德王猷之盡善盡美也生平力肩斯道惟恐濂洛關閩之說不傳於世嘗曰陸九淵議太極之非是大原可得而溷也林栗攻西銘之失是宏綱可得而絕也程迥詆主敬之誤是聖功可得而廢也陳亮疑道治天下之迂是王猷可得而雜也又曰晦翁續正叔之緒而底於大備子靜襲伯淳之詣而入於歧途遂至朋分角立歷數百年而未已以故德溫叔心方續晦翁之傳公甫伯安復張子靜之幟而有明末代之學術卒淪於淫辭詖行之歸嗚呼其亦不思而已矣著太極通書拾遺後錄三卷西銘拾遺後錄二卷正蒙集解九卷近思錄集解十四卷家禮拾遺三卷其解經一以朱子爲歸有

周易本義拾遺六卷周禮集傳六卷春秋集傳十卷又有語類約編聖學淵源錄增刪儀禮經傳通解四書詳說恆齋文集湖南自王夫之以學術聞天下文炤繼起名與之埒性至孝母得乳癌疾親吮之醫用瀉至四五斤或言疾不可起須惜費文炤泣然曰爲人子豈有知其難爲而不下藥者乎居喪哀毀一循古禮後選穀城教諭不赴主講岳麓書院著學規及學庸講義成就者衆雍正十三年卒年六十四弟芳華字實庵雍正七年舉人學宗程朱與文炤互相師友同著四書詳說又有通鑑綱目集義五十九卷澹園文集 王元復字能愚湖南邵陽人歲貢生邃於經術與車無咎齊名於皇極經世洪範內篇律呂新書皆有心得文炤初留意莊列書自見元復後不敢涉日嘗以所未徹者問元復元復作廣道鬼神死生蠡測四論示之著有榴園管測五卷車无咎字補旃亦邵陽人歲貢生事父母誠孝母歿扶柩過資水清溪灘暴風輓絕舟將覆无咎號痛誓以身殉俄風止得無恙

胡方陳遇夫 馮成修 勞澧 馮經

胡方字大靈廣東新會人歲貢生方敦崇實行獨守堅確年十二應童子試廣州

司李涂某奇其文延與語謂當薦之學使方端坐不答總督吳興祚聞其名使招之走匿不能得也事父母色養備至而心如不及侍疾憂形於色藥嘗而後進夜必衣冠侍未嘗就寢居喪藉草宿柩旁三年不入內先人田廬悉與弟授徒自給得錢置硯側族姍貧者令取之盡乃止有達官齎重金乞其文爲壽不應吏囑之不應家人告以絕糧不應子弟不違有願就鞭扑不願聞於方者里人語曰可被他人笞勿使胡君知他人笞猶可胡君愧殺我從學者仕與未仕白首猶懷其教雖困甚終不入公庭或以廕得官則大慙曰吾未能信得毋辱我夫子四十後杜門著述取朱子易本義而闡其旨爲周易本義注六卷又取四子書句梳字櫛補先儒所未及爲四子書注十卷又著莊子注四卷鴻梅堂詩文集六卷新會爲明陳獻章講學之鄉方集中謁白沙祠諸作及白沙子論具見淵源其梅花四體詩亦寓言講學如白沙之以詩教也雍正四年學政惠士奇疏薦稱方品端學醇一介不苟所著書接理學之傳而大要以力行爲主其年衰老宜有以寵異之先是方僑居鹽步士奇艤舟村外遣吳生求見方急揮手曰學政未蒞事不可見不可見出吳而肩其門士奇索所著書去試畢仍介吳生以請則假一冠投刺至長揖

曰今日齋沐謝知己方年邁無受教地不能執弟子禮數語遂起士奇謂吳生曰方貌似顧炎武必享大名當時知方者士奇一人而已年七十四卒郡中勵學篤行者有陳遇夫馮成修勞潼 陳遇夫字廷際廣東新寧人康熙十五年舉人生平潔身砥行敦崇禮節淹貫羣書究心宋學鄉舉後四十年四方貴顯無有識其面者知縣姜朝俊造廬問政所言皆切中時弊雍正元年詔舉孝廉方正朝俊薦之力辭遇夫論學謂明白薛胡與陳王異派迨其後也各標宗旨夫道一而已自小學以至大學經訓各具可考而知有何宗旨祕傳又謂陳獻章世指爲陸學然觀明儒學術之裂門戶之爭獻章不以講學自居不以議論強人聽從誠爲深識因重訂楊起元所輯白沙語錄以明獻章之學由博返約非由禪悟又著白沙年譜一卷白沙門人錄一卷又不遑宋人道喪千載之語采自漢迄唐二十七人據本傳而加論斷以明諸儒學統相承未嘗中絕爲正學續四卷他著有史見一卷迂言百則一卷年七十卒 馮成修字遜求廣東南海人生有至性七齡喪母哀毀如成人父遠遊不歸每語及輒涕交頤乾隆四年成進士改翰林院庶吉士散館授吏部主事遷員外郎十五年充福建鄉試副考官尋遷郎中十八年充四川

鄉試正考官二十四年督學貴州揭條約十四則以訓士成修初計偕卽徧訪其父蹤跡得官後再乞假尋親卒無所遇年六十一告歸不復出授經里中粹然師範至年八十計其父已逾百齡乃持服三年終身衣布六十年重宴鹿鳴逾年卒年九十五著有養正要規學庸集要等書 勞潼字潤之亦南海人乾隆二十年舉人髫齡時母授毛詩長途習焉應鄉試詩經房溢額者再或勸改經潼曰吾不敢忘母教也旣舉於鄉以母老不肯再應禮部試夙受知餘姚盧文弨文弨視學湖南強召之往至冬歸母思念殊切抵家漏三下跪母榻前母且泣且撫之曰其夢也耶潼悲不自勝自是不復出遊侍養十有六年而母卒哀毀骨立家人或失潼所在卽趨殯所視之已慟哭失聲矣又痛早孤故以莪野爲號家居以倡明正學利濟鄉黨爲己任嘗言讀孔子書得一言曰務民之義讀孟子書得一言曰強爲善而已矣讀朱子書得一言曰切己體察立學約八戒約七日苟犯此勿入吾門粵連歲洊饑力行捐振存活無算嘗言三代井田之法不可復行所恃以活民者惟在積貯乃倡立義倉不經官理司事公舉輪值侵漁者罰粵人善之著有四書擇粹十二卷孝經考異選注二卷救荒備覽四卷荷經堂稿四卷嘉慶六年卒

馮經字雁山亦南海人乾隆三十五年舉人官教諭篤學強記受知於督學翁方綱嘗讀詩至衡門之下一章怡然自得曰此君子素位不願外之說也孔顏樂處豈外求哉授徒三十年講說不倦來學之士至解舍不能容嘗謂說經必統會一經之始終而融貫諸經以證之其說乃確不可易尤邃於易釋卦象以十翼爲據釋爻辭以彖辭爲本河洛之數以周髀經爲宗而旁及於筆算籌算隨手指畫不差秒忽諸生有問難者輒色喜曲爲開導務使明達少左目失明其一僅能辨字畫每觀書目光去紙不一寸攻治益力生平以至誠感人未嘗有曖昧事免母喪踰年講論語至喜懼兩言嗚咽泣下門弟子皆起立動容卒年七十八著有四書學解周易略解詩經書經略解考工記注羣經互解算畧

殷元福夏錫疇

殷元福字夢五河南新鄉人七歲讀小學近思錄欣然樂之舉動卽以爲法少孤家貧依母紡車前假燈光終夜朗誦康熙三十三年成進士改翰林院庶吉士散館授廣西柳城縣知縣重農課士行鄉飲及賓興禮雍然可觀以艱歸服闋補江西武進縣吏胥慢易書生捧牘至元福咄嗟裁決咸驚服兩江有神明之頌攝無

錫謁東林講堂拔識名宿鄒升恆輩時以爲知人尋以告歸高安朱軾撫浙倡明正學拔士之好學能文者送敷文書院請元福主講席元福以明體達用爲教人材奮興時呼小白鹿洞生平設施皆本實踐精研周易詮發圖書太極之旨所著一遵程朱於陸王過當之處多所糾正其論文謂學能自得必不蹈襲成言而所言皆得人心之所同然孟子性善養氣之論爲前聖所未發自得故也論詩謂必敦乎理以爲志而理必資於學著有寓理集候鳴集知非草讀易草年六十四卒元福之後中州河北學者有夏錫疇 夏錫疇字用九河南河內人乾隆四十八年舉人事繼母以孝聞治經通大義不爲章句之習篤志勵行晝之所爲夜必書之生平寡交遊與俗不苟合喜讀易結廬吟誦其中題曰獨寐齋家世素貧以耕自給不足乃張藥室於市嘗謂許魯齋言學者治生最不可忽治生以務農爲上商賈次之決不可以教學作官圖爲生計也作陶隱氏傳自況其爲學鞭辟近裏而不喜良知之說曰良知者卽心以爲學故以格物爲務外以讀書爲溺心猶造衡者不準諸天下之所同然而擅私以自信教人以躬行實踐爲主曰言僞則多沮行僞則多敗吾人言行之際妻子見之奴僕見之鄉黨望之朋友責之欲以飾

己欺人得乎又曰僞言僞行僞意去盡纔成真君子鄉舉後以親老不願仕乃建宗祠立宗法置義田敦本訓俗講學西墅中以故夏氏之族無涉訟庭者著有讀易私鈔私說強學錄日省格邵窩文集嘉慶三年卒年六十七

胡具慶郭善鄰 王聿修

胡具慶字餘也本直隸容城人遷河南杞縣康熙五十九年舉人乾隆七年中明通榜官石泉縣知縣具慶六歲從商州李棟學棟老儒究心性理觀書之暇瞑目靜坐如泥塑然以具慶年少未之語也至年十六讀近思錄好之問於棟棟以書答曰人之一生以心爲主故曰天君吾子時時提醒此心聲色貨利毫不撓我方寸萬事當前天理澄湛卽此是道卽此是入道之方具慶服膺師訓如是者三十餘年時蠡縣李瑛斥靜坐爲禪學具慶謂程門設教以靜坐爲入手蓋靜坐則神氣清明乃能徐見義理所在書言坐以待日禮言坐如尸非坐禪入定之謂故其爲學合動靜一致而期於慎獨著獨知論三篇謂獨卽明德之本體天命之性之蘊於吾心者也譬之於日朱子所謂獨知者是日之光吾所謂獨者是日之體又謂獨與幾不同幾有善有惡獨有善無惡以太極圖證之幾則其分陰分陽之際

而獨則其渾然太極之體故審幾誠學者之切務而慎獨又切務中之先務大學中庸皆以此爲扼要之功又著證獨說三篇謂獨卽堯舜以來相傳之心法書云允執厥中中者獨之體也允執者慎之功也又謂孔子語曾子以一貫一者何獨是也曾子傳大學言三綱領八條目而扼要在慎獨絜矩慎獨忠也絜矩恕也恕由忠出然則夫子所謂一貫惟在於慎獨而已矣又謂孟子所言求放心擴四端者無非發明慎獨之旨蓋獨體卽心體亦卽性體離其獨體心卽放慎之於獨心卽收性發爲情則有四端慎之於獨而端可充孟子之言發前聖所未發而實則慎獨二字已包蘊於其中生平最惡科舉之學謂科舉欲利之心中人膏肓非先去此痼疾不足與言正學又謂三代井田封建肉刑不可復而學校之制則必當復今之所以治不古若者由於人材衰少而天下鮮知道之士則以學校不立而上所以教之者非其道也具慶與睢州湯準長垣崔渭源友善以正學相砥礪準斌之子渭源蔚林之子其學蓋淵源夏峯云著有克己要錄孝經章句求志山房文集同時學者有商邱郭善鄰禹州王聿修 郭善鄰字畏齋乾隆元年舉人少受知於虞城孫偉男偉男嘗從徐鄰唐田蘭芳遊篤學力行居喪廬墓有馴蛇白

雉之異雍正元年舉孝廉方正不就卒年八十善鄰研精經史篤志聖賢而爲學務歸平實嘗曰學術經濟皆本分內事後世士人薄於自待規摹制義外不復知所學更有何事求其有益身心家國難矣平時教人必以孝悌忠信諷諭於道而不輕課以文詞亦雅不欲以文詞自見也著畏說謂大凡人心不可不知所畏畏心之存亡善惡所由判也故字曰畏齋嘗與同人爲廻瀾社仿文潞公眞率會澠池張氏脫粟會意惟以講學勸善爲務其所著述大抵有關於人心世道非僅經生家言有春秋解疏興觀錄先賢模範春山文集 王聿修字念祖乾隆元年舉人七歲時父偶出未返雪夜庭立以待不肯入戶曰父受寒也家貧爇香節映書誦達旦語同學曰存心在精一行事先孝弟記誦詞章不足畢學者事授徒以仁義爲教不及榮利身示之則人多化之嘗館於葉夢父諱痛亟歸省則瘡生肘間家人猶未知也以大挑二等授確山教諭始至謁廟廟前燬已久捐歲入修之三年始成祭器樂舞皆備擢四川珙縣知縣珙無城聿修興築之會禱雨雨輒以夜不妨工作珙人爲詩歌勒之石歷官不攜妻子布衣齋食一錢不入家以失察去官已復補雲南南安州州判駐州西南境之磻嘉故明縣治也猺夷居之夷俗親

死戾其頸至斷曰使還顧子孫焚而揚其灰曰使升天前官勸戒不能止聿修知其俗尙鬼使工圖裸鬼數十百皆焦頭烙背骨折腸出雜漢鬼間漢鬼峨然冠帶如生人徧張之示曰吾夜夢裸鬼哀我如此夷人皆慟自悔恨俗遂革聿修曰是猶未知孝乃擇其子弟秀者入村塾導之禮讓裸夷多踴躍薙髮爭誦言孝悌旋以老乞歸五十二年卒年八十一卒後數年白蓮教起官軍誅討獲邾寶豐人甚衆獨禹州無一人入其黨知州崇士錦詢之皆曰王先生之教也士錦大驚異序其事而傳之著有四書五經講義全史提要珙志磬嘉志

王植黃叔瓚 王之銳

王植字懷三直隸深澤人康熙六十年進士授廣東和平縣知縣調陽江擢羅定州知州歷署平遠海豐新會香山及德慶州欽州巡撫王安國特薦之召見發山東補霽化調郟城以老病乞休植敦勵名節思效長孺之戇自號曰戇思居官廉直持平有強項吏稱所至興利除弊名大著尤務先教化聽訟必勸諭使服然後去嘗曰刑罰中之教化其效尤捷乞休時值聖駕將南巡以規避奪職仍留辦差事竣大吏欲爲奏請引見謝曰進退士人之大義旣稱老病病可愈老可返少乎

遂歸性勤敏經史百家靡不研究而一以宋五子爲宗著正蒙初義十七卷謂張子見道原從儒釋異同處入故其言太虛皆與釋氏對照又謂太虛有三義又謂程朱多不滿太虛二字然晰其本旨殊塗同歸不必執程朱緒論以相詆又謂詩箋書序禮疏舊說張子所用爲多當分別觀之不宜橫生訾議其論皆持平無門戶之見又取太極圖說通書西銘以朱子注列前諸家說附後參以己意著濂關三書三卷又著皇極經世全書解八卷道學淵源錄一卷晚著四書參注二卷大旨在辨朱陸之異同解仁義性道極爲通貫蓋其學根柢之所在嘗語子姪曰宋儒書言治身克己幽隱畢照以此自檢覺時時不能無過所自信者大德不踰閑爾年八十六卒又著有韻學五卷讀史綱要一卷權衡一書四十卷崇雅堂集八卷 黃叔璥字玉圃順天大興人兄叔琳已入列傳叔璥康熙四十八年進士由戶部主事遷吏部員外郎以薦擢御史巡視東城時王公以追私逋相屬甚夥叔璥告同列曰御史非王官何瑣瑣若是下所司理之有銜邸命至署者昂然坐滿御史上叔璥斥使徹坐將劾之其人悚惕謝罪去六十年臺灣亂甫定上擇臺臣廉靜有才識者往巡視特遣叔璥至則翦餘孽釋脅從反側遂安暇考其地攻守

險隘控制機宜著臺海使槎錄八卷雍正初任滿世宗命以所行事告後任因列海疆十要既還或以蜚語中之遂落職乾隆初起河南開歸道調驛鹽道撫災民濬河渠勤恤周至性至孝以不獲迎養作思歸圖以見志尋以母憂歸服除補江南常鎮揚道以老致仕家居七年卒年七十七叔璫記聞博洽晚歲尤究心先儒書其學以立誠爲本要其功於篤敬故自號篤齋嘗語人曰道學卽正學也親正人聞正言行正事斯爲實學不然空談性命何補乎博野尹會一巡撫河南叔璫爲其屬每見會一釋辭自下若後進之接師儒二司爲之動色相詫會一曰叔璫立不易方和而不流君子人也嘗取孫承澤增訂宋陳普字義及陳北溪字義程達原字訓爲廣字義三卷他著有近思錄集注慎終約篇旣倦錄南臺舊聞十六卷南征紀程一卷中州金石考八卷王之銳字仲穎直隸河間人幼有志正學年十四讀論語吾十有五章瞿然曰吾去成童一年耳曾小學之未通乎督學李光地按試河間召與語歎曰南方無此學質也選貢之使從遊七年盡聞光地之學時景州王廷珍交河王蘭生以及光地門皆入翰林之銳獨澹然沖默與江陰楊名時相切劘光地嘗曰從吾遊者不翅千人然而潛心學問不求聞達南楊北

王而已以纂修周易折中議敘教職乾隆四年以薦擢國子監助教十四年左都御史梅穀成侍郎何國宗復以經學薦以病不能行性孝友兄暴橫之銳事之謹及歿欲去官遂服格於例而止桐城方苞稱之銳孝友本天性學問法程朱其廉靜之操雖光地有不如也十八年卒年七十九

王懋竑

王懋竑字予中江蘇寶應人少從叔父式丹學刻厲篤志恥爲標榜聲譽精研朱子之學身體力行康熙五十七年成進士年五十一矣在吏部乞就教職授安慶府教授雍正元年與漳浦蔡世遠同被召引見授翰林院編修命在三阿哥書房行走二年以母憂去官特賜內務府白金爲喪葬費諭以治喪畢卽來京不必俟三年素善病居喪毀瘠明年入都謝恩畢遂以老病辭歸乾隆六年卒年七十四懋竑性澹泊少時嘗謂友人曰老屋三間破書萬卷平生志願足矣歸里後杜門著書以明李默所定朱子年譜多刪改原編與晚年定論道一編暗合因取文集語類等書條析而精研之以正年月之後先旨歸之同異訂爲年譜四卷考異四卷附錄二卷末第時卽編是書至易簣前數日乃成大旨在辨爲學次序以攻姚

江之說同邑朱澤溼潛心朱學據答南軒書云敬貫動靜而以靜爲本謂必從主敬以透主靜消息懋竑辨之曰人之有動靜也猶其有呼吸也靜則必動動則必靜論其循環則有互根之妙論其時節則有各致之功朱子已發未發說作於己丑有以靜爲本之說甲午乙未以後不復主此說矣主靜之指出於濂溪而朱子丙申作濂溪書堂記己亥作隆興祠記癸卯作韶州祠記癸丑作邵州祠記俱不一言主靜蓋敬可以貫動靜而靜不可以該動專言靜則偏矣又著白田雜著八卷於朱子書考訂尤詳謂易本義前九圖筮儀皆後人依託非朱子所作其略云朱子於易有本義有啟蒙與門人講論甚詳而此九圖曾無一語及之九圖之不合於本義啟蒙者多矣門人何以絕不致疑也本義之敘畫卦云自上而下再倍而三以成八卦八卦之上各加八卦以成六十四卦初不敢參以邵子之說至啟蒙則一本邵子而邵子所傳止有先天方圓圖其伏羲八卦圖文王八卦圖則以經世演易圖推而得之同州王氏漢上朱氏易皆有此二圖啟蒙因之至朱子所自作橫圖六則注大傳及邵子語於下而不敢題曰伏羲六十四卦圖其慎如此今直云伏羲八卦次序圖伏羲八卦方位圖伏羲六十四卦次序圖伏羲六十四

卦方位圖是孰受而孰傳之耶乃云伏羲四圖其說皆出邵氏邵氏止有先天一圖其八卦圖後來所推六橫圖朱子所作以爲皆出邵氏是誣邵氏也又云邵氏得之李之才之才得之穆修修得之希夷此明道敘康節學問源流如此漢上朱氏以先天圖屬之已無所據今乃移之四圖若希夷已有此四圖者是并誣希夷也文王八卦說卦明言之本義以爲未詳啟蒙別爲之說而不以入於本義至於乾天也故稱父一節本義以爲揲著以求爻啟蒙以爲乾求於坤坤求於乾與乾爲首兩節皆文王觀於已成之卦而推其未明之象與本義不同今乃以爲文王八卦次序圖又孰受而孰傳之耶卦變圖啟蒙詳之蓋一卦可變爲六十四卦彖傳卦變偶舉十九卦以爲說爾今圖卦變皆自十二辟卦而來以本義考之惟訟晉二卦爲合餘十七卦皆不合其非朱子之書明矣其說爲宋元儒者所未發又謂家禮亦後人依託之書又爲朱子答江元適書薛士龍書考一篇皆根柢全集語錄鈎稽年月辨別異同幾微得失無不周知其言尤允當他著有朱子文集注朱子語錄注讀經記疑讀史記疑白田草堂存稿

朱澤漢喬漢 任瓊

朱澤澧字湘陶江蘇寶應人諸生祖克簡順治四年進士官雲南道御史出巡福建值海寇周鶴芝圍省城率兵赴援與巡撫合力擒賊請增兵仙霞嶺築漳浦十餘城又度民利病上汰冗員革帶辦禁株連蠲鹽課恤驛困諸疏均蒙允可所治在延平陵溪與諸生講明朱子聖學秩滿歸郡人配享李延平祠著有奏疏政略石厓集澤澧少勤學得程氏讀書分年日程卽尋次序刻苦誦習數年略徧更學天文於泰州陳厚耀能得其意久之有志於聖人之道念朱子之學實繼周程紹顏孟以上溯孔子有謂朱子爲道問學陸王爲尊德性者以是蓄疑於中復取朱子文集語類觀之按其收斂身心體驗道理先後淺深曲折次第之故選錄成卷一字一句無不精心研窮反身體認初從中和舊說序已發未發說與湖南諸公答張欽夫書知其用功親切惟在靜中持守動中省察而又以靜中之動動中之靜終未融澈不能無疑與同邑王懋竑寓書質問懋竑屢書答之乃復玩答陳超宗陳器之林德九林澤之書玉山講義及太極圖說西銘解注恍然悟未發時四德渾具自有條理已發時四端各見品節不差而以語類中陳北溪所錄窮究根源來歷一條爲教人入門下手處由是深信朱子居敬窮理之學爲孔子以來相

傳的緒不可移易窮卽窮其所存之心存卽存其所窮之理止是一事喟然歎曰尊德性者莫如朱子道問學者亦莫如朱子矣著朱子未發涵養辨格物說辨等篇發明朱子之精蘊其辨析陸王皆粒破銖分毫無含糊嘗講學錫山一時學者多從之遊雍正六年詔舉賢良直隸總督何世基劉師恕交章薦之師恕使其弟造廬請皆弗應澤灃讀書未明起肅容莊誦事至斯應應已復誦日昃無事閉關靜坐旣暮挑燈諷詠率至夜分未嘗一日間晚得脾疾猶然一日讀易至益卦謂其子光進曰益象言遷善改過此功夫無時可已直到曾子易簣猶是進益處又曰聖賢功夫正於困苦時驗之若稍縱弛便至墮落可不懼哉疾甚吟邵雍詩怡然而逝年六十七著有止泉集八卷朱子聖學考略十卷朱子誨人編先儒關佛考王學辨陽明晚年定論辨吏治集覽師表集覽光進字宗洛能傳父學居母喪以毀卒有過庭紀聞梁谿紀聞讀禮偶鈔詩文集 喬漢字星渚亦寶應人少有機節水決子嬰隄衆走避漢倡捍塞十日隄成從澤灃受學遵朱子教人讀書次第取朱子書切己體察有疑輒質澤灃時年五十矣澤灃稱之曰從吾遊者衆矣惟喬君剛甚因舉或問過時後學語語類訓石洪慶語告之漢益奮澤灃歿復與

光進相砥礪乾隆元年舉孝廉方正辭不就與王懋竑論學書凡再三自謂向道
晚須用己百之功聞弟卒江陵即日冒雪行數千里扶櫬歸疾革曰吾自頂至踵
無一處不痛惟此心凝然不亂耳沐浴正衣冠而逝年六十五著有省身錄訓子
要言困學堂遺稿蕭山湯金釗謂其學術剛健篤實發爲輝光粹然有德之言

任瑗字恕庵江蘇山陽人年十八棄舉子業講學靜坐三年旣而嘆曰聖人之道
歸於中庸極於盡性精義入神以致用也利用安身以崇德也豈是之謂哉於是
取先儒書潛玩力索遵程朱遺規以上求孔孟謂不得聖賢心精不足以盡道之
極致近世所謂心學者以爲探本握要不知道精微而難窮心易蔽而多私心其
所心非聖人之心也著反經說一卷陽明傳習錄辨二卷小泉筆記一卷大旨與
平湖陸隴其同皆以遵朱子關陸王爲急瑗篤實闇修不炫於時爲高安朱軾所
引重灘縣韓夢周遊淮安與之交嘗與人曰任君體用具備有明以來無此大儒
乾隆元年兩江總督趙宏恩舉博學鴻詞廷試罷歸三十九年卒年八十二瑗講
經世之務嘗隨父官延平佐平順昌寇興舉淮安水利俱有成效他著有纂注朱
子文類一百卷論語困知錄二卷中庸困知錄四卷易學象數傳心錄一卷太極

圖說析疑一卷通書測一卷讀經管見一卷讀史衡說二卷困學恐聞二卷知言
筭記二卷朱子年譜一卷文集十餘卷

陸奎勳

陸奎勳字聚侯浙江平湖人少工文辭隨叔父棻於京師名噪公卿間棻嘗與同
里陸隴其辨析義利奎勳展翫書札獨契其妙年五十九成康熙六十年進士改
翰林院庶吉士散館授編修充明史纂修官撰擬制詔多稱旨尋以病乞休主廣
西秀峯書院創立學規仿朱子白鹿洞遺意成就甚衆奎勳淡榮利不爲嶄岸峻
絕之行而秉持不貳薄田不足供饘粥無戚戚容生平誦法朱子不遺餘力剖朱
陸異同之處不激不隨儀封張伯行命作正學論奎勳以爲有孟子斯可以關楊
墨若以儀秦而距楊墨未信爲聖人之徒也有朱子斯可與象山同甫往復辨論
卽入室弟子如北溪果齋諸儒亦未聞有舍己媵修而日事排擊者且誦法朱子
不徒誦其遺書必當效法其持身之嚴教家之肅正心誠意以格君非建書院刊
六經以教育士子舉行社倉興復水利蠲減木炭稅銀以利濟民生然後足稱朱
門嫡嗣也伯行深以爲然初於醫卜術數韜鈴步算以及二氏書靡弗汎覽後乃

一意說經當其覃思冥索卽暑月漏三下飛蟲交嗜若不知然有所論述聽者忘倦自謂六經注我而後可以我注六經兼合六經以注一經著有陸堂易學十卷宗朱子者十之六宗諸儒者十之四間亦有釋以己意得力在說卦一篇足該全易而以坤以藏之章爲歸藏象帝出乎震章爲連山象又言商之歸藏本於神農夏之連山本於黃帝人知畫卦重卦皆由伏羲不知黃帝始立著數及乾坤八卦之名屯蒙諸卦名則堯舜始增序卦之錯綜乃文王始定又詩學十二卷不取正變之說不特楚茨十詩斷爲成康盛世之音凡斯干無羊考室考牧均歸正雅淇澳楚邱緇衣蟋蟀均歸正風鄭譜時代舛謬不倫歐公強爲釐正尤多牽合周召二南以地不以人王風乃時爲之非有意於貶平王如此類有辨正精覈者大致與何楷詩世本古義相近且以爲不遵孔孟之傳第守毛鄭之學極詩之用不過三百而止是以有魯詩補亡之作又今文尙書說三卷病蔡沈集傳於禹貢黑水三危之屬生長南疆末由考訂洪範中以五事配五行專主相生不兼相剋未免後人滋議故參其疑闕所解惟伏生二十八篇而古文則置之用元吳澄書纂言例也又戴禮緒言四卷糾正漢人穿鑿附會其間指曲禮之漢儀識樂書之補闕

摘燕義之非古下至檀弓榆沈少儀几穎悉爲矯其謬而析其精又春秋義存錄十二卷凡經傳子緯所載孔子之言盡援爲義力主春秋非以一字褒貶能埽公穀拘例之失與宋儒深刻之論其疑胡傳而信左氏亦足破以經解經之空談金山楊履基謂朱子後大儒無如許衡吳澄隴其似許奎勳則似吳云然奎勳經學自信太勇務出新奇是其所短最後撰古樂發微已屬稿疾劇未成而卒又嘗輯八代詩揆唐詩安字音舉要等書詩文自弱冠時已充篋笥後乃以餘事爲之有文集二十卷詩正續集二十四卷同時隴其弟子有嘉善徐善建嘉定吳台碩善建字孝標究心周易及宋五子書教人以朱子小學北溪字義謂先識體段方可入精微處隴其著讀禮志疑善建與爲參訂母歿哀慟嘔血數升時稱其孝台碩字位三著有心印正說三十四卷取學術治功之要分三十四類各爲論以發明之隴其爲之序

汪紱余元遴 元遴孫龍光 洪騰蛟 董桂敷

汪紱初名烜字燦人安徽婺源人諸生少稟母教八歲四子書五經悉成誦家貧父淹滯江寧紱侍母疾累年十日未嘗一飽母歿紱走詣父勸之歸父曰昔人言

家徒四壁吾壁亦屬人若持吾安歸叱之去絃乃之江西景德鎮畫盤傭其間然稱母喪不御酒肉後飄泊至閩中爲童子師及授學浦城從者日進聞父歿一慟幾殆卽日奔喪迎櫬歸絃自二十後務博覽著書十餘萬言三十後盡燒之自是凡有述作凝神直書自六經下逮樂律天文地輿陣法術數無不融暢而一以宋五子之學爲歸著有易經詮義十五卷尙書詮義十二卷詩經詮義十五卷四書詮義十五卷春秋集傳十六卷禮記章句十卷禮記或問四卷參讀禮志疑二卷樂經律呂通解五卷樂經或問三卷孝經章句一卷讀陰符經一卷讀參同契一卷讀近思錄一卷讀讀書錄一卷讀困知記一卷讀問學錄一卷先儒晤語一卷理學逢源十二卷山海經存九卷物詮八卷策略四卷琴譜一卷詩韻析六卷大風集六卷詩文集各六卷絃與江永生同鄉未嘗晤面嘗寓書論禮書樂律往復千百言絃謂度生於律非律生於度然非度無以得律此如天非有度以日之行而起度日非有分以晝夜之長短而分分然分分而日之長短有數可求定度而周天之行有迹可紀同一理也度數者理氣流行之節次生氣之和自然流出故河圖之數所以成變化而行鬼神律管何獨不然永以爲真能言造化之妙謹誌

其言其論學謂學不可不知要然所以得要正須從學多後乃能揀出要處謂易理全在象數上乘載出來謂書秣象禹貢洪範須著力去考都是經濟謂詩只依字句吟詠意味自出謂看周禮須得周公之心乃於宏大處見治體之大於瑣屑處見法度之詳謂春秋非理明義精殆未可學又謂格物之格訓至如書言格于上下格于皇天皆至到之義上文致知字爲推致則格物爲窮至物理甚明惟性與天道不可得聞直是不可得聞陸王家因早聞性天而未嘗了悟以至害了終身又果於自信遺害後人也生平著述恥於自炫多藏巾笥尤注意理學逢源一書書分內外篇上篇明體下篇達用凡積二十餘年乃成自序謂自天人性命之微以及日用倫常之著自方寸隱微之地以達經綸斯世之猷庶幾井井有條通融貫徹所以反求身心以探乎天命之本源者亦可不待外求而得終身焉足矣性儉約無故不御酒肉歲荒屑豆作糜或數日無米處之怡然少聘於江比歸娶江年二十八矣江嘗語諸弟子曰吾歸汝師三十年未嘗見一怒言一怒色也乾隆二十四年卒年六十八子思謙增生以毀卒同邑余元遴傳其學 余元遴字秀書諸生家貧讀書躬行樵汲少有志爲己之學究心經義及宋五子書後師事

絨得聞爲學要領著庸言四卷皆克治身心考驗自得之語絨閱之稱其踐履篤摯平居坐不倚立不跛授徒所入分恤親族弟子貧者卻其贄已而空乏泊如也絨父子歿經紀其喪迎其妻江養於家復力寫遺書獻之督學朱筠卒賴以傳乾隆四十三年卒年五十五又著有詩經蒙說畫脂集孫龍光字黼山道光十五年舉人官江蘇婁縣知縣署崑山值水災力行捐賑多所全活署元和勸增豐備倉田八千餘畝署青浦有至聖衣冠墓援案請給奉祀生勸捐田畝爲祭埽費並倡建庭聞書院又擒治匪類徐灤論如律以續緝匪黨周立春未獲罷歸龍光早歲讀金谿姚江書於永康永嘉事功馬氏通考顧炎武遺書皆能得其要略後乃淵源家學篤志程朱以居敬窮理力行爲宗旨嘗謂朱子之學廣大精純爲孔子後一人絨尊信朱子昌言保衛特定一尊雖或病其言太盡太急切然欲救時俗之歧誤不得已焦脣敝舌以警覺之其設心良苦也絨與永俱爲婺人所推永學兼漢宋其徒戴震始專崇漢學後遂詆斥程朱故龍光云然所著有廣唐書三十卷朱子祠記考元明儒學正宗錄表章儒碩錄各二卷吳康齋學案汪仁峯學案各一卷仁峯年譜一卷汪雙池年譜四卷經學管窺六卷詩文集三十七卷 洪騰

蛟字鱗雨亦婺源人乾隆十五年舉人研窮經訓尤嗜宋儒書嘗以置閏法及經學理學諸疑質於汪紱紱報書言爲學之概甚悉騰蛟欲往教贊未行而紱歿又嘗著禹貢黑水說爲時所稱錢塘袁枚方之楊子行井大春著有壽山存稿稽年錄各十二卷壽山叢錄鄣麓常談各二卷婺源埤乘三卷思問錄五卷五十六年卒年六十六 董桂敷字宗邵亦婺源人嘉慶十年進士改翰林院庶吉士散館授編修以疾歸桂敷少孤事繼母以孝聞稍長博綜經史及儒先語錄爲學恪宗程朱躬行實踐顏其室曰自知大學士湯金釗嘗曰桂敷自勵勵人真無負性分職分也歸後主講豫章書院教學者讀書窮理貴在反躬士林以文範道範顏其講堂永豐劉繹出其門以學行稱年五十八卒著有十三經管見書序蔡傳後說周官辨非解夏小正箋注諸史蠡測諸子異同得失參斷儒先語錄滙參見聞贊語自知室文集初紱所著書惟參讀禮志疑刊行得上四庫館餘惟邑人董昌瑛錄有副本自桂敷尊其學謂得朱子真傳以其書公之同好乃稍稍行於世云

馬翮飛 胡國欽

馬翮飛字震卿安徽桐城人天資純粹弱冠讀四書章句集注慨然歎曰正途在

程朱矣學者舍是而入旁蹊烏足以爲學耶於是研求六藝暨五子書久之渙然有得其學以居敬爲本以隨時省察爲功以隨事實踐爲要署其齋曰翊翊自號一齋用自勵也乾隆元年開博學鴻詞科有欲見之而後舉者謝不往常熟知縣聘主講席月吉會講反覆詳切聽者忘倦吳中風氣時尚考證往往蔑視宋儒或兼綜陸王浸淫禪學翊飛獨戒及門謹守程朱矩矱勿入歧途嘗謂君子下學而上達鄙下學之功而高談盡性至命此明季儒者之失講學之過也禁上達之事不道終身用力於訓詁考訂此近代儒者之失不講學之過也又謂宋元以來儒者多近篤實至姚江始立異論天下靡然從之近世張履祥陸隴其力闢其非一軌於正實學者所當則倣惟酌其義之是準乎心之安推之四達而不悖何者所守一故所見通也少失母事父盡孝父歿廬墓哀毀如禮平居危坐一室未嘗少息布衣蔬食處之晏如故舊稔其貧欲有所遺多不能言而退巡撫潘思築修造廬禮固辭不見乾隆二十一年卒著有讀易錄二卷禹貢初輯一卷筆記二卷詩文鈔二卷 胡國鈇字絃五亦桐城人歲貢生少喪母事父及繼母以孝聞及長讀程朱書好之慨然肆力於聖賢之學教授鄉里不求仕進其教人主於內外交

修文行並進凡所講貫必舉義理歸之身心惡明季心學浸淫佛氏之說嘗曰今之浮屠佛氏之罪人也今之學者孔孟之罪人也又謂學不講則道不明欲令郡邑各學循月課之例每月集諸生取經書性理史鑑共徵其信質其疑有能發明學術治道者劄記之彙呈學使者裁定而卽以講學之勤惰立言之是非爲學官之殿最諸生之優劣時避其言晚歲探討益精後進以禮來者教之必盡其誠著有大學指南及詩文十餘卷年六十二卒時同縣方日新字漢良孫學顏字用克俱宗程朱之學與國鈇友善稱桐城三隱學顏有文稿二卷雅潔純粹爲世所稱

黃永年陳道 鄧元昌 宋昌圖

黃永年字靜山江西廣昌人初南城黃采師事謝文洊篤志力行事父母以孝稱著性圖一卷本孟子四端爲說力矯靜觀未發之失同里陶成傳其學居母喪晝授徒養父暮衰經宿墓間三年如一日康熙四十八年成進士改翰林院庶吉士散館授檢討尋告歸主豫章書院立教規斥功利擯俗學以居敬有恥爲窮理致用之本著有皇極數鈔二卷喪禮三卷存軒日程五十二卷四書講習錄吾廬遺書永年少師南豐梁份已獨居白田山中者十年靜證實驗得立身行己之要聞

成講學從之遊成少許可獨引進之乾隆元年巡撫常安舉博學鴻詞是年成進士不預試授刑部主事敝車蹇驢入曹矻矻治案牘疑獄多所平反歸則閉門手一編蕭然自得一日有客入謁及見伏地叩頭謝曰某陷冤獄非公久登鬼錄矣出一盒珠獻之永年變色曰嘻我爲刑官據法出無罪職爾何比於汝而乃污我客大慚納珠袖中去大學士鄂爾泰與寧化雷鉉論當世人才鉉稱永年鄂爾泰賢之內閣學士秦蕙田至舉以自代洊升郎中尋奉命決獄江南平反宣城知縣段雲翮爲時所稱十年授甘肅平涼府知府改江蘇鎮江又改常州爲政寬重有體尤盡心溝渠之利行部所至諮訪高才尊禮有德尋以事去官十六年卒年五十三永年爲學不專主一說以適用爲貴尤好明羅洪先書生平介節凜然一時賢士若方苞陳大受尹繼善俱重之喜誘掖後進嘗曰善人君子不可絕於世如嘉種焉生人之命所恃以立也著有希賢編靜子日錄及南莊類藁八卷白雲詩鈔二卷奉使集一卷永年鄉試出長洲彭啟豐門往還問學氣誼深至卒後啟豐題其遺集曰其思靜如淵其行直如矢云 陳道字紹洙江西新城人乾隆十三年進士幼從父受小學近思錄莊誦不倦比長肄業國子監合河孫嘉淦一見許

爲大器及師事黃永年聞爲學之要遂沈潛先儒書致力於日用動靜之際旁及水利農田軍政邊防諸務其論學專宗濂洛兼資陸王尤服膺寂感相資之說與雷鉉祝淦善二人斷斷不少假借道守師說不爲奪也旣成進士以親老不仕家居值歲歉和調貧富行平糶法編戶計口以振桀黠者得食亦馴服遠近以安自是值歲歉踵行之立義田二千畝仿范仲淹遺法暇則集親族講肄冠婚喪祭之禮孝友睦婣之行永年卒於吳子光理承父志不受賻道獨爲之經紀其喪祝淦以飢驅走四方艱於嗣道方疏春秋五傳約淦注禮記資以館穀俾無遠遊爲似續計祝後舉子名曰陳禾誌其德也二十五年居母喪毀卒年五十四門人魯九皋哀其遺文爲凝齋集八卷九皋見文苑傳同時學者有贛縣鄧元昌雩都宋昌圖 鄧元昌字慕濂諸生年十七得宋五子書讀之涕泗被面下曰嗟夫吾乃今知爲人之道也出入禽門忍不自返何哉遂棄舉子業致力於學宋昌圖以通家子往謁元昌喜曰吾小友也館之於家昕夕論學爲日程言動必記之互相考覈一日昌圖讀朱子大學或問首章元昌過窗聽之感慟不能起謂昌圖曰子勉之毋蹈吾所悔永爲朱子罪人偷息天地也元昌有長兄瞽而頑大小事必稟而後

行後母性瑣刻每怒必長跪請罪得解乃起後母弟亡弟婦有子請於元昌曰感兄公之德願苦守撫孤兒元昌泣拜之自是不入處室挾子與弟子處於堂督課之有田在城南秋熟視穫見貧子拾秉穗者招之曰來汝無然吾自與汝穀教汝讀書羣兒爭趨之始教以識字既使諷章句以俚語曉譬之羣兒踴躍受教既卒穫羣兒嗥曰先生且歸奈何有泣者後每秋穫羣兒來學以爲常城南人無少長皆稱鄧先生見元昌來必起立有衣冠問元昌者則曰我鄧先生客也不敢慢其感人如此著有慕濂遺集乾隆三十年卒年六十餘 宋昌圖字道昌諸生初謁元昌以爲聖賢可學而至居恆以敬爲主言動必宗禮法終身無倦容嘗爲持敬主一二銘授瑞金羅有高有高素治兵家言昌圖引以見元昌遂棄而學焉著有畏軒集二卷

曾受 鄧純

曾受一字正萬廣東東安人乾隆三年舉人二十五年揀發四川初署珙縣至則剏南廣書院增膏火作勸學詩百韻諸生斷斷向學農時巡郭外作勸農憫農歌令兒童歌之凡賓興鄉飲讀法諸令典必敬謹舉行旋調江津縣號難治又值歲

荒受一聯邑人作救命會以有餘貸不足踰年秋熟捐穀千石勸立義倉又作訓俗瑣言立旌善坊以教愚民民俗丕變人稱曾夫子而不名尋以署合州事降秩囊篋蕭然江津人醵金資之三十八年開復補長壽兼攝巴縣其治視江津時金川軍興絡繹受一不累民不誤公供張悉辦四十三年告歸珙人預奉主入名宦祠巴人作有四亭以比鄭子產江津人建祠曰曾夫子祠所嘗蒞事如涪開綦江閩中廣安諸州縣民過祠者咸瞻拜伏謁每歲八月受一誕日紳耆率子孫鞠膺祠外陳俳優百戲三日乃罷受一少好讀朱子書玩性命之旨者數十年嘗謂朱子集注主釋經貴嚴約而不盡其辭故作或問以暢達其意蓋注採程門諸家之精粹而問辨程門諸家之得失因著四書解義朱子或問語類文集義纂清江楊錫紱敦崇正學以人才爲性命見受一書卽以理學相期許又博稽史傳考洙泗以來下逮元明諸儒獲聞斯道之傳者著尊聞錄八卷漳浦蔡新稱其定見知聞知之統屏俗學雜學之陋嚴陽儒陰釋近理亂真之防粹然一出於正又於聽政之暇舉歷代禮樂刑政治亂得失之大推本經義旁及諸史著學古錄六卷大興朱珪稱其思精體大讀之見本知末如見古聖人之迹之心以是爲有本之學有

用之文歸後九載授徒講學復著易說四卷春秋解義四卷卒年七十七 鄧純
字粹如廣東東莞人道光元年舉孝廉方正少讀書有志於正學一言一動日記
之爲乾惕錄徧讀歷朝儒先書尤愛白沙陽明諸集初習靜行導引術既乃悟其
非遂棄去不事博覽羣籍好藏書往往棄產購之坐是家益落然性廉介不苟取
於人歲饑則傾貲賑族人無所吝年七十五卒嘗輯粵東名儒言行錄二十四卷
搜訪粵東故事著嶺南叢述六十卷又著有主一齋隨筆家範輯要寶安詩正

孫景烈王巡泰 劉紹啟

孫景烈字孟揚陝西武功人乾隆四年進士改翰林院庶吉士散館授檢討以言
事放歸少家貧力學讀小學近思錄諸書確然有守爲諸生時入院試有公役無
禮於一生不可堪景烈怒援以見督學督學察其意氣非常爲之責役嘗官商州
學正革陋規倡社學爲諸生闡發經義究義利之辨當道爲舉孝廉方正及放歸
陳宏謀尹繼善先後延主關中蘭山書院後復主鄠縣明道書院日與生徒講性
命之學雖盛暑必肅衣冠學使者慕其名夏日見之不敢搖扇其爲學恪守朱子
而以四書集注爲主諸經子史悉薈萃印證以此講學亦體之以持身涉世其講

大學格致謂陸王之說混窮理於去私講中庸天命之謂性謂天命善不命惡講四勿章復禮謂禮卽爲國以禮之禮嘗舉真西山語曰古之學者爲己爲青紫而明經爲科舉而業文去聖人之旨遠矣十五年宏謀欲以經明行修薦景烈固辭韓城王杰臨潼王巡泰皆其入室弟子杰嘗語人曰先生冬不鑪夏不扇如邵康節學行如薛文清又曰先生歸籍三十年雖不廢講學而獨絕聲氣之交四十七年卒年七十七著有關中蘭山明道書院講義易經管窺詩經講義性理講義康海武功志注濬封聞見錄菜根園慎言錄古文似廬陵有逸氣有西麓山房存藁可園集 王巡泰字岱宗陝西臨潼人乾隆三十三年進士歷官山西五寨廣東興業陸川知縣所至以經術飾吏治有惠政擢吏部主事巡泰少從景烈遊深達理奧其論說多闡儒先之祕正偏曲之謬嘗爲今日說以示學者不可自懈景烈嘗曰吾門治古文者王杰治義理者巡泰也先後主講臨潼渭南華陰望都解州運城諸書院多所成就著有四書日記解梁講義格致內編齊家四則服制解仕學要言丁祭考略河東鹽政志知命說零川日記等書又詩文集六卷杰官至大學士自有傳 劉紹攷字繼貢陝西三原人雍正十一年拔貢生時交河王蘭生

以李光地高弟視學關中舉紹攷博學鴻詞親老未就蘭生謂關中人士其刊落浮華切實用力者惟紹攷一人而已尋以朝考第一出爲四川知縣補什邡縣調南充以艱歸服闋授山西太原縣大計卓異引見賜蟒衣內緞調陽曲告歸紹攷博學通明所至以經術飾吏治遇災振卹全活無算歸里主蘭山書院多所造就嘗以陸王之學竊取佛似陳建辨之而未得所徵因讀周密齊東野語知張子韶嘗參宗杲陸子靜又參杲之徒德光因窮究源委著衛道編二卷上卷關異學下卷明正學其論讀朱子書謂世之叛朱者非宗良知則誦古注然尊朱者守其一說不知兼綜衆說非善學朱子也迺舉黃勉齋復葉味道書以爲學者法後桐城方宗誠見其書稱其言潔淨精微平湖陸隴其外未有如此之純粹者可謂眞儒他著有四書凝道錄十二卷周易詳說十八卷書考辨二卷春秋筆削微旨二十六卷春秋通論六卷九畹文集十卷

官獻瑤

官獻瑤字瑜卿福建安溪人以拔貢生授國子監學正篤好經學少嗜同里李光地書後受業於漳浦蔡世遠桐城方苞大學士朱軾重之曰吾老矣斯道之託將

在吾子乾隆元年滇督楊名時還朝疏薦七士獻瑤與焉是歲舉順天鄉試晉助教甫入學上事宜六條於其長名時暨孫嘉淦趙國麟先後攝國學事獻瑤與南靖莊亨陽無錫蔡德晉等爲六堂之長志合道孚每朔望釋菜畢登講座六堂師分占一經各就其齋會講南北學絃誦之聲夜分不絕都下有四賢五君子之號四年成進士改翰林院庶吉士充三禮館纂修官七年散館授編修九年充浙江鄉試副考官尋提督廣西學政十二年復提督陝甘學政遷司經局洗馬居官廉慎導士以誠在關中求得宋張載二十餘代孫屬學官教之識韓城王杰於諸生時以爲大器少孤事母孝自秦還遽乞終養歸事奉二十餘年母年九十乃終家居修宗祠增祭田立鄉規教宗人置義租恤親族然其家故寒素也獻瑤治經以治身教人欲於經求道其說經斟酌衆家而擇其粹尤邃於禮在史館時進周官講義論遂人治溝洫稻人稼下地因推明水田旱田之法以爲溝洫脩而水旱有備西北地利未嘗不勝東南又舉太宰九職以明生財之道曰王者以天下之利養天下之民莫詳於太宰九職蓋農工商賈之生財人知之至推而及於嬪婦又及於臣妾閒民則非周公盡人物之性不能也九職中生財最多莫如農而經曰

三農則博民於生穀者無不盡也曰九穀則所以順性辨土宜無不盡也乃其爲天下萬世籌贍足之計而終不虞於人滿者良由園圃虞衡藪牧之政兼收而備舉焉蓋以天下地勢論之不過五土就五土之中可耕者不過墳衍原隰止耳若山林邱陵川澤間或擇其可耕者以授山農澤農其不可耕者彌望皆是也是生於山林邱陵川澤之民且有時而窮故因地之利而任圃以樹事任牧以畜事任衡以山事任虞以澤事而民遂得享其利不至於窮且非惟三者之民不窮也貿遷有無互相灌輸而商賈所阜通之貨財從此出矣又嬪婦化治之絲枲卽園圃之所樹也百工飭化之八材臣妾聚斂之疏材卽山澤之所產也至閒民之轉移無非此數者而天下之地利盡卽人力亦無不盡矣今自大江以西五嶺以南山則皆童林則如赭而長淮以南大河以北大藪大澤第爲積水之區又燕冀齊魯地宜種植然所謂千樹棗千樹栗者不數見也如是而物安得不匱民安得不困夫小民趨利如鶩豈甘爲惰窳不圖所以相視不前者甲業之而乙戕之理之於官而莫之省爾若爲之明立禁條焚山林竭川澤漉陂池者有罰盜取橫侵者有罰有犯禁者官爲申理得實嚴懲或於所治內著有成效者優予上考不稱者罰

數年之間吏習民安生之有道取之有時用之有節孟子所云不可勝食勝用者豈虛語哉上嘉納其言特命閣臣改撰諭旨頒天下獻瑤於儀禮主鄭康成教繼公善說禮服得經意其略曰喪服首陳父上殺下殺旁殺凡以恩制者皆由父推也次陳君爲君父母小君長子凡以義制者皆由君推也次陳妻爲夫妾爲君妻爲爲宗子宗子母妻大夫宗子凡以尊服者皆由此推也次陳妻爲夫妾爲君妻爲夫黨妾爲君黨女君黨凡以親服者皆由此推也服莫重於斬而斬衰之升數有二齊衰功升數各有三衰莫重於降而正次之義亦次之齊衰升數多於總衰而總之縷細大小功升數多於總麻而總之縷細歸於稱情而後已父卒然後爲祖後者斬承高曾重者亦然內宗外宗爲君服斬與諸侯爲兄弟者亦然如不二斬通例也爲君斬仍爲父斬尊君也爲人後者降本宗通例也世叔父降則有大功義也故不盡乎禮之變者未足與言禮父在爲妻不杖辟尊者也爲母杖而堂上不杖辟尊者之處也故知父在爲母期所以達父之情而便其事也父必三年後娶所以達子之志也妻亡無子將不三年歟夫婦人倫之首一與之齊終身不改故夫死不嫁知婦之隆於夫則知夫不可殺於婦矣服以首貌貌以首心人情有

不能已者聖人弗禁於是乎有心喪之禮爲人後者爲其父母期而哀之發於容貌與發於聲音者未嘗不可以三年也抑發於飲食與發於居處者未嘗不可以三年也後世乃屑屑於稱謂之間其下相與其名而爲上者又未知果能稱其實也其亦不達於斯義也又曰傳曰適子不得後大宗漢儒謂假令小宗僅有適子而大宗無後亦當絕小宗以後之可謂達禮之權矣沈存中謂由祖而上皆曾祖雖百世而有相逮者皆爲之服三月乃今思之猶信小宗爲大宗親盡猶服爲始祖也聖人所以憂之深而慮之切也所著有讀易偶記三卷尙書偶記一卷尙書講稿思問錄一卷讀詩偶記二卷周官偶記六卷儀禮讀三卷喪服私鈔並雜記一卷春秋傳習錄五卷孝經刊誤一卷石溪文集十六卷詩集二卷卒年八十

孟超然

孟超然字朝舉福建閩縣人乾隆二十五年進士改翰林院庶吉士散館授兵部主事調吏部三十年充廣西鄉試副考官陞員外郎三十三年充順天鄉試同考官尋奉命提督四川學政遷郎中使還以親老請急歸超然視學四川廉正不苛遇士有禮表宋儒魏了翁以爲矜式以蜀民父子兄弟異居者衆作厚俗論以箴

其失蜀人爲立去思碑性淡泊既歸杜門卻掃久之巡撫徐嗣曾延主龍峯書院龍峯自漳浦蔡世遠主講倡明正學一時稱盛其後超然繼之人奮於學恆舍不能容性至孝侍父疾躬執廁踰遇戚族喪娶雖空乏必助嘗歎服徐陵我輩猶有車可賣之言其學以懲忿窒慾遷善改過爲主嘗曰變化氣質當學呂成公刻意自責當學吳聘君又曰談性命則先儒之書已詳不如歸諸實踐博見聞則將衰之年無及不如返諸身心其論王安石謂商子論至德者不和於俗成大功者不謀於衆聖人苟可以強國不法其故苟可以利民不循其禮此安石之先驅也然軼猶明於帝王霸之說安石乃以言利爲堯舜周公之道又軼之不如矣其論楊時謂龜山得伊洛之正傳開道南之先聲然爲人身後文如温州陳君李子約許德占張進孫龍圖諸墓志往往述及釋氏之學而贊之曰安曰定曰靜毋惑乎後之學者援儒入墨紛紛不已也閩之學者以侯官李光地寧化雷鎡爲最超然輩行稍後而讀書有識不爲俗學所牽則先後一揆云居喪時考士喪禮荀子及宋司馬光程子朱子說並采近代諸儒論說以正閩俗喪葬之失著喪禮輯略二卷傷不葬其親者惑形家言以速禍取孟子掩之誠是語作誠是錄一卷又記檢身

實踐之要爲焚香錄一卷取周易復卦之義歸之損益二象輯先儒格言比類爲求復錄一卷輯朱子與友朋弟子問答以資規誨爲晚聞錄一卷雜考經史識遺佚爲避暑錄一卷又有廣愛錄一卷家誠錄二卷文集六卷詩集二十卷嘉慶二年卒年六十七

戴祖啟

戴祖啟字敬咸江蘇上元人弱冠潛心經義有志儒者體用之學與族人震同舉於鄉時有二戴之日四庫館開大學士于敏中屬震召祖啟祖啟辭不往畢沅撫陝聘主關中書院隨材善誘安西迪化諸州來學者踵接沅奏於朝稱祖啟學術純正訓迪有方六年後有成效乞格外獎用乾隆四十三年成進士復還關中逾年沅復奏薦召見試四書文一篇奉旨以國子監學正學錄用四十八年卒年五十九祖啟制行廉靜教人以孝弟爲先尤專力於經其治春秋統以五事一曰常文以定體二曰變文以別嫌三曰互文以通義四曰便文以修辭五曰闕文以慎疑著春秋測義十二卷其治尙書謂吳草廬後學者咸力攻古文其實考之古注及經傳子史正義中三十三篇與伏生所授不過古今文字小異而究不失大同

先著尙書協異八卷經文既定復兼綜衆說斷以己意著尙書涉傳十六卷曰涉傳者取馬遷語也同里嚴長明稱二書謹嚴有義法其道根於彝倫秩敘其義資乎天下國家云他著有史記協異十六卷道德經解一卷師華山房文集六卷

閻循觀 韓夢周 姜國霖 張鏐

閻循觀字懷庭山東昌樂人乾隆三十一年進士授吏部考功司主事當官議事務持大體事或齟齬不畫押同列強之答曰吾學何事豈至是變耶吏舞文不遽責取陳宏謀所刻在官法戒錄爲講說俾知悔改一同年友爲外官遺之金不受曰忝居此職不敢受且不可以貧累君也居二年引疾歸歸一月而卒年四十五循觀性穎敏初好佛氏說旣讀宋儒書乃一奉程朱爲宗其學以忠恕爲根本以倫常爲實際主敬克己時時提醒此心刻苦自立而諄諄致戒於近名於河津之派爲近嘗作去情堂記謂年二十後有意於克己之學久之知心實多欲於是強制吾欲然時復橫決復自念曰欲之所起由於爲善不誠因從事於謹微而求誠自是私僞之萌頗少萌亦易除然終不能禁也年來德不加進學不加修每一念及嗟咨流涕忽若有誘於中者乃知吾之惡曰情要在去情而已矣情於實踐故

終不能釋然於異說情於矯其所便安故力不能繼情於去僞故恆心不堅因臚
爲三日以自詔曰存省勿忌躬行勿怠常業勿廢又嘗讀書程符山中杪秋木落
讀屈賈傳累欬無窮忽自省曰此非情之正君子憂德不戚年修身不垢俗更取
儀禮讀之已天晶月明澹然見古人素位之意時濰縣韓夢周亦居山中相友善
好學者多從之遊兩人論學皆斥陽明而循觀謂王氏發明知行合一之旨最爲
有味然由其說終任心而廢講習言雖高非貞則其論爲持平說經明白簡易先
儒有誤依文釋之不改字著有尙書讀記一卷大旨不信古文解金縢弗辟爲弗
辟攝政之嫌康誥首四十八字非錯簡費誓伯禽征徐戎爲周公在時事皆根據
史記爲說又春秋一得一卷於筆削大義多所發明如曰武氏子來求賻罪魯也
曰州吁不稱公子絕之於衛也曰諸侯不得專殺大夫故凡大夫之殺春秋皆稱
國舉官不論有罪無罪及殺當其罪否也曰梁山崩穀梁氏曰君親縞素帥羣臣
而哭之旣而祠焉斯崩山之壅河流者矣此術者之言也左氏曰君爲不舉降服
乘縵徹樂出次祝幣史辭以禮焉此有司之存也胡氏曰古之遭變異而外爲此
文者必有恐懼修省之心生於內徒舉其文而無實以先之何以弭災變乎此儒

者之道也其持論正大多類此他著有毛詩讀記困勉齋私記西澗草堂集名人小傳見聞隨筆性至孝少孤未諳葬事地卑水蓄冢既長以爲大戚陰雨輒號泣不食繞墓走達夜後墓雖遷終以此致羸疾浸淫而終 韓夢周字公復山東濰縣人少孤力學揭母不敬思無邪二語於座右跬步必以禮乾隆二十二年成進士授安徽來安知縣始至斥蠹役勸農功訓民節儉逐黠商之以竄物罔民者來安北繞羣山南多圩田民凋瘵甚夢周令依山種桑募兗沂人習蠶者教之蠶嘗欲開浦口黑水河使縣南之水不由瓜埠口可直達江則圩田不受災而民利數倍因著圩田圖三記具詳其地里丈尺工程上之總督高晉許爲奏請會以捕蝗不力罷歸去之日士民炷香攜酒相屬於道歸後講學程符山二十七年嘉慶三年卒年七十夢周爲學以存養爲根本省察爲修治窮理爲門戶篤守程朱檢身若不及嘗曰震驚百里不喪七鬯誠敬之效也能誠敬則心之理得矣其辨陸王謂宋南渡後杲堂出於佛徒最爲黠桀語張子韶曰侍郎把柄在手便須改頭換面以誘來學子韶欣然從之於是儒佛之界始大亂然子韶之徒智不足自全每供敗闕象山陽明則陰證釋氏之諦而巧爲改換之術又謂陽明卽心卽理與

釋氏卽心卽佛詞異而實同又謂陽明功業軒轅不必盡由講學蓋人本豪傑夙究於經世之務又能內定其心足以乘機制變故成功如此至於聖賢體用之全爲學之功則不可一毫借也又謂爲陽明之學者有二其一學問空疏不耐勞苦樂其簡易而從之其一博覽典籍勤而無得見其專主向裏遂悔而從之前者多高明之人後者亦沈潛之士皆有造道之資乃蹈於一偏不復見古人之大全可惜也交遊中與山陽任瑗最契於彭紹升汪縉羅有高皆謂其學陸王而卒歸於佛又不喜戴震孟子字義疏證謂程朱以理爲我所本有學以復之戴氏以理爲我所本無但資之於學卽此觀之孰爲得失不待繁證深辨也著有理堂文集日記陰符經注等書夢周少與閻循觀師昌樂滕綱綱字建三歲貢生隱居窮經不稱人過失一錢之餽不苟受母疾嘗一日夜行五百里求藥療母良已嘉慶三年卒年七十 姜國霖字雲一亦濰縣人父客京師病國霖往省至則已歿無錢市棺以衣裹屍負之乞食而歸里中憐其孝釀金以葬母善怒一日怒甚國霖作小兒嬉戲狀長跪膝前持母手披其面母大笑自是不復怒是年五十矣師事昌樂周士宏士宏有高致與國霖至莒樂其山水家焉死卽葬於莒國霖築室墓側安

貧守素不求於人年七十躬親耕耘乾隆十三四年灘大饑刷菜根爲食貌轉腴閻循觀問國霖喜讀何書曰論語終身味之不盡也其自述生平學力年四十始能不以貧富撓其心五十始能不以死生動其心及卒循觀爲作言行記 張鏐字紫峯山東樂陵人乾隆九年舉人官臨清州學正以告歸鏐殫心著述有志聖賢之學嘗館於惠民李氏山莊短榻孤檠習靜坐心志漸覺明淨既而曰此未足恃也惟主一無適一語隨處皆可致力耳以張伯行刻張子全書不無譌謬因仿近思淵源二錄遺意擇張子粹言程朱論定者彙爲一集間有刪節皆從程朱所辨而張子晚年所未及改者爲張子淵源錄十卷尤究心朱子書輯朱子四書彙編二十五卷他著有周易晚學編十六卷春秋大意十七卷四書擇中錄十五卷中庸九經衍義二卷古訓集彙一卷一銘齋擇中錄四卷鏐與閻循觀韓夢周同時而地近其講學大槩相同四十七年卒年七十七

法坤宏梁鴻著

法坤宏字鏡野山東膠州人乾隆六年舉人以年老授大理寺評事曾祖若真字漢儒順治三年進士官至河南布政使康熙十八年舉博學鴻儒古文學樊宗師

詩學李賀有黃山詩留十六卷卒年八十四坤宏少爲學不肯事章句性澹泊不
諧俗與人言陳義至高人以爲迂因自號迂齋初讀宋儒書未厭也旣得傳習錄
大喜以爲如己意所出其學以陽明爲宗以不自欺爲本同時閭循觀韓夢周皆
譏切之坤宏曰此無事口談也君子之學譬之飲食得其甘者果其腹飫其精者
澤其體徒謀謀然爲他人辨是非所謂舍爾靈龜觀我朵頤也坤宏博通諸經尤
邃於春秋著春秋取義測十二卷凡九易稿而後成自序曰取義測測孔子竊取
魯春秋之義也史家記事之法自有大例君舉必書諸侯之會其德刑禮義無國
不記魯之春秋雖能有懲惡勸善之義而其事其文無關教義拘於史例者固已
多矣孔子於是筆而削之筆其事文之足爲法戒者削其事文之無足爲法戒者
故曰其義則某竊取之矣其義魯春秋之義孔子以筆削取之故曰取義蓋春秋
之教主於徵信達道據事直書而其義自見而說經者紛紛謂孔子作春秋假魯
史以譏貶當世隱閔之薨舊史實書弑孔子諱其事改曰公薨溫之會舊史實書
召王孔子嫌其文改曰天王狩於河陽又謂例當書爵或黜而稱人例當書名或
進而書字是孔子以己意變更舊章規作一部春秋取義之旨隱矣或曰若然孔

子直鈔魯史耳何以云作春秋曰魯史以勸懲舉王法春秋以筆削章聖教取義之旨寓於筆削故曰作魯史舉法而是春秋特筆之以彰其是如趙盾與州吁宋督之弑同書許止與商臣蔡般之弑同書孔子並取之此義明而亂臣賊子之黨無所逃其誅矣魯史舉法而非春秋特削之以章其非如魯羣公之錫命則書王使召伯廖賜齊侯命王子虎策命晉侯爲侯伯則不書蓋孔子削之此義明而假仁襲義之奸無敢僭其賞矣然誅賞者法也是非者教也法非天子不敢明教雖庶人亦可明春秋天子之事也筆削之春秋庶人明天子之事也故孔子嘗曰知我者其惟春秋乎罪我者其惟春秋乎記曰屬辭比事春秋教也韓子曰春秋書王法不誅其人身此知孔子者也若紛紛之論皆罪孔子者也又以綱目提要後人傳述或失其初非朱子手訂因略加刪訂於其中事關勸懲與春秋義法相應者揭錄之爲綱目要略古文嚴於義法史記八家外好歸有光方苞然善下不自足喜人譏彈每一字屢更不厭循觀夢周皆甚稱其文著有學古編五十年卒年八十七 梁鴻翥字志南山東德州人優貢生窮老篤學月必誦九經一過每治一經案上不列他書有疑義思之累日夜必得而後已鄉里目爲癡人益都李文

漢一見奇之爲之延譽遂知名於世卒年五十九著周易觀運尙書義書經續解春秋辨義春秋義類儀禮綱目等書

謝金鑾陳庚煥 陰承方

謝金鑾字巨廷福建侯官人乾隆五十三年舉人以大挑二等歷官邵武南靖安溪南平彰化及臺灣嘉義教諭金鑾少讀宋儒書悅心性之說後悟其非返求之四書五經而得其要曰忠信曰好學嘗曰士不喜讀書空言存誠慎獨主敬存養有體無用其說經不事章句訓詁與友人書曰學者講求六經有得於心以之治己有術治人有術是謂經術近世喜搜古書以爲新博愈古愈廢之說則以爲愈佳學雖博以語修己治人之方則無術焉此謂經學不足言經術也官安溪嶺陽鄉械鬪知府捕所名數人不得歸咎於士金鑾請於督學恩普曰漳泉無獄不及士設案牒而罪之不出二年庠序空矣恩普壯其言事乃已憫漳泉好鬪教化不行著漳泉治法論一卷官嘉義值海盜蔡牽陷鳳山知縣急延問計金鑾曰此間士民經林爽文之亂守禦有成法召而謀之咄嗟可集也如其言衆果至金鑾指麾分守夜三鼓而辦一縣獲安先是蔡牽欲得蛤仔難爲巢穴其地本甌脫在臺

灣東北土沃而險金鑾考其始末詳其利害謂常撫之爲保障著紀略一卷知當事憚於興作請同里梁上國上之上可其奏卽新設噶嗎蘭廳是也金鑾居教職訓課有法而吏治民情尤關休戚性廉介諸生知其貧餽之不受嘗作退谷自警文大旨謂天下之理進常不足退常有餘故進而見不如退而藏進而求諸人不
如退而求諸己退谷金鑾號也晚調安溪不樂居官作教諭語四篇贈諸生質實
切當多卑近砭俗之言山陽汪廷珍謂在呂司寇呻吟語上嘉慶二十五年卒年
六十四又著有論語讀注補義四卷二勿齋文集六卷 陳庚煥字道由福建長
樂人歲貢生少好學父勸之曰秀才不知時務授以官如暮夜徒行豈非俗學誤
之耶庚煥自是留心世道讀有用之書既與謝金鑾交所學益務實踐其論學深
闢陸王謂陽明右陸絀朱至盛推達磨慧能而謂堯舜萬鎰孔子九千鎰其他見
於言語文字閒者初未嘗掩諱嘉隆大儒私淑姚江勇猛精進莫如羅近溪明德
之證上擬明道乃手傳二子軒輅往生之異至於坐化之頃親爲拜斗府之章持
彌陀之號歡喜贊嘆得未曾有然則近溪所明之德果何德也其詳辨學術多類
此生平不言人過於經傳傳譌多所考正性至孝親病嘗藥滌穢晝夜不懈居喪

蔬食不入內嘉慶元年郡縣議舉孝廉方正固辭卒年六十四著有五經補義二
十二史人物表千麓塾談莊嶽談童子撫談師門瓣香錄尊聞錄崇德同心錄易
堂隱德錄北窗隨筆畜德隨筆惕園文稿十六卷詩稿四卷 陰承方字靜夫福
建寧化人少研究心性之學刻意勸行終身無惰容有問學者先教以小學近思
錄嘗著學顏子所學論謂顏子博文卽大學格物致知約禮克復卽誠意正心修
身陸王以扞外物爲格物致良知爲致知而謂讀書窮理爲支離此爲君子儒而
誤者也同里伊秉綬問學承方舉朱子答林伯和陳師德書示之以爲要在慎獨
雷鉞視學浙江重其學行招之入幕以未專使聘辭不往及鉞告養歸卽造門相
得甚歡以所著文集與商訂焉建寧朱仕秀亦折節交承方以爲操心純踐履篤
不如也尤精喪禮著喪禮述三卷以儀禮經傳通解家禮爲主兼撫唐開元禮宋
政和禮明會典諸書取不背於古無強於今者而附以己意年七十三卒又有遺
文二卷

卿彬子祖培 蘇懿譜

卿彬字雅林廣西灌陽人歲貢生彬五歲而孤年十二喪大父母哀毀如成人事

母先意承志侍疾累夕不寐及歿哭踊之地成坳經年不櫛髮僅有存者三年中非受弔不見客既禫或求爲子師力辭自傷少孤母亡絕意進取以石營父墓而室其旁夜則拱立向墓遇家有嘉事每涕泣不能自已歲惟祀先除夕一至家如是者三十餘年有時家居夜誦書琅琅既歇獨立室外望西山泫然泣下西山在縣西南灌水陽彬父葬處也鄉人因顏其室曰永瞻彬爲學嚴於律已一言一行未嘗自欺嘗見諸子作字告之曰學書如修身自有定則若以趨時詎有真品乎子祖一官廣東海豐縣知縣遣人迎養作書卻之曰居官以清慎爲主初得官卽分心眷屬何以保清白乎吾守先人遺澤足以自供不賴汝祿也祖一承其教以廉善稱卒於官海豐之民不遠數千里送柩歸葬彬生平邃深經學晚尤嗜易著周易貫義自序謂天地萬物備於易而皆貫以一心然不敢曰一貫故稱貫義云又著有洪範參解律呂參解楚詞會真古詩十九首注等書嘉慶十八年卒年六十六子祖培能承其學 祖培字錫祚嘉慶七年進士改翰林院庶吉士散館授編修二十一年遷湖廣道監察御史二十三年擢工科給事中轉兵科道光元年擢內閣侍讀學士二年擢太常寺少卿是年卒年四十七祖培天性純篤居親喪

亦先後廬墓六年讀書力追古人以聖賢自律官京師閉戶鑽研每食止一蔬妻爲執炊歲用仰給祿米一介不取於人嘗寢疾同年生往省見其裘敝見鄆鄉人張鵬展自山東學政回餽以百金不肯受尤留心當世之務官御史時劾吏部溫某恃勢橫行有旨逮問都下肅然又奏請釐剔南新倉積弊吏無所容其奸每念學者僥倖弋獲束宋儒書不觀因上疏曰國家以經藝取士欲其講求大義體諸身心施諸事也今士之急於進取者但揣摩形似之言轉相倣效其弊將置儒書於不問而本心之理日以錮蔽則有才而適以滋弊若使聰明特出之才研求義禮之精微使本心益明而不爲人欲所陷溺庶才足致用不負乎經義取士之意矣伏讀御纂朱子全書御製序文冠諸篇首頒發海內誠以宋儒闡發前人之祕而朱子集其成觀其所論爲學之方並推闡持敬主一無適之說委曲詳盡令人曉然於天理之必當循性分之不容虧而向來學臣按試未有以其書直切指示鄉曲之士終身或不得一見乞敕下各省學政將此書化導諸生舉其要義往復申論或令書院山長各學教官廣爲訓迪不必明設科條以飾觀聽務使大公之理衆著於人心饜飫優游有所自得在學臣平日身範旣端又與多士講之有素

及臨試又能因其文以取其才趨向既正隨所造就必不致誤用聰明而可以爲國家培養元氣一鄉一邑之中得一二讀書明理之士以薰德而善良則醇樸成風宇宙之內莫非太和之所翔洽矣疏入得旨通飭遵行時以爲朝陽鳴鳳祖培封奏無虛日大抵皆培士風振官常除民害關係天下大計仁宗屢稱其直嘗請聖駕所經除道毋虛設多員以省擾累並見施行桂林朱琦稱吾鄉名御史陳宏謀謝濟世外厥推祖培云 蘇懿諧字淑階廣西鬱林州人貢生道光元年詔舉孝廉方正大吏以懿諧薦辭不赴少喜讀儒先書年十二於友人處見孝經小學以他書易歸莊誦不輟嘗擬畏友七人几席相對名整冠鏡心喚夢知秋采藥佩玦完璧七先生又以巨竹作枕納鋼鈴於內題曰無逸枕其刻苦如此其學以居敬爲本自少至老於孝經大學西銘二南日必誦一徧揭三語於壁曰體父母之心待手足體祖宗之心待宗族體天地之心待生育又繪先後天作人圖五倫圖困學日課圖困學掌環圖所性圖廣居圖張子西銘圖危微圖精一之傳圖執中舉類圖憂患圖民行圖每圖皆繫以序或作爲箴銘以自鏡所爲文樸質簡茂一澤於古著述極富好藏書購書外未嘗一履城市年六十卒著有孝經合本二卷

鄒魯求仁繹三卷傳心顯義一卷人爲錄二卷古今自訟錄一卷民彝彙六卷兩關日課一卷樂閑齋文集十卷學庸絃誦一卷防維錄二卷至文窺測一卷疇圖體要二卷尼徒從政錄一卷迪知錄二卷

姚學塽潘諮

姚學塽字晉堂浙江歸安人性靜介童時父兄坐庭上久侍立足不倚旣長讀書毅然以身學父喪哀毀感動鄉里父嗜蟹終身不食筵宴遇之涕泣友朋相戒勿設也嘉慶元年成進士官內閣中書時和珅爲大學士中書例執弟子禮學塽恥之遂歸和珅伏誅始入都任職十三年充貴州鄉試副考官歸道聞母憂痛不得躬養侍疾終身不以妻子自隨服闋至京轉兵部主事遷職方司郎中居京師先後四十年中外餽遺一無所受敝衣蔬食若旅人之阨者所僦僧寺破屋風號霜華盈席危坐不動晏如也尙書初彭齡調兵部請學塽至堂上躬起肅揖之學塽亦不往謝大學士百齡兼管兵部欲學塽詣其宅一見終不可得同里姚文田貽酒二罌爲壽固辭文田曰他日以此相報可乎乃受之仁和龔自珍於時少所許可獨心折學塽稱曰姚歸安學塽之學由狷入中行以敬存誠從嚴毅清苦中發

爲光霽嘗曰人必內自定然後可以應物又曰吾視萬物莫不有真趣然闇然自修未嘗向人講學答友人書曰自宋以來講學之書多矣然大略有三以致知啟其端以力行踐其實以慎獨握其要三者之中慎獨尤急不慎獨則所知皆虛而所行亦僞又曰宋儒之書非盡於宋儒之書也本之於經以深其源博之於史以廣其識驗之倫常日用以踐其實參之人情物理以窮其變不必終日言心性而後謂之理學亦不必終日言太極陰陽五行而後謂之理學也道光六年西陲用兵職方司任重事繁以積勞卒官年六十一病篤握其友會稽潘諮手曰君勉矣人生獨知之地鮮無愧者我生平竭蹶竟如此止君亦就衰盡所得爲俟年而已著有竹素齋集 潘諮字少白浙江會稽人少卓犖好獨遊奇山水足迹踰數萬里後與學挾友善日求寡過以無玷古人與長民者言言愛人與里老言言耕鑿樹畜與士人言言孝弟忠信遇名下士則告以實行爲首尤兢兢於義利之辨居惟一襍被日兩疏食食有餘則以給人之困者有數人贖金爲其母壽不可返乃各取少許其母怒曰汝見僧以如來象丐市者乎吾其爲像也乃謝而盡散之嘗云大學誠意獨爲一章格致後一段極結實細密工夫人於此一關最難自信

陽明謂格致外非更有誠意之功此其門人病所由種格致是識得此理堅志定力正從此起其精到可入宋人語錄間爲詩古文超曠絕俗著有古文八卷詩五卷常語二卷

唐鑑寶坊

唐鑑字鏡海湖南善化人仲父冕乾隆五十八年進士由知縣官至陝西布政使學有本原爲政務大體不喜操切而察吏懲奸無稍姑息母歿葬肥城嘗結廬墓側教授岱下撰岱覽三十二卷又著陶山文錄詩錄年七十五卒鑑嘉慶十四年進士改翰林院庶吉士散館授檢討二十三年遷浙江道御史疏劾湖南武陵知縣顧烺圻貪劣狀一時稱快坐論淮鹽引地吏議鑄級以員外郎降補宣宗登極詔中外大臣各舉所知諸城劉鏞之薦鑑出知廣西平樂府擢安徽寧池太廣道調江安糧道擢山西按察使調貴州按察使擢浙江布政使調江寧布政使所至革陋規不以一錢自污守平樂屢磔劇盜境內肅然安撫熟搖立五原學舍延師教讀搖大悅在江寧拯災修廢百度畢張總督陶澍寢疾鑑代行使院事言者劾其廢閣上遣使按問無左驗內召爲太常寺卿海疆事起鑑劾琦善耆英等直

聲震天下生平學宗朱子篤信謹守無稍依違及再官京師倡導正學蒙古倭仁
湘鄉曾國藩六安吳廷棟旌德呂賢基昆明何桂珍羅平竇埏皆從鑑問鑑嘗語
倭仁曰學以居敬窮理爲宗此外皆邪徑也又曰人知天之與我者至尊且貴則
我重物輕便有不淫不移不屈氣象倭仁悚然語國藩曰讀書有心得不必輕言
著述又曰經濟之學卽在義理內又曰檢攝於外祇有整齊嚴肅四字持守於內
祇有主一無適四字國藩謹誌其言鑑以有明王學講良知矜捷獲足亂聖道藩
籬著國朝學案小識十五卷以陸隴其張履祥陸世儀張伯行四人爲傳道餘爲
翼道守道而以張沐等爲心宗於孫奇逢亦致不滿國藩桂珍及埏皆爲後跋後
賢基復取其書進呈御覽皆推服甚至已致仕歸主講金陵書院咸豐元年詔召
入京進對十五次中外利弊無所不罄進所著畿輔水利書上嘉納焉將起用力
辭以老特旨褒美賞加二品銜令還江南矜式多士後居寧鄉善嶺山深衣蔬食
泊然自怡著朱子學案以發紫陽之蘊十一年卒年八十四又著有易闢讀易識
讀易反身錄讀禮小事記四經拾遺四砭齋省身日課平搖紀略朱子年譜考異
及詩文集十卷卒後國藩爲上遺疏賜諡確慎倭仁國藩官至大學士廷棟賢基

官至侍郎桂珍官至徽寧池太廣道殉難死皆自有傳 竇埈字蘭泉雲南羅平州人道光九年進士授吏部主事洊擢郎中遷監察御史埈與倭仁吳廷棟曾國藩何桂珍友善以道義相切劘爲學以集義爲宗篤實力行尤嚴理欲之辨小而應事接物大而患難死生必講求一至當之義嘗謂棄富貴而就貧賤不難處之不失其道爲難死不難必求合於義爲難官吏部搜剔弊端守正不苟胥吏不能欺遷御史值文宗踐阼疏劾前辦外交諸臣而薦林則徐之賢旋以繼母老乞假歸里回匪事起上命埈爲副團練使巡撫議撫回回要素省城正街巡撫與之埈不可遂劾以激烈褫職已以守雲南城功復原官同治初倭仁及河南巡撫嚴樹森先後疏薦召入都以知府發往貴州差遣時年六十餘矣既至一月卒埈審於進退倭仁遷盛京戶部侍郎埈遺書責以依違遷就養成自欺之意吳廷棟官山東布政使埈復責其不能行道卽當引退其嚴正如此避地四川生子纔數齡被召卽行曰此何時敢念幼子乎過安慶曾國藩欲疏留襄助知其不可而止及卒國藩甚悔惜之里居時著書講學感激時艱成銖寸錄四卷其論有曰養癰者獲令名決癰者受實禍韓侂胄以戰亡宋故邱瓊山且以秦檜爲南宋功臣也宋之

癰養成於檜決亦亡不決亦亡檜之罪實浮於侂冑然則癰可治乎曰決之以時則病可愈未決之先使病者自強然後一決而毒可盡去既決之後使病者自保然後一決而患不復生然此非良醫不能非病者信醫專而修身有道亦不能二者既不多覲天下之庸醫每以養癰求名雖天下之良醫亦不敢以決癰賈實禍矣然則將如之何曰烈士決之以速禍庸人養之以待亡君子則必修不可亡之道以聽亡不亡之天所謂修不可亡之道者自強自保而已所惡於養癰者爲其圖苟安而長人泄泄沓沓之心以底於必亡也故必先存決癰之心而慎施決癰之術先存必決之心則不敢泄泄沓沓以待禍慎施決癰之術則不致一潰無餘以戕生未講用入行政而先論禍福是非不揣其本而齊其末此瓊山之蔽也夫國藩稱其辨論十餘首多閱歷之言又有讀小學一書

胡達源丁善慶

胡達源字清甫湖南益陽人父顯韶諸生博覽經史訓子弟用小學近思錄大學衍義等書以身體力行爲主人比之陳太邱王彥方達源六歲祖授以古人嘉言善行輒有感觸既長承父師教不敢放逸嘉慶二十四年一甲三名進士授翰林

院編修擢國子監司業道光初充睿廟實錄館纂修官宣宗嘉其書有法召對命爲提調官盡領館事八年充雲南鄉試正考官復命提學貴州大定武舉吳甲父子橫踞一鄉徒黨徧郡縣嘗辱學官踣之地達源至盡發其姦狀置於理一郡稱快任滿入都賑饑青白口仿富弼青州法人給五日糧男女異路升斗籌票親爲驗發同官疑非成例達源引古義察近情奏聞上嘉納焉洊陞侍講學士大考擢詹事府少詹事充日講起居注官以武會試總裁失察降侍講尋以艱歸達源爲學鞭辟近裏嘗示子林翼曰孟子言充無穿窬之心穿窬可免也穿窬之心不易免也人能無愧此心則無愧君父矣又曰孟子推至於以言餽之以不言餽之有意探取於人卽爲穿窬之類其用情最隱其爲事易忽其用力防閑愈密擴充之卽是聖賢所著弟子箴言十六卷爲目十有六自序曰士莫先於奮志氣而學問則擇執之功莫切於正身心而言語則榮辱之主修其彝倫族黨之誼謹其直諒便佞之閑嚴其禮教範圍之防辨其義利公私之界謙讓節儉善之修也驕惰奢侈惡之戒也德備而才全體明而用達故以擴才識裕經濟終焉其書融會先儒諸說語皆心得有裨世教壽陽祁寯藻甚稱之他著有聞妙香軒文集年六十四

卒子林翼官至湖北巡撫諡文忠自有傳 丁善慶字伊輔湖南清泉人宛平籍道光二年進士改翰林院庶吉士散館授編修八年充貴州鄉試正考官十一年充廣東鄉試正考官十六年督學廣西洊擢侍講學士宣宗嘗問翰林中孰爲篤學大學士曹振鏞以善慶對上器之以母老乞養歸善慶幼孤早歲事母執爨必躬浙米必潔及歸益加謹母或不適憂皇如不終日意有不憚則長跪引咎既解乃起畢生孺慕自順親外不知天地更有何事也母歿主講岳麓書院粵匪寇長沙矢死堅守寓書其弟曰城陷收吾骨桂樹旁井中矣賊退趣治戰船以濟水師立共武社使諸生肄習火器以城守功賞加三品卿銜主岳麓二十餘年念俗方抗敵奢麗亡等不端士習無以率齊民因示以洛閩正軌爲修身立命之要湘鄉曾國藩言善慶庶幾以身教者其學詳於治經尤嗜易春秋著有左氏兵論同治八年卒年八十

朱文休劉傳瑩

朱文休字慎甫湖南瀏陽人少穎敏年十六棄舉子業閉戶潛修篤志性命之學以宋五子爲歸嘗曰讀書所以明道也未有不通四子五經而能明道者亦未有

不明濂洛關閩之道而能通五經者其學以誠爲本以敬爲宗以精義集義爲程途以明體達用爲究竟後益殫心易象春秋謂易象內聖之學春秋外王之書學不明易象無以窺道之全體不通春秋無以極道之大用又謂性道學之本也經濟學之用也學不博難以致用故凡秣算方輿律呂及諸子百家靡不研究性至孝省父武昌交江陵訓導胡大章監利王柏心及奉兩親南還遺以金不受父歿蔬食三年善化賀長齡聘掌書記以母老辭後家益窘復奉母之鄂依大章授徒以養養獨腴而身有飢色時競尙漢學或勸爲之以廣名譽文林笑曰吾於科目且棄而背之矣又屑覲彼耶卒不顧道光十九年卒年五十二所著大義粹言春秋本義三傳備說俱佚有易圖正旨一卷五子見心錄二卷從學劄記一卷文集一卷湘鄉曾國藩稱文林日抱遺訓以自鑄其躬闇然至死而不悔可謂篤志不牽衆好云 劉傳瑩字椒雲湖北漢陽人道光十九年舉人官國子監學正少讀顧炎武江永書慨然以通經史立功業爲志尤熟於胡渭閻若璩方輿之學凡字書音韻天文推算古文家之說皆刺取大旨日夜鈎稽不懈久之疾作自以所業繁雜無當身心欲追古爲己之學乃反覆濂洛以下書綜覈於倫常日用之地而

尤以辭受取與爲初基語其友湘鄉曾國藩曰君子之學務本而已吾與子敝精神於讐校費日力於文詞微俸身後不知誰何之譽自今以後可一切罷棄各敦內行沒齒無聞誓不復悔遂移疾歸養家居授徒著明性明教明治三篇以詔學者首言人之所以異於禽獸以其得性命之正而已性命之實著於五倫愚不肖者日用而不知賢知之過又好高而失實此所以違禽獸不遠也中言二帝三王之立教皆以明倫學校之勸懲朝廷之舉錯悉不外是是以其時風俗醇厚三代而下惟漢置孝弟力田科舉孝廉方正猶存此意故其風俗近古自唐以後專以詩賦帖經取士不復知先王立學本意士苟長於詞章記誦則雖不孝不友無禮無義皆可以掇巍科取高位無怪乎風俗薄惡而兇荒盜賊不絕於史策也終謂帝王之治通乎神明光於四海不過盡人倫之實推之天下使各盡其實而已後世不乏有志治平之士或徒以事功爲意而忽於家室彝倫之近亦見其推之無本行則必躓而已矣傳瑩繼娶鄧其父媵以財數千金不樂盡反之二十八年卒年三十一國藩稱其湛深敦厚內志外體一準於法世以爲知言朱子所編孟子要略久佚不傳傳瑩於金履祥孟子集注考證中輯出復還其舊國藩爲校刊之

桐城方宗誠復編其遺集爲四卷

李元春賀瑞麟 薛于瑛

李元春字時齋陝西朝邑人嘉慶三年舉人道光十六年吏部截取知縣改大理寺評事咸豐三年以勸捐出力奉旨賞加州同銜元春幼時父以諸生遊賈楚中家貧奉母居拾薪餉驢代貧家磴碾得麩糠和蔬爲食一日過里塾聞誦聲歸告母欲讀書母喜遣入學猶半日負薪以爲常稍長塾師講仁而不佞章輒苦思前後言仁不同處悟聖門求仁之旨年十四得薛瑄讀書錄益究性命之學徧求程朱文集熟讀精思鄉薦後以父歿母老絕意進取迭主潼川華原書院導諸生以正學興起者衆其學以誠敬爲本而要於有恆讀書觀理以爲行之端處事審理以驗知之素本末兼該內外交養一宗程朱謂朱子之學之精全由與友朋講論而得禁僞學忌講學世衰政亂時也扶衰救亂還在明正學此根本事謂陽明朱子晚年定論全是援儒入墨是己之見牢不可破在朱子公心衛道初無此意然後來衛朱子者譏陸王亦太甚謂白沙甘泉不盡與陽明同而亦相近高忠獻願涇陽陳幾亭馮少墟不欲與程朱異而亦有殊不可不辨謂李二曲亦有爭名立

名之意其以文章推山史以節介推復齋而云躬行實踐世無其人則自謂也是明爭名矣然山史不止文章復齋不止節介山史王宏撰號復齋王建常號也生平博通經史深惡支離著學術是非論曰學術至今日而愈歧矣有記誦之學有詞章之學有良知之學而又有考據之學而皆不可語於聖賢義理之學之精良知之學竊聖賢之學而失之過者也考據之學襲漢儒之學而流於鑿者也講良知者尊陽明而溺於空虛勢必與佛老之教等然陸王學偏而行誼事功猶有可取高明之士竊此而與朱子爲敵其實蕩檢踰閑有不可問者此真所謂僞學也務考據者右漢儒而左朱子彼謂漢儒近古其所講說皆有傳受夫近孔子而解經者孰如春秋之三傳然盟蔑盟昧其地各異尹氏君氏其人云訛此類疑竇不可勝數何論漢儒吾嘗思之生數千載之下欲講明於數千載之前聖人已遠簡編多缺兼以僞書日出將一一而考其實有可據必有不可據者有可通必有不可通者不可據不可通是終不能考其實也故斷不如朱子說理之爲真嗟乎朱子豈不知考據者哉今人好立說以駁朱子名心勝也此與講良知者之意等也然則儒者果將何所擇而守乎曰楊墨佛老吾斥之記誦詞章考據吾爲之而一

以朱子之明其理而履其事爲宗又不入於良知之家庶乎與聖學相近矣元春有所纂述皆以扶世教正人心爲己任不務空言常輯張子釋要先儒語錄爲關中道脈書增補馮從吾關學編學者宗之性廉介未嘗乞假於人每思以儉救世謂儉祇在守禮作禮俗辨以見意居家嚴恪與人則和易可親義所當爲必毅然行之嘗率所居十六村聯爲一社行保甲法鄰盜相戒不敢犯關中旱捐穀賑給邨民著救荒策數萬言上之當道大致謂當村各護村族各護族時賴以全活甚衆南鄉瀕渭各村以灘地構訟元春爲請正經界以息爭有械鬪者元春至數言立解所居高閣手植四桐積書數萬卷自號桐閣主人年八十猶夜半起讀書語學者曰愈勤則精神愈生四年卒年八十六所著有諸經緒說經傳摭餘春秋三傳注疏說左氏兵法諸史閒論諸子雜斷圖書揀要百里治略循吏傳芻蕘私語喪禮補議閒居鏡語益聞散錄學薈性理論及文集等書凡百餘卷又輯關中詩文鈔四十七卷青照樓叢書三編共九十餘卷弟子三原賀瑞麟能傳其學 賀瑞麟字角生陝西三原人恩貢生有志正學父以半耕半讀屬對應曰全受全歸父異之及父母歿居喪一遵家禮築廬墓側顏曰有懷草堂年二十四聞李元春

講學朝邑從之游遂棄舉業致力於儒先之書其學以朱子爲準的於陽儒陰釋之辨尤嚴與芮城薛于瑛朝邑楊樹椿友善以道義相切劘同治元年關中亂避地絳州顛沛之中仍與于瑛樹椿講學不輟亂定歸里知縣余廣颺請主學古書院手定學要六則曰審途以嚴義利之辨曰立志以大明新之規曰居敬以密存養之功曰窮理以究是非之極曰反身以致克復之實曰明統以正道學之宗性嚴正雖盛暑嚴寒必正襟危坐無欹側容接引後進皆規以禮法不爲諂諛所動廣颺舉孝廉方正不就巡撫劉蓉總督左宗棠復聘主關中蘭山書院皆固辭晚關清麓精舍於涇陽之清涼原來學者益衆生平以倡復橫渠禮教爲己任或延講古禮不遠千里郡縣屢請行古鄉飲酒禮觀者如堵牆風俗一變時人於妻喪服多略瑞麟獨依禮而行作妻服答問以解衆惑居恆不入城市惟於振窮墾荒均田積穀諸事則莫不躬親贊治同治十三年學政吳大澂疏薦奉旨加國子監學正銜光緒十七年督學柯逢時復以經明行修薦奉旨加五品銜十九年卒年七十著有五子信好錄讀朱錄要養蒙書誨兒編清麓文鈔語錄樹椿字仁甫嘗問學元春及交于瑛益絕意舉業以正學爲歸于瑛嘗規之曰坐交脛非學者所

宜遂力改之其服善如此 薛于瑛字貴之山西芮城人歲貢生年十八父歿遺言補讀小學書既悟學所以爲己遂誓父墓焚棄舉業讀小學萬遍凡十八年於先儒書程朱薛胡外尤喜許魯齋性孝友父歿伯兄繼亡繼母待之虐于瑛服事維謹母怒輒長跪請罪與嫂妻同食糠粃而母極滋味生平用功勤苦少卽親力農事析薪推磴多自爲之而門庭涓潔如洗每中夜危坐誦讀牀衾整齊未嘗見其展歛時稱鐵漢或戲呼爲薛聖人同治元年髮賊由陝西東竄函谷于瑛勸鄉里辦團防河部署分明四十餘日日不交睫時樹椿遊晉于瑛謂之曰學者進德當自生於憂患始此我輩今日之義也樹椿服其言其爲學以立志居敬窮理反身爲用功之準以熟讀精思爲讀書之法以守正崇禮爲變俗之本以不言舉業爲教學之則瑞麟嘗曰仁齋不辨陸王卻無一語似陸王樹椿亦曰吾熟不如仁齋大不如復齋仁齋于瑛號復齋瑞麟號也其授徒不計脩脯必禮聘始就學規整肅興起者衆光緒元年督學謝維藩以究心正學薦奉旨加國子監學正銜四年巡撫曾國荃延辦解州賑務查驗四閱月遂卒年七十二著有小學淺解大學聖經講義小學心術條講義必有事編豫養編爲己圖解告君錄遺集等書

路德柏景偉

路德字閔生陝西葭州人嘉慶十四年進士改翰林院庶吉士散館授戶部主事十八年考補軍機章京以目疾請假歸里德廉靜寡欲家貧母兄老藉講學爲祛病靜攝三年日復明以母老不復仕歷主關中宏道象峯對峯各書院教人專以自反身心講求實用爲主尤以不外求不嗜利爲治心立身之本生平研經軌道不事偏倚嘗著墨子論謂孟子兼距楊墨然距墨易距楊難墨子之道愛人濟物之道也楊子之道自私自利之道也自私自利人情類然末俗尤甚是卽楊子之徒也墨子之道非儒其意則不背於儒兼愛與摩頂放踵猶是己溺己飢殺身成仁之心特儒者得乎中墨子過乎中故不能無失然此皆楊子所不肯爲從墨子之道則富拯貧貴庇賤強扶弱智誨愚民康物阜勤素成風禁攻寢兵獄訟衰息不害爲治世從楊子之道將使富者生貧者死賤者悲貴者喜強者智者務爲自全弱者愚者舉不得免臣不忠其事子不竭其力兄弟不同其心雖人人服儒服誦儒書而生理固已滅矣著有櫟華館詩文集雜錄十餘卷弟子朝邑閻敬銘爲刊行敬銘師事德最久稱其懷抱峻潔遺棄榮利言學言理切近踏實無門戶標

榜氣習平江李元度亦謂德行誼爲文名所掩其詩古文又爲時藝試律所掩然德弟子著錄千數百人所選時藝一時風行俗師奉爲圭臬並取其五經節講之本以教學者不復知讀其全頗爲世所詬病云咸豐元年卒年六十八孫桓咸豐十年進士改翰林院庶吉士同治元年藍逆竄踞熬屋桓時家居被執不屈死柏景偉字子俊陝西長安人咸豐五年舉人以選授定邊縣訓導未赴任會回匪亂作奉父母匿南山轉徙荒谷間親歿哀毀骨立尋以在籍辦團防巡撫劉蓉奏請以知縣選用回匪竄甘肅景偉偕提督傅先宗助剿同治五年解鞏昌圍並克熟陽城絃功賞戴藍翎六年欽差大臣左宗棠督師入關與謀軍事景偉謂宜築堡寨以衛民居設里局以減徭役提耗羨以足軍食徙回居以清根本開科舉以定士心又上辦理回匪臆議十四事宗棠深才之以屬幫辦軍務劉典八年典以景偉積年勞勩特疏保薦詔以知縣分省補用賞加同知銜嗣典以終養回籍景偉遂歸里不復出光緒三年秦大饑景偉請於大吏發粟振恤創爲邨各保邨法以貧民稽富民粟使無匿以富民覈貧民戶使無濫手定章程全活數十萬人景偉少刻苦於學既歸主涇干味經關中各書院思造士以濟時艱創立求友齋令

以經史道學政事天文地理與掌故算法時務分門肄習造就甚衆其爲學似陳同甫王伯厚而實以劉念臺慎獨實踐爲的嘗謂聖賢之學以恕爲本以強爲用強恕而行則望於人者薄而責於己者厚又謂同此性命同此身心同此倫常同此國家天下道未嘗異學何可異凡分門別戶者非道學之初意也故理一分殊之旨與立人極主靜體認天理之言學者不以爲異而其所持究未嘗同然則主敬窮理致良知先立乎其大之數說者得其所以同亦何害爲異乎其大旨如此所著有澧西草堂集

方垌願廣譽 邵懿辰 陳壽熊

方垌字思臧浙江平湖人嘉慶二十一年舉人少從武康徐熊飛爲詩兼治古文訓詁後篤志程朱之學雖貧病交迫不顧也道光十年攝武義縣訓導武義屬金華有何基王柏金履祥許謙章懋之緒論久不講垌至以小學近思錄爲教反覆曉解士子翕然信從執經問業滿庠序持身極嚴非其義一介不取時郡學楊道生湯溪學沈寶齡並以理學倡諸生二人出入姚江垌寓書規之不少假借也以母喪歸邑中父老以爲百年來所僅見攀留不已十四年選授錢塘訓導未抵任

卒年四十三。垌爲學初謹步趨尺寸。凜凜念己所不足者。四端曰密曰裕曰虛曰慎。各作一箴以自警。既闢見端倪。畢力銳赴。乃拓偃仄歸於平夷。常臥病兩月。恍覺天理呈露。取程子易傳讀之。益洞明其理。以旁通於諸經。無不合者。又常看大學於朱子論天之明命。處閱之洞心。有手舞足蹈之樂。晚年體驗。延平喜怒哀樂未發之說。益以暇豫。其言曰。外整肅而內虛靜。湛然寂然。沖漠無朕。是之謂居敬。敬則一一則誠矣。又曰。動而後有善惡。當其靜則未有不善者也。故聖賢主靜。靜卽人生而靜之靜。不與動對。乃貫乎動靜之中者。靜固靜。動亦靜也。太極是已。因作靜坐箴以見意。又作生齋記曰。天地之道。生生而已。人得天地之心。以爲心。皆宜有慈祥。豈弟之意。否則其心與天地不相似。而生理息矣。生之理。息不可以爲人。故曰。仁。人心也。又曰。仁也者。人也。乾四德。元爲之長。仁之於人亦然。昔周子令學者觀天地生物氣象。所以體仁也。著有讀易日識六卷。春秋說四卷。生齋自知錄三卷。生齋日識二卷。詩文稿十七卷。重訂張楊園年譜五卷。又欲錄周程張朱及勉齋北山敬軒敬齋楊園清獻遺言。兼取念庵景逸爲學準一書。未成而歿。平湖自陸隴其後。乾隆間有蔣元字大始。諸生究心理學。謹循繩墨。著有人範六

卷讀書劄記八卷至垌潛思力行以詣其極尤妙契前賢云 顧廣譽字維康亦平湖人優貢生成豐元年薦舉孝廉方正會寇難未赴廷試廣譽自幼慕其鄉張履祥陸隴其爲人刻意勵行依程端禮讀書分年日程以治經又晨夕紬繹宋五子書身體而力行之時競尙漢學廣譽獨以程朱居敬窮理爲本以之自勉卽以之勉人與同里方垌爲道義交常挈家就垌白華書舍朝夕講論垌因出所爲生齋日識以相質證及垌歿奔護其喪復爲醮金刻其遺書吳縣吳鍾駿兩督浙學重其學行與錢唐伊樂堯並目爲浙士之冠晚肆力於儒先疏義而精力尤萃於詩著學詩平說三十卷以毛鄭陸孔朱呂爲主參之以歐陽蘇李范嚴諸儒之說復博采宋元明國朝諸家擇其合於經者取之違者去之說似可通而實非正義者辨之用以窺尋四始六義之本又憫晚近喪祭禮廢恩誼衰薄婚娶僭侈踰度乃變通古禮而酌乎時俗之宜著四禮推疑六卷他著有正詁五卷鄉黨圖考補正四卷悔過齋文稿十四卷婁縣姚椿稱其學博而行高其扶樹世教當與吳江張履同爲一時宗匠云同治五年卒於上海龍門書院年六十八樂堯字遇夔咸豐元年舉人按察使段光清入覲文宗問杭通經學古之士以樂堯對上稱歎久

之十一年髮匪陷杭州奉繼母出乞食山中踰年竟以寒餓死 邵懿辰字位西浙江仁和人道光十一年舉人考取內閣中書游陞刑部員外郎入直軍機處性戇直大學士琦善以枉殺熟番案入獄懿辰擬十九事將詰問或忌之撤懿辰名使不得與爲問官大學士賽尙阿視師廣西懿辰復手疏七不可上執政諍之由是齟焉不得安其位咸豐四年坐濟寧防河無效罷歸歸後家居養親覃思經籍論學宗朱子經學宗李光地文宗方苞不喜漢學家言與上元梅曾亮臨桂朱琦遊處尤與湘鄉曾國藩爲石交十年髮逆陷杭州懿辰奉母先去得無恙母歿旣葬賊再至懿辰與巡撫王有齡固守城中朝夕策戰備暇則偕同里伊樂堯窮經不懈十一年城陷罵賊死年五十二所著書多散佚有禮經通論位西遺稿一卷其忱行錄一卷論家國天下之道尤有慨乎言之 陳壽熊字獻清江蘇吳江人諸生少孤能自樹立作座右箴言入孝出弟之方居敬窮理之旨朝夕觀翫以自警讀書好深沈之思友平湖顧廣譽益治經學廣譽持謙退未嘗爲學者盡言壽熊授經吳淞間誘掖如不及人漸尊嚮之家貧不能葬其親應省試舟次大江涕泣醉江流爲誓歸仿桐鄉張履祥法爲葬親會自是獲葬者數十家咸豐十年粵

匪陷吳江壽熊糾鄉兵擊賊賊大至家人被害壽熊亦受創時有欲款賊者壽熊厲聲斥之遂憤不欲生絕粒五日而卒年四十九壽熊學宗程朱閤然自修不侈講學名常言數十年檢攝此心自今日始能不妄用又言死生之際視之淡然著有周易集義周易正義舉正周易本義箋讀易啟蒙私記讀易漢學私記冬官補亡考工記釋詩說參同契注詩文集

方東樹方宗誠

方東樹字植之安徽桐城人諸生父績博學工文詞著有經史劄記十二卷屈子正音三卷詩文鈔七卷東樹幼承家範年十一效范雲慎火樹詩驚其長老年二十餘用功心性之學又學古文於同里姚鼐四十後不欲以詩文名世研極義理於經史百家浮屠老子之說罔不窮究而最契朱子之言嘗言立身爲學固以修德立行內全天理爲極而於人世事理亦必講明通貫以待用惟當知本末先後之次不可以玩物喪志勞心失其遠者大者耳時海內競尙考證號曰漢學鼐嘗爲文辨之東樹因著漢學商兌三卷自序謂近世漢學闢宋儒攻朱子以言心言性言理爲厲禁觀其所著書不出訓詁小學名物制度棄本貴末於聖人躬行求

仁修齊治平之教一切抹殺名爲治經實足亂經又曰經者良苗也漢儒者農夫之勤菑畚者也耕而耘之以植其禾稼宋儒者穫而舂之蒸而食之以資其性命養其軀體益其精神也非漢儒耕之則宋儒不得食宋儒不舂而食則禾稼蔽畝棄於無用而羣生無以資其性命今之爲漢學者則取其遺秉滯穗而復殖之因以笑舂食者之非日夜不息曰吾將以助農夫之耕耘也卒其所植不能用以置五升之飲先生不得飽弟子長飢以此教人導之爲愚以此自力固不獲益其求在外使人狂使人昏蕩天下之心而不得其本其去經也遠矣同時陽湖陸繼輅元和沈欽韓皆重其書武進李兆洛言曩時讀書甚不喜康成於朱子亦時時腹誹讀先生書敬當力改其失其推服如此東樹又著辨道論跋黃宗羲南雷文定以破姚江山陰之失少有用世志遊粵東值大臣請禁洋煙著匡民正俗對陳所以禁之之道英人肇釁著病榻罪言論所以禦之之策時皆不用客遊五十年晚歲家居益窮性道之旨自言所學無時不有新益咸豐元年卒年八十古文簡潔涵蓄不及鼐能自開大以成一格然桐城自東樹後學者多務理學云他著有書林揚鱗一得拳膺錄思適居鈴語半字集考槃集山天衣聞考正待定錄進修譜

未能錄大意尊聞最後微言老子章義陰符經解昭味詹言文集詩集共百餘卷
方宗誠字存之東樹從弟弱冠師同里許鼎又從東樹遊清勤刻苦讀書有一
理之未通一事之未踐一過之未悟如痼疾在身論學宗程朱謂象山立大陽明
良知念臺慎獨亦皆本於孔孟特見其偏不見其全是以失之然大倫大節究無
不同要當各取所長咸豐三年髮匪陷桐城避居魯硤山中先世之享堂堂前古
柏半枯宗誠日坐其下讀書痛飲名曰柏堂每念致亂之由撥亂之道處亂之策
反覆推論歸其本於忠孝廉恥成俟命錄十卷時亂氛日熾宗誠獨授經山中與
同里朱道文方潛趙獻張勳諸人過從講學人比之魏禧易堂八年三河兵敗乃
挈家入山東布政使吳廷棟招至署中與共論學推爲碩果湘鄉曾國藩聞其名
致書速歸至大梁道阻巡撫嚴樹森留司章奏多所贊助後返安慶追隨戎幕中
曾國藩奏以知縣留補江蘇復奏調直隸同治十年補棗強縣知縣既至清積牘
釋滯囚治姦宄平反冤獄建正誼講舍敬義書院立學規集諸生會講刻小學經
正錄弟子規及先賢遺書採邑中國朝有學行之儒鄭端劉瑄劉士毅附祀董仲
舒祠以資觀感歲旱禱雨輒應值災年籌賑周至於貞孝寒儒別加餽贈凡教養

之事知無不爲總督李鴻章疏稱宗誠湛深經術留心濟世舉卓異將擢陞灤州以創修義倉積穀未成辭不往光緒六年告歸年六十三矣宗誠說經於諸子百家靡不采摭而一衷程朱論文精究義法必歸諸正學尤虛懷受善自少至老無時不以朋友切磋爲事一言可錄佩之終身學無不窺而能折中以求至是著有志學錄八卷續三卷輔仁錄四卷讀書筆記十三卷春秋集義十二卷周子通書講義一卷思辨錄記疑二卷宦遊隨筆二卷柏堂文集六編九十餘卷

夏忻弟炯

夏忻字欣伯安徽當塗人父鑾字德音嘉慶元年巡撫朱珪舉孝廉方正後以優貢官徽州訓導事母以孝聞學宗程朱務篤行不事著述訓士極嚴有屈辱必爲之直嘗謂士習宜整頓士習亦宜培養也先是當塗早鑾倡捐平糶道光二年復大水鑾卽貸千金命忻持散親族署中惟朝一粥夕一飯日省米石餘卽活一窮人命矣年七十卒忻道光五年舉人以武英殿校錄議敘官吳江婺源教諭生平不求聞達輯過庭聞見錄以述先德官婺源十八年與生徒講學惟以誦法朱子相勸刊發小學近思錄示學者入德之門士習丕變農隙之時周歷鄉村與民講

約以淺語敬闡聖諭十六條附刊律例之簡明者於後嘗曰教官以教爲職非獨教士雖庶民與有責焉咸豐初粵匪擾東南烜倡團練與婺人約曰七十老翁不能任天下事願與若死守婺而已城賴以全左宗棠督辦浙江軍務聞烜曾佐浙撫阮元平海寇聘參戎幕烜建議以徽爲江浙門戶救婺卽以圖浙後路肅清而後浙可安枕又謂用兵之要以慎爲先未復之地慎進攻不可輕犯賊鋒致墮詭計已復之地慎回顧不使賊出我後頓棄前功宗棠聽其言烜又籌貸銀米給留徽及金嚴諸軍以功保內閣中書加四品銜擢潁州府教授烜爲學兼綜漢宋長詩禮二經而尤深於朱子之書義理訓詁名物制度說文小學皆能博考精研深造自得其所撰著以輔翼世教爲心桐城方宗誠嘗稱其檀弓辨誣三卷有功孔子述朱質疑十六卷有功朱子三綱制服尊尊述義三卷實於古聖制禮以維繫綱常之意有所發明晚歲潛心翫易著易君子以錄二卷同治七年門人刑部侍郎胡肇智以所繹聖訓附律易解及檀弓辨誣述朱質疑進御有耆年篤學不倦之褒並命武英殿刊刻頒發天下榮之十年卒年八十三他著有學禮管釋十八卷讀詩筭記八卷附錄五卷學制統述三卷六書轉注說二卷養疴三編八卷賈

誼政事疏考補一卷陶主敬先生年譜一卷景紫堂文集十四卷 斫弟炯字卯生少承父學兄弟自相師友通諸經小學遭父喪乃體翫宋元明以來諸儒書發其旨趣辨其誣謬粹然一軌於正又著選法河務巖政諸議論者謂其可見施行年五十二卒有夏仲子集

許鼎蘇惇元 朱道文 方潛

許鼎字玉峯安徽桐城人幼有卓識讀書金滕篇能辨注疏謬誤及長父授以薛瑄讀書錄奮然有求道志年三十棄舉子業兀坐一齋日讀先儒書言動必準矩矱人咸迂笑之嘗愛謝上蔡語克己宜從難處克己思未能寡欲何以入道自是清苦守節不求人知人亦無有知者其學以程朱爲宗於陸王書亦取所長謂陽明以朱子格物窮理之旨爲非專以致良知爲教亦得魚忘筌耳陽明未謫龍場前物無不格理無不窮至是乃悟天下之理卽在吾心而以向之求理於事物者爲非不知理之全體統具於吾心而散殊於事物卽物窮理下學之功也悟天下之理卽在吾心上達之候也使向未嘗窮事物之理安有此悟乎居鄉授徒嚴幼儀而以身率之事父母有孝行母病痺數年常在牀褥鼎親滌中幫永夜侍牀下

夏則爲扇枕席母命去乃潛立戶外不揮蠱蚋惟恐驚母聞母呻吟聲卽趨至母歿寢柩側夜不張幕以家貧歛薄時時長跪自罰父病痔館舍離家數十里十日必一歸省盛寒溽暑抱病徒行不自知其憊也居父喪亦如母喪家人以年老敦勸惟進蔬食菜羹而已道光二十二年卒年六十一著有正志錄正學錄同縣方東樹稱其純粹深通皆由本之躬行反身理會推見至隱又有遺文二卷 蘇惇元字厚子亦桐城人監生天性孝謹母歿不入內聽樂飲酒食肉者三年年三十時好朱子之學師事方東樹名其堂曰儀宋後讀桐鄉張履祥書以爲得朱子正傳體用兼備鉅細畢舉爲撰訂年譜一卷又謂學不足以修己治人則爲無用之學文不足以明道析理則爲虛浮之文有行而無學其行無本有學行而無文章則無以載道而行遠宋以後文之純正者惟方苞爲輯望溪年譜二卷性嚴正守禮家貧甚一介不妄取與值連歲水災佐知縣籌畫拯救鄉里得實惠焉道光三十年舉孝廉方正辭不就咸豐七年卒年五十七著有遜敏錄四卷四禮從宜欽齋詩文鈔卒後遇亂未葬江督曾國藩至安徽爲營墓立之石時同縣爲理學者又有朱道文方潛 朱道文字魯存諸生學通老莊而歸重於程朱豁達有大志

能詩文咸豐三年粵賊陷桐城家屬遇害道文亦被殺已而蘇躬至爨下烹食奉母血淋漓不覺其痛母卒有賊感其孝奉錢二萬道文固卻之賊歎息去七年卒有遺集八卷 方潛初名士超字魯生嘗與霍山吳廷棟大學士倭仁往復論學同治七年卒年六十著有母不敬齋全書

汪桂月 呂緝熙 楊德亨

汪桂月字秀林安徽宿松人貢生道光元年舉孝廉方正少篤志聖賢之學事親曲致敬養居喪謝絕僧巫三年不入內雖盛夏不脫縗其學以守身爲本及物爲用而尤以人倫日用切近纖悉爲求仁之實際其言曰爲子止一親爲臣止一君爲人止一心心定靜則身安身鎮靜則家養又曰忠孝皆至性然有性情不可無學問有學問不可無涵養嘗翫孟子存心養性之旨自號曰養園家貧授徒四十餘年誘掖懇至從遊者甚衆尤善處人骨肉之間有兄弟不和者語其兄曰五倫之中有諍子諍臣諍友父曰嚴父師曰嚴師獨兄弟無以諍嚴爲詞者斯干曰式好無猶論語曰怡怡是宜盡吾性真愛勿以督責爲義也語其弟曰世俗多以兄弟爲平等然堯之命契不曰兄弟而曰長幼且申之曰有序誠恐後世之視爲平

等也孔子以事兄未能與事君事父一例告子游曰弟子服勞言子而及弟且總承之曰曾是以爲孝則孝固兼弟言之未有非悌弟能爲孝子者其引申經義善誘如此生平樂聞己過喜道人善而臨財一介不苟訓其子曰學者當爲天地立心生民立命而妻必以餓死事小失節事大爲立身之基所著養園隨筆亦寄齋文存皆體驗有得之言時稱爲慥慥君子咸豐元年卒弟子同里石廣均傳其學廣均字方墀道光六年進士授兵部主事數月以請養歸篤學好禮嗜善不倦爲鄉里所稱嘗擷性理書之精粹者爲內訟齋隨錄又著有人譜詩箴亦園遺集

呂緝熙字敬甫安徽安豐人遷居六安諸生家世積善人稱積善呂氏緝熙幼穎悟通諸子百家繼悟正學潛心義理或勸以應舉求仕則曰學不足無暇及也時正學衰歇謗議羣興緝熙怡然受之曰吾生平隱過多矣或天假人言以示之罰乎篤行潛修不怠嘉興沈維鏞順德羅惇衍視學安徽皆重緝熙論士子讀書勵行以緝熙爲則惇衍兩試六安撤防後造廬訪焉所著求志篇多格言惇衍以爲似明儒呂氏嘗謂周秦諸子之精語有宋儒所未及者因彙輯之爲諸子述醇他著有大學約旨述孟子程子晰疑國語存液等書性好善來學者衣食與共兄弟

親戚一體視之財物未嘗共計公私有餘則以濟窮困謂門人曰爲善則智慧生不爲善則障蔽生吾於道粗明善之力也道光二十九年卒年四十九 楊德亨字仲乾安徽石埭人貢生少窮經修行事親先意承志左右不離者八年弟治生計於外負千金德亨慮親意弗舒請往代令弟侍養居五年盡償其債家益起復歸養兄弟間怡怡如也咸豐初粵逆攻長沙德亨曰亂將至矣散其產千金與嫻族故舊後多賴以全活既避亂江西顛沛中篤學不懈初喜王守仁書著讀陽明拙語數卷以亂故復求體用之學湘鄉曾國藩聞其賢屢招致之德亨於兵政吏治知無不言又言當整頓學術爲撥亂反治之本國藩益重之久之讀近儒羅澤南倭仁吳廷棟書歎曰是正學也遂反求諸程朱廷棟致仕居江寧德亨朝夕請益盡棄所學研究近思錄諸書時年六十四矣國藩歎曰勇撤舉比張橫渠豈能過哉光緒二年卒年七十二德亨躬行實踐見廷棟後所學益力所養益醇嘗語友人方宗誠曰醜莫過於無實而浪得名禍莫烈於力小而輒任重又曰學問路徑不同無妨惟用心於內與用心於外不可不辨又曰人每日須讀聖賢書以提醒此心看得讀書當與喫飯并重一說不暇此心放倒矣宗誠言克己爲善終身

不見有疾言遽色者生平所見惟國藩廷棟及德亨三人而已著有尙志居集四卷補遺一卷讀書記四卷

劉繹龍文彬

劉繹字瞻巖江西永豐人道光十五年一甲一名進士授翰林院修撰入直南書房十七年提督山東學政事竣溫旨詢問家世命侍父母居直廬尋以親老乞歸里性至孝主講鷺洲書院去家百餘里每月必一歸省以爲常咸豐元年廷臣交薦詔入京時父已歿召對仍以母老陳情歸六年粵匪陷郡邑城奉母避山中八年命加三品京堂銜督辦江西團練繹出入兵閒不辭勞瘁多所保全旋丁母憂乞終制同治初詔嘉其學優品正復召入京時年已七十以老疾辭光緒四年卒年八十二繹官京師與戶部尙書祁寯藻相契時有以開礦奏者繹爲言明季礦害竊藻具疏上事遂寢嘗言爲國必先培元氣其要在得人才固民心上無言利之臣則賢才進下無貪黷之吏則閭閻安元氣之復必由於此督學山東刻勸課條規著崇正黜邪論一卷以鼓舞善類主講鷺洲及青原書院四十餘年與生徒講學不涉偏激不落虛空一以省察躬行爲本成就甚衆生平文不苟作必求合

立言之旨自序稱進未嘗一日詭遇退未嘗一日暇逸蓋非虛云著有存吾春齋文鈔十二卷詩鈔十三卷 龍文彬字筠圃江西永新人同治四年進士改吏部主事光緒元年充校穆宗實錄賞加四品銜賞戴花翎六年乞假歸主講友教經訓鷺洲章山秀水聯珠蓮洲各書院成就甚衆文彬少從劉繹遊爲繹所器重說經貫綜漢宋之間論學以誠敬爲宗旨言朱陸羅王異同之故皆有條理鑒明季講學家標榜之習殫精儒先語錄身體力行不立講會嘗謂以聖人之道自淑貴實踐而不尙浮談以聖人之道交修貴直諫而不矜門戶又謂養氣工夫在於積理積理既深則時見我躬闕失自不暇攻人之非病革時召其子曰數十年讀書養氣乃得此心洒洒落落榮辱毀譽無動於心而今而後吾知免夫十九年卒年七十三所著周易繹說四卷經督學龍湛霖呈進奉旨留覽他著有明會要八卷明紀事樂府三百首永懷堂詩文鈔十卷

吳嘉賓

吳嘉賓字子序江西南豐人道光十八年進士改翰林院庶吉士散館授編修嘉賓究心當世利病嘗條陳海疆事宜諭旨以非言官而言事與禮部主事湯鵬同

見嘉納二十七年緣事謫戍軍臺越四年釋回粵匪蔓延江楚以防堵武陽復新城彭澤諸縣及督團兵援郡城功賞內閣中書加侍讀銜同治三年賊犯南豐率鄉兵戰三都墟口遇害年六十二奉旨賜卹並建專祠嘉賓好學深思學宗陽明與蒙古倭仁湘鄉曾國藩友善嘗言性是人生命根與天呼吸相關處此處一斷絕便自棄其天無以爲人倭仁稱其言又言聖人言保國保天下老氏言取國取天下吾道祇自守老氏有殺機國藩亦稱其言治經字疏句釋以求據依其要歸於潛心獨悟力求自得尤長於禮著禮說二卷自序曰宋以來取大學中庸與論孟列爲四書世無異議余獨以禮運內則樂記孔子閒居表記諸篇爲古之遺言備錄其文以資講肄其餘論說多者亦全錄之先王之禮行於父子兄弟夫婦養生送死之間而謹於東西出入升降辭讓哭泣辟踊之節使人明乎吾之喜怒哀樂莫敢踰夫親疏貴賤長幼男女之分而其至約者則在於安定其志氣而已故曰禮樂不可斯須去身樂者動於內者也禮者動於外者也禮樂不外吾身之自動而奚以求諸千載而上不可究詰之名物象數也乎其大旨如此又著喪服會通四卷謂先王之制有時而易人道則無易喪服者人道也苟觀其會通則先王

之道雖欲稍爲損益其於吾心必有愆然不安者他著有周易說十四卷書說四卷詩說四卷求自得之室文鈔十二卷尙絢廬詩存二卷

蘇源生劉廷詔

蘇源生字泉沂河南鄆陵人道光二十年副榜貢生少失怙十歲卽知守身之義母病瘡晝夜侍側憔悴無人狀病劇刺背血爲文禱於神病旋愈嘉興錢泰吉主大梁書院源生從之遊言動無放出入不苟自爲課程甚密時假歸省母母恐其廢學趣之往而依戀怙悵見於詞色泰吉曰是家母子如是蘇氏其興乎咸豐元年舉孝廉方正辭不就八年皖匪竄扶溝時鄆城久圯源生不憚勞怨倡修之並爲規畫守禦計賊至宿城上指揮抗拒以故旁邑多蹂躪鄆陵獨完生平讀書篤實爲己專一而不雜以鄆陵地近河洛爲明薛瑄寄籍之鄉故其學遠宗二程近法薛瑄刊讀書錄等書以教學者時蒙古倭仁講正學中州源生河內李棠階內鄉王檢心皆負時望以醇正稱嘗謂程朱之言皆程朱所已行遵其言必當遵其行著省身錄十卷又以大學格致一傳紛紛聚訟源生謂一切不必辨但就章句發明之是非自見著大學臆說二卷又鳩集鄉邦著述錄其法言懿行可傳於後

者爲中州文徵五十四卷同治二年學使景其濬以學養純粹薦奉旨以訓導用八年以歷年守城勞績賞加光祿寺署正銜他著有師友劄記四卷紀過齋文稿二卷鄆陵文獻志四十卷所著中州學案未成九年卒年六十二 劉廷詔字虞卿河南永城人官考城教諭以憂歸服闋署孟津教諭咸豐初流寇至孟津廷詔冠服入文廟俟命終日而賊從關外過城得無恙秩滿歸六年卒廷詔爲諸生時讀朱子書恍然曰吾所學乃記誦詞章之末爾遂棄舉子業覃精經史及儒先性理於陽儒陰釋之書不肯假借以孫奇逢理學宗傳正宗列十一子登陸王於周程張朱之後謂道統之傳不宜輕議於五子外乃退諸儒於列傳屏陸王及其門人於附錄著理學宗傳辨正十六卷倭仁見其書序之曰夏峯書調停兩可歸於一家而特病其混然而無以別也夫學必合於天理之正卽乎人心之安乃可以信今而傳後廷詔此書統緒分明釐然不紊可謂趨向端而取舍審矣其推重如此他著有五經默記亂後佚不傳

劉熙載宗稷辰

劉熙載字融齋江蘇興化人十歲喪父哭踊如禮道光二十四年進士改翰林院

庶吉士散館授編修咸豐二年入直上書房與故大學士倭仁以操尙相友重論學則有異同倭仁宗程朱熙載兼取陸王以慎獨主敬爲宗而不喜學部通辨以下掇擊已甚之談上嘗問所養對以閉戶讀書御書性靜情逸四大字賜之以病歸里巡撫胡林翼特疏薦熙載貞介絕俗同治三年徵爲國子監司業遷左中允督學廣東作懲忿窒慾遷善改過四箴訓士謂士學聖賢當先從事於此所至蕭然如寒素未滿任乞歸襤被篋書而已熙載治經無漢宋門戶之見其論格物兼取鄭義論毛詩古韻不廢吳棫叶音讀爾雅釋詁至叩吾台予以爲四字能攝一切之音以推開齊合撮無不如矢貫的又論六書中較難知者莫如諧聲疊韻雙聲皆諧聲也許叔重雖未有疊韻雙聲之名然河可疊韻也江工雙聲也孫炎以下切音下一字爲韻取疊韻上一字爲母取雙聲蓋開自許氏又作天元正負歌以明加減乘除相消開方諸法生平於六經子史及仙釋家言靡不通曉而一以躬行爲重嘗戒學者曰眞博必約眞約必博又曰才出於學器出於養又曰學以盡人道而已士人所處無論窮達當以正人心維世道爲己任不可自待菲薄平居嘗以志士不忘在溝壑遯世不見知而不悔二語自勵自少至老未嘗作一妄

語主講上海龍門書院十四年以正學教弟子有胡安定風著持志熟言二卷篤近切實足爲學者法程又有藝概六卷四音定切四卷說文雙聲二卷說文疊韻二卷昨非集四卷光緒七年卒年六十九 宗稷辰字滌甫浙江會稽人道光元年舉人官內閣中書游陞戶部員外郎轉御史出爲山東運河道以疾告歸稷辰潛心理學徧覽諸儒書其書以和同朱陸爲宗嘗著朱王致知本同考曰余於通志堂經解中得朱子舊說謂致知乃致不慮而知之知又於語類中見答鄭仲履曰致知乃本心之知快然曰不慮而知非良知乎本心之知非良知乎朱子以立教當從平實改去舊說而不行然而無相異也人之虛明無不根於性初性初何所爲慮有不慮之知而後充之爲格物窮理之知而成其定靜安慮以完得止之知朱子雖隱其初說而不慮之知實致知之本源所謂理者要不能過乎是則致知中實含致良知之意可見矣又答桐城方潛書曰承詢朱陸合一之故夫道本大同理原一致惟用功致力各有所不合之故象山致廣大而不肯從事於精微陽明極高明而不違曲導乎中庸其實義利之辨八字著地知能之良一語闢天真至處故協於克一也稷辰年甫三十歷主湖南羣玉濂溪虎溪書院皆立講規

爲學者所宗尤留心當世之務官御史時上實行保甲變通錢法諸疏多切實用又上平寇需才疏舉湘陰左宗棠時服其有知人鑑出赴河工值捻逆肆擾稷辰倡議築戰牆於南北岸又於北岸設營防禦賊不敢犯歸後主蕺山書院發明劉宗周慎獨宗旨救王學流弊又以尹和靖朱子先後至越特於家塾爲四賢義學躬親指授成就者衆順天府尹蔣琦齡嘗特疏稱大學士倭仁及稷辰爲近時理學中碩果推崇甚至同治六年卒年八十著有四書體味錄躬恥齋文鈔二十四卷詩鈔二十八卷

范泰衡

范泰衡字宗山四川隆昌人道光十四年舉人以大挑二等選萬縣訓導性孝友幼失怙恃哀毀骨立遇歲時祭奠輒痛哭終其身待弟泰亨尤友愛生平爲學不事權術惟曰仁曰誠而行之以恕泰亨官刑部教以力保仁心舉平時心得之言撰我心錄以勗之及泰亨歿聞耗一慟幾絕嘗主隆昌書院課諸生以宋五子書朔望行釋奠禮講大學一章以爲條教湘鄉曾國藩稱泰衡理學庶幾躬行實踐者及官萬縣爲國藩采辦川米以餉安慶軍又上書謂設局萬縣不如設局金沙

無灘險而省運費國藩納其言駱秉章督蜀過萬容以軍情爲陳防剿之策會粵逆石達開及藍大順二順等先後竄近萬泰衡籌辦團防分守輒耳銅羅諸要隘賊不敢犯同治元年三月藍二順竄萬之武寧大順亦由分水至郭羅壩縣中戒嚴泰衡日夜登陴分團軍營城北外山爲犄角勢賊知有備乃走雲陽遣諸軍分道追剿擒獲甚衆敍功奉旨加五品銜以知縣用鄂撫嚴樹森過萬與語竟日出告人曰范先生議論事理顛撲不破真可與決大疑定大計也三年以病告歸居恆自奉澹泊而見義必爲歸後置義田贍親族選子弟爲宗正董其事語子孫曰吾一身志在大學雖窮居不損也博施濟衆無是事要必有是心汝等以事窺我失我矣所著有讀周易記六卷讀尙書記一卷讀孝經記一卷讀大學中庸記二卷讀論語記二卷讀孟子記二卷晚歲益肆研討足不出戶六年折衷羣說粹然一出於正貴筑黃彭年湘鄉劉蓉謂其書足衍程朱之緒云光緒十三年卒年八十四

成孺

成孺原名蓉鏡字美卿江蘇寶應人諸生性至孝父歿三日哭氣絕而復屬者再

授經養母歲歉糲糲或弗繼母所御必精鑿又懼傷母心輒戒家人夏槩孟於堂若會食然母苦瘵寒夜尤劇孺屏息牖戶外廉其衰數而調劑之或至申日事母垂六十年起居飲食之節有禮經所未嘗言而以積誠通之者早遂經學旁及象緯輿地聲韻字詁靡不貫徹於金石審定尤精確久之寢饋儒先書益有所得取紫陽日用自警詩以味真腴顏其居自號曰心巢孺於漢宋兩家實事求是爲門戶之見嘗曰爲己則治宋學真儒也治漢學亦真儒爲人則治漢學僞儒也治宋學亦僞儒又曰義理論語所謂識大是也考證識小是也莫不有聖人之道焉事父事君識大也多識鳥獸草木之名識小也皆師教所不廢然不可無本末輕重之差湖南學政朱迥然延主校經堂孺立學程設博文約禮兩齋湘中士人爭自興學著有禹貢班義述三卷據地志解禹貢於今古文之同異及鄭注與班偶殊者一一辨證卽有不合亦不曲護其非尙書曆譜二卷以殷曆校殷周曆校周從違以經爲斷又考太初曆卽三統爲太初曆譜一卷春秋日南至譜一卷又有切韻表五卷二百有六表分二呼而經以四等緯以三十六母審辨音聲不容出入晚年著述一以朱子爲宗所編我師錄困勉記必自錄庸德錄論語論仁釋明

明德解義太極衍義東山政教錄下學上達體用兼備又有國朝學案備忘錄一卷國朝師儒論略一卷經義駢枝四卷五經算術二卷步算釋例六卷文錄九卷詩錄一卷宋書州郡志校記一卷唐詩可興集六卷寶應儒林事略一卷寶應文苑事略一卷成氏先德傳一卷子肇慶舉人直隸靈壽知縣庚子殉難諡恭恪列忠義傳門弟子甚衆同邑姚江曲阜孔廣牧金壇馮煦皆有著述傳其學

余煥文

余煥文字偉齋四川巴州人咸豐十年進士授禮部主事煥文方數歲見父母色微愠則持書左右朗誦怒解乃已長好古文辭而討論農田水利邊防軍政諸書尤勤凡山川阨塞民食緩急學校之廢興盡察其輕重本末雖親歷者無以難也咸豐二年舉於鄉以父病不與會試逾年居父喪禮與哀稱旣官禮部思迎養之難也遂投告歸杜門教子壹以奉母爲事會藍李爲寇全蜀騷然煥文立起治團練與兄浩散家財製器械選丁壯部勒之數百里內外皆應警召立至所居曰岳家場有寇輒敗去復越境助官軍討捕當是時岳家場之團名聞川北寇往來苦綏順潼保間終不敢近岳家場駱秉章督蜀聞其名禮延至署歎爲異才欲奏辟

之不可秉章就請督辦川北團練語人曰川北付之余君吾無憂矣布政使劉蓉故以理學經濟名湘中曾國藩左宗棠所尊事也於當世士少許可獨奇重煥文及蓉撫陝遂疏薦煥文品正學純通達時務辦理團練井井有條才望尤著請調陝自助詔賞員外郎隨營治秦軍煥文以母老辭蓉請至數四母感其意命之行乃與蓉約曰不敘功不署職事平當卽歸蓉皆許之於是克漢中定劍北治善後賑撫事疏奏章程悉仰煥文手關右略靖蓉知煥文可大用謀試以西安府事煥文申前約固辭蓉固留復遣客說喻終不聽蓉益歎服煥文自是遂歸不復出金山者巴州勝處也煥文築室山中聚書數萬卷吟誦自適西安將軍多隆阿及駱秉章劉蓉時時致書詢治軍方略裁復輒數千言然聘詞則不報所居南有天井壩山溜發則田皆爲壑煥文采古區田溝田法爲從衡溝間以塘堰取其填淤殺其衝突夾溝爲路度溝路間植桑梨棗橘以盡地利水旱不害歲入大豐遠近高其行爭造廬延主講席先後主講本州宕渠雲屏及綏定漢章龍山書院以身行爲之師謂窮經者窮其義理以裨身心也讀史觀古人是非得失所以證己之是非時事之得失在身有益於身在國有益於國非漫然作書肆說鈴也其爲學始

務博覽三史外如三通五禮國朝掌故諸編下逮顧炎武王夫之黃宗羲各集無不提要鉤元附以己意著之簡端晚益嗜宋五子之學以慎獨主敬爲體窮理致知爲用嘗圖五子像於齋中顏之曰默養吾誠而取程子活潑潑地謝良佐常惺惺法書楹以自勵讀王守仁集謂知行合一卽文言知至至之知終終之之義也讀李容集謂返觀內照之說直認本體而悔過自新切實可師無異程朱也年六十猶日誦五子書暨注疏各十篇嘗諭其子曰學爲人當自五子書入學爲文當自注疏入故其見於行也躬行實踐能以至誠感人嘗擴張岳家場義塾條舉經史大義訓生徒至夜分不倦累年如一日捐千金倡置學田募集萬餘金以租贏資賓興費子入翰林賀金千悉購書籍益以修金所入立經史館以教巴人士服教者千餘人或仕或處皆恂恂然守古禮重公義無敢軼尺寸州試時士役牴牾衆大譁煥文至各慚沮引退山民械鬪有司將禁以兵煥文疾馳二百里譬曉之立解散嘗遣僕道出新寧遇盜繼知煥文寄其子京師費也愕然曰余公盛德何可劫乎遣其黨二人衛之又前行羣盜麕至此二人曉之故懼然去僕感而酬之終不受其積誠所化多類此光緒十六年四川總督劉秉璋疏薦煥文持身清介

處世和平學術深純孝行卓著特賞四品卿銜十八年卒年六十八赴葬者千人
所在樹碑設祀志其德著有日記雜錄二卷兩漢讀史論斷二卷鞭心錄四卷大
中講義二卷夢傳文鈔八卷

清史列傳 卷六十八

儒林傳下一

顧炎武 張昭 吳任臣

顧炎武初名絳字寧人江南崑山人生而雙瞳子中白邊黑讀書一日十行年十四爲諸生耿介絕俗與同里歸莊善時有歸奇顧怪之目見明季多故棄舉業講求經世之學炎武三世俱爲顯官母王氏守節孝於姑明亡不食卒叛僕陸恩見炎武家中落欲告炎武通海炎武沈之水僕壻投里豪復訟之繫奴家危甚會曲周路澤農救之得免遂去之山東墾田長白山下復北歷關塞墾田於雁門之北五臺之東後客淮安萊州黃氏有獄詞連炎武乃赴山東聽勘富平李因篤營救之獄始白自是往還河北最後至華陰置田五十畝因定居焉生平精力絕人自少至老無一刻離書所至之地以二贏二馬載書遇邊塞亭障呼老兵卒詢曲折有與平日所聞不合卽發書對勘或平原大野則於鞍上默誦諸經注疏嘗謂經學卽理學自有舍經學以言理學者而邪說以起不知舍經學則其所謂理學者

禪學也於同時諸人雖以苦節推孫奇逢李容以經世之學推黃宗羲而論學則皆不合其與友人論學云百餘年來之爲學者往往言心言性而茫然不得其解也命與仁夫子所罕言性與天道子貢所未得聞性命之理著之易傳未嘗數以語人其答問士則曰行己有恥其爲學則曰好古敏求其告哀公明善之功先之以博學顏子幾於聖人猶曰博我以文自曾子而下篤實無如子夏言仁則曰博學而篤志切問而近思今之君子則不然聚賓客門人數十百人與之言心言性舍多學而識以求一貫之方置四海之困窮不言而講危微精一是必其道高於夫子而其弟子之賢於子貢也我弗敢知也孟子一書言心言性亦諄諄矣乃至萬章公孫丑陳代陳臻周霄彭更之所問與孟子之所答常在乎出處去就辭受取與之間是故性也命也天也夫子之所罕言而今之君子之所恆言也出處去就辭受取與之辨孔子孟子之所恆言而今之君子之所罕言也愚所謂聖人之道者如之何曰博學於文曰行己有恥自一身以至於天下國家皆學之事也自子臣弟友以至出入往來辭受取與之間皆有恥之事也士而不先言恥則爲無本之人非好古多聞則爲空虛之學以無本之人而講空虛之學吾見其日從事

於聖人而去之彌遠也炎武之學大抵主於斂華就實凡國家典制郡邑掌故天文儀象河漕兵農之屬莫不窮原究委考正得失撰天下郡國利病書百二十卷遍覽諸史圖經文編說部之類取其關於民生利病者且周流西北歷二十年其書始成別有肇域志一編則考索之餘合圖經而成者尤精韻學撰音論三卷言古韻者始自明陳第然創闢榛蕪猶未邃密炎武乃推尋經傳探討本原又詩本音十卷其書主陳第詩無協韻之說不與吳棫本音爭亦不用棫之例但卽本經之韻互考且證以他書明古音原作是讀非由遷就故曰本音又易音三卷卽周易以求古音考證精確又唐韻正二十卷古音表二卷韻補正一卷皆能追復三代以來之音分部正帙而知其變又撰金石文字記求古錄與經史相證而日知錄三十卷尤爲精詣之書蓋積三十餘年而後成其論治綜覈名實於禮教尤兢兢謂風俗衰廉恥之防潰由無禮以維之常欲以古制率天下炎武又以杜預左傳集解時有闕失作杜解補正三卷其他著作有石經考九經誤字五經異同二十一史年表歷代帝王宅京記營平二州地名記昌平山水記山東考古錄京東考古錄譎觚十事菰中隨筆救文格論亭林文集詩集並有補於學術世道國朝

稱學有根柢者以炎武爲最又廣交賢豪長者虛懷商榷不自滿假作廣師篇云
學究天人確乎不拔吾不如王錫闡讀書爲己探賾洞微吾不如楊瑀獨精三禮
卓然經師吾不如張爾岐蕭然物外自得天機吾不如傅山堅苦力學無師而成
吾不如李容險阻備嘗與時屈伸吾不如路澤農博聞強記羣書之府吾不如吳
任臣文章爾雅宅心和厚吾不如朱彝尊好學不倦篤於朋友吾不如王宏撰精
心六書信而好古吾不如張昭至於達而在位其可稱述者亦多有之然非布衣
之所得議也康熙十七年詔舉博學鴻儒科次年修明史大臣爭薦之並力辭不
赴二十一年卒年七十 張昭字力臣江南山陽人諸生受業於顧炎武精六書
之學嘗校婁機漢隸字源爲之序謹守許慎家法家貧隱於賈博雅嗜古尤究心
金石嘗乘江水退藉落葉仰讀瘞鶴銘證爲顧況書家藏古鼎彝甚富後雖聾廢
而考證彌勤炎武音學五書昭所寫定 吳任臣字志伊浙江仁和人志行端愨
博學而思深兼精天官樂律嘗與吳百朋會飲百朋問鄒殿二字何讀任臣曰殿
也同本秦權鄒許同本說文長箋百朋歎服任臣又嘗於市上得編鐘一枚曰此
大呂鐘也滌視款識果然康熙十八年應博學鴻儒科試列二等授翰林院檢討

充纂修明史官曆志一篇出任臣手未幾卒著有十國春秋一百十四卷搜羅廣博爲時所稱又有周禮大義補禮通春秋正朔考辨山海經廣注字彙補託園詩文集

黃宗羲 弟宗炎 宗會 子百家 陳赤衷

黃宗羲字太沖浙江餘姚人年十四補諸生父尊素明天啟間官御史以抗直死魏闡之難宗羲年十九袖長錐入京頌冤至則魏闡已磔卽疏請誅曹欽程李實又於對簿時錐許顯純流血毆崔應元胸拔其鬚歸祭其父又與吳江周延祚等錐牢子葉咨顏文仲應時立斃時欽程已入逆案宗羲復於對簿時錐實獄竟偕同難諸子弟設祭詔獄中哭聲如雷聞禁中及歸從劉宗周遊姚江末派援儒入釋宗羲力摧其說時稱禦侮陳貞慧等作南都防亂揭署名日被難諸家推宗羲居首福王時阮大鍼案揭中姓名欲殺之會大兵至得免尋歸浙東糾合黃竹浦子弟數百人隨諸軍於江上時呼世忠營大兵定浙宗羲間行歸家遂奉母里門畢力著述旣而請業者日至乃復舉證人書院之會於越中以申宗周之緒其後東之鄞西之海寧皆請主講守令亦或與會然非其志也康熙十七年詔徵博學

鴻儒掌翰林院學士葉方藹欲薦之宗義辭以疾且言母老十九年左都御史徐元文監修明史薦宗義辭如初及詔取所著書關史事者宣付史館二十九年上訪求遺獻刑部尙書徐乾學復薦宗義仍不出然宗義雖不在史館而史局每有疑事必諮之宗義之學雖出宗周不恣言心性教學者說經則宗漢儒立身則宗宋學嘗自謂受業蕺山時頗喜爲氣節斬斬一流所得尙淺憂患之餘始多深造又謂明人講學襲語錄之糟粕不以六經爲根柢束書而從事於游談更滋流弊故學者必先窮經然拘執經術不適用於欲免迂儒之誚必兼讀史又謂讀書不多無以證理之變化多而不求於心則爲俗學故上下古今穿穴羣言自天官地志九流百家之教無不精研所著易學象數論六卷謂聖人以象示人者七有八卦之象六爻之象象形之象爻位之象反對之象方位之象互體之象後儒之爲僞象者四納甲也動爻也卦變也先天也乃崇七象而斥四象又謂遁甲太乙六壬世謂三式皆主九宮以參人事乃以鄭康成太乙行九宮者證太乙以吳越春秋占法國語伶州鳩之對證六壬以訂數學其持論皆有依據授書隨筆一卷則太原閻若璩問尙書而告之者春秋日食曆一卷辨衛樸所言之謬律呂新義二

卷少時取餘杭竹管斷之爲十二律與四清聲試之因廣其說孟子師說二卷以宗周四書諸解獨少孟子乃疏其舊說爲之其書闡發良知之旨推究事理不爲空疏無用之談亦不盡主姚江之說史學則欲輯宋史而未就僅存叢目補遺三卷又輯明史案二百四十四卷其明史有三例一國史取詳年月二野史取當是非三家史備官爵世系明史彙出於萬斯同斯同之學出於宗羲也天文則有大統法辨四卷時憲書法解新推交食法一卷圓解一卷割圓八線解一卷授時法假如一卷西洋法假如一卷回回法假如一卷其後梅文鼎本周髀言天文世驚爲不傳之祕而不知宗羲實開之又著明儒學案六十二卷敘述明代講學諸儒流派分合得失甚詳後又輯宋儒學案元儒學案以誌七百年儒學源流又明文海四百八十二卷彙集明人文集二千餘家擷其菁華典章人物燦然具備與十朝國史亦多彈駁參正文集則有南雷文案吾悔撰杖蜀山諸集及詩集後又分爲南雷文定晚年復定爲文約文定十一卷文約四卷又深衣考一卷今水經一卷四明山志九卷歷代甲子考一卷二程學案二卷尙書湯斌嘗曰黃先生論學如大禹導山導水脈絡分明吾黨之斗杓也紹興府知府李鐸欲以爲鄉飲大賓

宗羲遺書曰宗羲蒙聖天子特旨召入史館庶人之義召之役則往役筆墨之事亦役也宗羲時以老病堅辭不行聖天子憐而許之今之鄉飲酒亦奉詔以行者也若召之役則避勞而不往召爲賓則貪養而飲食衍衍是爲不忠卒辭之三十四年卒年八十六弟宗炎宗會並負異才有三黃之日子百家 宗炎字晦木明貢生與兄宗羲弟宗會俱從宗周遊其學術大略與宗羲等而兀稟過之既經憂患潛心學易著有周易象辭三十一卷尋門餘論二卷圖書辨惑一卷力闢陳搏之學謂周易未經秦火不應獨禁其圖至爲道家藏匿二千年始出又著六書會通以正小學謂揚雄但知識奇字不知識常字乃奇字所自出也又有二晦山栖諸集以故居被火俱亡康熙二十五年卒年七十一 宗會字澤望明拔貢生讀書一再過不忘有縮齋文集十卷 百家字主一國子監生傳宗羲學又從梅文鼎問推步法著勾股矩測解原二卷康熙中明史館開宗羲以老病不能行徐乾學延百家入史館成史志數種其天文志曆志則百家彙本也又著有失餘彙希希集 陳赤衷字夔獻浙江鄞縣人歲貢生幼力學嘗入天井山與苦行僧參究儒釋異同歸而求之六經康熙初集里中同志執贄黃宗羲創爲講經

會搜故家經學書討論得失發先儒所未發十年間次第畢講其後萬斯同以史學萬斯大陳自舜以窮經張汝翼以躬行萬斯選王之坪以名理鄭梁李鄴嗣董道權允瑄以文章及萬言仇兆鼈陳紫芝范光陽陳錫嘏諸人皆有名於一時由赤衷開其溝澮也十九年赤衷入都崑山徐乾學一見投契稱爲碩學由是公卿爭欲延致赤衷作貞女篇謝之二十六年卒於京邸年七十一

錢澄之 方中通

錢澄之初名秉鐙字飲光安徽桐城人明諸生弱冠時有關黨爲御史巡按至皖盛威儀謁孔子廟觀者如堵澄之徐正衣冠植立昌言以詆之由是名聞四方崇禎朝以明經貢京師屢上書言時政得失不報游吳越間復社幾社名流雅相引重遂爲雲龍社以聯吳淞冀接武於東林雲間陳子龍夏允彝嘉善魏學渠與相友善又嘗問易於漳浦黃道周後避黨禍至震澤遇兵跳身南遯崎嶇閩越間亂定歸里遂杜足田間治諸經課耕以自給著田間易學十二卷其學初從京房邵康節入故言數頗詳蓋道周之餘緒也後乃講求義理參取注疏及程傳本義而本旨以朱子爲宗其說不廢圖而以陳搏先天圖及河洛二圖皆因易而生非易

因此而作圖中奇偶之數乃揲著之法非畫卦之本持論極爲允當又著田間詩學十二卷謂詩與尙書春秋相表裏必考之三禮以詳其制作徵諸三傳以審其本末稽之五雅以覈其名物卽今輿紀以考古之圖經而參以平生所親歷其書以小序首句爲主所採諸儒論說自注疏集傳外凡二程張子至明黃道周何楷共二十家持論精覈無所攻亦無所主而於名物訓詁山川地理言之尤詳他著有屈宋合詁二冊詩集二十八卷文集三十卷康熙三十二年卒年八十二方中通字位伯亦桐城人父以智明崇禎十三年進士翰林院檢討博極羣書著述凡數百卷其通雅五十二卷網羅載籍疏證前訓尤爲世所稱闖賊陷京師被執脫身南歸後棄家避馬阮之難隱於方外中通隨父宦京邸克承家學於天人律數音韻六書尤爲研究嘗以古九章法僅存條目鮮能尋繹其義乃據御製數理精蘊推闡之又列數原律衍幾何約珠算筆算籌算尺算諸法輯諸家說剗取其長著數度衍二十四卷附錄一卷他著又有易經深淺說心學宗續編繼善錄音韻切衍篆隸辨從詩文集中通兄中德字田伯弟中履字素伯皆有學行父亡後三人徒步追尋奔侍遠省復奉母於南海母歸後中履獨往侍父十餘載及歿奉

概歸葬焉中德著有古事比五十三卷中履晚筭稻花齋於湖上殫力著述著有古今釋疑十八卷皆考證之文論經籍禮樂天文輿地小學算術鎔鑄舊說不同弁陋又汗青閣全書數十種發明天文性命經史之祕足爲後學津梁

朱鶴齡 陳啟源 臧琳

朱鶴齡字長孺江蘇吳江人明諸生穎敏嗜學嘗箋注杜甫李商隱詩盛行於世故所作韻語頗出入二家入國朝屏居著述晨夕一編行不識途路坐不知寒暑人或謂之愚遂自號愚庵嘗自謂疾惡如仇嗜古若渴不妄受人一錢不虛誑人一語云著愚庵詩文集其書元好問集後云好問於元既足踐其土口茹其毛卽無反詈之理乃今之訕詆不少避者若欲掩其失身之事以誑國人非徒悖也其愚亦甚其言蓋指國初居心反覆之輩可謂知大義矣初爲文章之學及與顧炎武友炎武以本原相勸乃湛思覃力於諸經注疏及儒先理學以易理至宋儒已明然左傳國語所載占法皆言象也本義精矣而多未備撰易廣義略四卷以蔡氏釋書未精斟酌於漢學宋學之間撰尙書埤傳十七卷以朱子摺擊詩小序太過與同縣陳啟源參考諸家說疏通序義撰詩經通義二十卷以胡氏傳春秋多

偏見鑿說乃合唐宋以來諸儒之解撰春秋集說二十二卷又以杜氏註左傳未盡合俗儒復以林氏注素之因詳證參考撰讀左日鈔十四卷又有禹貢長箋十二卷作於胡渭禹貢錐指之前雖不及渭書而備論古今利害旁引曲證亦多創獲康熙二十二年卒年七十八 陳啟源字長發江南吳江人諸生性嚴峻不樂與外人接惟嗜讀書晚歲研精經學尤深於詩朱鶴齡著詩經通義於國朝獨探啟源之說所著毛詩稽古編三十卷其銓釋經旨一準毛傳而鄭箋佐之訓詁聲音以爾雅爲主草木蟲魚以陸疏爲則於漢學可謂專門又著有尙書辨略二卷讀書偶筆二卷存耕堂稿四卷 臧琳字玉林江蘇武進人諸生治經以漢注唐疏爲主教人先以爾雅說文曰不解字何以讀書不通訓詁何以明經鍵戶著述世無知者有尙書集解百二十卷經義雜記三十卷閻若璩稱其深明兩漢之學錢大昕校定其書云實事求是別白精審而未嘗輕詆前哲眞務實而不近名者

張爾岐 馬驥

張爾岐字稷若山東濟陽人祖以上皆力農父行素教以儒業遂篤守程朱之說遜志好學著天道論中庸論篤終論爲時所稱又著學辨五篇曰辨志曰辨術曰

辨業曰辨成曰辨微又著立命說辯斥袁氏功過格立命說之非明季行素官石首縣丞罹兵難爾岐欲身殉以母老止年三十覃心儀禮以鄭康成注文古質賈公彥釋儀曼衍學者不能尋其端緒乃取經與注章分之定其句讀疏其節錄其要取其明註而止有疑義則以義斷之亦附於末著儀禮鄭註句讀十七卷附以監本正誤石經正誤二卷崑山顧炎武遊山東交爾岐讀而善之曰炎武年過五十乃知不學禮無以立濟陽張爾岐作儀禮鄭注句讀一書根本先儒立言簡當以其人不求聞達故無當世名然書實可傳使朱子見之必不僅謝監獄之稱許矣爾岐又著周易說略八卷詩說略五卷夏小正傳註一卷弟子職註一卷老子說略一卷蒿庵集三卷蒿庵閒話二卷所居敗屋不修藝蔬果養母集其弟四人講說三代古文於母前愉愉如也妻朱婉婉執婦道勸爾岐勿出遂教授鄉里終其身康熙十六年卒年六十六弟爾崇亦有名於世著尙書通義五卷山東善治經者爾岐同時有馬驥 馬驥字宛斯山東鄒平人順治十六年進士除淮安府推官尋補靈壁縣知縣蠲荒除弊流亡復業康熙十二年卒於官年五十四士民奉祀名宦祠驢於左氏融會貫通著左傳事緯十二卷附錄八卷所論具有條理

其圖表亦考證精詳爲專門之學又撰釋史一百六十卷纂錄開闢至秦末之事博引古籍疏通辯證非羅泌路史胡宏皇王大紀所可及時人稱爲馬三代四十四年聖祖命大學士張玉書物色驢所著書明年四月令人贖白金二百兩至鄒平購板入內府時掖縣王爾齊字襄哉諸生遂於經史其治經以毛鄭之詩何氏之公羊鄭氏之三禮爲主著有泡齋集

黃生

黃生字扶孟安徽歙縣人明諸生生淹貫羣集於六書訓詁尤有專長嘗著字詁一卷根據輿博每字皆有新義如謂大𩇛七個之𩇛當從口諧聲與從冫者不同似蛇之鱣既借徒何切之鱣又借張演切之鱣而皆轉爲常演切漢書注誤以張連切之鱣爲釋又謂周禮玉人注瓚讀爲饗屨之屨說文饋以羹澆飯釋文膏屨作膏饋故玉篇屨卽饋字內則釋文醜讀爲饗之然反屨本又作饗竝之然反此蓋明醜屨當竝讀爲饗非謂屨卽饗字若以諸延切屨何以處玉人注之饗屨乎又謂干乾字通引後漢書獨行傳云明堂之奠干飯寒水在晉帖所云淡悶干嘔之前若此之類尤爲精覈又著義府二卷凡經史子集以至趙明誠金石錄洪适

隸釋鄭道元水經注所載古碑陶宏景周子良冥通記訓詁及外教之書其古音古訓皆爲考證如據說文周禮雅雅正賈公彥丁度之誤引賈誼論陳琳檄證尙書漂杵爲漂楸引爾雅證禮記鄭注烹魚去乙之誤引呂覽證朱爆非朱領引檀弓彌牟爲木證勃鞞爲披引左傳及詩序證檀弓請庚之之庚訓道路引唐書廉訪證周官六計之廉訓察引吳越春秋證鄂不卽鄂跗引左傳證出於其類之出訓產引周禮載師閭師證夫布里布爲二事引詩王風證孟子施施引左傳劉子語證司中引繫詞證信信當讀申引禮記經說命爲兌命解行路兌矣當訓說引漢書證志微噍殺當爲纖微憔悴引周頌爾雅證鄭衆解牘應雅之譌引爾雅證終軍許慎解豹文鼠之所以異引後漢書李膺傳證師古解軒中之譌引孝經疏證後漢書辜較估較辜權酤權之義引史記貨殖傳證刁悍當爲雕悍引潛夫論證關龍卽參龍引莊子證列子蕉鹿之蕉爲樵引世說注證茗芋卽酪酏皆根柢訓典鑿鑿可憑論者謂其書不在方以智通雅下生平著述好以古人書名其書又有論衡及識林二種總名一本堂集他著又有葉書一卷杜詩說十二卷

薛鳳祚

薛鳳祚字儀甫山東淄川人嘗師事定興鹿善繼容城孫奇逢著聖學心傳發明認理尋樂之旨尋從魏文魁學天文主持舊法順治中釋穆尼閣說爲天步真原謹守繩尺著曆學會通十餘種蓋新法初行欲以中西文字會而通之故曰會通也其曰對數比例者卽西法之假數也曰中法四線者以西法六十分爲度不便於算改從古法百分爲度表所列止正弦餘弦正切餘切故曰四線其書之目曰太陽太陰諸行法原曰木火土三星經行法原曰交食法原曰歷年甲子曰求歲實曰五星高行曰交食表曰經星中星曰西域回回術曰西域表曰今西法選要曰今法表以順治十二年乙未天正冬至爲元諸應皆從百起算以三百六十五日二十三刻三分五十七秒五微爲歲實黃赤道交度有加減恆星歲行五十二秒與天步真原法同梅文鼎天算書紀所謂青州之學也鳳祚又著兩河清彙詳究黃河運河北自昌平通州南至浙江河湖水諸目皆詳載之又記黃河職官夫役道里之數及歷代至國朝治河成績援據古今疏證頗明別爲海運一篇欲倣元運故道與漕河並行蓋祖邱濬舊說也

俞汝言 徐善 徐庭垣

俞汝言字右吉浙江秀水人少孤力學具經世才明亡棄諸生自號浙川老民寧都魏禧來浙訪汝言與論古今人物治亂得失窮十晝夜禧爲傾倒家貧無隔宿春而浩然自得族父某富而無子汝言次當後或覲之遂謝去出游燕趙韓魏宋衛閩粵之鄉越雲中雁門歸而閉戶著述篇帙之富當代無比嘗以春秋四傳互有異同皆各據所見非聖人本指乃廣搜百家書擇其確當者以釋經義著春秋平義十二卷自序謂傳經之失不在於淺而在於深春秋尤甚故其書簡汰精審多得經意又摘列四傳之失隨事辨正區爲六類一曰尊聖而忘其潛二曰執禮而近於迂三曰尙異而鄰於鑿四曰臆測而近於誣五曰稱美而失實情六曰摘瑕而傷鏗刻著春秋四傳糾正一卷論者謂其立義正大持論簡明足爲治春秋者之藥石當著春秋時年已六十餘映窗繼燭竟夕無勸其手稿塗乙補綴朱墨縱橫用心甚篤卒以是失明然猶口授諸書使人以筆記之生平熟精諸史及明代掌故著有晉軍將佐表禮服沿革漢官差次考宋元舉要曆紀年崇禎大臣年表卿貳表明世家考寇變略彙州三述補品級廣考諡法考雙湖雜錄等書又有京房易圖及先儒語要六卷浙川集十卷康熙十八年卒年六十六 徐善字敬

可亦秀水人父世淳明崇禎末知湖北隨州張獻忠陷襄陽悉衆壓境城破死之國朝乾隆四十一年賜諡烈愍善年十一值國變避兵失恃及長挾書策遊棄科舉不治從學於同里施博精求致知格物之學與桐鄉張履祥爲道義交履祥嘗言世人厚於自養而薄於先祖豐於燕客而嗇於祭祀惟善能虔祀事履祥舉葬親社請善爲賓然頗好禪學履祥屢貽書規諫之後入京師居徐乾學第中錢塘高士奇奉命總修春秋講義善代士奇撰春秋地名考略十四卷其書以春秋經傳地名分國編次皆先列國都次及諸邑博引諸書考究其異同砭正其疏舛頗爲精核士奇因列己名奏進善晚著四易十二卷一天易闡圖書也二義易敘八卦也三商易辯十辟也四周易明四正八交之旨也其於圖書博采諸家之論而一本乎邵子程子張子及朱子之說又著易論才辯縱橫頗浸淫於佛老又有莊子注藟谷集時同縣徐庭垣官新昌縣丞生稍後於善亦著有春秋管窺十二卷自序謂世但知推尊聖人而不知孔子當日固一魯大夫也於周天子則其大君於魯公則其本國之君於列國諸侯則俱周天子所封建與魯君並尊者也身爲人臣作私書以賞罰王侯君公此犯上作亂之爲而謂聖人爲之乎又謂春秋與

禮經相表裏禮存其體春秋著其用魯史記注本周公遺制史書舊章卓然俱有法式因以左傳之事實質經以經之異同辯例於公穀二傳及諸儒論釋其合於義例先後無悖者不復置議如其曲說偏斷理有空礙則據經文先後以駁正之其大旨醇正多得經意蓋在啖趙諸儒之上又著春秋類辨十卷以管窺依經順次散而不比故復著是編辨異察同使相爲表裏云

姚際恆 孫之騷

姚際恆字立方浙江仁和人諸生少折節讀書汎濫百氏既棄詞章之學專事於經年五十日向平婚嫁畢而遊五嶽予婚嫁畢而注九經遂屏絕人事閱十四年成九經通論時太原閻若璩力辨晚出古文之僞際恆持論不謀而合蕭山毛奇齡作冤詞攻若璩之說奇齡故善際恆因數與爭論際恆守所見迄不爲下奇齡嘗作山陰何氏記毛際可見之曰何氏藏書有幾不及立方腹笥耳其爲時所推如此又著庸言錄雜論經史理學諸子末附古今僞書考一卷持論雖嚴足以破惑學者稱之然祖歐陽修趙汝楨之說以周易十翼爲僞書本同時顏元之論謂周程張朱皆出於禪未免好爲異論云 孫之騷字子駿亦仁和人貢生雍正間

官慶元縣教諭性耿介博學好古尤專於經時尙書大傳宋本未出元和惠棟修明堂大道錄僅從他書轉引之驟蒐采補綴成尙書大傳三卷補遺一卷其勤甚至又以沈約所注竹書紀年未爲詳備因撫諸書爲之注成考定竹書紀年十三卷其中如商均暴天下之類辨別誣妄路史帝杼遷老王之類考訂謬誤皆屬精確官教諭時年逾六旬與諸生立條約告以五經源流誘掖備至著松源經說四卷慶元古松源地故名他著有二申野錄八卷晴川蟹錄四卷後蟹錄四卷枝語二卷南漳子二卷夏小正集解松源集

梅文鼎 弟文鼎 文鼎 王錫闡

梅文鼎字定九安徽宣城人幼時仰觀星氣輒了然於次舍運旋大意年二十七與弟文鼎文鼎師事道士倪觀湖習臺官交食法著曆學駢枝二卷自是遂有志曆學值書之難讀者必求得其說至廢寢食遇疇人子弟及西域官生皆折節造訪人有問者亦詳告無隱期與斯世共明之中年喪偶不再娶閉戶覃思所著曆算書多至八十餘種讀元史授時曆經歎其法之善作元史曆經補注二卷又以授時集古法大成然創法五端外大率多因古術因參校古術七十餘家著古今

曆法通考七十餘卷授時以六曆考古今冬至取魯獻公冬至證統天術之疏然依其本法步算與授時所得正同作春秋以來冬至考一卷元史西征庚午元術西征者謂太祖庚辰也庚午元者上元起算之端也曆志譌太祖爲太宗不知太宗無庚辰也又譌上元爲甲子則於積年不合也考而正之作庚午元曆考一卷授時非諸古術所能比郭守敬所著曆草乃曆經立法之根拈其義之精微者爲郭太史曆草補注二卷立成傳寫譌舛不得其說不敢妄用作大統立成注二卷授時法於日躔盈縮月離遲疾並以垛積招差立算而九章諸書無此術從未有言其故者作平立定三差詳說一卷此發明古法者也唐九執法爲西法之權輿其後有婆羅門十一曜經及都聿里斯經皆九執之屬在元則有扎馬魯丁西域萬年法在明則有馬沙亦黑馬哈麻之回回法西域天文書天順時貝琳所刻天文實用卽本此書也作回回曆補注三卷西域天文書補注二卷三十雜星考一卷表景生於日軌之高下日軌又因於里差而變移作四省表景立成一卷周髀所言里差之法卽西人之說所自出作周髀算經補注一卷渾蓋之器最便行測作渾蓋通憲圖說訂補一卷西國日月以太陽行黃道三十度爲一月作西國日

月考一卷西術有細草猶授時之有通軌也以曆指大意彙括注之作七政細草補注三卷新法有交食蒙求七政蒙引二書並逸作食交蒙求訂補二卷監正楊光先不得已日食圖以金環與食甚時分爲二圖而各具時刻其誤非小作交食圖法訂誤一卷新法以黃道求赤道交食細草用儀象志表不如弧三角之親切作求赤道宿度法一卷謂中西兩家之法求交食起復方位皆以東西南北爲言然東西南北惟日月行至午規而又近天頂則四方各正其位矣自非然者則黃道有斜正之殊而自虧至復經歷時刻輾轉遷移弧度之勢頃刻易向且北極有高下而隨處所見不同勢難施諸測驗今別立新法不用東西南北之號惟人所見日月圓體分爲八向以正對天頂處命之曰上對地平處命之曰下上下下聯爲直線作十字橫線命之曰左曰右此四正向也曰上左上右曰下左下右則四隅向也乃以定其受蝕之所在則舉日可見作交蝕管見一卷太陽之有日差加減猶月離交蝕之有加減時因表說有誤作日差原理一卷火星至爲難算至地谷而始密解其立法之根作火緯本法圖說一卷訂火緯表記因及七政作七政前均簡法一卷金水歲輪繞日其度右移上三星軌迹其度左轉若歲輪則仍右移

作上三星軌迹成繞日圓象一卷天問略取黃緯不真而列表從之誤作黃赤距緯圖辨一卷西人謂日月高度等其表景有長短以證日遠月近其說非是作太陰表影辨一卷新法帝星句陳經緯刊本互異作帝星句陳經緯考異一卷測帝星句陳二星爲定夜時之簡法作星晷真度一卷以上皆以發明新法算書或正其誤或補其闕也康熙間明史開局曆志爲檢討吳任臣所修嘉興徐善宛平劉獻廷常州楊文言各有增定最後以屬黃宗羲又以屬文鼎文鼎摘其譌舛五十餘處以曆草通軌正之成明史志擬稿三卷雖爲大統而作實以闡明授時之奧補元史之闕略其總目凡三曰法原曰立成曰推步又作曆志贅言一卷大意言明用大統實卽授時宜詳元史所闕以補未備又回回曆承用三百年法宜備書明鄭世子之曆學袁黃之曆法新書唐順之周述學之會通回曆以庚午元曆例例之皆得附錄其西洋曆方今見行然徐李測驗改憲之功不可沒也亦宜備載緣起康熙二十八年文鼎至京師李光地謂之曰天曆至國朝大備矣經生家猶若望洋者無快論以發其意也宜做元趙友欽革象新書體例作爲簡要之書俾人人得其門戶從事者多此學庶將大顯因作曆學疑問三卷四十二年光地扈

駕南巡駐蹕德州有旨取文鼎書光地遂以曆學疑問呈進獎諭有加四十四年二月上南巡光地以巡撫扈從上問文鼎今焉在光地以尙在臣署對四月光地與文鼎伏迎河干越晨召對御舟中從容垂問移時如是者三日上謂光地曰曆算朕最留心今鮮知者如文鼎真僅見也賜御書扇幅及珍饌臨辭特賜績學參微四大字五十一年命文鼎孫穀成在內廷學習五十二年賜穀成舉人五十二年頒賜文鼎律呂正義一部諭穀成曰汝祖留心律曆可將律呂正義寄去令看或有錯處指出甚好古帝王有都兪吁咈後來遂止有都兪朋友間亦不喜人規勸可併將此意寫與汝祖知之五十四年賜穀成進士文鼎圖注各直省及蒙古各地南北東西之差爲書一卷名分天度里又作陸海鍼經一卷亦謂之里差捷法文鼎於測算之圖與器一見卽得要領有測器考二卷自鳴鐘說一卷壺漏考一卷日晷備考三卷赤道提晷說一卷勿庵揆日器一卷諸方節氣加時日軌高度表一卷揆日淺說一卷測景捷法一卷璇璣尺解一卷測量定時簡法一卷勿庵測望儀式一卷勿庵仰觀儀式一卷勿庵渾蓋新式一卷勿庵月道儀式一卷嘗自言吾爲此學皆歷最難苦之後而後得簡易有從吾遊者坐進此道則吾一

生勤苦皆爲若用因著答李祠部問曆一卷答劉文學問天象一卷又承友人命作七十二候太陽緯度一卷又爲潘天成作寫算步曆法一卷又作思問編一卷則手疏生平難讀之書以待問者也同時西洋穆尼閣及薛鳳祚王錫闡揭瑄所著書文鼎皆爲訂正有天步真原訂注天學會通訂注王寅旭書補注寫天新語鈔存一卷又古曆列星距度考一卷則從殘本補完之而斷以爲授時之法者也明萬曆中利瑪竇倡幾何之學學者張皇過甚薄古法爲不足觀而或者株守舊聞斥爲異學文鼎集其書而爲之說用籌用筆用尺稍稍變從我法若三角比例等原非古法可該特爲表出古法方程亦非西法所有則專著論以明之又具爲九數存古以著其槩著勿庵籌算七卷勿庵筆算五卷勿庵度算二卷比例數解四卷三角法舉要五卷方程論六卷幾何摘要三卷勾股測量二卷九數存古十卷凡九種總曰中西算學通外有少廣拾遺一卷方田通法一卷幾何補編四卷西鏡錄訂注一卷權度通幾一卷奇器補註二卷正弦簡勝補一卷弧三角舉要五卷環中黍尺五卷塹堵測量二卷用勾股解幾何原本之根一卷幾何增解數則附前條共一卷仰觀覆矩二卷方圓冪積二卷麗澤珠璣一卷古算器考一卷

數學星槎一卷凡一十七種並爲續編文鼎爲學甚勤每漏四五下猶篝燈夜誦居京師時公卿皆延跂願交光地命子鍾倫弟鼎徵及羣從執弟子禮宿遷徐用錫晉江陳萬策景州魏廷珍河間王之銳交河王蘭生皆以得與參校爲榮其於學無所不窺辨先後天八卦位次不合者證其合讀等子韻而定爲以代而變以地而變以代與地交而變詩文皆質直自言其意有積學堂詩鈔四卷文鈔六卷六十年卒年八十九上聞特命地方官經紀其喪子以燕字正謀康熙三十二年舉人於算學頗有悟入惜早卒孫穀成字玉如幼有童烏之譽在內廷聖祖授以借根方法穀成知與古立天元一術同有明三百年所不能知者一旦復顯於世著有增刪算法統宗十一卷赤水遺珍一卷操縵卮言一卷官至左都御史別有傳穀成子鈐鈔俱能以算學世其家早卒 文鼎字和仲初學曆時未有五星通軌無從入算文鼎與兄文鼎弟文鼎夜則披圖仰觀晝則運籌推步復與文鼎取元史算經以三差法布爲五星盈縮立成然後算之著步五星式六卷早卒 文鼎字爾素文鼎得中西書圖文鼎手鈔略備文鼎依歲差考訂平議大星屬友人張慎鈺之渾蓋復屬文鼎作恆星黃赤二星圖取其星名之同而數有多寡異於

古人者別識之爲經星同異考一卷又著有授時步交食式一卷又有幾何類求新法算書中比例規解本無算例文鼎作度算則用文鼎所補而參之以陳蓋謨尺算用法 王錫闡字寅旭江蘇吳江人博覽羣書與張履祥友善講學以濂洛爲宗爲人孤介寡合兼通中西曆學生於明末當徐光啟等修新法時聚訟盈庭錫闡獨閉戶著書潛心測算天色澄霽輒登屋臥鷗吻間仰觀景象竟夕不寐務求精符天象著曉庵新法六卷考古法之誤而存其是擇西說之長而去其短據依圭表改立法數識者莫不稱善康熙二十一年卒年五十五梅文鼎曰從來言交食祇有食甚分數未及其邊惟錫闡以日月圓體分三百六十度而論其食時所虧之邊凡幾何度今推其法頗精確御製考成所采文鼎以上下左右算交食方向法實本於錫闡錫闡無子其遺書知之者少錫闡精覈文鼎博大各造其極未可軒輊皆在薛鳳祚之上

毛奇齡

毛奇齡字大可浙江蕭山人康熙十八年以廩監生薦舉博學鴻儒科試列二等授翰林院檢討充明史館纂修官二十四年充會試同考官尋假歸得痺疾遂不

復出奇齡少穎悟明季避兵縣之南山築土室讀書其中著毛詩續傳三十八卷既以避讐流寓江淮間失其稿乃就所記憶著國風省篇一卷詩筭一卷毛詩寫官記四卷復在江西參議道施閏章處與湖廣楊洪才說詩作白鷺洲主客說詩一卷明嘉靖中鄞人豐坊僞造子貢詩傳申培詩說行世奇齡作詩傳詩說駁議五卷引證諸書多所糾正泊在史館進所著古今通韻十二卷聖祖仁皇帝善之詔付史館歸田後僦居杭州著仲氏易一日著一卦凡六十四日而書成託於其兄錫齡之緒言故曰仲氏凡三十卷又著推易始末四卷春秋占筮書三卷易小帖五卷易韻四卷河圖洛書原舛編一卷太極圖說遺議一卷其言易發明荀虞千侯諸家旁及卦變卦綜之法自後儒者多研究漢學不敢以空言說經實自奇齡始而辨正圖書排擊異學尤有功於經義奇齡分校會闡時閱春秋房卷心非故傳之偏有意傳述至是乃就經文起義著春秋毛詩傳三十六卷春秋簡書刊誤二卷春秋屬辭比事記四卷條例明哲考據精覈又欲全著禮經以衰病不能乃次第著昏喪祭禮宗法廟制及郊社禘祫明堂學校諸問答多發先儒所未及至於論語大學中庸孟子各有考證而大學證文及孝經問援據古今辨後儒改

經之非持論亦有可采奇齡淹貫羣書詩文皆推倒一世而自負者在經學然好爲駁辨他人所已言者必力反其詞古文尙書自宋吳棫後多疑其僞及閻若璩作疏證奇齡力辯爲真遂作古文尙書冤詞八卷又刪舊所作尙書廣聽錄爲五卷以求勝於若璩而周禮儀禮奇齡又以爲戰國之書所作經問其中排斥如錢丙蔡氏之類多隱其名而指明攻駁者惟顧炎武閻若璩胡渭三人以三人博學重望足以攻擊而餘子以下不足齒錄也素曉音律家有明代宗藩所傳唐樂笛色譜直史館據以作竟山樂錄四卷及在籍聞聖祖仁皇帝論樂諭羣臣以徑一圍三隔八相生之法因推闡考證撰聖諭樂本解說二卷皇言定聲錄八卷三十八年聖祖南巡奇齡迎駕於嘉興以樂本解說進溫諭獎勞聖祖三巡至浙奇齡復謁行在賜御書一幅五十二年卒於家年九十一門人蔣樞編輯遺集分經集文集二部經集自仲氏易以下凡五十種文集合詩賦序記及他雜著凡二百三十四卷著述之富甲於近代李天馥嘗謂奇齡有不可及者三不挾書冊而下筆有千萬卷一也少小避人盛年在道路得怔忡疾遇疾發求文者在門捫腹四應頃刻付去無誤二也讀書務精覈羣經諸子及諸瑣屑事皆極其根柢而貫其枝

葉偶一論及輒能使漢宋儒者拄口不敢辨三也然奇齡恃其縱橫博辨肆爲排擊欲以劫服一世漢以後人俱不得免而其所最詆者爲宋人宋人之中所最詆者爲朱子故後人反詆之者亦多全祖望嘗發其集爲蕭山毛氏糾謬十卷祖望稱奇齡之才要非流輩所易及使其平心易氣以立言其足以羽翼儒苑無疑世謂公論云奇齡弟子平湖陸邦烈山陰盛唐遂昌王錫會稽章大來餘姚邵廷采等著錄者甚衆蠡縣李塨最知名廷采塨自有傳邦烈字又超嘗取奇齡經說所載諸論裒爲聖門釋非錄五卷謂聖門口語未可盡非也

胡渭 子彥昇 葉佩蓀

胡渭初名渭生字肫明浙江德清人年十五爲縣學生入太學篤志經義精輿地之學尙書徐乾學奉詔修一統志開局洞庭山延常熟黃儀顧祖禹太原閻若璩及渭分纂渭著禹貢錐指二十卷圖二十七篇謂漢唐二孔氏宋蔡氏於地理多疏舛如三江當主鄭康成說禹貢達於河河當從說文作荷榮波旣豬波當從鄭康成作播梁州黑水與導川之黑水不可溷爲一及博稽載籍考其同異而折衷之山川形勢郡國分合同異道里遠近平險討論詳明宋以來傳寅程大昌毛晃

而下注禹貢者數十家精覈典贍此爲之冠又撰易圖明辯十卷專爲辨定圖書而作初陳摶推闡易理衍爲諸圖其圖準易而生故以卦爻反覆研求無不符合傳者務神其說遂歸其圖於伏羲謂易反由圖而作又因繫辭河圖洛書之文取大衍算數作五十五點之圖以當河圖取乾鑿度太乙行九宮法造四十五點之圖以當洛書陰陽奇偶一一與易相應傳者益神其說真以爲龍馬神龜之所負謂伏羲由此而有先天之圖實則唐以前書絕無一字符驗而突出於北宋之初由邵子以及朱子但取其數之巧合未暇究太古以來誰從授受故易學啟蒙易本義前九圖皆沿其說然考宋史儒林傳啟蒙本屬蔡元定創稿非朱子自撰其答劉君房書曰啟蒙本欲學者且就大傳所言卦畫著數推尋不須過爲浮說而自今觀之如河圖洛書亦不免尙有贅語至於本義卷首九圖爲門人所依附朱子當日未嘗堅主其說元陳應潤作爻變義蘊始指諸圖爲道家假借吳澄歸有光諸人亦相繼排擊國朝毛奇齡黃宗羲爭之尤力然皆未能窮溯本末一一抉所自來渭則於河圖洛書五行九宮參同先天太極龍圖易數鉤隱圖啟蒙圖書先天後天卦變象數流弊引據舊文互相參證以箝依託之口使學者知圖書之

說乃修鍊術數二家旁分易學之支流非作易之根柢視禹貢錐指尤爲有功經學又撰洪範正論五卷謂漢人專取災祥推衍五行穿鑿附會亂彜倫攸紘之經撰大學翼真七卷大旨以朱子爲主僅謂格致一章不必補傳力闢王學改本之誤所論一軌於正漢儒傳會之談宋儒變亂之論埽而除焉康熙四十三年聖祖仁皇帝南巡渭以禹貢錐指獻行在御覽嘉歎宣至直廬賜饌並御書詩扇及耆年篤學四字賜之五十三年卒年八十二子彥昇 彥昇字竹軒雍正八年進士授刑部主事改山東定陶縣知縣以開釋冤獄被劾按察使黃叔琳勸使自檢舉彥昇曰官不足惜獄實冤願終雪之叔琳密訪果如彥昇言彥昇曰獄已雪又何求不俟開復而歸杜門著書於樂律尤有心得謂琴律與笛律不殊琴有緩急不如笛便馬融以京房所加孔爲商聲荀勗以第一孔爲黃鐘宮後出孔爲太簇商蓋自漢至晉舊法如此宋人以體中翕聲爲黃鐘是以姑洗爲黃鐘也以俗樂之合字屬黃鐘是以下徵爲正宮也所著樂律表微八卷凡度律二卷審音二卷製調二卷考器二卷多糾正古人之謬又著春秋說四書近是叢書錄要 葉佩蓀字丹穎浙江歸安人乾隆十九年進士改兵部主事二十九年充順天鄉試同考

官洵陞郎中授衛輝府知府署開封調南陽擢河東道所至以廉潔惠民爲治去之日士民走送者萬人四十四年授山東按察使四十六年授湖南布政使尋罷吏議歸佩蓀治易盡取漢唐宋以來諸家傳註及河洛先天月卦卦氣卦變反對諸說必索其所以然然後舉而空之曰三聖人所言者不可增損一字三聖人所未言者吾不敢加一字著易守四十卷又有傳經堂詩文集十二卷四十九年卒年五十四

閻若璩 李鎧 吳玉搢 宋鑒

閻若璩字百詩山西太原人世業鹽筴僑寓淮安幼多病讀書閻記不出聲年十五以商籍補山陽縣學生員研究經史深造自得嘗集陶宏景皇甫謐語題其柱云一物不知以爲深恥遭人而問少有暇日其立志如此海內名流過淮必主其家年二十讀尙書至古文二十五篇卽疑其僞沈潛三十餘年乃盡得其癥結所在作古文尙書疏證八卷引經據古一一陳其矛盾之故古文之僞大明所列一百二十八條毛奇齡尙書古文冤詞百計相軋終不能以強辭奪正理則有據之言先立於不可敗也其疏證之最精者謂漢藝文志言魯共王壞孔子宅得古文

尚書孔安國以考二十九篇得多十六篇楚元王傳亦云逸書十六篇天漢之後孔安國獻之古文篇數之見於西漢者如此而梅頤所上乃增多二十五篇此篇數之不合也杜林馬鄭皆傳古文者據鄭氏說則增多者舜典汨作九共大禹謨益稷五子之歌嗣征典寶湯誥咸有一德伊訓肆命原命武成旅獒罔命凡十六篇而九共有九篇故亦稱二十四篇今晚出書無汨作九共典寶等此篇名之不合也鄭康成註書序於仲虺之誥太甲說命微子之命蔡仲之命周官君陳畢命君牙皆注曰亡而於汨作九共典寶肆命等皆注曰逸逸者卽孔壁書也康成雖云受書於張恭祖然其書贊曰我先師棘下生子安國亦好此學則其淵源安國明矣今晚出書與鄭名目互異其果安國之書耶又云古文傳自孔氏後惟鄭康成注得其真今文傳自伏生後惟蔡邕石經所勒者得其正今晚出書味谷鄭作柳谷心腹腎腸鄭作憂腎陽剗剗鄭作臏宮剗剗頭庶剗與真古文既不同矣石經殘碑遺字見於洪适隸釋者五百四十七字以今孔書校之不同者甚多碑云高宗饗國百年與今書之五十有九年異孔紘三宗以年多少爲先後碑則以傳序爲次則與今文又不同然後知晚出之書蓋不古不今非伏非孔而欲別

爲一家之學者也班孟堅言司馬遷從安國問故堯典禹貢洪範微子金縢諸篇多古文說許慎說文亦云其稱書孔氏今以史記說文與晚出書校又甚不合安國注論語予小子履以爲墨子引湯誓其辭若此不云此出湯誥亦不云與湯誥小異然則予小子履云云非真古文湯誥蓋斷斷也其注雖有周親二句論語尙書詮釋縣絕此豈一人之手筆乎又云書序益稷本名棄稷馬鄭王三家本皆然蓋別是一篇中多載后稷與契之言揚雄法言孝至篇云言合稷契之謂忠謨合皋陶之謂嘉雄親見古文故有此言晚出書析皋陶謨之半爲益稷則稷與契初無一言雄豈鑿空者耶若璩又以朱子以來已疑孔傳之依託遞有論辨復爲朱子尙書古文疑以伸其說康熙元年遊京師旋改歸太原故籍補廩膳生十八年應博學鴻儒科試報罷崑山顧炎武以所撰日知錄相質卽爲改定數條炎武虛心從之編修汪琬著五服考異若璩糾其繆數條尙書徐乾學歎服及乾學奉敕修一統志開局洞庭山旣又移嘉善復歸崑山若璩皆與其事局中人輯其緒論一編曰閻氏碎金若璩於地理尤精審山川形勢州郡沿革瞭如指掌撰四書釋地一卷續編兼及人名物類訓詁典制又解釋經義諸條共爲五卷事必求其

根柢言必求其依據旁參互證多所貫通又據孟子七篇參以史記諸書作孟子生卒年月考一卷又著孔廟從祀末議十一事一曰孔廟祀典宜復八佾十二籩豆於太學二曰十哲之外宜進有若公西華於廟庭廣爲十二哲三曰秦冉顏何宜從祀縣亶宜補入四曰公明儀宜從祀樂正克宜進入兩廡五曰曾申申詳均宜從祀六曰河間獻王劉德宜入從祀七曰諸葛孔明宜入從祀八曰范仲淹宜入從祀九曰蔡元定宜進於兩廡十曰黃幹請援蔡沈之例以進十一曰兩廡先賢先儒位次多凌躐宜請釐正其後康熙五十四年增祀范仲淹於西廡雍正二年復祀秦冉於東廡顏何於西廡增祀諸葛亮於東廡縣亶樂正克黃幹於西廡乾隆三年以有子升配東序若璩私議已上見於列聖施行矣又著潛邱筮記六卷毛朱詩說一卷手校困學紀聞二十卷因浚儀之舊而駁正箋說推廣之評定古文百篇其師山陽吳一清所手授續加闡發又有日知錄補正喪服翼注宋劉攽李燾馬端臨王應麟四家逸事博湖掌錄諸書詩有眷西堂諸集世宗在潛邱聞其名延至賜坐索觀所著書每進一篇必稱善疾革請移就外以大牀爲輿上施青紗帳二十人舁之出安穩如牀簀康熙四十三年卒年六十九世宗遣使經

紀其喪親製輓詩四章復爲文祭之子詠康熙四十八年進士官中書舍人亦能文 李鎧字公凱江南山陽人順治十八年進士補奉天蓋平縣知縣調鐵嶺丁憂歸康熙十八年薦舉博學鴻儒科試列二等授翰林院編修與修明史洊官內閣學士鎧少孤力學於書無不窺至老愈勤一生清節嘗與門人云孟子爲卿於齊終不受祿君祿且然況交際乎其自守如此所著有讀史雜述史斷王士禎稱爲有用之學又有恪素堂集 吳玉搢字籍五江南山陽人廩貢生精小學著別雅五卷考古書文字之異取字體之假借通用者系韻編次各注所出爲之辨證非俗儒剽竊所能及又著金石存說文引經考六書述部敍考山陽志遺乾隆間游京師秦蕙田延校五禮通考後官鳳陽府訓導卒 宋鑒字元衡山西安邑人乾隆十三年進士官浙江常山知縣調鄞縣莅鄞七年以廉能陞廣東南雄府通判署連州知州又署澳門同知潮陽知縣所至有政聲以親老告歸囊無長物惟書數千卷而已鑒經術湛深尤精小學嘗以閤若璩古文尙書疏證文詞曼衍而不爾雅重輯尙書考辨四卷又以經學不明由於小學不講乃采經史方言釋名玉篇廣韻水經注諸書爲說文解字疏益以附借備三門詳贖博辨甚有條理他

著有易見尙書彙鈔漢書地理考詩文集子葆淳乾隆四十八年舉人隰州學正國子監助教能傳其學

萬斯大 兄斯選 弟斯同 從子言 子經

萬斯大字充宗浙江鄞縣人父泰字履安明崇禎九年舉人與陸符齊名善詩兼熟史事寧波文學風氣泰實開之入國朝以經史分授諸子使從黃宗羲遊各名一家卒年六十斯大治經以爲非通諸經不能通一經非悟傳注之失則不能通經非以經釋經則亦無由悟傳注之失其爲學尤精春秋三禮於春秋則有專傳論世屬詞比事原情定罪諸義於三禮則有論郊論社論禘論祖宗論明堂泰壇論喪服諸義其辯正商周改月改時周詩周正及兄弟同昭穆皆極確實宗法十餘篇亦頗見推衍答應摛謙書辨治朝無堂尤爲精覈根柢三禮以釋三傳較宋元以後空談書法者殊然其說經以新見長亦以鑿見短置其非存其是未始非一家之學性剛毅慕義若渴明臣張煌言死後棄骨荒郊斯大葬之南屏父執陸符死無後斯大爲葬其兩世六棺所著有學春秋隨筆十卷學禮質疑二卷儀禮商三卷禮記偶箋三卷周官辨非二卷康熙二十二年卒年五十一兄斯選弟斯

同從子言子經 斯選字公擇學於黃宗羲嘗謂學者須驗之躬行方爲實學於是切實體認知意爲心之存主非心之所發理卽在氣中非理先氣後涵養純粹年六十卒宗羲哭之慟曰甬上從游能續蕺山之傳者惟斯選一人 斯同字季野生而異敏年四十五取家藏書徧讀之皆得其大意從黃宗羲得聞蕺山劉氏之學以慎獨爲主以聖賢爲必可及寧波有五經會斯同年最少遇疑義輒以片言析之尙書徐乾學撰讀禮通考斯同與參定焉博通諸史尤熟於明代掌故嘗作明開國以後至唐桂功臣將相內外諸大臣年表以備采擇康熙十七年薦博學鴻儒科辭不就會詔修明史大學士徐元文爲總裁欲薦斯同入館局斯同復辭乃延主其家以刊修委之元文罷繼之者大學士張玉書陳廷敬尙書王鴻緒皆延之乾隆初大學士張廷玉等奉詔刊定明史依據鴻緒彙本而增損之鴻緒彙實出斯同手嘗病唐以後設局分修之失謂一代治亂賢奸之迹當具其表裏吾少館於某氏家其家有列朝實錄吾讀而詳識之長游四方就故家長老求遺書考問往事旁及郡志邑乘雜家傳誌之文靡不網羅參伍而要以實錄爲歸蓋實錄者直載其事與言而無所增飾者也凡實錄之難詳者吾以他書證之他書

之誣且濫者吾以實錄裁之雖不敢自謂可信而是非之枉於人者鮮矣昔人於宋史已病其繁蕪而吾所述倍焉非不知簡之爲貴也吾恐後之人務博而不知所裁故先爲之極使知吾所取者有可損而所不取者必非其事與言之真而不可益也建文一朝無實錄野史因有遜國出亡之說斯同斷之曰紫禁城無水關無可出之理鬼門亦無其地成祖實錄稱建文閣宮自焚上望見宮中煙起急遣中使往救至已不及中使出其屍於火中還白上所謂中使者乃成祖之內監也安肯以后屍誑其主而清宮之日中涓嬪御爲建文所屬意者逐一刑訊苟無自焚實據豈肯不行大索令耶且建文登極二三年削奪親藩曾無寬假以至燕王稱兵犯闕逼迫自殞即使出亡亦是勢窮力盡謂之遜國可乎由是建文之書法遂定斯同性不樂榮利見人惟以讀書勵名節相切劘康熙四十一年卒年六十所著有歷代史表六十卷儒林宗派八卷喪禮辨疑四卷廟制折衷二卷廟制圖考四卷石經考二卷周正彙考八卷紀元彙考四卷歷代宰輔彙考八卷宋季忠義錄十六卷南宋六陵遺事一卷庚申君遺事一卷羣書疑辨十二卷書學彙編二十二卷崑崙河源考二卷河渠考十二卷石園詩文集二十卷其歷代史表稽

考列朝掌故端緒釐然有助史學又創宦者侯表大事年表二例爲列史所無儒
林宗派自孔子以下漢後唐前傳經之儒及兩宋周程朱陸各派一一具列其持
論獨爲平允焉 言字貞一斯選兄斯年子副貢生少隨諸父講社中號精博著
有尙書說明史舉要嘗與修明史獨成崇禎長編故國輔相子弟多以賄求減先
人罪言悉拒之尤工古文同縣李鄴嗣嘗曰事古而信篤志不分吾不如斯大粹
然有得造次儒者吾不如斯選學通古今無所不辨吾不如斯同文章名世居然
大家吾不如言有管村文集晚出爲安徽五河知縣忤大吏論死子承勳狂走數
千里哀金五千贖之歸時稱孝子承勳字開遠諸生以薦用爲磁州牧工詩有冰
雪集 經字授一黃宗羲移證人書院於鄞申明劉宗周之學經侍席末與聞其
教及長傳父叔及兄言之學又學於應撫謙闇若璩康熙四十二年成進士改翰
林院庶吉士散館授編修五十年充山西鄉試副考官五十三年督學貴州及還
以派修通州城工罄其家素工分隸經乃賣所作字得錢給朝夕晚增補斯大禮
記集解數萬言春秋定哀二公未畢又續纂數萬言又重修斯同列代紀年又續
纂兄言尙書說明史舉要皆先代未成之書乾隆初舉博學鴻詞科不就年八十

二家遭大火遺書悉焚經終日涕洟自以爲負罪先人踰年卒著有分隸偶存二卷

惠周惕 子士奇 孫棟 余蕭客

惠周惕原名恕字元龍江蘇吳縣人父有聲以九經教授鄉里與徐枋善周惕少從枋游又受業於汪琬康熙十七年舉博學鴻儒科丁憂不與試三十年成進士改翰林院庶吉士散館以知縣用選直隸密雲縣知縣卒於官周惕邃於經學爲文章有桀度著有易傳二卷詩說三卷三禮問六卷春秋問五卷及硯谿詩文集其詩說三卷謂大小雅以音別不以政別謂正雅變雅美刺錯陳不必分六月以上爲正六月以下爲變文王以下爲正民勞以下爲變謂二南二十六篇皆房中之樂不必泥其所指何人謂天子諸侯皆得有頌魯頌非僭其言並有依據惠氏三世以經學著周惕其創始也子士奇 士奇字天牧康熙五十年進士改翰林院庶吉士散館授編修五十二年五十四年兩充會試同考官聖祖嘗問廷臣誰工作賦內閣學士蔣廷錫以王頊齡湯右曾及士奇三人對五十七年孝惠章皇后升祔禮成特命祭告炎帝陵舜陵故事祭告使臣學士以上乃得開列士奇以

編修與異數也五十九年充湖廣鄉試正考官尋提督廣東學政雍正初復命留任三年士奇在粵以經學倡多士三年之後通經者多又謂校官古博士也校官無博士之才弟子何所效法訪諸輿論得海陽進士翁廷資卽具疏題補韶州府教授部議格不行奉旨惠士奇居官好所舉諒非徇私著照所請後不爲例在任洵陞侍讀學士去之日粵人尸祝之五年奉旨修理鎮江城以產盡停工罷官乾隆元年有旨調取來京二年補侍讀四年以病告歸六年卒年七十一撰易說六卷雜釋卦爻專宗漢學以象爲主嘗謂漢儒言易孟喜以卦氣京房以適變荀爽以升降鄭康成以爻辰虞翻以納甲其說不同而指歸則一皆不可廢今所傳之易出自費直費氏本古文王弼盡改爲俗書又創爲虛象之說遂舉漢易而空之而古學亡矣易者象也聖人觀象而繫辭君子觀象而玩辭六十四卦皆實象安得虛哉又撰春秋說十五卷以禮爲綱而緯以春秋之事言必據典論必持平禮記說十四卷大學說一卷於古音古字皆爲分別疏通復援引諸史百家之文考漢制以求周制士奇幼讀史於天文樂律二志未盡通曉及官翰林因新法究推步之原著交食舉隅二卷悟陽正陰倍之義法存於琴瑟撰琴瑟理數考四卷又

所著詩有紅豆齋小草詠史樂府及南中諸集子七人棟最知名 棟字定宇元和學生員自幼篤志向學家多藏書日夜講誦於經史諸子稗官野乘及七經志緯之學靡不肄業及之小學本爾雅六書本說文餘及急就章經典釋文漢魏碑碣自玉篇廣韻而下勿論也乾隆十五年詔舉經明行修之士陝甘總督尹繼善兩江總督黃廷桂交章論薦會大學士九卿索所著書未及呈進罷歸棟於諸經熟洽貫串謂訓詁古字古音非經師不能辨作九經古義二十二卷尤邃於易其撰易漢學乃追考漢儒易學掇拾緒論使學者得窺其門徑凡孟喜易二卷虞翻易一卷京房易二卷干寶附焉又鄭康成易一卷荀爽易一卷其末一卷則棟發明漢易之理以辨正河圖洛書先天太極之學其撰易例二卷乃鎔鑄舊說以發明易之本例隨手題識筆之於冊以儲作論之材其撰周易述二十三卷以荀爽虞翻爲主而參以鄭康成宋咸干寶之說約其旨爲注演其說爲疏書垂成而疾革遂闕革至濟十五卦及序卦雜卦兩傳雖爲未完之書然漢學之絕者千有五百年至是而粲然復章又撰明堂大道錄八卷禘說二卷謂禘行於明堂明堂之法本於易古文尙書考二卷辨鄭康成所傳之二十四篇爲孔壁真古文東晉

晚出之二十五篇爲僞又撰後漢書補注二十四卷王士禎精華錄訓纂二十四卷九曜齋筆記松崖筆記松崖文鈔及諸史會最竹南漫錄諸書嘉定錢大昕嘗論宋元以來說經之書盈屋充棟高者蔑古訓以誇心得下者襲人言以爲己有獨惠氏世守古學而棟所得尤精擬諸前儒當在何休服虔之間馬融趙岐輩不及也二十三年卒年六十二其弟子知名者余蕭客最爲純實 余蕭客字仲林江蘇長洲人初撰注雅別鈔八卷就正於棟棟曰子書專攻陸佃蔡卞羅願佃卞乃安石新學願非有宋大儒不必辨當務其大者蕭客矍然自是徧覽四部書撰古經解鈎沈三十卷凡唐以前舊說自諸家經解所引旁及史傳類書片語單詞悉著其目自宋以來訓詁之傳日就散亡沿及明人說經者遂憑臆談我朝經學昌明著述之家爭及於古蕭客是書其一也蕭客又撰文選紀聞三十卷文選音義八卷文選雜題三十卷選音樓詩拾若干卷晚歲失明生徒求教皆以口授乾隆四十三年卒年四十七

陳厚耀

陳厚耀字泗源江蘇泰州人康熙四十五年進士大學士李光地薦其通天文算

法召見試以三角形令求中線又問弧背尺寸厚耀具筭進稱旨四十八年駕幸熱河厚耀扈行上問北極出地高下及地周地徑地圓厚耀具舉以對旋以母老就教職得蘇州未踰年召入南書房厚耀學問淵博自是通幾何算法學益進授中書科中書尋命與梅穀成修書蒙養齋賜算法諸書及西洋儀器等書成特旨授翰林院編修五十三年丁母艱命賜帑銀著江南織造經紀其喪喪畢晉國子監司業轉左諭德五十七年充會試同考官五十八年以老乞致仕六十一年卒年七十五厚耀以天算之法治春秋嘗補杜預長曆爲春秋長曆十卷其凡有四一曰曆證備引漢書續漢書晉書隋書唐書宋史元史左傳注疏春秋屬辭天元曆理諸說以證推步之異其引春秋屬辭載杜預論日月差謬一條爲注疏所無又引大衍曆義春秋曆考一條亦唐志所未錄二曰古曆以古法十九年爲一章一章之首推合周曆正月朔日冬至前列算法後以春秋十二公紀年橫列爲四章縱列十二公積而成表以求曆元三曰曆編舉春秋二百四十二年推其朔閏及月之大小而以經傳干支爲證佐述杜預之說而考辯之四曰曆存以古曆推隱公元年正月庚戌朔杜氏長曆則爲辛巳朔乃古曆所推之上年十二月朔謂

元年以前失一閏蓋以經傳干支排次知之厚耀則謂如預之說元年至七年中書日者雖多不失而與二年八月之庚辰四年二月之戊申又不能合且隱公三年二月己巳朔日食桓公三年七月壬辰朔日食亦皆失之蓋隱公元年以前非失一閏乃多一閏因定隱公元年正月爲庚辰朔較長曆退兩月推至僖公五年止以下朔閏一一與杜曆相符故不復續推焉厚耀明於曆法故所推較預爲密又撰春秋戰國異辭五十四卷通表二卷撫遺一卷春秋世族譜一卷鄒平馬驢爲繹史兼采三傳國語國策厚耀則皆摭於五書之外獨爲其難氏族一書與顧棟高大事表互證春秋氏族之學幾乎備矣厚耀又著禮記分類孔子家語注十
七史正譌諸書

馮景

馮景字山公浙江錢塘人國子監生性嗜讀書善屬文康熙十七年游京師授經於侍郎項景襄家是年詔舉博學鴻儒科公卿列其名將上固辭不就會有司營宮室需枿木梁頰亟有請易國子監彝倫堂梁者景致書尙書魏象樞亟陳不可事得寢於是京師咸知有太學生馮景者大學士索額圖思致之一見不可得二

十三年館侍郎金鼎家因病將南還鼎輓留不獲索詩以誌念歸則設教於淮安洗馬邱象隨家垂十年復北游一試京兆報罷遂絕意仕進三十一年商邱宋犖撫吳聞景賢以禮聘就幕府情好甚篤有賄干景一言於犖者峻卻之以此益見重犖內擢尙書邀偕北上以母老固辭歸里貧老且病五十四年卒年六十有四景爲人嚴正處師友間惟以責善爲事仁和汪煜湯右曾爲給事中時與景夙好其所敷陳數由景致書激勉之王士禎轉左都御史景以受知故冀其大有所匡濟致書諷之有曰民欲其無貧何術而使藏其富吏欲其無貪何術而使生其廉兵欲其無驕何術而使戢其暴工商欲其無困何術而使阜其財士欲其有恥何術而使厲其志其責望甚切在淮安時淮揚有水患景素不識湯斌聞斌奉詔北上作書陳致患之由斌見書歎賞稱其文爲不朽景於學無所不窺而說經之文尤邃嘗引歐陽子語謂學者當師經師經必先求其意意得則心定心定則道純純則充充則實充實則發於文輝光施於事果毅閤若璩精於考覈景駁其四書釋地中十事若璩爲古文尙書疏證攻僞古文尙書之失景助之成淮南子洪保二卷其自序云儒者之學莫大乎正經而黜僞古文淆亂莫之或正閤子倡之馮

子和之故曰洪保閻子晉產也馮子吳產也而作合於淮南以卒其業故亦號淮南子景著述頗富多散失有幸草十二卷樊中集十卷解春集十四卷今存者解春集蓋取易林解我胸春之意云

魏荔彤 王又樸

魏荔彤字念庭直隸柏鄉人父裔介官至大學士自有傳荔彤十二歲補諸生以資入爲內閣中書選鳳陽同知振饑山左活民數萬口以優敘授漳州府知府膺卓薦擢江蘇常鎮道署江蘇按察使居官能守家法有惠愛聲於官齋署省事草堂欲與民休息嘗兼攝崇明兵備道給餉以時兵弁感其德以忤大吏去官寓蘇州負累不得歸聞母訃擗踊號呼喪逾常節遂嬰委痺疾雍正四年乃返里生平嗜古學勤著述罷官後猶杜門點勘四庫七略上自經史旁及天文地理諸書丹鉛不去手尤善易著大易通解十五卷附錄一卷其論畫卦謂與河圖洛書祇可謂其理相通不必穿鑿附會又以乾一兌二離三震四巽五坎六艮七坤八非生卦之次序其論爻則兼變爻言之謂占法二爻變者以上爻爲主五爻變者占不變爻四爻變者占二不變爻仍以下爻爲主餘占本爻與象辭至論上經首乾坤

中間變之以泰否下經首咸恆中間交之以損益尤得二篇之樞紐其餘諸經皆有論述嘗仿揚雄體作自述一篇云手注古九經望道窺一貫其自負如此又注釋南華道德素問諸書所爲詩文曰懷舫集凡三十六卷 王又樸字介山直隸天津人雍正元年進士改翰林院庶吉士未散館授吏部主事出爲河南分司以督修鹽池渠堰失上官意被劾去尋起復陝西以運同用總督尹繼善奏調江南署泰州通判池州徽州知府政有惠聲精水利能返瀦爲田江南宿儒多稱之未幾致仕歸乾隆二十五年卒年八十又樸治經精易學幼讀本義以朱子所云不可便以孔子之說爲文王之說者爲非年近六十尋味經文覺卦爻各詞非彖象傳實有不能明者著易翼述信十二卷大旨專以彖象文言諸傳解釋經義自謂篤信十翼述之爲書其注釋各卦每爻必取變氣蓋卽之卦之遺法其於河圖洛書及先天後天皆不列圖而敘其法於雜論之末特爲有識古文受知於桐城方苞許以力追秦漢有詩禮堂文集五卷詩集七卷

顧陳埽

顧陳埽字玉停江蘇鎮洋人少有文名讀書必詣微多冥契搢獲不主故常康熙

五十四年舉人以薦入湛凝齋修律數淵源中和樂府諸書所纂修皆出陳埏手每書上聖祖必嘉獎屢得溫旨書成議敘授行人司行人嘗給札蒙養齋賜第京師敕官津送其父宏沛來京就養宏沛至陳埏方在熱河上遣官護陳埏回京省視雍正元年奉詔書出使山東浙江所至得大體還督通州倉三年以目疾乞歸閉戶讀書四方以幣乞文詞恆填戶篤於內行居喪不飲酒食肉不處內沈起元官河南欲延主大梁書院援范文正公憂中掌學睢陽故事以勸陳埏執象山責呂東萊故事堅謝不赴少讀皇極經世書至無口過易無身過難無身過易無心過難四語憬然汗下晚讀象山集歎曰先生之學以躬行實踐爲主謂其近禪者妄也自命爲象山後人有以程朱之學諷者陳埏亦無所迁性侃直而介纂修時總裁以文屬點定一日盡駁其稿總裁怒擲地陳埏徐起拾之明日總裁悟卒從其說監倉洗手從事官吏經紀不得恣侵牟里居非公不至官府乾隆元年詔起官以親老不出又時舉博學鴻詞詹事府詹事王奕清巡撫顧琮將論薦而時議當俟巡撫偕總督學政考試陳埏與奕清書遂辭不赴時論高之六年開設樂部以陳埏洞曉音律有旨宣召亦以疾辭十二年卒年七十陳埏生平絕學有三曰

字學曰算學曰樂律嘗造八矢注字圖說謂字學居六藝之末聲音樂也形體書也而口出耳入手運目存則皆有數焉學士惠士奇通政孫勳得其書置酒延陳埽請其說陳埽爲言經聲緯音開發收閉之旨及每矢實義一矢未發則聲不能出字有所避八矢盡而音定字死矣二人歎爲天授初得徐光啟曆書精求一月遂創造開方句股諸法在湛凝齋外廷送算學三百餘員候試主者令陳埽與試聖祖親策之得七十二人陳埽爲冠內廷呼爲算學狀元少與同里王時翔爲性命交其詩名亦伯仲婁東詩人雖各成家大約宗仰吳偉業陳埽晚出欲自關町畦而不離正軌所著又有鍾律陳數旋宮知義各一卷無益之言一卷讀四書偶見三卷讀內則一卷內則音釋一卷合注龍虎上經參同契二卷注首楞嚴五卷癸巳治疫記三卷洗桐集九卷抱桐集三卷

吳廷華 盛世佐

吳廷華字中林浙江仁和人康熙五十三年舉人由內閣中書出爲福州府海防同知乾隆初薦修三禮在館凡十年二十年卒年七十四廷華通諸經尤深三禮居官以經術飾吏治暹羅入貢世宗以三品服寵其陪臣及歸欲以屬禮接郡守

廷華曰春秋之義王人雖微序諸侯上使者秩雖高陪臣也暹羅使爲屈琉球國貢硫磺歸挾中土物關吏持之急廷華引周禮環人送迎門關無譏及野廬氏第禁不時不物爲請關吏謝之修三禮時分輯諸圖發祕府所藏諸儒禮圖七十餘家詳審同異多所訂正著儀禮章句十七卷以張爾岐儀禮句讀過於墨守鄭注王文清儀禮分節句讀其箋注失之太略因折衷先儒補所未備於喪禮爲詳審又有三禮疑義曲臺小錄東壁書莊集 盛世佐字庸三浙江秀水人乾隆十三年進士官貴州龍里知縣撰儀禮集編四十卷集古今說禮者一百九十七家而斷以己意持論謹嚴無空腹高談輕排鄭賈之錮習又楊復儀禮圖久行於世然其說本注疏而時有並注疏之意失之者世佐亦一一是正至於諸家謬誤辨之尤詳焉餘姚盧文弨著儀禮詳校頗采其說

顧棟高 陳祖范 吳鼎 梁錫璣 華玉淳 顧鎮 蔡德晉

顧棟高字復初江蘇無錫人康熙六十年進士授內閣中書雍正時引見以奏對越次罷職乾隆十五年特召內外大臣薦舉經明行修之士時所舉四十餘人惟大學士張廷玉尙書王安國侍郎歸宣光舉江南舉人陳祖范尙書汪由敦舉江

南舉人吳鼎侍郎錢陳羣舉山西舉人梁錫璣大理寺卿鄒一桂舉棟高此四人論者謂名實允孚焉尋奉旨皆授國子監司業棟高以年老不任職賜司業銜皇太后萬壽棟高入京祝嘏特旨召見拜起令內侍扶掖棟高奏對首及三吳儆俗請以節儉風示海內上嘉之陞辭賜七言律詩二章以寵其行二十二年南巡召見行在加祭酒銜賜御書傳經耆碩四字二十四年卒於家年八十一棟高少與同里蔡德晉金匱吳鼎精心經術尤嗜左氏傳遇拂意家人置左傳於几上則怡然誦之不問他事著春秋大事表五十卷輿圖一卷附錄一卷以春秋列國諸事比而爲表又爲辨論以訂舊說之譌凡百三十一篇條理詳明議論精覈多發前人所未發又毛詩類釋二十一卷續編三卷采錄舊說發明經義頗爲謹嚴其尙書質疑二卷多據臆斷不足以言心得大抵棟高窮經之功春秋爲最而書則用力少也其論學則合宋元明門徑而一之援新安以合金谿爲調停之說著有大儒粹語二十八卷 陳祖范字亦韓江蘇常熟人雍正元年舉人其秋禮部中式以病不與殿試歸僦廬華匯之濱槌戶讀書居數年詔天下設書院以教士大吏爭延爲師訓課有法或一二年輒辭去曰士習難醇師道難立且此席似宋時祠

祿仕而不遂者處焉吾不求仕而久與其列爲汗顏耳乾隆十五年薦舉經學祖
范居首以年老不任職賜國子監司業銜十八年卒於家年七十有九所撰述有
經咫一卷膺薦時錄呈御覽文集四卷詩集四卷掌錄二卷祖范於學務求心得
論易不取先天之學論書不取梅頤論詩不廢小序論春秋不取義例論禮不以
古制違人情皆通達之論同縣顧鎮傳其學 吳鼎字尊彝江蘇金匱人乾隆九
年舉人以薦舉經學授國子監司業洎擢翰林院侍講學士轉侍讀學士大考降
左春坊左贊善遷翰林院侍講旋休致所撰有易例舉要二卷十家易象集說九
十卷衷宋俞琰元龍仁夫明來知德等十家易說以繼李鼎祚董楷之後其東莞
學案則專攻陳建學部通辨作也兄鼎字大年幼而嗜學與蔡德晉秦蕙田及鼎
爲經會尙書揚名時以經學薦未授官乾隆元年成進士改工部主事聞父訃歸
尋卒著三正考二卷駁胡安國夏時冠周月之謬又謂三正通於民俗引陳廷敬
蔡德晉諸說於三代諸書差互之處一一剖其所以然最足破疑似之見又有易
象約言 梁錫璵字確軒山西介休人雍正二年舉人乾隆十五年以薦舉經學
授國子監司業與吳鼎同食俸辦事不爲定員十七年命直上書房累遷詹事府

少詹事大考降左庶子擢祭酒坐遺失書籍鐫級膺薦時以所撰易經揆一呈御覽鼎錫璵並蒙召對面奉諭旨云汝等以經學保舉朕所以用汝等去教人大學士九卿公保汝等是汝等積學所致不是他途倖進復奉聖訓云窮經爲讀書根本但窮經不徒在口耳須要躬行實踐汝等自己躬行實踐方能教人躬行實踐鼎錫璵頓首祇謝又奉諭吳鼎梁錫璵所著經學著派翰林二十員中書二十員在武英殿各謄寫一部進呈原書給還本人所有紙札飯食皆給於官著梁詩正劉統勳董理其事 華玉淳字師道江蘇無錫人太學生爲學窮研經史務究根柢與族子綱俱從顧棟高游兼長曆算綱著春秋朔閏表玉淳爲改正之其答棟高書曰今法以合朔時刻定月之大小中氣有無定閏之先後而古曆甚疏不得以今法爲準杜氏就經傳日月排成長曆未必盡合春秋時法晉語十月惠公卒韋昭注云內傳左九月而此云十月賈侍中以爲閏在十二月後魯失閏以閏月爲正月晉以九月爲十月而置閏也然則列國之曆又各有不同因此疑經傳日月參差未必盡闕誤或赴告有異也最可異者先儒見經文兩書閏月皆在歲終遂謂古曆閏皆十二月以此解左傳歸餘於終不知閏所以定時成歲若閏必歲

終四時何以定竊意閏者附月之餘日也積聚餘分至中氣在晦則當置閏是爲一終所謂歸於終者如此元楊恭懿上授時曆奏云暴秦焚書廢古僞作置閏歲終西漢因之然則太初未改曆前屢書後九月乃仍秦曆非古法然也其言深明古今同異之故棟高撰大事表朔閏一表蓋出二華手也所自著有禹貢約義論三江主鄭康成蘇軾之說極爲有見論九江則以爲洞庭與德清胡渭合晚欲撰述八書以補三通所未備未成而卒詩宗查慎行有澹園稿 顧鎮字備九江蘇常熟人乾隆三年舉人十五年大學士蔣溥以經學薦十九年成進士補國子監助教遷宗人府主事以年老乞歸鎮少從陳祖范游砥行績學尤深詩禮嘗以講學諸家尊集傳而抑小序博古諸家又申小序而疑集傳乃調停兩家之說而解其紛著虞東學詩十二卷又以本朝庶孫爲祖庶母服功令無明文陳祖范經咫極陳宜稱之義明當服三年而讀禮通考所載言人人殊鎮乃引禮經曰父之所不降子亦不降也定服三年作兩議千餘言時以爲允歸後主講金臺白鹿鍾山書院誨誘不倦兼工古文同年友袁枚時就講業天性孝友父歿水漿不入口恩從子寡嫂甚摯卒年七十三所著三禮劄記未成有虞東文錄八卷詩二卷支谿

小志錢法考諸書 蔡德晉字仁錫江蘇無錫人雍正四年舉人乾隆二年禮部尚書楊名時薦德晉經明行修授國子監學正遷工部司務德晉嘗謂橫渠以禮教人最得孔門博約之旨故其律身甚嚴其論三禮多發前人所未發著禮經本義十七卷禮傳本義二十卷通禮五十卷

諸錦 鄭江

諸錦字襄七浙江秀水人雍正二年進士改翰林院庶吉士散館外補知縣就教職選金華府教授乾隆元年舉博學鴻詞召試一等三名授編修充三禮館纂修官六年充福建鄉試正考官十二年充山西鄉試副考官官至左春坊左贊善錦少孤奉母教辛苦誦讀家貧無買書資聞吳下書賈某愛客詣之留數日主人曰觀君舉止欲讀竟此架上書耶錦笑而領之長洲顧嗣立嘉定張大受爲之延譽名遂起生平浸淫典籍寢食俱廢閱覽博物於箋疏考核尤精著毛詩說二卷通論一卷一以小序爲主毛鄭諸子外有佳說則采之有奧義則通之疏證旁通時有新意又著補饗禮一卷以吳澄所補儀禮經傳諸篇獨缺饗禮因據周官賓客之聯事而比次之並采左傳禮記中相發明者條注其下其以經補經證佐天然

咸有條理又著夏小正詁一卷專釋名物亦多以經詁經性耿介官京師時權貴之門未嘗一至青浦王昶每過之薨魚晶飯雜談經史而已告歸後鄉居十餘年昕夕讀書不問外事依然一老書生也詩法山谷后山爲王昶所稱晚歲輯浙中耆舊詩題曰國朝風雅凡十二册自著有絳趺閣詩十一卷三十四年卒年八十四 鄭江字璣尺浙江錢塘人康熙五十七年進士改翰林院庶吉士充明史館纂修官雍正元年充順天鄉試同考官以校閱公明議敘授檢討丁憂歸里服闋入都尙書吳士玉奏充一統志纂修官總裁方苞見江文深相折服因以志事屬江時纂修者衆惟江與常熟王峻屬筆最多十年充順天鄉試同考官十二年晉贊善十三年充山東鄉試正考官試竣復命督學安徽遷侍講任滿晉侍讀仍充明史綱目纂修官尋以足疾告歸江幼孤貧眇一目讀書務心得不從事詞華性淡泊寡營回翔書局者二十年和碩果親王喜延賓客苞以江薦力辭不赴視學安徽青陽有娶未婚族嬖之武生已廉其實縣令再三請貸卒治其罪巢縣監生樊珍以爭產誣其弟婦與鄰人通知縣受賕實其事江駁之言之撫軍事得釋諸生陶敬信之通經江有龍之史學皆疏薦有龍獻所著書與修三禮時服其知人

嘗從長洲何焯游湛深經學謂春秋非啖趙劉孫諸大儒則聖經或幾乎晦武夷胡氏頗以己意武斷迂泛不切因集諸家之說著春秋集義二十卷仁和杭世駿稱其穿穴根據不第爲胡氏諍臣又著詩經集詁四卷禮記集注四卷詩文稱情而出大類宋范正獻然自視歆然有指其失及改定者終身敬禮之有筠谷詩鈔七卷書帶草堂詩文集四十餘卷乾隆十年卒年六十四

沈炳震

沈炳震字東甫浙江歸安人貢生少好博覽紀傳年月世系他人所不經意者必默識之及長才益閎雅著新舊唐書合鈔二百六十卷其書分爲綱日本紀列傳以舊書爲綱分注新書爲目諸志舊書多闕略舛錯則以新書爲綱分注舊書爲目又補列方鎮表拜罷承襲諸節目訂正宰相世系表之譌謬積數十寒暑乃成鄞全祖望見其書驚歎謂可依王氏漢藝文志考證例孤行於世又著二十四史四譜五十卷一紀元二封爵三宰執四諡法休寧汪由敦稱其體蓋出表曆之流而變其旁行斜上者爲標目舉帝紀之要撮世家列傳載記之綱領類聚區分合乎書志薈萃羣言之法外有九經辯字蒙瀆十二卷排比文字鈎稽訓詁有裨經

學又歷代帝系紀元歌一卷唐詩金粉十卷井魚聽編十六卷增默齋詩八卷雜著十卷乾隆元年薦試博學鴻詞科報罷踰年卒年五十九卒後六年侍郎錢陳羣以新舊唐書合鈔奏進詔付書局其精粹者採入唐書考證中弟炳異炳謙炳謙字幼孜歲貢生與炳震同舉博學鴻詞工詩

徐文靖 趙繼序

徐文靖字位山安徽當塗人雍正元年舉人乾隆元年薦試博學鴻詞罷歸文靖家貧力學考據經史講求實學嘗著山河兩戒考十四卷前八卷本唐僧一行之說廣採羣書以爲之證後六卷則文靖所續補詳於考古不涉占驗又管城碩記三十卷推原詩禮諸經之論旁及子史說部語必求當鄞全祖望見之服其考據精博侍讀學士張鵬翀嘗取二書呈進十五年安徽巡撫薦舉經學十六年會試特授翰林院檢討時年八十六矣又著禹貢會箋十二卷因胡渭錐指所已言而推所未至首列禹貢山水次爲圖說十八先引蔡傳博及諸書辨證之文較渭書益密又撰周易拾遺十四卷主程子說而於漢魏諸家亦有發明又有竹書統箋十二卷作於孫之駿考定竹書以後首仿司馬貞補史記例作伏羲神農紀年多

據毛漸偽三墳殊失考正然其箋引證羣書考訂地理世系則比之驟爲詳貫焉文靖老年猶健低頭據案著書不輟年九十餘卒初侍郎黃叔琳主江南鄉試歸曰他人但以榜中有狀頭爲滿意耳余得三人曰任啟運陳祖范徐文靖其學皆醇而博 趙繼序字芝山安徽休寧人乾隆六年舉人繼序治經於漢宋無所偏主嘗謂訓詁制度義理皆儒者所當研究或因精力不及分門別戶互相刺謗學者不知其方流弊滋甚所著周易圖書質疑二十四卷以象數言易而不主陳邵河洛之說首爲古經次釋經義次爲圖三十有二各系以說而終以大衍象數考春秋傳論易考易通曆數周易考異卦爻類象其書多從卦變起象而兼取漢宋諸儒之說持論頗平允又著有漢儒傳經說撰孔門弟子考詩文集同時潁州連斗山字叔度著有周易辨畫四十卷其說專主卦畫立義逐卦詳列互體剖析爲微妙頗有合於精理又著有周官精義十二卷

王文清 潘士權 余廷燦

王文清字廷鑑湖南寧鄉人雍正二年進士授九谿衛學正轉岳州府教授以憂歸乾隆元年舉博學鴻詞報罷十四年大學士史貽直阿克敦侍郎梅穀成俱以

潛心經學薦詔分修三禮踰年選寶慶府教授大學士朱軾奏留改中書科中書分修律呂正義遷宗人府主事尋乞養歸十七年再舉經學以父喪不赴文清淹貫經籍尤深於禮在三禮館時爲桐城方苞所推挹嘗著周禮會要六卷約括注疏諸說疏通字義又著儀禮分節句讀以句讀爲主略有箋注不欲其繁皆便讀者又著考古源流六百二十八卷爲門二十自序稱合三通學海玉海元龜考索衍義典彙稗編諸本校之卷帙不必全收而要義具足折衷閒出鄙見而臆說則無凡肆力三十餘年以力綿未能付梓乃先摘其淺近切要者爲考古略八卷他著又有三禮圖五卷喪服解十卷祭禮解十卷樂制考十卷樂律問對四卷周易中旨陰符經發微校定五代史行己錄家訓治生要術鋤經餘草詩文略等書文清歸後布衣蔬食杜門窮山中桂林陳宏謀撫楚勒碑所居曰經學之鄉聘主嶽麓書院成就者四百餘人年九十二卒 潘士權字龍庵湖南黔陽人附貢生乾隆六年考補天文生呈請纂修占書委署太常寺博士十一年以告歸年七十二卒士權少穎異長益肆力於學著有中庸一得尤精象數音律游京師爲大學士孫嘉淦所稱許所著大樂元音七卷前五卷據琴定樂大旨本管子下徵之數一

百八下羽之數九十六白虎通絃音離故首徵二說而通之案絃審音以首絃爲下徵二絃爲下羽三絃爲宮四五六七爲商角徵羽並附以儀禮樂譜十二篇圖說頗繁然實本欽定律呂正義之說旁爲推演其由琴而推諸樂與婺源江永律呂新論所見略同但不及永書精密耳六卷附琴譜曲譜七卷附曆學音調類例甚詳又著洪範補注五卷前二卷闡蔡沈之書外篇三卷則皆自撰合著龜卜筮五行卦氣聲音律呂交互言之 余廷燦字存吾湖南長沙人乾隆二十六年進士改翰林院庶吉士散館授檢討充三禮館纂修官以母年八十乞養歸母歿嘔粥寢苦值暴雨入倚廬地沮洳家人藉以片板麾去之其學兼綜經史及諸子百家象緯句股律呂音韻皆能提要鉤元嘗與休寧戴震河間紀昀相切劘晚主濂溪石鼓縣江城南書院教人以兼通漢宋爲宗著有存吾文集十六卷嘉慶三年卒年七十

任啟運

任啟運字翼聖江蘇宜興人少讀孟子至卒章輒哽咽大懼追統無傳家貧無藏書從人借閱夜乏膏火持書就月至移牆不輟事父母以孝聞年五十四舉於鄉

雍正十一年計偕至都會世宗問有精通性理之學者尙書張照以啟運名上特詔廷試以太極似何物對進呈御覽得旨嘉獎會成進士遂於臚唱前一日引見奉 上諭任啟運授翰林院檢討在阿哥書房行走上嘗問以朝聞夕死之旨啟運對以生死一理未知生焉知死上諭云此是賢人分上事未到聖人地位從此作去久自知之逾年抱疾賜藥賜醫越月謝恩特旨繞廊而進面稱知汝非堯舜不敢以陳於王前再四慰安務令自愛令侍臣扶掖以出且遙望之高宗登極仍命在書房行走署日講起居注官尋擢中允四年遷侍講晉侍講學士七年擢都察院左僉都御史八年充三禮館副總裁官尋陞宗人府府丞九年卒於所賜第年七十五賜帑金治喪賜祭葬啟運學宗朱子嘗謂諸經已有子朱子傳獨未及禮經乃著肆獻裸饋食禮三卷以儀禮特牲少牢饋食禮皆士禮因據三禮及他傳記之有關王禮者推之不得於經則求諸注疏以補之凡五篇一曰祭統二曰吉蠲三曰朝踐四曰正祭五曰繹祭其名則取周禮以肆獻裸享先王以饋食享先王之文較之黃榦所續祭禮更爲精密又宮室考十三卷於李如圭釋宮之外別爲類次日門曰觀曰朝曰廟曰寢曰塾曰宇曰等威曰名物曰門大小廣狹曰明

堂曰方明日辟雍考據甚爲精覈儀禮一經久成絕學啟運研究鉤貫使條理秩然不愧窮經之目又禮記章句十卷以大學中庸朱子既成章句則曲禮以下四十七篇皆可釐爲章句但所傳篇次序列紛錯爰做鄭康成序儀禮例更其前後併爲四十二篇其有關倫紀之大而爲秦漢元明輕變易者則衆著其說以俟後之論禮者酌取外有周易洗心九卷四書約指十九卷孝經章句十卷夏小正注竹書紀年考逸書補孟子時事考史要女史通纂女教經傳白虎通正譌任氏家禮酌任氏史冊備考同姓名考記事珠清芬樓文集等書其周易洗心則年六十月時作觀象玩辭時闡精理啟運研窮刻苦旣受特達之知益思報稱年七十二猶書自責語曰孔曾思孟實爲汝師日面命汝汝頑不知痛自懲責涕泗漣漣嗚呼老矣瞑目爲期及總裁三禮館喜甚因盡發中祕所儲平心參訂日營手寫漏常二十刻不輟論必本天道酌人情務求合朱子遺意而心神並耗竟以是終十四年詔舉經學上諭有任啟運研窮經術敦樸可嘉語三十七年命中外蒐輯古今羣書諭曰歷代名臣泊本朝士林夙望向有詩文專集及近時沈潛經史原本風雅如顧棟高陳祖范任啟運沈德潛輩亦各著成編並非剽說卮言可比均應概

行查明在坊肆者或量爲給價家藏者或官爲裝印至有未經鐫刊祇係鈔本存留者不妨繕錄副本仍將原本給還庶幾副在石渠用儲乙覽於是上啟運所著書四種入四庫中

全祖望

全祖望字紹衣浙江鄞縣人十六歲能爲古文討論經史證明掌故雍正七年以諸生充選貢至京師上侍郎方苞書論喪禮或問苞大異之旋舉順天鄉試戶部侍郎李紱見其文曰此黃震王應麟以後一人也乾隆元年薦舉博學鴻詞科是春會試先成進士改翰林院庶吉士不再與鴻博試二年散館以知縣用遂歸不復出方詞科諸人未集紱以問祖望祖望爲記四十餘人各列所長乃彙爲詞科摭言一書先以康熙十八年百八十六徵士接以今科采諸人所著入之已成大半會將歸未卒業僅得前後姓名及舉主試錄三卷性伉直旣歸貧且病饔飧不給人有所餽弗受主講蕺山端谿書院爲士林仰重二十年卒於家年五十有一祖望爲學淵博無涯涘於書靡不貫串在翰林與李紱共借永樂大典讀之每日各盡二十卷時開明史館復爲書六通移之先論藝文次論表次論忠義隱逸兩

列傳皆以其言爲躋生平服膺黃宗羲宗羲於明季諸人刻意表章祖望踵之詳盡而覈實可當續史家居後修宗羲宋儒學案又七校水經注三箋困學紀聞皆足見其汲古之深又答弟子董秉純張炳蔣學鏞廬鎬等所問經史疑義錄爲經史問答十卷儀徵阮元嘗謂經學史才詞科三者得一足傳而祖望兼之其經史問答實足以繼古賢啟後學與顧炎武日知錄相埒晚手定文彙刪其十七爲結埼亭文集五十卷又著有讀易別錄孔子弟子姓名表漢書地理志稽疑公車徵士小錄續甬上耆舊詩天一閣碑目

沈彤 王士禳

沈彤字冠雲江蘇吳江人自少力學以窮經爲事貫串前人之異同折衷至當乾隆元年薦舉博學鴻詞報罷與修三禮及一統志書成授九品官以親老歸彤淹通三禮以歐陽修有周禮官多田少祿且不給之疑後人多沿其說卽有辨者不過以攝官爲詞乃詳究周制撰周官祿田考三卷以辨正歐說分官爵數公田數祿田數三篇積算至爲精密其說自鄭注賈疏以後可云特出又撰儀禮小疏一卷取士冠禮士昏禮公食大夫禮喪服士喪禮爲之疏箋足訂舊義之譌其果堂

集十二卷多訂正經學之文若周官頒田異同說五溝異同說井田軍賦說釋周官地徵等篇皆援據典覈又撰春秋左傳小疏尙書小疏氣穴考略內經本論彤性至孝親歿三年中不茹葷不內寢居恆每講求經世之務所著保甲論其後吳德旋見之稱爲最善云十七年卒年六十五 王士讓字尙卿福建安谿人雍正十年副貢生乾隆元年舉博學鴻詞報罷留京與修三禮書成議敘出知湖北蘄州不四年卒於官著有儀禮訓解其書不墨守鄭注博采先儒下及同時三禮館諸人論議標舉姓氏然後下以己意蓋仿石渠論白虎通例也

龔元玠 劉斯組 陳象樞 李榮陞

龔元玠字鳴玉江西南昌人乾隆元年以諸生舉博學鴻詞後巡撫阿思哈復以經學薦俱報罷十九年成進士出知貴州銅仁縣縣多山易藏奸城舊七門元玠建卡爲守門兵樓止值風雨不得他適防守遂嚴學宮久圯復倡修之緣事降調改撫州教授再以承審失實罷職歸元玠少貧好讀書未嘗從師學嘗取歐陽修限字讀九經法畢誦注疏自是博通羣籍歷碌貫串不僅爲一家言所著十三經客難凡易二卷書四卷詩四卷三禮十三卷春秋二十四卷四書七卷爾雅一卷

其孝經一卷彙佚不傳又留心河務窮竟源委鄉試時考官孫嘉淦見其治河策深爲激賞嘗渡黃河風不利舟蕩洪濤中人有怖色元玠獨左右指視無所畏復買小舟赴海口測量去路著黃淮安瀾先資編二卷性至孝年五十遭父母喪不茹酒肉不入內室鄉人無少長稱龔先生年八十二卒又著畏齋文集四卷 劉斯組字斗田江西新建人雍正二年舉人授分宜教諭時廣東奏擇江西教職中賢能者府置一員課士斯組檄考第一分屬肇慶兼主端溪書院以左都御史孫嘉淦薦與元玠同舉博學鴻詞報罷十八年副都御史葉一棟復以經學薦是年中明通榜後歷知廣東西寧河南杞縣有善政及致仕邑人祀焉生平潛心經術尤深於易著有周易撥易堂解二十卷又著太元別訓五卷各以韻語發揮其義欲以奧崛配雄又有皇極緒言二十卷 陳象樞字馭南江西崇仁人以五經兩中副榜貢生特旨一體會試雍正八年成進士授吏部主事遷員外郎以尙書甘汝來薦加翰林院檢討銜乾隆二年督學四川卻道里費抽俸以助諸吏廩給四川自渝以下江最險夔人士舊試於渝象樞曰奈何予多士以危自往按試夔有考院自此始蜀人奉其教與前學政陳瓊稱二陳夫子五年復督學湖南其教如

在蜀遷郎中以母憂歸服闋以任內誤收考生鐫級十五年詔起用舊臣十四人皆九列象樞與焉任職三年實事求是以勞疾卒年五十八象樞十二歲能古文與新建周學健奉新帥念祖齊名初成進士大學士朱軾言於朝曰吾鄉知名士也生平覃精經術尤善儀禮著儀禮補箋二十卷又有易經發蒙六卷五經淵源錄一卷經解補四卷學庸定解五卷讀史一得五卷復齋文集十卷詩集八卷

李榮陞字奠基江西萬載人乾隆二十八年進士官湖南永興縣知縣絕苞苴勤判決豪猾屏迹以母憂歸起官雲南權知雲州嘗奉檄出勘普洱大理府事陟蒼山遊洱海訪六詔遺蹟揚蒙氏鍾銘而還又權知恩樂縣縣介哀牢蒙樂兩山間爲唐虞崇山地雍正時始改歸流榮陞治之化行徼外補官呈貢調嶠峨年已六十六以疾乞休上官知其貧延主大理書院期年始辦裝歸榮陞幼有異資甫授句讀卽疑鄭康成亂易篇次欲改復費氏之舊讀詩至無將大車以塵疵非韻疑疵爲瘡之誤自是深研經學著周易篇第三卷易考四卷尙書編第二卷尙書考六卷精甘石家言嘗推步五星謂於嘉慶五年三月十八日當聚奎後果驗古文爲上高李祖陶所稱有厚岡文集二十卷詩集四卷

江永 胡匡衷

江永字慎修安徽婺源人諸生少讀書日記數千言嘗見大學衍義補徵引周禮愛之求得其書朝夕諷誦遂研覃十三經注疏凡古今制度及鐘律聲韻無不探賾索隱尤深於三禮及天文地理之學以朱子晚年治禮爲儀禮經傳通解書未就黃氏楊氏相繼纂續亦非完書乃廣摭博討大綱細目一從吉凶軍賓嘉五禮舊次題曰禮經綱目凡八十八卷引據諸書釐正發明實足終朱子未竟之緒嘗一至京師桐城方苞荆谿吳紱質以禮經疑義皆大折服讀書好深思長於比勘明推步鐘律聲韻歲實消長前人多論之者梅文鼎略舉授時而亦疑之永爲說曰日平行於黃道是爲恆氣恆歲實因有本輪均輪高衝之差而生盈縮謂之視行視行者日之實體所至而平行者本輪之心也以視行加減平行故定氣時刻多寡不同高衝爲縮末盈初之端歲有推移故定氣時刻之多寡且歲歲不同而恆氣歲實終古無增損當以恆者爲率隨其時之高衝以算定氣而歲實消長可勿論也其論黃鐘之宮據管子呂氏春秋以正淮南子天文訓漢書律曆志之謬曰黃鐘之宮黃鐘半律也卽後世所謂黃鐘清聲是也唐時風雅十二詩譜以清

黃起調畢曲琴家正宮調黃鐘不在大絃而在第三絃正黃鐘之宮爲律本遺意國語伶州鳩因論七律而及武王之四樂夷則無射曰上宮黃鐘太簇曰下宮蓋律長者用其清聲律短者用其濁聲古樂用均之法雖亡而因端可推韓子外儲篇曰夫瑟以小絃爲大聲大絃爲小聲雖詭其辭以諷然因是知古者調瑟之法黃鐘大呂太簇夾鐘姑洗仲呂蕤賓用半而居小絃林鐘夷則南呂無射應鐘用全而居大絃也管子書五聲徵羽宮商角之序亦如此永此言實漢以來所未尋究者其論古韻曰考古音者昉於吳才老崑山陳氏援證益精博然顧氏考古之功多審音之功淺顧氏分古音爲十部猶未密也真諄以下十四韻當析爲二部而先韻半屬真諄半屬元寒考之三百篇用韻畫然侯之正音近幽當別爲一部虞模部之隅渝驅婁等字蕭豪部之蕭寥魚好等字皆侯幽之類與本部源流各別三百篇亦畫然侵覃以下九韻亦當以侈斂分爲二部而覃鹽半屬侵半屬嚴添蓋平上去三聲皆當爲十三部入聲當爲八部而三代以上之音始有條不紊也論今韻曰平上去三聲多者六十部少者五十餘部惟入聲祇三十四部或謂支至哈蕭至麻尤至幽無入聲崑山顧氏古音表又反其說於是舊有者無舊無

者有皆拘於一偏蓋入聲有二三韻而同一入者如東尤侯同以屋爲入眞脂同以質爲入文微同以物爲入寒桓戈歌同以曷末爲入之類按其呼等察其偏旁參以古音乃無憾也晚年讀書有得隨筆撰記謂周易以反對爲序次卦變當於反對取之否反爲泰泰反爲否故小往大來大往小來是其例也凡曰來曰下曰反自反卦之外卦來居內卦也曰往曰上曰進曰升自反卦之內卦往居外卦也又謂兵農之分春秋時已然不起於秦漢證以管子左傳兵常近國都野處之農固不隸於師旅也其於經傳稽考精審多類此所著有周禮疑義舉要七卷禮記訓義擇言六卷深衣考誤一卷律呂闡微十卷律呂新論二卷春秋地理考實四卷鄉黨圖考十一卷讀書隨筆十二卷古韻標準四卷四聲切韻表四卷音學辨微一卷河洛精蘊九卷推步法解五卷七政衍金水二星發微冬至權度恆氣注曆辨歲實消長辨曆學補論中西合法擬草各一卷近思錄集注十四卷考訂朱子世家一卷乾隆二十七年卒年八十二休寧戴震歙縣金榜之學得於永爲多永卒後震攜其書入都故四庫全書收永所著書至十餘部尙書秦蕙田撰五禮通考摭永說入觀象授時類而推步法解則載其全書焉 胡匡衷字樸齋安徽

績溪人歲貢生績學敦行以孝友爲鄉里所重於經義多所發明不苟與先儒同異所著有周易傳義疑參十二卷析程朱之異同補程朱之罅漏大抵多採宋元各家羽翼程朱之說以相訂正而亦時出己見於二書深有裨益禮經著有三禮筭記周禮井田圖考井田出賦考儀禮釋官等書其論井田多申鄭義而授田一事以遂人所言是鄉遂制大司徒所言是都鄙制鄭註自相違戾作畿內授田考實一篇列於卷首積算特爲精密其釋官則以周禮禮記左傳國語與儀禮相參證論據精確足補注疏所未及又著有左傳翼服論語古本證異論語補箋莊子集評離騷集註等書其古文別爲樸齋文集年七十四卒

盧文弨 孫志祖 邵瑛

盧文弨字弨弓浙江餘姚人父存心乾隆初舉博學鴻詞科文弨乾隆十七年一甲三名進士授翰林院編修上書房行走歷官左春坊左中允翰林院侍讀學士三十年充廣東鄉試正考官三十一年充湖南學政以條陳學政事宜不當部議降三級用三十三年乞養歸文弨孝謹篤厚潛心漢學與戴震段玉裁友善好校書所校逸周書孟子音義荀子呂氏春秋賈誼新書韓詩外傳春秋繁露方言白

虎通獨斷經典釋文諸善本鏤板惠學者又苦鏤板難多則合經史子集三十八種而名之曰羣書拾補所自著有抱經堂集三十四卷儀禮注疏詳校十七卷鍾山笥記四卷龍城笥記三卷廣雅釋天以下註二卷皆能使學者誥正積非蓄疑渙釋其言曰唐人之爲義疏也本單行不與經注合單行經註唐以後尙多善本自宋後附疏於經注而所附之經注非必孔賈諸人所據之本也則兩相齟齬矣南宋後又附經典釋文於注疏間而陸氏所據之經注又非孔賈諸人所據也則齟齬更多矣淺人必比而同之則彼此互改多失其真幸有改之不盡以滋其齟齬啟人考覈者故註釋文合刻似便而非古法也其特識多類此文昭嘗歷主江浙各書院講席以經術導士六十年卒年七十九同時江陰趙曦明字敬夫諸生文昭校讎諸籍資曦明之力爲多曦明著有讀書一得六十卷其體例與黃東發日鈔相近又有顏氏家訓注七卷桑梓見聞錄八卷 孫志祖字詒穀浙江仁和人乾隆三十一年進士改刑部主事洊陞郎中擢江南道監察御史乞養歸志祖清修自好讀經史必釋其疑而後已著讀書脞錄七卷考論經子雜家折中精詳又家語疏證六卷謂王肅作聖證論以攻康成又僞撰家語飾其說以欺世因博

集羣書凡肅所剽竊者皆疏通證明之又謂孔叢子亦王肅僞託其小爾雅亦肅借古書以自文並作疏證以辨其妄幼熟精文選後乃倣韓文考異之例參稽衆說正俗本之誤爲文選考異四卷又輯前人及朋輩論說爲文選註補正四卷又有文選理學權輿補一卷輯風俗通逸文一卷補正姚之駟輯謝承後漢書五卷嘉慶六年卒年六十五 邵瑛字瑤圃浙江餘姚人乾隆四十九年一甲二名進士授翰林院編修改內閣中書嘉慶三年充湖北鄉試副考官旋以告歸不復出瑛邃深經術以左傳杜注孔氏正義所駁劉炫義未免左袒著劉炫規杜持平六卷又以說文之字正十三經及逸周書大戴禮國語沿襲俗字之謬著說文羣經正字二十八卷

翁方綱

翁方綱字正三順天大興人乾隆十七年進士改翰林院庶吉士散館授編修二十四年充江西鄉試副考官二十七年充湖北鄉試副考官二十九年督學廣東凡三任四十四年充江南鄉試副考官四十六年擢國子監司業尋遷洗馬四十八年充順天鄉試副考官四十九年遷詹事府少詹事五十一年督學江西五十

五年擢內閣學士五十六年督學山東嘉慶元年賜千叟宴及御製詩珍物四年左遷鴻臚寺卿十二年重頂鹿鳴宴賜三品銜十九年重預恩榮宴賜二品銜二十三年卒年八十六方綱弱冠入翰林散館日上至方綱跪所取卷閱之諭曰牙拉賽音漢語甚好也旣而屢司文柄英才碩彥識拔無遺與同里朱珪獻縣紀昀俱以宏獎風流爲己任寶應劉台拱海州凌廷堪曲阜孔廣森南城王聘珍欽州馮敏昌東鄉吳嵩梁等皆從之遊生平精研經術嘗謂考訂之學以衷於義理爲主其嗜博嗜瑣嗜異矜己者非也又曰考訂之學蓋出於不得已事有歧出而後考訂之說有互難而後考訂之義有隱僻而後考訂之論語曰多聞曰闕疑曰慎言三者備而考訂之道盡於是矣時秀水錢載斥休寧載震爲破碎大道以此相詆方綱與歙縣程晉芳言謂詁訓名物豈可目爲破碎考訂詁訓然後能講義理也錢載之爭究以戴說爲正然戴謂聖人之道必由典制名物得之此卻不盡然其論最爲持平方綱讀羣經有書禮論語孟子附記官鴻臚卿時青浦王昶見其方考禹貢顧命兩篇諸儒同異相與辨論斷斷竟日晚居馬蘭峪猶溫肄三禮三傳其精勤如此嘗與歸安丁杰及王聘珍校正朱彝尊經義考凡千八十八條爲

經義考補正十二卷又著禮經日次春秋分年系傳表十三經注疏姓氏通志堂經解目錄各一卷於金石之學尤精審嘗取熹平石經一十二段殘字勒於南昌學宮所著兩漢金石記二十二卷王昶謂其剖析毫芒參以說文正義幾欲駕洪文惠而上之他著有粵東金石略十二卷蘇米齋蘭亭考八卷小石帆亭著錄六卷米海岳元遺山年譜二卷蘇詩補注八卷石洲詩話八卷所爲詩多至六千餘篇自諸經注疏以及史傳之考訂金石文字之爬梳皆貫徹洋溢於其中蓋以學爲詩者有復初齋詩集七十卷文集三十五卷

朱筠 李威

朱筠字竹君順天大興人贈太傅大學士珪之兄父文炳陝西盩厔縣知縣筠與珪皆生於盩厔九歲至京師與珪同讀書通經文成斐然乾隆十九年進士改翰林院庶吉士散館授編修三十二年授贊善三十三年大考二等擢侍讀學士充日講起居注官三十五年充福建鄉試正考官三十六年提督安徽學政三十八年詔求遺書筠奏前明永樂大典一書陳編羅載請擇其中若干部分別繕寫以備著錄下軍機大臣議議上奉旨軍機大臣議覆朱筠條奏內將永樂大典擇取

繕寫各自爲書一節議請分派各館修書翰林等官前往檢查恐責成不專徒致歲月久稽汗青無日蓋此書移貯年深既多殘缺又原編體例分韻類次先已割裂全文首尾難期貫串特因當時采摭甚博其中或有古書善本世不恆見今就各門彙訂可以湊合成部者亦足廣名山石室之藏著卽派軍機大臣爲總裁官仍於翰林等官內選定員數責令專司查校將原書詳細檢閱並將圖書集成互爲校覈擇其未經採錄而實在流傳已少尙可裒集成編者先行摘開目錄奏聞候朕裁定其後纂輯四庫全書得之大典中者五百餘部皆世所不傳次第刊布海內實筠發之筠又奏言請做漢唐故事擇儒臣校正十三經文字勒石太學奉諭緩辦旋因生員欠考捐貢案降三級用得旨朱筠學問尙優著加恩授爲編修在辦理四庫全書處行走比還總辦日下舊聞纂修事四十四年提督福建學政筠博聞宏覽以經學六書倡謂經學本於文字訓詁周公作爾雅釋詁居首保氏教六書說文僅存於是刊布許氏說文解字敍說之以教士視學所至尤以人才經術名義爲急在安徽時躬拜奠婺故士江永汪紱祀之紫陽書院每試進諸生教之辨色坐堂皇至然燭不倦好金石文字謂可證佐經史爲文以鄭孔經義遷

固史書爲質嘗謂取法乎上僅得乎中書法參六書有隋唐以前體承學之士望爲依歸筠宏獎後進惟恐不至陸錫熊程晉芳任大椿皆筠所取士李威洪亮吉武億黃景仁吳鼎皆其弟子陽湖孫星衍爲諸生時以不見筠爲恨介亮吉爲紹願遙執弟子禮筠嘗言翰林以立品讀書爲職不能趨謁權要少曾館於劉統勳家及統勳爲大學士筠不通謁統勳遇於朝詢之筠曰非公事不敢謁貴人統勳嘆息稱善四十六年卒年五十三著有笥河集三十六卷 李威字畏吾福建龍溪人乾隆四十三年進士改刑部主事官至廉州府知府威從朱筠遊傳其學嘗爭辨筠前不以爲忤著有說文定本十五卷晚講陸王之學與桐城姚瑩最契以爲所談不足爲外人道也著嶺雲軒瑣記警切似呻吟語惟每引聖人至精之理與佛氏相比附桐城方東樹爲刪節以行

王鳴盛 金日追 吳凌雲 汪照

王鳴盛字鳳喈江蘇嘉定人幼從長洲沈德潛受詩後又從惠棟問經義遂通漢學乾隆十九年一甲二名進士授翰林院編修二十三年大考翰詹第一擢侍講學士充日講起居注官二十四年充福建鄉試正考官尋擢內閣學士兼禮部侍

郎銜坐濫支驛馬左遷光祿寺卿丁內艱遂不復出鳴盛性儉素無聲色玩好之娛晏坐一室伊唔如寒士嘗言漢人說經必守家法自唐貞觀撰諸經義疏而家法亡宋元豐以新經學取士而漢學殆絕今好古之儒皆知崇注疏矣然注疏惟詩三禮及公羊傳猶是漢人家法他經注則出魏晉人未爲醇備著尙書後案三十卷專述鄭康成之學若鄭注亡逸采馬王注補之孔傳雖出東晉其訓詁猶有傳授間一取焉又謂東晉所獻之太誓僞而唐人所斥之太誓實非僞故附書今文太誓一篇存古之功自謂不減惠氏周易述也又著周禮軍賦說四卷發明鄭氏之旨又十七史商榷一百卷於一史中紀志表傳互相稽考因而得其異同又取稗史叢說以證其舛誤於輿地職官典章名物每致詳焉別撰蛾術編一百卷其爲目十說錄說字說地說制說人說物說集說刻說通說系蓋倣王應麟顧炎武之意而援引尤博詩以才輔學以韻達情古文用歐曾之法闡許鄭之義有詩文集四十卷嘉慶二年卒年七十六弟子金曰追 金曰追字對揚亦嘉定人諸生受業王鳴盛深於九經正義每有疑譌隨條輒錄先成儀禮注疏正譌十七卷阮元奉詔校勘儀禮石經多采其說時同縣通經學者又有吳淩雲 吳淩雲字

得青亦嘉定人嘉慶五年歲貢讀書深造經師遺說靡不通貫嘗假館錢大昕孱守齋盡讀所藏書學益邃所著十三經考異援據精覈多前人所未發又經說三卷小學廣韻說各一卷海鹽陳其幹爲合刊之題曰吳氏遺著 汪照原名景龍字綉青亦嘉定人貢生少有詩名在練川十二子之列通金石善八分書嘗佐韓城王杰青浦王昶幕晚歲研窮經義以大戴禮記注惟盧辯一家餘姚盧文弨休寧戴震雖曾釐正文字未及解詁乃糾集同異采擷前說一字之譌折衷至當肆力者三十餘年成大戴禮記注補十三卷昶序其書言後世有復十四經之舊照書當與孔賈並行推重甚至他著有三家詩義證宋詩選略陶春館吟稿

錢大昕 族子塘 坊

錢大昕字曉徵江蘇嘉定人乾隆十六年召試舉人授內閣中書十九年進士改翰林院庶吉士二十二年散館授編修二十三年大考二等一名擢右春坊右贊善二十四年充山東鄉試正考官二十五年充會試同考官二十七年充湖南鄉試正考官二十八年大考一等三名擢翰林院侍講學士三十年充浙江鄉試副考官三十二年乞假歸三十四年補原官入直上書房遷詹事府少詹事三十九

年充河南鄉試正考官尋提督廣東學政四十年丁父艱服闋又丁母艱病不復出主講鍾山婁東紫陽書院嘉慶九年卒年七十七大昕幼慧善讀書時元和惠棟吳江沈彤以經術稱其學求之十三經註疏及唐以前子史小學諸書大昕推而廣之錯綜貫串發古人所未發任中書時與吳烜褚寅亮同習梅氏算術及歐羅巴測量弧三角諸法入翰林禮部尙書何國宗世業天文年已老聞其善算先往見之曰今同館諸公談此道者鮮矣大昕於中西兩法剖析無遺用以觀史自太初三統四分中至大衍下迄授時朔望薄蝕凌犯進退抉摘無遺漢三統爲七十餘家之權輿訛文奧義無能正之者大昕衍之據班志以闡劉歆之說裁志文之訛二千年已絕之學昭然若發蒙大昕又謂古法歲陰與太歲不同淮南天文訓攝提以下十二名皆謂歲陰所在史記太初元年年名焉逢攝提格者歲陰非太歲也東漢後不用歲陰紀年又不知太歲超辰之法乃以太初九年爲丁丑歲則與史漢之文皆悖矣又謂尙書緯四遊升降之說卽西法日躔最高卑之說又宋楊忠輔統天術以距差乘躔差減氣汎積爲定積梅文鼎謂郭守敬加減歲餘法出於此但統天求汎積必先減氣差十九日有奇與郭又異文鼎不能言大昕

推之曰凡步氣朔必以甲子日起算今統天上元冬至乃戊子日不值甲子依授時法當加氣應二十四日有奇乃得從甲子起今減去氣差是以上元冬至後甲子日起算也既如此當減氣應三十五日有奇今減十九日有奇者去躔差之數不算也求天正經朔又減閏差者經朔當從合朔起算今推得統天上元冬至後第一朔乃乙丑戊初二刻弱故必減閏差而後以朔實除之卽授時之朔應也大昕始以辭章名沈德潛吳中七子詩選大昕居一旣乃研精經史蔚爲著述於經義之聚訟難決者皆剖析源流文字音韻訓詁天算地理氏族金石以及古人爵里事實年齒瞭如指掌古人賢姦是非疑似難明者皆有確見惟不喜二氏書嘗曰立德立功立言吾儒之不朽也先儒言釋氏近於墨予以爲釋氏亦終於楊氏爲己而已彼棄父母而學道是視己重於父母也大昕在館時嘗與修音韻述微續文獻通考續通志一統志天球圖諸書所著有唐石經考異一卷經典文字考異三卷聲類四卷二十二史考異一百卷唐書史臣表一卷唐五代學士年表二卷宋學士年表一卷元史氏族表三卷元史藝文志四卷三史拾遺五卷諸史拾遺五卷通鑑注辨證三卷四史朔閏考四卷南北史雋一卷三統術衍三卷術鈴

三卷風俗通義逸文二卷吳興舊德錄四卷先德錄四卷洪文惠年譜一卷洪文敏年譜一卷王伯厚年譜一卷王弇州年譜一卷疑年錄三卷潛學堂文集五十卷詩集二十卷詞垣集四卷潛學堂金石文跋尾二十五卷金石文字目錄九卷天一閣碑目二卷養新錄二十三卷恆言錄六卷竹汀日記鈔三卷族子塘坵能傳其學塘字學淵乾隆四十五年進士改教職選江寧府學教授塘少大昕七歲相與共學又與大昕弟大昭及弟坵相切磋爲實事求是之學於聲音文字律呂推步尤有神解著律呂古義六卷據所得漢慮僂銅尺正荀勗以劉歆銅斛尺爲周尺之非謂周本八寸尺不可以制律制律必用十寸尺卽昔人所云夏尺周因夏商夏商因唐虞古律當無異度又史記三書釋疑三卷於律算天官家言皆究其原本而以它書疏通證明之律書上九商八羽七角六宮五徵九數語註家皆不能曉小司馬疑其數錯塘據淮南子太元經證之始信其確又著伴官雅樂釋律四卷說文聲繫二十卷淮南天文訓補註三卷其所作古文曰述古編凡四卷年五十六坵字獻之副貢生游京師朱筠引爲上客以直隸州州判官於陝與洪亮吉孫星衍討論訓詁輿地之學論者謂坵沈博不及大昕而精當過之嘉

慶二年教匪擾陝西坵時署華州率衆乘城力遏其衝城無弓矢倣古爲合竹強弓厚背紙爲翎二人共發之達百五十步又以意爲發石之法石重十斤達三百步前後斃賊無算城獲全三年春河南有謀敗賊者賊渠張添倫取道華州者三卒不能東以積勞得末疾引歸著史記補注百三十卷詳於音訓及郡縣沿革山川所在陝甘總督松筠重其品學親至臥榻問疾索未刊著述坵取付之曰三十年精力盡於此書矣十一年卒年六十六又有詩音表一卷車制考一卷論後錄五卷爾雅釋義十卷釋地以下四篇註四卷十經文字通正書十四卷說文斟詮十四卷新斟註地理志十六卷漢書十表注十卷聖賢塚墓志十二卷

錢大昭 子東垣 釋 侗

錢大昭字晦之江蘇嘉定人太學生大昕弟也大昕深於經史一門羣從皆治古學能文章大昭少於大昕者二十年事兄如嚴師得其指授時有兩蘇之比壯歲游京師嘗代友人校錄四庫全書人間未見之祕皆得縱觀由是學益浩博又善於決擇其說經及小學之書能直入漢儒闕奧嘗欲從事爾雅大昕與書謂六經皆以明道未有不通訓詁而能知道者欲窮六經之旨必自爾雅始大昭乃著爾

雅釋文補三卷及廣雅疏義二十卷又著說文統釋六十卷其例有十一曰疏證以佐古義凡經典古義與許合者在所必收二曰音切以復古音以徐鉉徐鍇等不知古音往往誤讀又許君言讀若某者卽有某音今并補正又說文本有舊音隋書經籍志有說文音隱顏氏家訓引之唐以前傳注家多稱說文音某今並採附本字之下三曰考異以復古本凡古本暨古書所引有異同者悉取以折中四曰辨俗以正譌字凡經典相承俗字及徐氏新補新附字皆辨證詳明別爲一卷附後五曰通義以明互借凡經典之同物同音於古本是通用者皆引經證之六曰從母以明孳乳如完刑髡軌等字皆於元下注云從此七曰別體以廣異義凡重文中之籀篆古文奇字皆有所從其許未言者亦略釋之經典兩用者則引而證焉八曰正譌以訂刊誤凡許君不收之字注中不應有又字畫脫誤者並校正之九曰崇古以知古字如鷓鴣鷓鴣之類經典有不從鳥者此古今字今注曰古用某十曰補字以免漏略如由希免蟲等三十九字從此得聲者甚多而書中脫落有子無母非許例今酌補之亦別爲一卷附後大昭於正史尤精兩漢嘗謂注史與注經不同注經以明理爲宗理寓於訓詁訓詁明而理自見注史以達事爲

主事不明訓詁雖精無益也每怪服虔應劭之於漢書裴駙徐廣之於史記其時去古未遠稗官載記碑刻尙多不能會而通之考異質疑徒萋萋於訓詁乃著兩漢書辨疑四十卷於地理官制皆有所得又仿其例著三國志辨疑三卷又以宋熊方所補後漢書年表祇取材范書陳志乃於正史外兼取山經地志金石子集其體例依班氏之舊而略變通之著後漢書補表八卷計所補王侯多於熊書百三十人論者謂視萬斯同歷代史表有過之無不及他著有詩古訓十二卷經說十卷補續漢書藝文志二卷後漢郡國令長考一卷邇言二卷嘉定金石文字記四卷生平不嗜榮利名其讀書之所曰可廬欲斬至於古之隨遇自足者嘉慶元年詔舉孝廉方正之士江南大吏以大昭應徵賜六品頂戴十八年卒年七十子東垣繹侗 東垣字旣勤嘉慶三年舉人官浙江松陽縣知縣以艱歸服闋補上虞縣東垣與弟繹侗皆潛研經史金石時稱三鳳嘗與繹侗及同縣秦鑿勘訂鄭志又與繹侗鑿及桐鄉金錫篋輯釋崇文總目世稱精本東垣爲學沈博而知要以世傳孟子注疏繆舛特甚乃輯劉熙棊毋遂陸善經諸儒古注及顧炎武閻若璩同時師友之論附以己見並正其音讀考其異同爲孟子解誼十四卷他著有

小爾雅校證二卷補經義考四十卷列代建元表勤有堂文集 繹初名東壙字以成少承家學嘗以諸經句讀徵引家互有異同據武億原本參稽羣籍折中至是爲十三經斷句考又著方言箋疏十三卷五方之民言語不通循聲譯字字雖無定而音理可推是書於展轉互異處尋其音變之原古人以聲釋文之旨於斯大啟他著有說文解字讀若考三卷闕疑補一卷釋大釋小各一卷釋曲一卷訓詁類纂一百六卷 侗字同人諸生嘉慶十三年淀津召試二等賞大緞充文穎館校錄十五年舉人議敘知縣侗於說文用力致深精講韻學熟於古音之通轉嘗徵集羣書同物異名之文比而釋之爲釋聲八卷其序曰言小學者有二端曰故訓爾雅說文之屬是也曰聲音釋名之屬是也有文字然後有訓詁而聲音實在文字之先故言小學必通訓詁言訓詁必先識字欲識字必先審聲音所謂聲者萌芽於二儀初判之時廣益於草昧既開之後非後世四聲七音三十六母之說也周公制爾雅有釋詁言訓獨無釋聲與名者是以劉氏廣之爲釋名一書又曰論語必也正名乎記曰書同文天下古今之名之文可正而同也天下古今之聽音則莫能一也夫聲隨人變則字亦隨之俱變書傳所紀異言殊俗紛更錯雜

新學後進罔識據依甚者不知督郵爲獨搖而疑神農尙無此官不知文無卽靡蕪而謂當歸以贈羈旅此釋聲之書所以繼釋名而作也又曰爾雅而外以爲言故訓者首推許慎言聲音者當宗劉熙取其詮釋諸名俱以聲爲定準蓋有得乎六書形聲之旨者而彼所釋必據聲音以求故訓此所釋則皆以聲音概文字故命名爾殊也其書冥思苦索積年乃成又有羣經古音鈎沈四卷正名錄四卷九經補韻考二卷說文音韻表五卷重文小箋二卷孳乳表二卷方言義證六卷吳語詮六卷侗於曆算之學亦能究其原本大昕撰宋遼金元四史朔閏考未竟而卒侗證以羣書金石文字增輯一千三百餘條日夕檢閱推算幾忘寢食卒因是感疾而歿他著有金石錄四十卷續隸續三卷古錢待訪錄二卷樂斯堂文集

范家相 姜炳璋 盛百二 翟均廉

范家相字左南浙江會稽人乾隆十九年進士授刑部主事洊陞郎中三十三年出知廣西柳州府歲餘以疾告歸尋卒家相幼時母授之書每篝燈治紡輒卽令侍讀丙夜不少假弱冠薄遊爲人主幕務稍廢學年至四十母責其泯泯無聞乃復杜門研誦其學源出蕭山毛奇齡奇齡說經引證浩博善於詰駁而盛氣所激

其受攻擊亦最甚家相持論一出和平不敢放言高論生平最服膺者尤在餘姚黃宗羲性孝友直諒敦古誼晚歲手一編矻矻不置於詩尤深著三家詩拾遺十卷謂三家之說與禮記周官左國多不合而毛獨條條可復此毛所以得掩前人然朱子集傳每取匡劉韓子之說以糾毛失使三家並存其駁三家者或當甚於毛惟僅一二彌覺可重然則三家之是者固當信從其非者亦不妨兩存也其書撫拾經傳子史比惠棟九經古義余蕭客古經解鈎沈尤爲賅備又著詩瀋二十卷以注疏集傳爲兩大樞紐惟其合者從之間出新義補所未備而折衷孟子逆志論世之法其謂三百篇之韻叶之而不協者有三列國之方音不同一也古人一字每兼數音而字音傳譌已久非可執一以諧聲二也詩必歌而後出每以餘音相諧自歌詩之法不傳而餘音莫辨三也其說足解顧炎武毛奇齡兩家之闕他著有易說二卷書義拾遺七卷夏小正輯注四卷四書貫約十卷家語證僞十卷韻學考原二卷今韻津五卷史漢義法十卷史記蒙拾三卷廟制問答二卷刑法表四卷南中日札四卷文集二十卷同時浙中學者有姜炳璋盛百二翟均廉姜炳璋字石貞象山人乾隆十九年進士官石泉縣知縣少博通經史爲諸生

時督學雷鉉按郡試以兩漢總論炳璋授筆抒二千餘言浙東西徧傳誦焉其說經篤實近裏恪守先儒語必有據著詩序補義二十四卷以詩序首句爲國史所傳如蘇轍之例又參用朱子詩序辨說之義以貫通兩家其綱領有云有詩人之意有編詩之意如雄雉爲婦人思君凱風爲七子自責是詩人之意雄雉爲刺宣公凱風爲美孝子是編詩之意朱子順文立義大抵以詩人之意爲是詩之旨國史明乎得失之迹則以編詩之意爲一篇之要尤可謂解結之論又著讀左補義五十卷破說春秋者屈經從例之弊援據典博參考亦頗融貫又著有尊鄉集盛百二字秦川秀水人乾隆二十一年舉人官山東淄川知縣爲政靜而不擾簡而有要聽訟不多言而人自服查覈歷城濟陽災戶了了無遺能吏莫之及然素無宦情在官一年以憂去遂不仕少讀書穎悟於天文句股律呂河渠之學必研其故嘗謂羲和之法遭秦火而不傳六天沸騰莫知所從自太初以後踵事增修者七十餘家至御製律曆淵源之書出如披雲見日使千古術士詭祕之說至今日而莫遁其形始知大經大法已略具於虞書數語之內雖有古今中外之殊其理莫能外也著尚書釋天六卷解堯典舜典允征洪範之有關曆象者博採諸書

而詳疏之其大要以西法爲宗凡五易稿乃成所論說於陰陽之理性命之旨治亂得失之故洞若觀火晚居齊魯間主講山棗棗城書院十數年多有成就他著有柚堂文存四卷皆山閣吟稿四卷柚堂筆談四卷續八卷觀錄四卷問水漫錄四卷增訂教稼書二卷 翟均廉字春沚仁和人乾隆三十年舉人官內閣中書著周易章句證異十一卷取周易古今諸本篇章句讀之同異逐卦逐爻悉爲臚列考證精確所言皆有依據勝郭京舉正以意刊改託言於王韓舊本者也又著海塘錄二十六卷浙江海塘在海寧州南唐宋以來遞有修築均廉徵引各書考訂賅洽卷首載聖祖高宗親臨相度及詔諭尤足以昭示後來

褚寅亮 程際盛

褚寅亮字摺升江蘇長州人乾隆十六年召試舉人授內閣中書官至刑部員外郎寅亮少以博雅名在刑部時明於律尤戒深刻研鞠無冤濫侍郎杜玉林嘗以疑獄屬之心思精銳於史書魯魚一見便能訂其誤謬中年覃精經術一以注疏爲歸從事禮經幾三十年墨守家法專主鄭學鄭氏周禮禮記注妄庸人羣起嗤點之稱儀禮爲孤學能發揮者固絕無而謬加指摘者亦尙少惟敖繼公集說多

巧竄經文陰就已說後儒苦經注難讀喜其平易無疵之者萬斯大沈彤於鄭注亦多所糾駁至張爾岐馬駟但粗爲演繹其於敖氏之似是而非均未能正其失也寅亮著儀禮管見三卷於敖氏洞見其癥結驅豁其霧露時公羊何氏學久無循習者所謂五始三科九旨七等六輔二類之義不傳於世惟武進莊存與默會其解而寅亮能闡發之撰公羊釋例三十篇謂三傳惟公羊爲漢學孔子作春秋本爲後王制作訾議公羊者實違經旨又因何劭公言禮有殷制有時王之制與周禮不同作周禮公羊異義二卷世稱爲絕業又長於算術著句股廣問三卷嘉定錢大昕作三統術衍校正刊本誤字甚多其中月相求六扞之數句六扞當作七扞推閏餘所在加十得一句加十當作加七皆取寅亮說也又著有十三經筆記十卷諸史筆記八卷諸子筆記二卷名家文集筆記七卷又有周易一得四書自課錄乾隆四十六年以病告歸主常州龍城書院八年五十五年卒年七十六

程際盛原名炎字煥若亦長洲人乾隆四十五年進士授內閣中書官至監察御史際盛初學詩於同里沈德潛及官京師奉職三十餘年退食而歸閉關卻掃惟以窮經爲務尤深研鄭學摘鄭語之要爲周禮故書考儀禮古文今文考禮記

古訓考凡三卷書成於辛亥在段玉裁漢讀考未出以前然其讀經之法則與玉裁暗合又著說文古語考駢字分箋各二卷續方言補正一卷青浦王昶稱其書皆有功學者又有清河偶錄稻香樓集

翟灝 黃模 周廣業

翟灝字大川浙江仁和人乾隆十九年進士官金華衢州府學教授灝見聞淹博又能搜奇引僻嘗與錢塘梁玉繩論王肅撰家語難鄭氏欲搜考以證其僞因握筆互疏所出頃刻數十事時方被酒旋罷去未竟彙其精力殊絕人也著有爾雅補郭六卷以爾雅郭注未詳未聞者百四十二科邢疏補言其十餘仍闕如乃參稽衆家一一備說又云古爾雅當有釋禮篇與釋樂篇相隨祭名與講武旌旗三章乃釋禮之殘缺失次者又著四書考異七十二卷皆貫串精審爲世所推他著又有家語發覆周書考證山海經道常說文稱經證漢書藝文補志太學石鼓補考通俗篇湖山便覽無不宜齋詩文彙五十二年卒 黃模字相圃浙江錢塘人歲貢生少工詩與同里吳錫麒有李杜之目生平淡於榮利親歿後不復應舉覃思經術一意著述有夏小正分箋四卷異議二卷時稱精覈又有三家詩補考國

語補韋竹書詳證蜀書箋略武林先雅及壽德堂詩集八卷 周廣業字耕崖浙
江海寧人乾隆四十八年舉人廣業深研古學著孟子四考四卷一逸文二異本
三古注四出處時地末附辨明王世貞論孟子用於齊必敗闢楊墨非功之說又
著經史避名彙考四十六卷廣德州志

任大椿 族弟兆麟 基振

任大椿字幼植江蘇興化人祖陳晉字似武乾隆四年進士官徽州府教授以通
經聞著易象大意存解一卷發揮明簡切於人事又有燕喜堂文集后山詩集大
椿乾隆三十四年二甲一名進士授禮部儀制司主事儀制號繁劇大椿請移司
簡曹俾得竭半日一夜之力假書誦習四庫館開以薦爲纂修官時非翰林而預
纂修者八人大椿博於聞見考訂精當禮經類提要不出一手皆大椿詳定旋以
憂歸里服闋遷員外郎陞郎中五十四年授陝西道監察御史甫一月而卒年五
十二大椿家貧盡色養讀書守道義素不以空言講學服官行己無媿古人少工
文詞既與休寧戴震同舉於鄉習文論說究心漢儒之學初爲禘祫喪服等辨駁
孔賈諸儒兼難鄭君震以其思銳而議堅引鄭樵毛奇齡賊經害道爲戒自是實

事求是所學淹通於禮尤長名物始欲薈萃全經久之知其浩博難罄因思卽類以求一類既貫乃更求他類所著弁服釋例八卷深衣釋例三卷釋緡一卷皆博綜羣籍衷以己意或視爲爾雅廣疏實經禮別記之意又以字書傳世莫古於說文玉篇而呂忱字林實承說文之緒開玉篇之先字林不傳則六書相傳之脈中闕弗續著字林考逸八卷又輯蒼頡篇逸文爲二卷後族弟兆麟以二書未備爲之補正他著又有小學鈎沈二十卷吳越備史注二十卷列子釋文考異一卷詩尙清遠爲嘉定王鳴盛所稱有集六卷 兆麟原名廷麟字文田震澤籍太學生嘉慶元年舉孝廉方正以侍養辭祖德成字象先父思謙字純仁俱諸生有學行德成著白鹿洞規大義澹寧文彙思謙著易要詩譜中星考經筵堂文集薛胡語要皇極經世鈐解兆麟承家學博聞敦行又從長洲褚寅亮彭紹升游自經傳子史音韻古籀及詩古文皆穎悟解脫心契其妙爲王鳴盛錢大昕所重金壇段玉裁先與兆麟兄大椿基振遊後居蘇州交兆麟有三任之日兆麟雖好古經說然謂論典章名物在考證論性道則無庸東原博於考證而原善之作究未聞聖學宗旨嘗闢蓮涇精舍祀尹和靖立教規講經義經世之務以宋以後說詩者異同

雜糅集周迄隋諸家之說不背於序者爲毛詩通說二十卷以春秋三傳缺一不可輯啖趙程張諸家說有裨三傳者爲春秋本義十二卷又著夏小正注四卷尸子附錄四卷孟子時事略孝經本義小爾雅注弟子職注聲音表古樂譜石鼓文集釋各一卷其夏小正注移主夫出火在三月移時有見梯始收在五月復補采芑雞始乳二條鳴盛稱其確當又以課授生徒編錄三代兩漢之書爲述記四卷其詩文曰有竹居集凡十三卷 基振字領從篤志研經著爾雅注疏箋補戴震序稱其考索精詳震著爾雅文字考多引其說

梁上國 張崇蘭

梁上國字斯儀福建長樂人少爲大興朱珪所賞識入讀書社乾隆四十年成進士改翰林院庶吉士習國書散館改除大學士于敏中惜其才奏請留館學習尋以憂歸五十五年再散館授編修嘉慶二年轉御史六年巡視濟寧漕務七年遷給事中復除內閣侍讀學士九年遷太常寺少卿復遷奉天府丞十二年內遷詹事府少詹事稽察覺羅官學十四年以前失察通倉盜米罪吏議十五年復補內閣侍讀學士十八年擢太僕寺少卿是秋奉命督學廣西十九年晉太常寺卿二

十年卒於官年六十八上國通經知時務凡當世之急務鄉里之利病旁咨博訪多所建白時楚蜀用兵疏言六事曰正罪名以申國法尙謀議以籌勝算設統帥以一兵權添士卒以壯軍威杜冒濫以收實用妥招撫以淨賊根上覽奏趣令更立法紀軍政始肅閩南奸民結黨通兵役號天地會蔓延他郡肆鈔掠有司匿不聞復疏請敕大吏密察掩捕獲其渠餘黨解散一方遂安臺灣噶瑪蘭居淡水廳之北屢爲海賊蔡牽朱潰所覬覦上國疏請收撫其地上令督撫議尋見施行惟巡視南城時以所轄六門郭外遼闊多歧徑奸慝易溷因請分村落定坊戶以便稽察汰冗役設鄉約以資講諭參用保甲法而通變之吏議格不行後十餘年逆賊林清構煽營窟適在近郊時服其先見生平質直好學不蹈脂韋好面規人過治經不苟同於人古文尙書自閻若璩疏證出同時毛奇齡冤詞朱鶴齡埤傳仍以孔安國傳爲真本自後學者尊信閻氏無異詞上國著古文尙書條辨八卷力攻閻氏惟語多嫉激世鮮好之大興翁方綱序其書謂古文諸篇皆聖賢之言有裨於人國家有資於學者不宜輕議閻氏多嫉激語故梁子亦嫉激以敵之此非梁子之過閻氏之過也然上國之學不盡同於奇齡有駁毛氏大學證文一卷他

著又有數目通典十卷閩海人文五卷山左山右遼瀋粵西遊記四卷九山詩文集十二卷上國之後又有張崇蘭 張崇蘭字猗谷江蘇丹徒人歲貢生著古文尙書私議三卷謂古文義理精密隋書唐正義原委具有明徵乃據惠棟古文尙書考分條析之其閻氏書惠所不采者以爲未安不再辨惠氏而下襲其說而立異同者隨所見爲之剖晰大旨與上國書同崇蘭學務根柢善談名理有悔廬文鈔五卷

戴震

戴震字東原安徽休寧人讀書好深湛之思少時塾師授以說文三年盡得其節目年十六七研精注疏實事求是主一家與郡人鄭牧汪肇龍汪梧鳳方矩程瑤田金榜從婺源江永游震出所學質之永永爲之駭歎永精禮經及推步鍾律音聲文字之學惟震能得其全性特介年二十八補諸生家屢空而學日進與吳縣惠棟吳江沈彤爲忘年友以避讐入都北方學者如獻縣紀昀大興朱筠南方學者如嘉定錢大昕王鳴盛餘姚盧文昭青浦王昶皆折節與交尙書秦蕙田纂五禮通考求精於推步者大昕舉震蕙田延之纂觀象授時一門乾隆二十七年

舉鄉試三十八年詔開四庫館徵海內淹貫之士司編校之職總裁薦震充纂修四十年特命與會試中式者同赴殿試賜同進士出身改翰林院庶吉士震以文學受知出入著作之庭館中有奇文疑義輒就咨訪震亦思勤修其職晨夕披檢無閒寒暑經進圖籍論次精審所校大戴禮記水經注尤精覈又於永樂大典內得九章五曹算經七種皆王錫闡梅文鼎所未見震正譌補脫以進得旨刊行御製詩冠其卷首四十二年卒於官年五十有五震之學由聲音文字以求訓詁由訓詁以尋義理謂義理不可空憑胸臆必求之於古經求之古經而遺文垂絕今古懸隔必求之古訓古訓明則古經明古經明則賢人聖人之義理明而我心之所同然者乃因之而明義理非他存乎典章制度者也彼歧訓詁義理而二之是訓詁非以明義理而義理不寓乎典章制度勢必流入於異學曲說而不自知也震爲學精誠解辨每立一義初若扞獲及參考之果不可易大約有三曰小學曰測算曰典章制度其小學書有六書論三卷聲韻考四卷聲類表九卷方言疏證十卷漢以後轉注之學失傳好古如顧炎武亦不深省震謂指事象形諧聲會意四者爲書之體假借轉注二者爲書之用一字具數用者爲假借數字共一用者

爲轉注初哉首基之皆爲始印吾台予之皆爲我其義轉相注也又自漢以來古音淺微學者於六書之故靡所從入顧氏古音表入聲與廣韻相反震謂有入無入之韻當兩兩相配以入聲爲之樞紐真至仙十四韻與脂微齊皆灰五韻同入聲東至江四韻及陽至登八韻與支之佳哈蕭宥肴豪尤侯幽十一韻同入聲侵至凡九韻之入聲則從廣韻無與之配魚虞模歌戈麻六韻廣韻無入聲今同以鐸爲入聲不與唐相配而古音遞轉及六書諧聲之故胥可由此得之皆古人所未發其測算書有原象四篇迎日推策記一篇句股割圓記三篇曆問一卷古曆考二卷續天文略三卷策算一卷自漢以來疇人不知有黃極西人入中國始云赤道極之外又有黃道極是爲七政恆星右旋之樞詫爲六經所未有震謂西人所云赤極卽周髀之正北極也黃極卽周髀之北極璿璣也虞書在璿璣玉衡以齊七政蓋設璿璣以擬黃道極也黃極在柱史星東南上弼少弼之間終古不隨歲差而改赤極居中黃極環繞其外周髀固已言之不始於西人也又月建所指亦謂黃極夫北極璿璣冬至夜半恆指子春分夜半恆指卯夏至夜半恆指午秋分夜半恆指酉以周髀四遊所極推之則月建十有二辰爲黃極夜半所指顯然

漢人以爲斗杓移辰者非也又漢以來九數佚於秦火儒者測天多不能盡句股之蘊西人傳弧三角術推步始爲精密其三邊求角及兩邊夾一角求對角之邊加減捷法梅氏用平儀之理爲圖闡之可謂剖析淵微然用餘弦折半爲中數則過象限與不過象限有相加相減之殊未爲甚捷也震謂用餘弦者或加或減易生歧惑乃立新術用總較兩弧之矢相較半折爲中數則一例用減更簡而捷矣蓋餘弦者矢之餘也八線法弧小則餘弦大弧大則餘弦小弧若大過象限九十度則餘弦反由小而漸大惟矢不然弧小則矢小弧大則矢大弧若大過象限九十度則矢更隨之而大是矢與弧大小相應不似餘弦之參差故以易之此立法之根古人所未及也震所著典章制度之書未成有詩經二南補注二卷毛鄭詩考四卷尙書義考一卷儀禮考正一卷考工記圖二卷春秋卽位改元考一卷大學補注一卷中庸補注一卷孟子字義疏證三卷爾雅文字考十卷經說四卷水地記一卷水經注四十卷九章補圖一卷屈原賦注七卷通釋二卷原善三卷緒言三卷直隸河渠書六十四卷氣穴記一卷藏府算經論四卷葬法贅言四卷文集十二卷震卒後其小學則高郵王念孫金壇段玉裁傳之測算之學則曲阜孔

廣森傳之典章制度之學則興化任大椿傳之皆其弟子也後十餘年高宗以震所校水經注問南書房諸臣曰震尙在否對曰已死上惋惜久之

段玉裁 鈕樹玉 陳樹華

段玉裁字若膺江蘇金壇人生而穎異讀書有兼人之資年十三補諸生學使尹會一授以小學書遂究心焉乾隆二十五年舉人至京師見休寧戴震好其學遂師事之以教習得貴州玉屏縣知縣旋調四川署富順及南溪縣事又辦理化林坪站務時大兵征金川輓輸絡繹玉裁處分畢輒篝燈著述不輟著六書音韻表五卷古韻自顧炎武析爲十部後江永復析爲十三部玉裁謂支佳一部也脂微齊皆灰一部也之哈一部也漢人猶未嘗淆借通用晉宋而後乃少有出入迄乎唐之功令支注脂之同用佳注皆同用灰注哈同用於是古之截然爲三者罕有知之又謂眞臻先與諄文殷魂痕爲二尤幽與侯爲二得十七部其書始名詩經韻譜羣經韻譜嘉定錢大昕見之以爲鑿破混沌後易其體例增以新加十七部蓋如舊也書成自蜀寄震震偉其所學之精云自唐以來講韻學者所未發尋任巫山縣年四十六以父老引疾歸卜居蘇州之楓橋鍵戶不問世事者三十餘年

玉裁於周秦兩漢書無所不讀諸家小學皆別擇其是非於是積數十年精力專說說文著說文解字三十卷謂爾雅以下義書也聲類以下音書也說文形書也凡篆一字先訓其義次釋其形次釋其音合三者以完一篆故曰形書又謂許以形爲主因形以說音說義其所說義與他書絕不同者他書多段借則字多非本義許惟就字說其本義知何者爲本義乃知何者爲段借則本義乃段借之權衡也說文爾雅相爲表裏治說文而後爾雅及傳注明又謂自倉頡造字時至唐虞三代秦漢以及許叔重造說文曰某聲曰讀若某者皆條理合一不紊故既用徐鉉切音又某字志之曰古音第幾部後附六書音韻表俾形聲相爲表裏始爲長編名說文解字讀凡五百四十卷既乃隱括之成此注書未成海內想望者幾三十年嘉慶十七年始付梓高郵王念孫序之曰千七百年無此作矣玉裁又以說文者說字之書故有讀如無讀爲說經傳之書必兼是二者漢人作注於字發疑正讀其例有三讀如讀若者擬其音也比方之詞讀爲讀曰者易其字也變化之詞當爲者定爲字之誤聲之誤而改其字也救正之詞三者分而漢注可讀而經可讀述漢讀考先成周禮六卷又撰禮經漢讀考一卷其他十六卷未成儀徵阮

元謂玉裁書有功於天下後世者三言古音一也言說文二也漢讀考三也其他說經之書以漢志毛詩經毛詩故訓傳本各自爲書因釐次傳文還其舊著重訂毛詩故訓傳三十卷以諸經惟尙書離厄最甚古文幾亡賈逵分別古今劉陶是正文字其書皆不存乃廣蒐補闕正晉唐之妄改存周漢之駁文著古文尙書撰異三十二卷又錄左氏經文取鄭注禮周禮存古文今文故書之例附見公羊穀梁經文之異著春秋左氏古經十二卷而以左氏傳五十凡附後又有毛詩小學三十卷汲古閣說文訂十六卷經韻樓集十二卷二十年卒年八十一初玉裁與念孫俱師震故戴氏有段王兩家之學玉裁少震四歲謙焉執弟子禮雖耄或稱震必垂手拱立朔望必莊誦震手札一通卒後王念孫謂其弟子長洲陳奐曰若膺死天下遂無讀書人矣玉裁弟子長洲徐頌嘉興沈濤及女夫仁和龔麗正俱知名而奐尤得其傳 鈕樹玉字匪石江蘇吳縣人居東洞庭隱於買篤志好古不爲科舉之業精研文字聲音訓詁謂說文懸諸日月而不刊者也後人以新附淆之誣許君矣因博稽載籍著說文新附考六卷續考一卷又著說文解字校錄三十卷樹玉後見玉裁書著段氏說文注訂八卷所駁正之處皆有依據時又有

元和舉人徐承慶著段注匡謬十五卷尤勝鈕氏書 陳樹華字芳林江蘇元和人乾隆元年廩貢生授湖南武岡州州同以註誤回籍已復由縣丞陞知縣洊擢山西澤州府同知以到任遲延降補寧鄉知縣樹華勤學有左癖官湖南時得慶元間吳興沈作賓分系諸經注本乃棄官歸里徧考他經傳記子史別集與左氏經傳及注有異同者成春秋內傳考證五十一卷同時戴震盧文弨金榜王念孫皆服其該洽段玉裁自蜀歸移居蘇州讀其書歎爲善本因錄其副以訂阮元十三經校勘記後錢塘嚴杰授以慶元所刻淳化諸善本令樹華精詳摭摭其是非難定者玉裁爲折衷焉樹華又有國語補音訂誤及詩集嘉慶六年卒年七十二

凌廷堪

凌廷堪字次仲安徽歙縣人六歲而孤冠後始讀書慕其鄉江永戴震之學乾隆五十五年進士改教職選寧國府教授奉母之官畢力著述嘉慶十四年卒年五十五廷堪之學無所不窺於六書算曆以迄古今疆域之沿革職官之異同靡不條貫尤專禮學謂古聖使人復性者學也所學卽禮也顏淵問仁孔子告之者惟禮焉爾顏子歎道之高堅前後迨博文約禮然後如有所立即立於禮之立也禮

有節文度數非空言理者可託著禮經釋例十三卷謂禮儀委曲繁重必須會通其例如鄉飲酒鄉射燕禮大射不同而其爲獻酢酬旅酬無算爵之例則同聘禮覲禮不同而其爲郊勞執玉行享庭實之例則同特牲饋食少牢饋食不同而其爲尸飯主人初獻主婦亞獻賓長三獻祭畢飲酒之例則同乃區爲八例以明同中之異異中之同曰通例曰飲食例曰賓客例曰射例曰變例曰祭例曰器服例曰雜例禮經第十一篇自漢以來說者雖多由不明尊尊之旨故罕得經意乃復爲封建尊尊服制考一篇附於變例之後大興朱珪讀其書贈詩推重之廷堪禮經而外復潛心於樂謂今世俗樂與古雅樂中隔唐人燕樂一闕蔡季通鄭世子輩俱未之知因以隋沛公鄭澤五旦七調之說爲燕樂之本又參考段安節琵琶錄張叔夏詞原遼史樂志諸書著燕樂考原六卷江都江藩歎以爲思通鬼神外有充渠新書二卷元遺山年譜二卷梅邊吹笛譜二卷校禮堂文集三十六卷詩集十四卷儀徵阮元嘗命子常生從廷堪授士禮又稱其鄉射五物考九拜解九祭解釋牲詩楚茨考諸說經之文多發古人所未發其尤卓然者則復禮三篇云

江聲 兄筠 孫沅 顧廣圻

江聲字叔澧江蘇元和人七歲就傅讀書問讀書何爲師以取科第爲言聲求所以進於是者稍長與兄筠共學不事帖括年二十九遭父疾晨夕侍牀褥不解衣帶至自滌械窻視穢以驗疾進退及居憂哀毀骨立逾三年容戚然如新喪者侍母疾居喪亦如父歿時少讀尙書怪古今文不類又疑孔傳非安國所爲年三十五師事同郡惠棟得讀所著古文尙書考及闔若璩古文疏證年四十一以棟旣作周易述搜討古學乃撰尙書集注音疏存今文二十九篇以別梅氏所上二十八篇之僞造取書傳所引湯征泰誓諸篇逸文按書序錄入又取說文經子所引書古文本字更正秦人隸書及唐開元改易古字之謬輯鄭康成殘注及漢儒逸說附以己見而爲之疏以明其說之有本以篆寫經復三代文字之舊凡四易稿積十餘年而後成共十二卷說一卷泰誓後得馬融頌以爲疑聲辨之曰融意以泰誓非伏生所傳故疑之爾然泰誓維四月太子發上祭於畢云云尙書大傳旣引其文所以不傳者生年老容有遺忘大傳能引九共帝告片語而不傳其全文是其明驗也漢書藝文志云尙書古文經五十七篇計伏生書二十八篇三分盤庚爲三十加孔氏多出二十四篇才五十四加泰誓三篇適五十七若無泰誓不

符其數融疑所稱八百諸侯不期而會然婁敬說高祖嘗言之又疑火流爲雕以穀俱來爲神恠然孔子繫易稱河出圖洛出書論語亦曰鳳鳥不至河不出圖吾已矣夫符瑞之徵聖人且覲幸之謂爲子所不語豈通論乎詩思文貽我來牟卽此以穀俱來之謂融亦將斥爲誕乎融又以書傳所引泰誓甚多而疑此泰誓皆無有案湯誓傳自伏生今古文皆有而墨子兩引湯誓中亦無之泰誓亦猶是耳大傳引盤庚曰若德明哉湯任父言卑應言引無逸曰厥兆天子爵今經反遺其語然則伏生旣傳之後歐陽夏侯遞有師承猶不能無闕逸況泰誓經灰燼之餘百年而出耶其論爲閻惠諸人所未及聲又病後世深求考老轉注之義至以篆迹求之因爲六書說謂建類一首卽始一終亥五百四十部之首同意相受卽凡某之屬皆從某也陽湖孫星衍亦推其說以爲爾雅肇祖元胎之屬始也始亦建類一首肇祖元胎皆爲始亦同意相受說文此類亦甚多推考老之訓如口部之咽噏也噏咽也走部之走趨也趨走也猶之考轉注老老轉注考矣其同在口部走部卽建類一首也聲亦以爲然而戴震以爲貫全部則義太廣聲折之曰若止考老爲轉注不已隘乎且諧聲一義不貫全部乎聲與震以學問相推重其不相

附和如此聲嘗爲說文解字考證及見金壇段玉裁所著遂舉稿本付之又嘗爲畢沅校刊釋名爲之疏證皆以篆書生平不爲行楷與人筆札皆作古篆俗儒往往非笑之而聲不顧也其寫尙書灑水字灑字不在說文灑据淮南作塵灑据爾雅義作孟人始或恠之後服其非臆說顧其書終以時俗不便識讀不甚行於時又嘗舉經子古書俱繩以說文字例去其俗字命曰經史子字準繩又著論語竢質三卷六書淺說一卷恆星說一卷良庭小慧一卷良庭者晚年因性不諧俗取周易艮背之義自號也聲性耿介不慕榮利交游如王鳴盛王昶畢沅皆重其品藻而聲未嘗以私事干之嘉慶元年詔開孝廉方正科江蘇巡撫費淳首舉聲賜六品頂戴四年卒年七十九 筠字震滄乾隆二十七年舉人幼依外家於無錫爲吳鼐高弟子博雅好古長於三禮三傳著有讀儀禮私記其書多取敖繼公郝敬萬斯大諸家說異於注疏者訂其是非而亦時出新意戴震金榜甚稱之卒年六十二聲子鏐孫沅能世其學鏐字貢庭諸生後聲一年卒 沅字子蘭優貢生金壇段玉裁僑居蘇州沅出入其門者數十年玉裁著六書音均表發明平上入分合相配曰此表惟江聲及沅知之外無第三人知者沅先著說文釋例後承玉

裁屬以段書十七部諧聲表之列某聲某聲者爲綱而件係之聲復生聲則依其次第爲說文解字音韻表凡十七卷沉於段紕譌處略箋其失其言曰支脂之之爲三眞臻先與諄文欣魂痕之爲二皆陸氏之舊而段氏矜爲獨得之祕嚴分其界以自殊異凡許氏所合韻處皆多方改使離之而一部之與十二部亦不使相通故韻之讀祕改爲逼肱之乙聲刪去聲字必之弋亦聲改爲八亦聲而於開章一篆說解極一物三字卽是一部十二部十五部合韻之理於是絕不敢言其韻直至亥字下重文說之也十二十三兩部之相通者惟民昏二字爲梗故力去昏字以就其說畀字由聲十五部也縹從畀得聲而縹卽古綦字在一部遂改畀字爲由聲以避十五部與一部之合音凡此皆段氏之癥結處也又曰段氏論音謂古無去故譜諸書平而上入沉意古音有去無入平輕去重平引成上去促成入上入之字少於平去職是故耳北人語言入皆成去古音所沿至今猶舊非敢苟異參之或然沉當時面質玉裁親許駁勘故有不同云卒年七十二 顧廣圻字千里江蘇元和人諸生吳中自惠氏父子後江聲繼之後進翕然多好古窮經之士聲弟子數十人而徐頤鈕樹玉及廣圻俱以通小學爲聲契賞廣圻讀惠氏書

盡通其義論經學云漢人治經最重師法古文今文其說各異若混而一之則輻輳不勝矣論小學云說文一書不過爲六書發凡原非字義盡於此廣圻天質過人經史訓詁天算輿地靡不貫通至於目錄之學尤爲專門時人方之王仲寶阮孝緒兼工校讐同時孫星衍張敦仁黃丕烈胡克家延校宋本說文體記儀禮國語國策文選諸書皆爲之札記考定文字有益後學又時爲漢學者多譏宋儒廣圻獨取先儒語錄摘其切近者爲遯翁苦口一卷以教學者著有思適齋文集十八卷道光十九年卒年七十

崔述

崔述字武承直隸大名入乾隆二十七年舉人選授福建羅源縣知縣時武弁多藉海盜邀功遇漳泉商船索賄不與遂誣爲盜述平反之調上杭關稅向贏數千金述悉解充緝盜公費未幾投劾歸卜居相州閉門著述著書三十餘種而考信錄一書尤爲生平心力所專注凡考古提要二卷上古考信錄二卷唐虞考信錄四卷夏商考信錄四卷豐鎬考信錄八卷洙泗考信錄四卷豐鎬別錄三卷洙泗餘錄三卷孟子事實錄二卷考古續說二卷附錄二卷又有王政三大典考三卷

讀風偶識四卷尙書辨僞二卷論語餘說一卷讀經餘論二卷名考古異錄其自
敘著書大旨謂不以傳注雜於經不以諸子百家雜於傳注以經爲主傳注之合
於經者著之不合者辨之異說不經之言則闕其謬而削之如謂易傳僅溯至伏
義春秋傳僅溯至黃帝不應後人所知反多於古人凡緯書所云十紀史所云天
皇地皇人皇皆妄也謂戰國時楊墨橫議常非堯舜薄湯武以快其私毀堯則託
諸許由毀禹則託諸子高毀孔子則託諸老聃毀武王則託諸伯夷太史公尊黃
老故好采異端雜說學者但當信論孟不當信史記謂夏商周未有號爲某公者
公亶父相連成文猶所謂公劉也古公亶父猶言昔公亶父也謂匡爲宋邑似畏
匡過宋本一事匡人其如予何桓魋其如予何似一時一事之言記者小異耳其
說皆爲有見然述學主見聞勇於自信雖有考證而從橫軒輊任意而爲者亦多
有之他著有易卦圖說一卷五服異同彙考三卷大名水道考一卷菽田贍筆二
卷雜錄二卷瑣記二卷綴語二卷大恠談一卷涉世雜談一卷聞見雜記四卷知
味錄二卷知非集三卷無聞集五卷小草集五卷嘉慶二十一年卒年七十七弟
子石屏陳履和爲刊其遺書

程瑤田

程瑤田字易疇安徽歙縣人乾隆三十五年舉人選嘉定教諭嘉慶元年舉孝廉方正十九年卒年九十瑤田少師淳安方粹然又與戴震金榜同學於江永篤志治經震自言遜其精密其學長於涵泳經文得其真解不屑屑依傍傳注以喪服緦麻章末長殤中殤降一等四句鄭氏誤以爲傳文故觸處難通又不杖期章惟子不報傳文公妾以及士妾爲其父母傳文鄭氏以爲失誤大功章大夫之妾爲君之庶子女子已嫁者未嫁者爲世父母叔父母姑姊妹舊讀以大夫之妾爲建首下二爲字貫之鄭氏謂女子別起貫下斥傳文爲不辭皆援據經史疏通證明以規鄭失著儀禮喪服文足徵記十卷又以考工記諸言磬句磬折鄭氏度直矩解之致與前後經文不合謂磬折不明由於倨句不明欲明倨句先辨矩字矩有直有曲倨句之云折其直矩而爲曲矩卽今木石工所用之曲尺著磬折古義一卷又以鄭注太宰九穀稷梁二者言人人殊因詢考農家據說文釋之謂梁爲粟以稷爲秫今高粱也著九穀考四卷又宗法小記釋宮小記考工創物小記溝洫疆理小記水地小記解字小記聲律小記釋草小記釋蟲小記各一卷皆考證精

確爲學者所宗又論學小記一卷外篇一卷其論性謂性從質形氣而有譬之水與鏡水之清鏡之明質形氣之清明也是卽性也清明能鑑物濁暗不能鑑物此智愚所由分然極濁極暗清明自在其中是卽下愚不移者其性之善自若也又謂性不可見於情見之情是心之起念心只一念善者居其先惡則從善而轉之耳今爲盜賊者其初只有謀生一念豈不欲擇其善者爲之至皆不可得乃不得已而爲盜賊又必有一二爲盜賊者從而引之所謂習也他著又有禹貢三江考讀書求解數度小記九勢碎事修辭餘鈔各一卷統名通藝錄瑤田性退讓初效鄭康成爲禮堂繼念非讓無以明禮官嘉定時以身率教復以讓名堂及告歸邑人購忠烈名流手蹟贈之不肯受曰先生不取吾邑一錢豈破紙亦不受耶王鳴盛贈詩云官惟當湖陸師則新安程一百五十載卓然兩先生其推重如此浙撫阮元嘗聘修杭州府學樂器多所參訂善鼓琴年老失明猶口授其孫成琴音記三卷詩爲桐城劉大櫟所稱有集十八卷粹然字心醇黎如子著有十三經注疏類鈔一百卷禮服古制二十卷皆佚不傳

邵晉涵 周永年

邵晉涵字二雲浙江餘姚人乾隆三十六年進士歸班銓選會開四庫館特詔徵晉涵及歷城周永年休寧戴震等入館編纂改翰林院庶吉士授編修四十五年充廣西鄉試正考官五十六年大考遷左中允洊擢侍講學士充文淵閣直閣事日講起居注官晉涵左目眇清羸善讀書四部七錄靡不研究嘗謂爾雅者六藝之津梁而邢疏淺陋不稱乃爲正義二十卷以郭璞爲宗而兼采舍人樊劉李孫諸家郭有未詳者擇他書附之自是承學之士多舍邢而從邵尤長於史以生長浙東習聞劉宗周黃宗羲諸緒論說明季事往往出於正史之外在書館時見永樂大典采薛居正舊五代史乃薈萃編次得十之八九復采冊府元龜太平御覽諸書以補其缺並參考通鑑長編諸史及宋人說部碑碣辨證條繫悉符原書一百五十卷之舊書成呈御覽館臣請仿劉昫舊唐書之例列於二十三史刊布學宮詔從之由是薛史與歐陽史並傳矣嘗謂宋史自南渡後多謬慶元之間褻貶失實不如東都有王偁事略欲先輯南都事略使條貫粗具詞簡事增又欲爲趙宋一代之志俱未卒業其後鎮洋畢沅爲續宋元通鑑屬晉涵刪補考定故其緒餘稍見於審正續通鑑中晉涵性狷介不爲要人屈嘗與會稽章學誠論修宋史

宗旨晉涵曰宋人門戶之習語錄庸陋之風誠可鄙也然其立身制行出於倫常日用何可廢耶士大夫博學工文雄出當世而於辭受取與出處進退之間不能無簞豆萬鍾之擇本心既失其他又何議乎此著宋史之宗旨也學誠聞而聳然他著有孟子述義穀梁正義韓詩內傳考並足正趙岐范寧及王應麟之失而補其所遺又有皇朝大臣謚迹錄方輿金石編日輜軒日記南江詩文稿嘉慶元年卒年五十四 周永年字書昌山東歷城人少嗜學聚書五萬卷築籍書園祀漢經師伏生等博洽貫通爲時推許乾隆二十六年進士特詔徵修四庫書改翰林院庶吉士散館授編修充文淵閣校理官四十四年充貴州鄉試副考官永年在書館見宋元遺書湮沒者多采入永樂大典中於抉摘編摩自新喻劉氏兄弟公是公非集以下凡得十餘家皆前人所未見者悉著於錄生平與邵晉涵及江都程晉芳歸安丁杰曲阜桂馥交最契嘗借館中書與馥爲四部考傭書工十人日夜鈔校會禁借官書乃止其爲學務觀大義不讐章句自謂文拙不存稿著有先正讀書訣一卷卒年六十二

孔廣森 孔繼涵

孔廣森字驥軒山東曲阜人孔子六十八代孫襲封衍聖公傳鐸之孫戶部主事繼汾之子乾隆三十六年進士改翰林院庶吉士散館授檢討年少入官翩翩華胄一時爭與之交然性淡泊耽著述不與要人通謁告養歸不復出及居大母與父喪竟以哀卒時乾隆五十一年年三十五廣森聰穎特達嘗受經戴震姚鼐之門經史小學沈覽妙解所學在公羊春秋嘗以左氏舊學溷於征南穀梁本義汨於武子王祖游謂何休志通公羊往往爲公羊疾病其餘啖助趙匡之徒又橫生義例無當於經唯趙汭最爲近正何氏體大思精然不無承譌率臆於是旁通諸家兼采左穀擇善而從著春秋公羊通義十一卷序一卷凡諸經籍義有可通於公羊者著錄之其不同於解詁者大端有數事謂古者諸侯分土而守分民而治有不純臣之義故各得紀年於其境內而何邵公謂唯王者然後改元立號經書元年爲託王於魯則自蹈所云反傳違戾之失其不同一也謂春秋分十二公而爲三世舊說所傳聞之世隱桓莊閔僖也所聞之世文宣成襄也所見之世昭定哀也顏安樂以爲襄公二十三年邾婁鼻我來奔云邾婁無大夫此何以書以近書也又昭公二十七年邾婁快來奔云邾婁無大夫此何以書以近書也二文不

異同宜一世故斷孔子生後卽爲所見之世從之其不同二也謂桓十七年經無夏二家經皆有夏獨公羊脫耳何氏謂夏者陽也月者陰也去夏者明大夫不繫於公也所不敢言其不同三也謂春秋上本天道中用王法而下理人情天道者一曰時二曰月三曰日王法者一曰譏二曰貶三曰絕人情者一曰尊二曰親三曰賢此三科九旨而何氏文謚例云三科九旨者新周故宋以春秋當新王此一科三旨也又云所見異辭所聞異辭所傳聞又異辭二科六旨也又內其國而外諸夏內諸夏而外夷狄是三科九旨也其不同四也他如何氏所據間有失者多所裨損以成一家之言又謂左氏之事詳公羊之義長春秋重義不重事皆好學深思心知其意故能融會貫通使是非之旨不謬於聖人大旨見自序中儀徵阮元謂讀其書始知聖志之所在又著大戴禮記補注十四卷詩聲類十三卷禮學卮言六卷經學卮言六卷少廣正負術內外篇六卷駢體兼有漢魏六朝初唐之勝江都汪中讀之歎爲絕手然廣森不自足作堂於其居名曰儀鄭自庶幾於康成惜奔走家難勞思天年藝林有遺憾焉 孔繼涵字體生廣森從父乾隆三十二年進士官戶部主事充日下舊聞纂修官以母疾乞養歸繼涵篤於內行雅志

稽古於天文地志經學字義算數之書無不博綜與休寧戴震友善考證異同良多資益凡所鈔校者數千百帙集唐以來金石刻千餘種與經義史志相比附又彙梓罕存之本爲微波榭叢書及搜梓算經十書皆爲世所稱所自著有春秋世族譜春秋地々人名同名錄春秋閏例日食例左國蒙求國語解訂譌周官聯事考工車度記補林氏考工記解句股粟米法釋數同度記水經釋地紅欄書屋集二卷詞四卷四十八年卒年四十五子廣棡能傳其學廣棡字伯誠乾隆四十四年舉人繼涵所著春秋各書未竟厥緒廣棡實終之嘉慶四年卒年四十五

劉台拱 劉玉麀

劉台拱字端臨江蘇寶應人父世蕃舉孝廉方正不就官靖江縣訓導教士有聲台拱幼不好戲六歲母歿哀毀如成人九歲作顏子頌心慕理學及長見同里王懋竑朱澤澗書遂篤志程朱之學乾隆三十五年舉人屢試禮部不第大興朱珪校禮闈得其卷歎爲績學之士時四庫館開台拱在都與朱筠程晉芳戴震邵晉涵及同郡任大椿王念孫等遊稽經考古旦夕討論台拱齒最少每發一義諸人莫不折服其學自天文律呂至聲音文字靡不該貫考證名物精研義理未嘗離

而二之於漢宋諸儒之說不專一家惟是之求精思所到如與古作者晤言一室而知其意指之所存以論語禮經爲孔氏微言大義所在用力尤深選丹徒縣訓導課士以敦品立行爲先暇則誦習古訓親爲講畫取儀禮十七篇除喪服外各繪爲圖與諸生習禮容爲發明先王制作之精意迎兩親學署雍雍色養事繼母尤孝母或返家書至目輒睜嘗客他所忽心痛驟歸母病危甚台拱侍湯藥衣不解帶者數旬病遂愈及兩親歿水漿不入口哀動鄰里旣斂枕苫啜粥自是出就外寢蔬食者五年青浦王昶以爲有曾閔之孝而王念孫則稱其學與閔若璩相伯仲朱筠嘗曰台拱大賢也豈獨學問過人也邵晉涵亦曰予交友中淵通靜遠造次必儒者台拱一人而已然台拱以聖賢之道自繩與人遊處未嘗一字及道學也卒以哀毀過情臥病不起嘉慶十年卒年五十五台拱慎於接物而好誘掖後進與王念孫及金壇段玉裁江都汪中最稱莫逆中恃才傲物獨心折台拱嘗曰君欲吾養德性無騁血氣使吾見所不足吾所以服也及中歿台拱撫其孤喜孫成立武進臧庸常以經義請益台拱飲食教誨之十七年如一日庸心感焉生平無他嗜好唯聚書數萬卷及金石文字日夕冥搜而不務著述卒後稿多零落

僅輯成論語駢枝一卷儀禮傳注一卷經傳小記三卷荀子補注一卷漢學拾遺一卷文集一卷及方言補校淮南子補校國語補諸書其說論語如切如磋如琢如磨則據爾雅之文有事弟子服其勞有酒食先生饌則據內則之文子貢欲去告朔之餼羊則據周官大戴記穀梁傳之文師摯之始關雎之亂則據周官儀禮之文入公門以下則據聘禮之文吉月必朝服而朝孔子時其亡也而往拜之則據玉藻之文皆聖經之達詁而傳注之所未及其疏釋儀禮經文能默念其意既補鄭注之缺兼斥敖氏之妄如橫弓之爲南踣弓張侯設乏之在前一日饌於東方之在東堂下下飲之非在西階下朝祖之奠非用脯醢醴酒皆條理緻密至於荀子補注綴評事之疏漏漢學拾遺箴祕書之違失凡所糾正悉徹本源云 劉玉麐字又徐亦寶應人乾隆四十二年拔貢生以直隸州州判分發廣西歷官鬱林州州判知象州龍門北流等縣所至有政聲嘉慶二年貴州興義府苗亂延及泗城玉麐襄理軍儲爲賊礮所擊歿於軍年六十事聞得旨廕卹玉麐砥行礪學博通經史遊京師獲聞戴震程瑤田諸人緒論又就正於劉台拱所學日進著有爾雅補疏粵西金石錄等書歿後散佚後人掇其說經之文爲甓齋遺稿儀徵阮

元刻入經解中

臧庸 弟禮堂

臧庸本名鏞堂字在東江蘇武進人高祖琳已有傳庸與弟禮堂俱事錢塘盧文
昭沈默樸厚學術精審續其高祖之學擬經義雜記爲拜經日記八卷高郵王念
孫亟稱之其敍孟子年譜辨齊宣王湣王之譌閩縣陳壽祺歎爲絕識又著拜經
文集四卷月令雜說二卷樂記二十三篇注一卷孝經考異一卷子夏易傳一卷
詩考異四卷韓詩遺說二卷訂譌一卷盧植禮記解詁一卷爾雅古注三卷說文
舊音考三卷蔡邕月令章句二卷王肅禮記注一卷聖證論一卷尸子一卷賈唐
國語注一卷蕭該漢書音義二卷校鄭康成易注二卷其輯子夏易傳辨此傳爲
漢韓嬰作非卜子夏其詩考異大旨如王伯厚但逐條必自考輯不依循王本庸
初因寶應劉台拱獲交儀徵阮元其後館元署中爲多元寫其書爲副本以原本
還其家嘉慶十六年卒年四十五 禮堂字和貴事親孝父病瘡冬月畏火禮堂
潛以身溫被及卒居喪如禮三年不見齒母遭危疾刲股和藥私禱於神願減齒
一紀初娶婦時教以孝弟長言令熟聽乃合卷一家感而化之尤精小學善讐校

師事錢大昕業益進好許氏說文解字以南唐徐氏兄弟治此楚金尤專業而世傳小徐本轉寫譌異闕者據大徐本補之益失真得元板熊氏韻會舉要所引小徐善本重輯說文繫傳十五卷又刺取許引諸經爲說文經考三十卷又爲南宋石經考二卷慕古孝子孝婦事作孝傳百三十卷尙書集解案六卷三禮注校字六卷春秋注疏校正六卷補嚴氏蔚左傳賈服注三卷輯臧榮緒晉書二卷愛日居筆記六卷嘉慶十年卒年三十

金榜 洪榜 汪龍

金榜字藥中安徽歙縣人乾隆二十九年召試舉人授內閣中書軍機處行走三十七年一甲一名進士授翰林院修撰散館後養疴讀書不復出卒於家榜少工文詞以才華爲天下望後師事江永友戴震遂深經術著禮箋十卷復刺取其大者數十事爲三卷大而天文地域田賦學校郊廟明堂以及車旗服器之細貫串羣言折衷一是朱珪讀之歎其詞精而義覈榜治三禮最尊鄭康成然博稽而精思慎求而能斷嘗援鄭志答趙商云不信亦非悉信亦非斯言也敢以爲治經之大法故鄭義所未衷者必糾正之於鄭氏家法不敢誣也榜之友又有洪榜 洪

榜字汝登亦歙縣人乾隆二十三年舉人應天津召試第一授內閣中書卒年三十有五粹於經學著明象未成終於益卦因鄭康成易贊作述贊二卷又明聲韻撰四聲均和表五卷示兒切語一卷江氏永切字六百十有六是書增補百三十九字又以字母見溪等字注於廣韻之目每字之上以定喉吻舌齒唇五音蓋其書宗戴江二家之說而加詳焉又有周易古義錄書經釋典詩經古義錄詩經釋典儀禮十七篇書後春秋公羊傳釋例論語古義錄初堂讀書記許氏經義諸書爲人律身以正待人以誠以孝友著於鄉里生平學問之道服膺戴震戴震所著孟子字義疏證當時讀者不能通其義惟榜以爲功不在禹下云 汪龍字辰叔亦歙縣人乾隆五十一年舉人嗜古博學尤精於詩嘗讀詩生民元鳥二篇疑鄭箋迹乳卵生之說不若毛傳謂姜嫄簡狄從帝嚳祀郊禘之正遂稽傳箋同異用力於是經者數十年成毛詩異義四卷毛詩申成十卷卒年八十二

王念孫 李惇 宋縣初

王念孫字懷祖江蘇高郵人父安國官吏部尙書諡文肅自有傳念孫八歲能屬文十歲讀十三經畢旁涉史鑑有神童之目高廟南巡以大臣子迎鑾獻文冊賜

舉人乾隆四十年進士改翰林院庶吉士散館授工部主事洊陞郎中擢陝西道御史轉吏科給事中嘉慶四年仁宗睿皇帝親政時川楚教匪猖獗念孫陳剿賊六事首劾大學士和珅疏語援據經義大契聖心是年命巡淮安及濟寧漕授直隸永河道六年以河隄漫口罷特旨留督辦河工工竣賞主事銜河南衡家樓河決命隨尙書費淳查勘且籌新漕又命馳赴臺莊隨同吉綸辦河務尋授山東運河道在任六年調永定河道會東河總督與山東巡撫以引黃利運異議召入都決其是非念孫奏引黃入湖不能不少淤然暫行無害詔許之已而永定河水復異漲如六年之溢念孫自引罪得旨休致道光五年重宴鹿鳴賞給四品銜十二年卒年八十有九念孫故精熟水利官工部著導河議上下篇及奉旨纂河源紀略議者或誤指河源所出念孫力辨其譌議乃定紀略中辨譌一門念孫所撰也任河道十餘載查工節帑積弊一清累得旨褒獎所條上河務事多議行既罷官日以著述自娛著讀書雜誌八十二卷分逸周書戰國策管子荀子晏子春秋墨子淮南子史記漢書漢隸拾遺凡十種於古義之晦誤寫校之妄改皆一一正之一字之證博及萬卷其精於校讎如此初從休寧戴震受聲音文字訓詁手編詩

三百篇九經楚詞之韻分古音爲二十一部於支脂之三部之分段玉裁六書音韻表亦見及此其分至祭蓋輯爲四部則段書所未及也念孫以段書先出遂輟作又以邵晉涵先爲爾雅疏乃綜其經學撰廣雅疏證日三字爲程閱十年而書成凡三十二卷其書就古音以求古義引伸觸類擴充於爾雅說文無所不達然聲音文字部分之嚴一絲不亂蓋藉張揖之書以納諸說而實多揖所未知及時惠棟戴震所未及嘗語子引之曰詁訓之旨存乎聲音字之聲同聲近者經傳往往假借學者以聲求義破其假借之字而讀本字則渙然冰釋如因假借之字強爲解則結籟不通矣毛公詩傳多易假借之字而訓以本字已開改讀之先至康成箋詩注禮屢云某讀爲某假借之例大明後人或病康成破字者不知古字之多假借也又曰說經者期得經意而已不必墨守一家引之因推廣庭訓成經義述聞十五卷經傳釋辭十卷引之字伯申能世其學由編修官至禮部尙書謚文簡自有傳論者謂國朝經述獨絕千古高郵王氏一家之學三世相承自長洲惠氏父子外蓋鮮其匹云 李惇字成裕江蘇高郵人乾隆四十五年進士少異穎七歲卽知解經有神童之日年十三而孤及長與同縣王念孫賈田祖同力於

學又與任大椿劉台拱汪中程瑤田等相研摩邃深經傳尤長於詩及春秋晚好曆算得宣城梅氏書盡通其術與錢塘齊名著有羣經釋小八卷考諸經古義二百二十餘事多前人所未發又有古文尙書說毛詩三條辨考工車制考左氏通釋杜氏長曆補渾天圖說讀史碎金詩文集惇事母孝侍疾居喪皆盡禮質直寡言篤於朋友始爲諸生爲學使謝墉所賞將選拔貢會賈田祖卒於旅舍惇經營殯事不與試墉歎爲古人江都江藩好詆訶前人惇謂之曰王子雍若不作聖證論以攻康成豈非醇儒其面規人過如此四十九年卒年五十一賈田祖字稻孫諸生通左氏春秋有春秋左氏通解 宋縣初字守端亦高郵人乾隆四十二年拔貢生官五河清河訓導邃深經術長於說詩著韓詩內傳徵四卷又有釋服二卷困知錄

王謨

王謨字仁圃江西金谿人乾隆四十三年進士授知縣乞就教職選建昌府教授以實學訓士生徒景附後以告歸年七十六卒謨天才俊逸精力過人弱冠賦江右風土下筆千言自少疾俗學好博覽晚歲獨抱遺經泊然榮利之外嘗輯漢魏

羣儒著述之已佚者分經史子集四部片議單詞無不甄錄爲漢魏遺書鈔五百餘種用力至深其經翼一門一百八種經已刊行世共寶之讀書有心得輒爲筭記仿困學紀聞例類別區分爲汝麋玉屑二十卷嘉興錢儀吉稱其研覈同異文萬旨千無一語沿襲前人無一義不求至是洵足開牖後學生平論撰甚富諸經皆有詮釋著韓詩拾遺十六卷逸詩詮三卷夏小正傳箋四卷孟千古事案四卷補孟子釋文七卷又有三易通占尙書雜說左傳異辭論語管窺爾雅後釋嘗以江西通志詳今而略古著江右考古錄一卷以六朝五代人物廢闕江右人文見於史者多疏略因網羅舊聞著豫章十代文獻略五十二卷他著有補史記世家古今人表問漢唐地理書家語廣注酒中正讀書引凡數十卷又汝麋詩鈔八卷文鈔十二卷

汪中 子喜孫 江德量 徐復 許珩 汪光燾

汪中字容甫江蘇江都人父一元以孝子旌中生七歲而孤家酷貧不能就外傅母鄒授以小學四子書稍長助書買鬻書於市因徧讀經史百家過日成誦遂爲通人年二十補諸生然時人未之知也編修杭世駿主講安定書院論及孟子往

送之門以爲昏禮無明文中引穀梁祭門闕門證之世駿折服遂大稱之乾隆四十二年拔貢提學謝墉每試別置一榜署名諸生前嘗曰余之先容甫爵也若以學當北面事之矣以母老竟不赴朝考中嘗有志於用世故於古今沿革民生利病皆博問而切究之年三十顯意經術與高郵李惇王念孫寶應劉台拱爲友共討論之其治尙書有尙書考異治禮有儀禮校本大戴禮記校本治春秋有春秋述義治小學有爾雅校本及小學說文求端同時治經諸人如王念孫阮元郝懿行時采其說中嘗謂國朝古學之興顧炎武開其端河洛矯誣至胡渭而細中西推步至梅文鼎而精力攻古文者閻若璩也專治漢易者惠棟也凡此皆千餘年不傳之絕學及戴震出而集其大成擬作六儒頌未成又嘗博考先秦古籍三代以上學制廢興使知古人以爲學者爲述學一書凡虞夏第一周禮之制第二周衰列國第三孔門第四七十子後學者第五又列通論釋經舊聞典籍數典世官目錄凡六而自題其端曰觀周禮太史云云當時行一事則有一書其後執書以行事又其後則事廢而書存至宋儒以後則並其書之事而去之矣又曰有官府之典籍有學士大夫之典籍當時行一事則有一書傳之後世奉以爲成憲此官

府之典籍也先王之禮樂政事遭世之衰廢而不失有司徒守其文故老能言其事好古之君子閱其浸久而遂亡也而書之簡畢此學士大夫之典籍也又曰古之爲學士者官師之長但教之以其事其所誦者詩書而已其他典籍則皆官府藏而世守之民間無有也苟非其官官亦無有也其所謂士者非王侯公卿大夫之子則一命之士外此則鄉學小學而已自辟雍之制無聞太史之官失守於是布衣有授業之徒草野多載筆之士教學之官記載之職不在上而在下及其衰也諸子各以其學鳴而先王之道荒矣然當諸侯去籍秦政焚書有司所掌蕩然無存猶賴學士相傳存其一二斯不幸中之幸也又曰孔子所言則學士所能爲者留爲世教若其政教之大者聖人無位不復以教子弟又曰古人學在官府人世其官故官世其業官旣失守故專門之學廢其書稿草略具亦未成後乃卽其考三代典禮及文字訓詁名物象數益以論撰之文爲述學內外篇凡六卷其有功經義者則有若釋三九婦人無主答問女子許嫁而壻死從死及守志議居喪釋服解義其表章經傳及先儒者則有若周官徵文左氏春秋釋疑荀卿子通論賈誼新書序其他考證之文亦有依據中又熟於諸史地理山川阨要講畫瞭然

著有廣陵通典十卷秦蠶食六國表金陵地圖考生平於詩文書翰無所不工所作廣陵對黃鶴樓銘漢上琴臺銘皆見稱於時他著有經義知新記一卷大戴禮正誤一卷遺詩一卷五十九年卒年五十一中性質直不爲容止疾當時所爲陰陽拘忌釋老神怪之說斥之不遺餘力於時彥不輕許可好嫚罵人人目之曰狂生然不沒人之實有一文一詩之善者亦贊不容口事母以孝聞貧無菽水則賣文以養居喪哀戚過人其於知友故舊沒後衰落相存問過於生前蓋其性之篤厚然也子喜孫喜孫字孟慈嘉慶十二年舉人由內閣中書洊陞戶部員外郎補河南懷慶府知府卒於官喜孫博學好古於文字聲音訓故多所究心能紹家學著有大戴禮記補喪服答問紀實國朝名臣言行錄經師言行錄尙友記且住庵文稿同郡人爲漢學者又有江德量徐復許珩汪光燧江德量字量殊江都人父恂好金石文字伯父昱通聲音訓詁之學德量少承家學及長與汪中友善勵志肄經學益大進乾隆四十四年一甲二名進士授翰林院編修改江西道御史居朝多識舊聞博通掌故公餘鍵戶以文籍自娛著有古泉志三十卷又撰廣雅疏未成五十八年卒年四十有二徐復字心仲亦江都人諸生著有論語疏

證惜早卒 許珩字楚生儀徵人諸生著周禮注疏獻疑七卷釐正搜剔論者謂爲鄭賈功臣 汪光燧字晉蕃亦儀徵諸生博通經史嘗辨惠氏易爻辰圖之謬又作黃稗釋一卷人歎其精覈卒年四十三

梁玉繩 弟履繩 汪遠孫

梁玉繩字曜北浙江錢塘人增貢生同書嗣子家世貴顯有賜書玉繩不至富貴自號清白士與弟履繩互相礪錯有二難之目同時杭世駿陳兆崙錢大昕孫志祖盧文弨皆與接談論文弨嘗稱二人氣象玉繩則侃侃然履繩閤閤然其見重如此玉繩嘗語履繩曰後漢襄陽樊氏顯重當時子孫雖無名德盛位世世作書生門戶願與弟共勉之故玉繩年未四十棄舉子業專心撰著其警記七卷多釋經之文有裨古義嘗謂經學自東晉後分爲南北自唐以後則有南學而無北學北史儒林傳曰江左周易則王輔嗣尙書則孔安國左傳則杜元凱河洛左傳則服子慎尙書周易則鄭康成蓋南北之不同如此陸元朗南方學者經典釋文不獨創始陳後主元年其成書亦在未入隋以前故序錄中於王曉周禮音注云江南無此書不詳何人於論語云北學有杜弼注世頗行之又其書中引北音祇一

再見似書成後入隋唐亦不增加故北大儒如徐遵明諸人皆不援及舊唐書儒學傳稱元朗於貞觀初拜國子博士五經正義之作未必非元朗創議故正義於易書左傳用王注孔傳杜注並同釋文正義中所謂定本者出於顏師古手師古之學本其祖介介家訓書證篇每是江南本非河北本師古爲定本時輒引晉宋以來古今本折服諸儒則據南本爲定可知也孔仲達本兼涉南北學至其爲正義時已有顏氏考定本在前且師古首董其事仲達亦不能自主遂專用南學而北學由此竟廢近乃有治鄭氏易書服氏左傳者紹北學於千載之下不亦難乎玉繩尤精乙部書著史記志疑三十六卷據經傳以糾乖違參班荀以究同異凡文字之傳譌注解之傳會一一析辨之從事幾二十年刊行後續有增加復筆之上方大昕稱其書爲龍門功臣可與集解索隱正義並傳又以大昕言漢書人表尊仲尼於上聖顏閔思孟於大賢弟子居上等者三十餘人而老墨莊列諸家咸置中等有功名教因著人表考九卷皆詳審雅博見稱於時他著有元號略四卷呂子校補二卷誌銘廣例二卷蛻稿四卷又庭立紀聞四卷子學昌所記也年七十六卒履繩字處素乾隆五十三年舉人刻意於學蕭然如寒素衣不求新出

則徒步強識博聞通聲韻之學尤精左氏傳其舅元和陳樹華著春秋內外傳考證履繩復彙輯諸家之說而折其衷成書六種名曰左通一曰補釋古注輯存雖富惟合者錄二曰駁證諸家詮釋或疏有證者駁三曰考異旁搜及石經羣籍諸文四曰廣傳取材在公穀國語而外五曰古音證以風謠卦繇六曰臆說詳於別解軼聞皆考輯詳審其補釋三十二卷外孫汪遠孫爲刊行履繩不以所能病人亦不以所知愧人人樂親之五十八年卒年四十六 汪遠孫字久也浙江錢塘人嘉慶二十一年舉人官內閣中書幼聰穎十歲侍祖父受經通大義時浙江藏書家若趙氏小山堂吳氏瓶花齋皆散軼惟遠孫曾祖憲所置尙存卽世所稱振綺堂也父以遠孫嗜學病中指楹書曰以畀汝遠孫自是務爲根柢之學排日讀十三經注疏以心得者輯爲考異於國語用力尤深嘗輯賈逵虞翻唐固之說附以王肅孔晁兩家爲三君注輯存四卷於韋氏注解譌者駁之義缺者補之辭意有未昭晰者詳說之搜輯舊聞博求通語爲發正二十一卷以公序本及他書校明道本爲考異四卷又嘗與嘉興錢泰吉爲校史之約所校漢書地理志二卷泰吉謂可與大興徐松西域傳並傳家有水北樓瀕西湖春秋佳日焚香讀書以爲

常暇與里中耆彥結束軒吟社四方賢雋至則觴詠樓中長洲陳奐遊杭州與之善道光十五年病革以遺書囑奐遂卒年四十七奐爲編定所著書閱數年乃成他著有三家詩考證世本集證借閒生詩三卷詞一卷

莊述祖 莊綬甲 莊有可

莊述祖字葆琛江蘇武進人從父存與官禮部侍郎幼傳太原閻若璩之學博通六藝而善於別擇時閻氏所闢僞古文信於海內言官學臣則議上言於朝重寫二十八篇於學官頒天下考官命題學者毋得諷讀僞書存與方直上書房獨曰辨古籍真僞爲術淺且近也古籍墜溷十之八頗藉僞籍存者十之二胷子不能旁覽雜氏惟賴習五經以通於治若大禹謨廢人心道心之旨殺不辜寧失不經之誡亡矣太甲廢儉德永圖之訓墜矣仲虺之誥廢謂人莫己若之誡亡矣說命廢股肱良臣啟沃之誼亡矣旅獒廢不寶異物賤用物之誡亡矣問命廢左右前後皆正人之美失矣今數言幸而存皆聖人之真言也乃爲尙書既見三卷說二卷數稱僞書而古文竟獲仍學官不廢他著象傳論一卷彖象論一卷繫辭傳論二卷附序卦傳論八卦觀象解二卷卦氣論一卷毛詩說二卷補一卷附一卷周

官記五卷說二卷春秋正辭十二卷附舉例一卷要指一卷四書說二卷事蹟別見列傳門人餘姚邵晉涵曲阜孔廣森同邑劉逢祿及述祖皆通其學述祖十歲而孤乾隆四十五年進士選山東昌樂縣知縣調濰縣明暢吏治刑獄得中豪猾歛跡嘗勘讎地衆以爲斥鹵也述祖指路旁草問何名曰馬帚述祖笑曰此於經名非夏小正非秀記時凡沙土草莽者宜禾何謂讎衆皆服尋授桃源同知不一月以乞養歸著書色養者十六年未嘗一日離左右嘉慶二十一年卒年六十七述祖原本家學研求精密於世儒所忽不經意者覃思獨闢洞見本末以爲連山亡而尙存夏小正歸藏亡而尙有倉頡古文畧可稽求義類乃著夏小正經傳考釋十卷以斗柄南門織女記天行之不變以參中火中紀日度之差以二月丁卯知夏時以正月甲寅啟蟄爲曆元歲祭爲郊萬用入學爲禘又著古文甲乙篇謂許叔重始一終亥偏旁條例所由出日辰幹支黃帝世大撓所作沮誦倉頡名之以易結繩伏羲畫八卦作十言之教之後以此三十二類爲正名百物之本故歸藏爲黃帝易就許氏偏旁條例以幹支別爲序次凡許書所存及見於金石文字者分別部居各就條例書未竟而條理粗備其餘五經悉有撰述旁及逸周書尙

書大傳史記白虎通於其舛句訛字佚文脫簡易次換第草薙腋補咸有證據凡所著十七種其刊行者尙書今古文考證七卷毛詩考證四卷毛詩周頌口義三卷五經小學述二卷歷代載籍足徵錄一卷弟子職集解一卷漢鏡歌句解一卷石鼓然疑一卷文鈔七卷詩鈔二卷 莊綬甲存與孫字卿珊諸生承其家學盡能通之尤爲述祖所愛重著周官禮鄭氏注箋十卷尙書考異三卷釋書名一卷莊有可字大久綬甲同族勤學力行老而彌篤取諸注傳精研義理句櫛字比合諸儒之書以正其是非而自爲之說於易書詩禮春秋皆有傳述凡四十二種四百三十餘卷其周官指掌五卷爲德清戴望所稱

武億

武億字虛谷河南偃師人父紹周進士官吏部郎中億年十七喪父十九喪母哀痛毀瘠以讀書自勵時伊洛溢屋圯架洿以居斧朽木燎寒誦讀不輟已復從大興朱筠遊益爲博通之學士大夫無不慕與之交然億簡傲真率非其志掉臂不以屑意也乾隆四十五年進士五十六年授山東博山縣知縣問土俗利病釐比邱尼請命於大吏免玻璃人貢勸節儉創范泉書院進其秀者講授敦倫實學革

煤炭供饋里馬草豆不以累民決辭無留獄禱雨卽沛有以賄于者曰汝不聞雷聲乎吾矢禱久矣輿情大洽五十七年大學士和珅領步軍統領事聞妄人言山東逆匪王倫未定死密遣番役四出蹤跡之於是番役頭目杜成德等十一人橫行州縣入博山境手鐵尺飲博莫敢誰何億悉執之成德尤崛強痛杖之叩頭求解去喧傳其事者曰億鹵莽濫責無罪將累上官巡撫吉慶以任性濫責平民劾罷之而不直書其事億莅任僅七月及去民攜老弱千餘人走大府乞留我好官不可得則曰爲運致薪米門如市焉嘉慶四年十月諭大學士尙書侍郎及都察院通政使大理寺堂官於京外各員內操守端潔才猷幹濟及平日居官事蹟可據者各舉所知於是億去官事聞十一月諭吏部原任山東博山縣知縣武億卽行文該員本籍詢問願否來京引見而億先以十月卒年五十有五億學問醇粹於七經注疏三史涑水通鑑皆能闡誦旣罷官貧不能歸所至以經史訓誥教授生徒勇於著錄有羣經義證七卷經讀考異九卷金石三跋十卷金石文字續跋十四卷偃師金石記四卷偃師金石遺文二卷安陽金石錄十三卷又有三禮義證讀史金石集目錄譜授堂筭記詩文集等書凡數百卷皆稽之經史百家傳記

旁引遠徵遇微罅輒剖抉精蘊比辭達意以成一例大興朱珪稱億不愧好古遺直云

戚學標 陳熙晉 李誠

戚學標字鶴泉浙江太平人幼有異稟從天台齊召南遊稱高弟高宗純皇帝巡浙江學標獻南巡頌乾隆四十五年成進士官河南涉縣知縣縣苦闕布徵學標請於大府得減額權林縣有兄弟爭產者集李白句爲斗粟謠以諷皆感悔性强項多與上官齟齬卒以是罷後改寧波府教授未幾歸著漢學諧聲二十三卷總論一卷用說文以明古音謂六書之學三曰形聲聲不離形形者聲之本也而聲又隨乎氣氣有陰有陽故一字之音或從陰或從陽或陽而陰或陰而陽或陰陽各造其偏昔人知其然故但以某聲者明字音所出以專其本以讀若某設爲譬況之詞使人依類而求卽離絕遠去而因此聲之本以究此聲之變無患其不合說文從某某聲從某某亦聲從某某省聲從某某讀若某某從某某讀與某某同並二端兼舉聲音之學莫備於此後人惑於徐氏所附孫愐音切不究本讀而一二宿儒言古音如吳棫陳第顧炎武江永之流亦第就韻書辨析不知說文形聲相繫韻

書就聲音聲說文聲氣相求韻書祇論同聲之應其部居錯雜分合類出臆見學者苟趣其便衷於一讀且狃平上去入之界之不可移易諧聲之法廢而說文之學晦矣其書論聲一本許氏由本聲以推變聲既列本注旁搜古讀以爲之證末附說文補考二卷多辨正二徐謬誤又有毛詩證讀不分卷詩聲辨定陰陽譜四卷四書偶談內外篇二卷字易二卷鶴泉文鈔二卷又有溪山講授三台詩錄台州外書風雅遺聞鶴泉詩鈔鶴泉集唐集李三百首等書 陳熙晉原名津字析木浙江義烏人優貢生以教習官貴州知縣歷知開泰龍里普定縣仁懷同知擢湖北宜昌府知府權開泰時教匪蔣昌華擾黎平將興大獄熙晉縛其渠而貸諸脅從全活無算龍里民以釘鞵殺人已誣服而兇驗不合心疑焉一日方慮囚見叢人中有曳鞵竊睨者命執而鞠之痕宛合遂款服老人道死無主名熙晉廉得其故有小兒偕行密呼兒啗以果餌兒遽效老人墜樹狀獄乃白龍里人爲立生祠仁懷亦如之普定俗糾聚相雄長號其魁曰牛叢其獲盜不謁之官輒積薪焚殺之先是有挾讎焚三尸者吏不敢捕熙晉期必得重繩以法風頓革其守宜昌也楚大水流庸聚宜昌畢力撫綏繕城垣以工代賑會秩滿將行爲留六閱月歲

其事送者數千人皆泣下尋乞養歸未幾卒熙晉遂於學積書數萬卷訂疑糾謬務窮竟原委每語及經史三通歷朝會要袞袞若成誦嘗謂杜預解左氏有三蔽劉光伯規之而書久佚惟正義引一百七十三事孔穎達皆以爲非乃刺取經史百家及近儒著述以明劉其杜非而劉是者申之杜是而劉非者釋之杜劉兩說義俱未安則證諸羣言斷以己意成春秋規過考言九卷又謂隋經籍志載光伯左氏述義四十卷不及規過據孔穎達序稱習杜義而攻杜氏疑規過卽在述義中舊唐書經籍志載述義三十七卷較隋志少三卷而多規過三卷此其證也正義於規杜一百七十三事外又得一百四十三事蓋皆述義之文其異杜者三十事駁正甚少殆唐初奉敕刪定著爲令典黨同伐異勢會使然乃參究得失援據羣言成春秋述義拾遺八卷他所著有古文孝經述義疏證五卷帝王世紀二卷貴州風土記三十二卷黔中水道記四卷宋大夫集箋注三卷駱臨海集箋注十卷日損齋筆記考證一卷文集八卷征帆集四卷仁懷廳志二十卷 李誠字靜軒浙江黃巖人嘉慶十八年拔貢生官雲南姚州州判終順寧知縣誠研究經學貫串該洽罷官後總督阮元嘗檄修雲南通志著有十三經集解二百六十卷首

臚漢魏諸家之說次採近人精確之語而唐宋諸儒之徵實者亦不廢焉又有萬山綱目六十卷水道提綱補訂二十八卷宦遊日記一卷微言管窺三十六卷醫家指迷一卷

丁杰 周春 吳東發

丁杰原名錦鴻字升衢浙江歸安人乾隆四十六年進士寧波府學教授杰純孝誠篤嘗奔走滇南迎父柩歸葬少家貧就書肆中讀肆力經史旁及說文音韻算數初至都適四庫館開任事者延之佐校遂與朱筠戴震盧文弨金榜程瑤田等相講習於大戴禮用功尤深著有大戴禮記繹又易鄭注久佚宋王應麟哀輯成書國朝惠棟復有增入杰審視兩本以爲多驛入鄭氏易乾鑿度注又漢書注所云鄭氏乃卽注漢書之人非康成乃刊其譌定其是復摘補其未備著周易鄭注後定凡十二卷杰爲學長於校讐與盧文弨最相似得一書爲審定句讀博稽他本同異胡渭禹貢錐指號爲絕學杰摘其誤甚多嘗謂緯書移河爲界在齊呂填闕八流以自廣夫河患之棘由九河堙廢而害始於齊管仲能臣必不自貽伊戚班固敘溝洫志云商竭周移秦決南涯自茲距漢北亡八支則九河之塞當在秦

楚之際矣又惠棟尙書大傳輯本杰以爲疏舛謂如鮮度作刑以詰四方誤讀困學紀聞此謬之甚者五行傳文不類讀後漢書注始知誤連皇覽也杰嘗與翁方綱補正朱彝尊經義考序年月博采見聞以相證合又與許宗彥闡繹墨子上下經大有端緒其爲人校定之書曰毛詩草木蟲魚鳥獸疏方言漢隸字原復古編困學紀聞補箋字林考逸蘇詩補注方言善本始於戴震杰采獲裨益最多盧文弨以爲不在戴下漢隸字原考正錢塘謂得隸之義例杰又言字母三十六字不可增併不可顛倒見端知邦非精照爲孤清不可增濁聲也疑泥孃明微來日爲孤濁不可增清聲也非卽邦之輕脣不可併於敷微卽明之輕脣不可併於奉影爲曉之深喉喻爲匣之深喉曉匣影喻不可顛倒爲影曉喻匣也所著有小西山房文集嘉慶十二年卒年七十子授經嘉慶三年優貢傳經六年優貢皆能世其家學有雙丁之目授經佐其友嚴可均造甲乙丙丁長編以校定說文周春字松靄浙江海寧人乾隆十九年進士官廣西岑溪縣知縣革陋規幾微不以擾民有古循吏風以憂去官岑溪人構祠祀焉嘉慶十五年重赴鹿鳴二十年卒年八十七春博學好古兩親服闋年未五十不謁選所居凝塵滿室插架環列臥起其

中者三十餘年四部七略靡不瀏覽究心字母遂徧觀釋藏六百餘函於韻學有得著十三經音略十二卷他著又有中文孝經一卷爾雅補注四卷小學餘論二卷代北姓譜二卷遼金元姓譜一卷遼詩話一卷選材錄一卷杜詩雙聲疊韻譜括略八卷 吳東發字侃叔浙江海鹽人歲貢生少與兄以敬講心性之學以朱子爲法兄弟孝友遭父喪哀毀不能堪時稱兩孝子東發復潛心經術尤邃於尙書好金石之學凡商周秦漢之文及見者無弗考究一字未識沈思冥索必得乃已嘗從嘉定錢大昕遊大昕引爲畏友嘉慶八年卒年五十七著有羣經字考十卷易書詩論孟東發手自詮次三禮春秋屬草未定其子本履編成之又有石鼓讀謂石鼓文中有次章卽用首章之前半重疊讀之如毛詩之例刻時簡省不重書耳儀徵阮元稱所言爲前人所未發又有讀經筆記書序鏡尙書後案質疑經韻六書述史記龜策傳解西銘釋文商周文拾遺鐘鼎款識釋金石文跋尾續詩文奇古有澉浦詩話遵道堂詩文稿

沈夢蘭 宋世榮

沈夢蘭字古春浙江烏程人乾隆四十八年舉人以大挑知縣分發湖北補宜都

縣知縣夢蘭博通諸經實事求是尤邃於周官成周禮學一書分溝洫畿封邦國都鄙城郭宮室職官祿田貢賦軍旅車乘禮射律度量衡十三門取司馬法逸周書管子呂覽伏傳戴記諸古書參互考證合之書詩禮記三傳孟子先儒所病其牴牾者無不得其會通爲之圖並取經傳文之與周官相發明者釋於篇他著有易書詩孟子學五省溝洫圖說其易學自序云自輯周禮學於易象得井比師訟同人大有若干卦錯綜參伍知易之爲道先王一切之治法於是乎在而孟子學則又以疏證周官之故彙其餘說以成帙者其溝洫圖說凡南北形勢河道原委歷代沿革衆說異同與夫溝遂經畛之體廣深尋尺之數以及蓄水止水蕩水均水舍水瀉水之事皆備復證之周官考究詳覈官湖北時奉檄襄築荊州隄工上江隄埽工議及荊州論沔陽水災復奉檄會勘作水利說以諭沔民原本經術有裨實用皆此類也 宋世犖字卣勛浙江臨海人乾隆五十三年舉人以教習官陝西扶風知縣地當川藏孔道夫馬悉歛之民計畝索錢名曰公局世犖多所裁革無妄取時教匪初定州縣多以獲盜遷擢扶風民有持齋爲怨家所訐者大府飛檄至捕而鞠之皆良民釋弗顧罷歸孳求經訓熟於諧聲假借之例著周禮故

書疏證六卷儀禮古今文疏證二卷他著有确山駢體文四卷紅杏軒詩鈔十七卷

儒林傳下 一 卷六十八

七十五 一

清史列傳 卷六十九

儒林傳下二

孫星衍 畢亨 李貽德

孫星衍字淵如江蘇陽湖人少與同里楊芳燦洪亮吉黃景仁文學名齊袁枚品其詩曰天下奇才與訂忘年交星衍雅不欲以詩名深究經史文字音訓旁及諸子百家皆心通其義既從錢大昕遊精研漢學元和江聲注尙書以堯稽古爲同天舉陶稽古爲順考古道前後歧說星衍著論云鄭注稽古同天言堯同於天也鄭意蓋以堯稱帝爲同天書正義誤引其文云稽同也古天也天爲古之說雖見周書未必唐時卽有此義又嘗於江寧瓦官寺閣見元應一切經并慧苑華嚴經音義引倉頡爲多乃刺取其文兼撫他書爲倉頡篇三卷謂元應慧苑書世多不傳然足與陸德明經典釋文並垂於世屬友人刊行乾隆五十二年一甲二名進士授翰林院編修充三通館校理五十四年散館改刑部主事故事一甲進士改部或奏請留館又編修改官可得員外郎前此吳文煥有成案大學士和珅示意

欲使往見星衍不肯自是編修改主事遂爲成例官刑部爲法寬恕大學士阿桂尙書胡季堂悉器重之有疑獄輒令依古義平議全活甚衆退直之暇仍理舊業高麗使臣朴齊家入貢特謁星衍爲書問字堂扁賦詩以贈五十七年遷員外郎洵陞郎中六十年授山東兗沂曹濟道嘉慶元年七月曹南水漫灘潰決單縣地星衍與按察使康基田鳩工集夫五日夜從上游築隄遏禦之不果決基田謂此役省國家數百萬帑金尋權按察使凡七閱月平反數十百條活死罪誣服者十餘獄濰縣有武人犯法賄和珅門屬託大吏星衍訪捕輸之械和門來者於衢及回本任值江南豐工及山東曹工同時漫溢星衍以無工處所得疏防咎特旨予留任曹工分治引河三道星衍治中段工畢較濟東道登萊道上下段省三十餘萬先是河工分賠之員或得羨餘謂之扣費星衍不取悉以給引河工費時曹工尙未合河督巡撫亟奏合龍移星衍任尋又奏稱合而復開開則分賠兩次壩工銀九萬兩當半屬後任而司事者並以歸星衍星衍亦任之曰吾旣兼河務不能不爲人受過也四年六月丁母憂歸儀徵阮元撫浙聘主詁經精舍星衍課諸生以經史疑義及小學天部地理算學詞章不十年舍中士皆以撰述名家服闋入

都奉旨仍發山東十年補督糧道十二年權布政使值侍郎廣興在省供張煩擾星衍不肯妄支後廣以賄敗豫東兩省多以支庫獲罪星衍不與焉湯陵舊在山西滎河星衍據漢崔駰晉伏滔及皇覽說皆云濟陰有湯陵任曹南時常申上府請釐祀典至是陵始修整給地畝奉香火又考太平寰宇記知先賢閔子墓在范縣今所傳在歷城者誤爲修築之申禁樵采又以伏生傳書二十七篇使二帝三王之訓典不墜於地欲奏請建立伏博士乃具稿移學政屬鄒平令訪其嫡裔資使讀書越七年竟得入告奉旨准以伏生六十五代孫敬祖世襲五經博士十六年引疾歸星衍博極羣書勤於著述又好聚書聞人家藏有善本借鈔無虛日金石文字靡不考其原委常病古文尙書爲東晉梅頤所亂官刑部時卽集古文尙書馬鄭注十卷逸文二卷歸田後又爲尙書今古文注疏三十九卷其序例云尙書古注散佚今刺取書傳升爲注者五家三科之說一司馬遷從孔氏安國問故是古文說一書大傳伏生所傳歐陽高大夏侯勝小夏侯建是今文說一馬氏融鄭氏康成雖有異同多本衛氏宏賈氏逵是孔壁古文說皆疏明出典其先秦諸子所引古書說及緯書白虎通等漢魏諸儒今文說許氏說文所載孔壁古文注

中存其異文異字其說則附疏中其書意在網羅放失舊聞故錄漢魏人佚說爲多又兼采近代王鳴盛江都段玉裁諸人書說惟不取趙宋以來諸人注以其時文籍散亡較今代無異聞又無師傳恐滋臆說也凡積二十二年而後成論者以爲勝王鳴盛書其他撰輯有周易集解十卷夏小正傳校正三卷明堂考三卷考注春秋別典十五卷爾雅廣雅古訓韻編五卷魏三體石經殘字考一卷孔子集語十七卷晏子春秋音義二卷史記天官書考證十卷建立伏博士始末二卷寰宇訪碑錄十二卷金石萃編二十卷京畿金石考二卷續古文苑二十卷詩文集二十五卷又有九經正俗字考十三經佚注集馬昭孫叔然難王申鄭之書山海經音義鄭康成年譜其所校刊若岱南閣叢書平津館叢書均據善本有資學藝二十三年卒年六十六星衍性誠正無僞言僞行立身行事皆以儒術尤喜獎借後進所至之地士爭歸附其所撰輯能集衆人之才智準以己之識力再三審擇而後成編其卒也海內學者皆悼慕之 畢亨原名以田字九水山東文登人初從休寧戴震遊精漢人故訓之學尤長於書後與星衍交星衍以金滕秋大熟以下據尙書大傳及史記當爲亳姑逸文後人或以其文有啟金滕之語遂入於金

滕篇中亨釋之曰尙書王出郊謂祭天於郊以周公配書序所云成王葬周公於畢告周公作亳姑卽其事此經上文云今天動威以彰周公之德惟予小子其親迎言親迎而祭之迎迎尸也惟郊祭周公之事故云我國家禮亦宜之禮者謂祭也尙書大傳曰乃不葬周公成周而葬於畢尊以王禮申命魯郊據此而言則魯之郊禘由風雷之變始也星衍載其說文集中星衍撰周易集解左右采獲亨力居多其尙書今古文注疏亦多采亨說每稱以爲經學無雙曲阜桂馥說文義證引亨篤論百數十事中嘉慶十二年舉人道光六年以大挑知縣分發江西署安義縣有兄殺胞弟案亨執不念鞠子哀泯亂倫彝刑茲無赦義不準援赦大府怒將劾亨會欵程恩澤重亨事乃解後補崇義縣以積勞卒於官年且八十矣著有九水山房文存二卷星衍晚年所著書又多付嘉興李貽德爲卒其業 李貽德字次白嘉慶二十三年舉人年二十六謁星衍於江寧事以師禮星衍與上下古今窮晝夜不息屬分纂十三經佚注貽德因著春秋左氏傳賈服注輯述二十卷其書援引甚博字比句櫛於義有未安者亦加駁難又有詩考異詩經名物考周禮賸義十七史考異攬青閣詩鈔夢春廬詞道光十二年卒年五十

陳鱣

陳鱣字仲魚浙江海寧人父璘字昆玉諸生嘗著許氏說文正義未成而歿鱣博學好古彊於記誦尤專心訓詁之學時同州人吳騫拜經樓多藏書鱣亦喜聚書得善本互相鈔藏以故海昌藏書家推吳氏陳氏嘉慶元年舉孝廉方正督學阮元稱浙中經學鱣爲最深手摹漢隸孝廉二字以顏其居復爲書士鄉堂額以贈三年中式舉人在公車時與嘉定錢大昕大興翁方綱金壇段玉裁質疑問難後客吳門與黃丕烈定交取所藏異本往復異校鱣學宗許鄭嘗繼其父志取說文九千言聲爲經偏旁爲緯竭數十年之心力成說文正義一書又以鄭康成注孝經見於范書本傳鄭志目錄無之中經簿但稱鄭氏解而不書其名或曰是其孫小同所作然鄭六藝論序孝經序春秋皆云元又爲之注鄭注春秋未成後與服子慎遂爲服氏注故從來列鄭注無及春秋者竊以其注孝經亦未寫定小同追錄成之故不敢載入目錄中經簿所題蓋要其終范書所紀則原其始也因綴拾遺文爲孝經鄭注一卷又以六藝論未見輯本廣爲蒐討成一卷又著鄭康成年譜一卷又著論訓古訓十卷凡漢人之注及皇疏無不采取玉裁見所著諸書歎

其精覈晚築講舍於紫薇山麓寢處其中一意撰述有石經說六卷聲類拾存一卷埤蒼拾存一卷經籍跋文一卷續唐書七十卷恆言廣證六卷綴文六卷對策六卷詩人考三卷詩集十卷二十二年卒年六十五

王聘珍

王聘珍字貞吾江西南城人自幼以力學聞乾隆五十四年學使翁方綱拔貢成均常客浙西與歛淩廷堪論學廷堪深許之又爲謝啟昆阮元參訂古籍爲人厚重誠篤廉介自守治經確守後鄭之學著大戴禮記解詁十三卷目錄一卷其言曰大戴與小戴同受業於后倉各取孔壁古文記非小戴刪大戴馬融足小戴也禮察保傅語及秦亡乃孔襄等所合藏是賈誼有取於古記非古記采及新書也三朝記曾子乃劉氏分屬九流非大戴所哀集也又曰近代校讐不知家法王肅本點竄此經私定孔子家語反據肅本改易經文又或據唐宋類書如藝文類聚太平御覽之流增刪字句或云據永樂大典改某字作某凡茲數端率以今義繩古義以今音證古音以今文易古文遂使孔壁古奧之經變而文從字順經義由茲而亡故其發凡大旨禮典器數墨守鄭義解詁文字一依爾雅說文及兩漢經

師訓詁有不知而闕無杜撰之言如五義義字據周禮注讀若儀五鑿五字釋若忤青史子引漢書君子養之讀若中心養養之養皆能根據經史發蒙解惑凡積二十餘年而後成阮元謂其書義精語潔多所發明爲孔廣森諸家所未及江都焦循稱其不爲增刪一仍其舊列爲三十二讀書贊之一又著九經學引申詁訓考定漢制具有家法又有經義考補

洪亮吉 子飴孫 符孫 齡孫

洪亮吉字君直江蘇陽湖人六歲而孤母蔣賢明督課嚴風雪夜受經至雞鳴亮吉純孝既壯爲嬰兒戲娛母家貧橐筆出遊節所入養母及歸聞母凶耗慟絕墜水得救免三年徹酒肉不入中門少工文辭與同邑黃景仁詩歌唱和時稱洪黃後從安徽學政朱筠遊同幕戴震邵晉涵王念孫汪中等皆通古義乃立志窮經家居與孫星衍相摯摩學益宏博時又稱孫洪乾隆五十五年一甲二名進士授翰林院編修五十七年充順天鄉試同考官卽拜貴州學政之命亮吉以古學教士黔省僻遠無書籍爲購經史通典文選等散置各府書院奏禮記宜用鄭氏注今功令試士從元陳澹注舛漏不足闡發經義未奉部議施行嘉慶二年命在上

書房行走三年正月大考命擬征邪教疏時川陝餘匪未靖亮吉指陳規畫慷慨數千言是月因弟靄吉卒引古人期功去官之義病免家居又明年高宗純皇帝上賓亮吉以供奉內廷奔京哭臨仁宗親政詔求直言極諫之士亮吉念身自微賤受知兩朝居侍從之列欲終不言則非人臣匪躬之義言之又慮其不可以徑達也自聞詔後不知寢食者累月一日奮曰吾終不可以立仗馬辜聖天子恩乃反覆極陳時事累數千言略謂故福郡王所過繁費州縣供億致虛帑藏故相和珅擅權時達官清選或執贄門下或屈膝求擢羅列中外官罔上負國者四十餘人手書爲三函乞成親王大學士朱珪兵部尙書劉權之代表奏上見視朝稍晏小人熒惑等語以爲論及宮禁震怒革職對簿詔亮吉讀書人體弱毋許用刑亮吉感慟伏地問何爲上書從容應曰庶人傳語況翰林乎王大臣等當亮吉大不敬律斬立決奉旨免死發往伊犁交將軍保寧嚴加管束明年二月亮吉至伊犁四月京師旱上禱雨心切命清理庶獄故事戍伊犁者滿三年則伊犁將軍入奏未及期不得上請自四月二十四日皇上親禱社稷壇之後經旬尙未得雨閏四月初三日奉上諭從來聽言爲致治之本拒諫乃失德之尤朕從不敢自作聰明飾

非文過兼聽并觀惟求一是而已去年編修洪亮吉既有欲言之事不自陳奏轉向成親王及朱珪劉權之私宅呈送原屬違例妄爲經成親王等先後呈進原書朕詳加披閱實無違礙之句仍有愛君之誠惟視朝稍晏小人熒惑等句未免過激令王大臣等訊問擬以重辟施恩改發伊犁然此後言事者日見其少卽有言亦論官吏之常事而與君德民隱休戚相關之實絕無言者豈非因洪亮吉獲咎鉗口不敢言以致朕不聞過下情復壅爲害甚鉅洪亮吉所論實足啟沃朕心故銘諸座右時常觀覽若實悖逆亦不能壞法沽名況皆屬子虛何須置辨而勤政遠佞更足警省朕躬今特明白宣諭王大臣并洪亮吉原書使內外諸臣知朕非拒諫飾非之主實可與言之君諸臣倖遇可與言之君而不與言大失致君之道負朕求治之苦心矣仍各殫心竭思隨時密奏軍機大臣卽傳諭伊犁將軍保寧將洪亮吉釋放回籍是日午刻皇上硃筆親書諭旨交軍機頒發中外午後同雲密布卽得甘霖御製得雨敬述詩紀事御製詩注有納言克己乃爲民請命之大端本日親書諭旨將去年違例上書發往新疆之編修洪亮吉立予釋回宣諭中外並將其原書裝潢成卷常置座右以作良規正在頒發是夜子時甘霖大沛連

宵達晝旋據報近郊入土三寸有餘保定一帶亦皆深透天鑿中誠捷於呼吸可感益可畏也自關新疆以來漢員賜環之速未有如亮吉者亮吉遂歸署其室曰更生表不殺恩十四年卒年六十四亮吉忼爽有志節自稱性褊急不能容物好古人偏奇之行每惡胡廣中庸不悅孔光張禹之爲人生平好學不以所遇榮枯釋卷帙嘗舉荀子語爲人戒有暇日故其學於經史注疏說文地理靡不參稽鉤貫窮日著書老而不倦少好春秋左氏傳覺杜注望文生義不遵古訓者十居五六於是冥心搜錄以他經證此經以別傳校此傳寒暑不輟者十年遵漢藝文志例分經爲四卷傳爲十六卷訓詁則以賈許鄭服爲主以三家固專門許則親問業於賈者也撥及通俗文者服子慎之所注與李虔所續者截然而兩徐堅初學記等所引可證也地理則以班固應劭京相璠司馬彪等爲主輔晉以前輿地圖經可信者亦酌取焉又舊經多古字古音半亡於杜氏而俗字之無從鈎校者又半出此書因一一依本經與二傳暨漢唐石經陸氏釋文與先儒之說信而可徵者逐件校正疑者闕之成春秋左傳詁二十卷其他所著有公羊穀梁古義二卷六書轉注錄八卷漢魏音四卷比雅十二卷弟子職箋釋一卷傳經表二卷通經

表二卷四史發伏十二卷三國疆域志二卷東晉疆域志四卷十六國疆域志十六卷西夏國志十六卷乾隆府廳州縣圖志五十卷曉讀書齋雜錄八卷卷施閣詩文甲乙集三十二卷更生齋詩文甲乙集十六卷詞二卷又有外家紀聞二卷伊犁日記二卷天山客話二卷北江詩話六卷子飴孫符孫齡孫 飴孫字孟慈嘉慶三年舉人湖北東湖縣知縣博極羣籍聞見既洽心力尤銳撰世本輯補十卷三國職官表三卷史目表二卷毘陵藝文志四卷青埕山人詩十卷又撰漢書藝文志考證隋書經籍志考證皆未成二十一年卒年四十四 符孫字幼懷撰齊雲山人詩文集 齡孫字子齡道光十九年舉人廣東鎮平縣知縣著有梁疆域志四卷淳則齋駢文二卷

桂馥 許瀚

桂馥字東卉山東曲阜人乾隆五十五年進士選雲南永平縣知縣居官多善政嘉慶十年卒於任年七十馥博涉羣書尤潛心小學精通聲義嘗謂士不通經不足致用而訓詁不明不足以通經故自諸生以至通籍四十年間日取許氏說文與諸經之義相疏證爲說文義證五十卷云義證者取梁書孔子祛傳中語也其

書薈萃羣書力窮根柢爲一生精力所在馥與段玉裁生同時同治說文學者以桂段並稱而兩人兩不相見書亦未見段氏之書聲義兼明而尤遠於聲桂氏之書聲義並及而尤博於義段氏鈎索比傅自以爲能冥合許惟勇於自信自成一
家之言故破字勑義爲多桂氏敷佐許說發揮旁通令學者引伸貫注自得其義
之所歸故段書約而猝難通關桂書繁而尋省易了其專臚古籍不下己意則以
意在博證求通輾轉孳乳觸長無方亦如王氏廣雅疏證阮氏經籍纂詁之類非
可以己意爲獨斷者也馥尙有說文諧聲譜考證本欲與義證并行歿後遇亂散
失數卷馥又繪許祭酒以下及魏濟陽江式唐趙郡李陽冰南唐廣陵徐鉉徐鍇
兄弟宋吳興張有錢塘吾邱衍之屬爲說文統系圖大興朱筠嘗爲之記及就宦
滇南追念舊聞隨筆疏記十卷以其細碎比之匠門木杙題曰札樸然馥嘗引徐
幹中論鄙儒博學務於物名詳於器械考於訓詁摘其章句而不能統其大義之
所極以獲先王之心故使學者勞思慮而不知道費日月而無成功謂近日學者
風尙六書動成習氣偶涉名物自負倉雅略講點畫妄議斯冰叩以經典大義茫
乎未之聞也此尤爲同時小學家所不能言足以鍼育起廢他著有晚學集十二

卷繆篆分韻五卷續三十五舉一卷 許瀚字印林山東日照人道光十五年舉人官嶧縣教諭博綜經史及金石文字於訓詁尤深至校勘宋元明本書籍精審不減黃丕烈顧廣圻晚年校刊說文義證謂原稟臺下有查高唐賦原文六字此爲馥脫稟未校之書因爲之補正數年乃成甫成而板燬於捻寇並盡瀚所藏經籍金石遂悒鬱而歿年七十其答門弟子問曰說文序云今敍篆文合以古籀而亦有以篆文爲重文者如上之重文上下之重文下皆篆文者是蓋重文爲古籀者卽正文爲篆文重文爲篆文者卽正文爲古籀鄭康成注禮參用古今文循是例也古籀之外又有奇字古文之別體也又有或俗篆文之別體也許書古文宗孔氏篆文宗倉頡篇一字而數古文皆孔氏奇字則異孔氏者也一字而數或體皆倉頡俗體則異倉頡者也異孔氏異倉頡而必取之者爲其合於六書也此重文之例也顧重文之在同部者易曉重文之在異部者難知如叫與踟逾與踰跋與越之類遽數難終或疑此有重複錯亂則又不然請卽有明文者徵之如首古文百百古之重文也而自爲部儿古文奇字人人之重文也而自爲部介籀文大大之重文也而自爲部此必不可易者也哥古文以爲哥字哥譌重文也而歌在

欠部爲歌之重文𠄎古文以爲覲字𠄎覲重文也而覲在面部其重文作𠄎此又不可易者也然則分寄重文於衆部謂非許君之妙用哉又有一字複見各部者如右在口部又見右部吁在口部又見于部歛爲嘯籀文又見欠部𠄎爲𠄎古文又見革部𠄎爲𠄎或體又見心部類此者蓋三十餘事而爲徐鼎臣校出者十有八事類以爲重出許書傳寫既久重字衍文固不能免然如難草部又爲𠄎重文校以汗簡則𠄎之誤也踞足部又爲居重文校以繫傳則𠄎之誤也此又不可謂重也他著有別雅訂五卷印林遺著一卷又有韓詩外傳勘誤攀古小廬文

朱彬姪士端

朱彬字武曹江蘇寶應人乾隆六十年舉人彬幼有至行年十一喪母哀戚如成人丁父憂歛葬盡禮三年疏食居外時祖母劉尙存寒暑飲食盡心調護一如其父在時同懷兄早殤與羣從冑弟友于甚篤自少至老好學不厭承其鄉王懋竑經法又與外兄劉台拱高郵王念孫引之父子李惇江都汪中餘姚邵晉涵諸人互相切磋每有所得輒以書札往來辨難必求其是而後已於訓詁聲音文字之學用力尤深著有經傳考證八卷又輯禮記訓纂四十九卷取爾雅說文玉篇廣

雅諸書之故訓虎觀諸儒之論議鄭志弟子之問答以及魏晉以降諸儒之訓釋又刺取北堂書鈔通典太平御覽諸書之涉是書者旁證國初及乾嘉間諸家之書亦不下數十種而一以注疏爲主擷其精要緯以古今諸說其附以己意者皆援據精確足以蒼衆說而持其平他著有游道堂詩文集四卷道光十四年卒年八十二子士彥字休承由編修官至吏部尙書諡文定自有傳姪士端士端字銓甫道光元年舉人官廣德州訓導引疾歸父毓楷有孝行通許鄭之學士端少承家學又從從父彬游研究古義於許氏形聲之學尤精嘗以二徐本互校擇善而從不擅改原文又以鐘鼎彝器諸文考合說文所載古籀各體著說文校定本二卷考訂精確所斟正金壇段玉裁刪改之失甚多又著彊識編八卷蕭山湯金釗稱爲有益經傳之作又有說文形聲疏證三家詩輯宜祿堂金石記檢身錄吉金樂石山房詩文集

汪德鉞 呂飛鵬

汪德鉞字崇義安徽懷寧人嘉慶元年進士改翰林院庶吉士散館授禮部主事遷員外郎充會典館總纂官以書吏繕寫錯誤奪職卒年六十一德鉞性孝嘗封

股療母疾未達時隱居其鄉之雲田坂自謂與俗迥暱我者琴書山水四友也因撰四一居士傳嘗言君子立身務厲廉恥刻苦自治日之所爲夜必書之揭經書要義撰箴銘自警又言浮薄以厚藥之躁率以靜藥之傲誕以敬藥之不能精進病在因循因字銳齋又字三藥朱珪巡撫安徽政體寬大德鉞上書謂宜法子產之治鄭不宜如曹參之治齊宜如蜀相諸葛武侯不宜如東海相劉寬公不忍於頭會箕歛之人而獨忍於纍纍然匍匐入井之赤子耶珪善之仁宗親政珪被召德鉞復上書言四事曰輔盛德教胥子慎用人以舉衆職辨上下以定民志故事曹司見長官皆長揖後乃易爲半跪因仍數十年德鉞啟座右尙書紀昀爭之卒復長揖山東巡撫議以肥城邱氏爲左邱明後據廣韻引風俗通證之咨部請立五經博士德鉞議駁曰唐林寶元和姓纂於邱氏云齊大夫封於營邱支孫以地爲姓左傳有邾大夫邱弱於左氏云齊公族有左右公子因以爲氏後乃出左邱云齊國臨淄縣有左邱明之後舉左雍左思爲證林寶唐博聞士姓纂邱獨不用應劭說必證據明白始削之邱氏譜近出去林氏又千餘年乃反引風俗通爲證誤矣又姓纂以倚相爲邱明別族今譜乃以爲邱明祖紕繆顯然何可信也或謂

善善從長然欲報左氏傳經之功而俾非種冒承左氏有靈其式憑耶事遂寢德
鉞篤信宋儒書然實潛心考據閉戶讀書日有笱記其說尙書乃服維宏王謂王
當爲大左傳引周書曰惠不惠茂不茂康叔所以服宏大也此其證說詩不長夏
以革爲夏楚也革鞭也書鞭作官刑扑作教刑古以與通說儀禮士冠特牲筮日
謂寫卦皆卦者事執筮示主人皆筮者事士冠不言筮者文不具鄭注以特牲書
卦爲卦者事誤也又馬融注論語以三綱五常解因以文質三統解損益朱子集
注因之德鉞謂三綱五常定之自天者也非夏殷先王所剏也不可謂因且孔子
言禮一而已馬以爲五常則益之以仁義智信信如其說曰殷因於夏之仁義智
信周因於殷之仁義智信可乎蓋因與損益爲一事損者損其禮益者益其禮禮
也者吉凶軍賓嘉之謂非指其辭讓之心爲禮之端而言也湯武革命故禮亦隨
之然革其節目而不能革其大體故同一始加冠而牟追章甫委貌異其制同一
三加而收啍弁異其名同一尸而夏立殷坐周旅酬同一降神而殷先求諸陽周
先求諸陰同一牲而異其黑白赤同一祭而異其心肝同一飲而異其明水醴同
一尊而異其山著義象乃因風氣之醇澆而有盈縮監前人之得失而裒益其多

寡是聖人之善其因也禮者人之隄防也其因與損益亦若是而已故君臣父子之名不可卽名以禮而仁義智信之德不可獨以禮當之也其說皆能發前人所未發著有周易義例一卷周易雜卦反對互圖一卷七經餘說一卷語錄四卷女範一卷銳齋偶筆一卷日記六卷文鈔六卷詩一卷又有詩經文辭異同考三國志補注 呂飛鵬字雲里安徽旌德人年十七從寧國凌廷堪治禮廷堪器之以爲能傳其學山陽汪廷珍視學安徽喜士通古經義補飛鵬縣學附生飛鵬少讀周禮長而癖嗜廷堪嘗著周官九拜九祭解鄉射五物考援據禮經疏通證明足發前人所未發飛鵬師其意而變通之成周禮補注六卷其大旨以鄭氏爲宗廣搜衆說補所未備或旁采他經舊注或兼取近儒經說要於申明古義又著周禮古今文義證六卷平居書齋閣自銘誠粹然出於儒先道學鄉饑籌粟倡賑人多德之有爭辯一言立釋嘗戒其子賢基曰成名易成人難又曰言官不易爲毋陳利而昧大體毋挾私而務高名其本行如此賢基卒以忠節著道光二十三年卒年七十三

張惠言 子成孫 江承之 胡祥麟

張惠言字皋聞江蘇武進人少受義經卽通大義年十四爲童子師修學立行敦品自守嘉慶四年進士時大學士朱珪爲吏部尙書以惠言學行特奏改庶吉士充實錄館纂修官六年散館奉旨以部屬用珪復特奏改授翰林院編修七年卒年四十二惠言鄉會兩試皆出朱珪門未嘗以所能自異默然隨羣弟子進退而已珪潛察得之則大喜故屢進達之而惠言亦斷斷相諍不敢隱珪言天子當以寬大得民惠言言國家承平百餘年至仁涵育遠出漢唐宋之上吏民習於寬大故奸孽萌芽其間宜大伸法以肅內外之政珪言天子當優有過大臣惠言言庸猥之輩倖致通顯復壞朝廷法度惜全之當何所用珪喜進淹雅之士惠言言當進內治官府外治疆場者與同縣編修洪亮吉於廣坐諍之惠言少爲辭賦擬司馬相如揚雄之文及壯又學韓愈歐陽修篆書初學李陽冰後學漢碑額及石鼓文嘗奉命詣盛京篆列聖加尊號玉寶惠言言於當事謂舊藏寶不得磨治又謂翰林奉命篆列聖寶宜奉請馳驛以格於例不果行生平精思絕人嘗從歛金榜問故其學要歸六經而尤深易禮著有周易虞氏義九卷虞氏消息二卷嘗謂自漢武帝時劉向校書考易說以爲諸易家皆祖田何楊叔丁將軍大義略同惟京

氏爲異而孟喜受易家陰陽其說易本於氣而後以人事明之八卦六十四象四正七十二候變通消息諸儒祖述之莫能具當漢之季年扶風馬融作易傳授鄭康成作易注而荊州牧劉表會稽太守王朗潁川荀爽南陽宋忠皆以易名家各有所述惟翻傳孟氏學旣作易注奏上之獻帝翻之言易以陰陽消息六爻發揮旁通升降上下歸於乾元用九而天下治依物取類貫穿比附始若瑣碎及其沈深解剝離根散葉暢茂條理遂於大道後儒罕能通之自魏王弼以虛空之言解易唐立之學官而漢世諸儒之說微獨資州李鼎祚作周易集解頗采古易家言而翻注爲多其後古書盡亡而宋道士陳搏以意造爲龍圖其徒劉牧以爲易之河圖洛書也河南邵雍又爲先天後天之圖宋之說易者翕然宗之以至於今牢不可拔而易陰陽之大義蓋盡晦矣大清有天下元和徵士惠棟始考古義孟京荀鄭虞氏作易漢學又自爲解釋曰周易述然掇拾於亡廢之後左右采獲十無二三其所述大抵宗禰虞氏而未能盡通則旁徵他說以合之蓋從唐五代宋元明朽壞散亂千有餘年區區修補收拾欲一日而其道復明斯固難也翻之學旣邃又具見馬鄭荀宋氏書考其是否故其義爲精又古書亡而漢魏師說可見者

十餘家然惟鄭荀虞三家畧有梗概可指說而虞又較備然則求七十子之微言田何楊叔丁將軍之所傳者舍虞氏之注其何所自焉故求其條貫明其統例釋其疑滯信其亡闕庶以探蹟索隱存一家之學其所未寤俟有道正焉耳又著虞氏易禮二卷虞氏易候一卷虞氏易言二卷初惠棟作周易述大旨遵虞翻補以鄭荀諸儒學者以未能專一少之儀徵阮元謂漢人之易孟費諸家各有師承勢不能合惠言傳虞氏易卽傳漢孟氏易矣孤經絕學也惠言又著周易鄭氏義三卷周易荀氏九家義一卷周易鄭荀義三卷易義別錄十四卷易緯略義三卷易圖條辨二卷其易義別錄序謂不盡見其辭而欲論其是非猶以偏言決獄也不盡通各家而欲處其優劣猶按白而嘲黑也故其所著皆羽儀虞氏易者於禮有儀禮圖六卷讀儀禮記二卷皆特精審又有茗柯文五卷詞一卷子成孫 成孫字彥惟少時惠言課以說文令分六書譜之成象形二卷惠言著說文諧聲譜未竟而卒成孫後從莊述祖游得其大要乃續成之卷第篇例多所增易凡五十卷其書分中僮薨林巖筐榮藜誥干萋肄揖支皮絲鳩萑夔岨二十部此乃於毛詩中拈其最先出之字爲建首加以易韻屈韻而又以說文之聲分從之犁然不紊

有各家所未及者嘗以示儀徵阮元元歎其超卓精細後臨桂龍啟瑞見其稿以爲較段氏書爲密而不失之拘古韻之書此爲集其大成時啟瑞著古韻通說因節錄之以備考遭亂稿佚惟節本九卷存成孫兼精天學同里董祐誠歿爲較刊其遺書又著有端虛勉一居文集 江承之字安甫安徽歙縣人學於惠言時弟子從惠言受易禮者十數其甥董士錫受易通陰陽五行家言承之兼受儀禮著有周易爻義虞氏易變表儀禮名物鄭氏詩譜 胡祥麟字仁圃浙江秀水人嘉慶十八年舉人少遊吳江陸燿幕講求實學治經好深沈之思得張惠言虞氏易義消息思索屢月衍其說爲虞氏易消息圖說一卷性鯁直自名其齋曰省過嘉興錢泰吉日爲諍友道光三年卒詩學楊鐵崖李西厓有省過齋詩鈔

許宗彥

許宗彥字積卿浙江德清人父祖京乾隆三十四年進士官至山東布政使著有詩經述八卷詩四卷宗彥九歲能讀經史善屬文侍郎王昶愛其才作積卿字說以贈嘉慶四年進士是科得人最盛總裁朱珪尤重宗彥謂兼有張惠言王引之吳鼐諸子之長授兵部主事就官兩月以親老遽引疾歸親歿卒不出居杭州杜

門以讀書爲事其學問無不通探蹟索隱發千年儒者所未發考周五廟二祧以爲周制五廟之外別有二祧爲遷廟之殺以厚親親之仁宗廟之外別立祖宗與禘郊同爲重祭以大尊尊之義諸經無文武二廟不毀之誤誤始於韋元成而劉歆因之鄭康成亦因之祧者遷廟乃謂爲不遷之廟名實乖矣又考文武二世室以爲周文武皆配於明堂太室故有文武世室之號孔穎達誤謂伯禽稱文世室武公稱武世室以公羊傳周公稱太廟魯公稱世室羣公稱宮證之外甚又考禹貢三江以爲漢志言分江水首受江東至餘姚入海夫曰分江水曰首受江則非南江之正流可知曰東至餘姚入海則非在吳入海可知與禹貢三江無與又考太歲太陰以爲太歲者歲星與日同次斗杓所建之辰也太陰始寅終丑太歲始子終亥漢律志曰太初元年歲前十一月朔旦冬至歲在星紀婺女六度歲名困敦此太歲始子之確證武帝詔曰年名焉逢攝提格此太陰始寅之確證漢書天文志始誤以甘石之言太陰者係之太歲而與太初之太歲遂差兩辰乃以爲星有贏縮非矣又說六書轉注以爲從偏旁轉相注說文曰轉注者建類一首同意相受考老是也後序曰其建首也立一爲端卽建類一首之謂也如示爲部首從

示之偏旁注爲神祇等字從神祇注爲祠祀祭祝等字輾轉相注皆同意爲一類戴震指爾雅詁訓爲轉注而不知詁訓出於後來非制字時所豫有也段玉裁引戴說又言爾雅字多假借而不知假借者本無其字今如初哉首基之訓非本無首字而假初哉等字以當之也其他所著學說能持漢宋儒者之平禮論治論諸篇皆稽古證今通達政體尤精天文得泰西推步祕法自製渾全球別具神解嘗援緯書四游以疏本天高卑而知不同心非渾圓之理考周髀北極璿璣以推古人測驗之法七政皆統於天而知東漢以前用赤道不用黃道爲得諸行之本又論日左右旋一理以王錫闡解黃道右旋赤道平行戴震分黃道黃極爲二行其說頗不分明爲剖析之皆言天家所未及性孝友慎於交游體羸而神理澁淡見者皆肅敬之儀徵阮元會試舉主也重其學術行誼以子女爲姍家宗彥嘗訓諸子曰讀書人第一須使此心光明正大澄清如止水無絲毫苟且私曲不可對人處故名所居曰鑑止水齋二十三年卒年五十一著有鑑止水齋集二十卷

郝懿行 牟庭

郝懿行字恂九山東棲霞人嘉慶四年進士授戶部主事二十五年補江南司主

事道光三年卒年六十九懿行謙退訥若不出口然自守廉介不輕與人晉接遇非素知者相對竟日無一語迨談論經義則喋喋忘倦所居四壁蕭然庭院蓬蒿常滿僮僕不備懿行處之晏如浮沈耶署視官之榮悴若無與於己者而一肆力於著述漏下四鼓者四十年所著有爾雅義疏十九卷春秋說略十二卷春秋比一卷山海經箋疏十八卷易說十二卷書說二卷鄭氏禮記箋四十九卷懿行嘗曰邵晉涵爾雅正義蒐輯較廣然聲音訓詁之原尙多壅闕故鮮發明今余作義疏於字借聲轉處詞繁不殺殆欲明其所以然又曰余田居多載遇草木蟲魚有弗知者必詢其名詳察其形考之古書以徵其然否今茲疏中其異於舊說者皆經目驗非憑胸臆此余書所以別乎邵氏也懿行之於爾雅用力最久稿凡數易垂歿而後成訓故同異名物疑似必詳加辨論疏通證明故所造較晉涵爲深高郵王念孫爲之點閱寄儀徵阮元刊行元總裁會試時從經義中識拔懿行者也其著春秋說略有十例一曰說春秋不得褒貶天王以明臣子之義二曰說春秋不得妄生褒貶春秋直書其事褒貶自見三曰說春秋者好於經所無處尋褒貶春秋皆實錄其多一字少一字皆事實如此非聖人意爲增減四曰春秋多闕文

然以義推之皆大略可見五曰春秋經文當從左氏左氏闕誤乃從公穀六曰左氏深於經公穀說經字字求褒貶左氏但敘本事褒貶自見得聖人渾厚之旨七曰說春秋者好緣傳生義不顧經文說經當一以經爲主范武子曰三傳殊說擇善而從此言可爲治經者法八曰春秋刑書也刑書之例一成不移故法必行而人知畏九曰春秋聖人義理之書本不待傳而明十曰比事屬辭春秋教也事同相比事異相比辭同相屬辭異相屬其義自見河間紀昀觀其書以爲能剗盡千秋藤葛其箋疏山海經援引各籍正名辨物事刊疏謬辭取雅馴阮元謂吳氏廣注徵引雖博失之蕪雜畢沅校本訂正文字尙多疏略惟懿行精而不鑿博而不濫懿行妻王照圓字瑞玉博涉經史當時著書家有高郵王父子棲霞郝夫婦之目照圓聰慧過人每與懿行持論不合諍辨竟日著有詩說一卷烈女傳補注八卷附女錄一卷女校一卷又與懿行以詩答問懿行錄之爲詩問七卷其爾雅義疏亦間取照圓說光緒七年倉場侍郎游百川進呈懿行所著春秋爾雅山海經四種奉旨郝懿行所著書當交南書房翰林閱看據稱郝懿行學問淵博經術湛深嘉慶年間海內推重所著各書精博邃密足資考證卽著留覽八年府尹畢道

遠等續進懿行及照圓所著書六種奉旨著留覽懿行所著未經進者有詩經拾遺一卷汲冢周書輯要一卷竹書紀年校正十四卷荀子補注一卷晉宋書故一卷補晉書刑法志一卷食貨志一卷宋瑣語一卷寶訓八卷蜂衙小紀燕子春秋海錯各一卷證俗文十八卷筆錄六卷文集十二卷懿行以養疴輟爾雅業時瀏覽晉宋史鈔晉文百數十首謂王右軍虛談廢務浮文妨要二語切中當時之弊所鈔屏黜虛浮一以切實爲主其自作雜文亦出入漢魏晉宋之間雜記數帙旁徵稗說閒采時事皆意主勸戒照圓所著未經進者又有列仙傳校正二卷夢書一卷牟庭初名庭相字默人亦棲霞人貢生與郝懿行友善同研樸學庭少懿行二歲懿行每有著述輒與商榷庭嘗謂孫叔炎受學康成而鄭注士昏禮曰壻悉計反從士從胥又漢書陳勝傳應劭注沈音長含反地理志應劭注沓音長答反項羽傳注服虔曰惴音章瑞反揚雄傳注服虔曰踢音石奠反應服與鄭同時年輩大於叔炎然則謂反語始於叔炎非也懿行以爲然庭博通羣經兼明算術尤好今文尙書之學所著書五十餘種遭亂亡佚獨詩切一書首尾完具又周公年表投壺算草兩句合與兩股較及帶縱和數立方算草各一卷今尙存同時萊

陽趙曾字慶孫乾隆五十四年舉人官江蘇知縣爲今文尙書及三禮左氏之學與庭友善甘泉江藩嘗稱爲山左翹楚也

莫與儔 子友芝

莫與儔字猶人貴州獨山人嘉慶四年進士改翰林院庶吉士散館改知縣授四川鹽源縣俗富人好買無徵之田貧人鬻產存賦久輒逃亡與儔責賦富人而貰其隱占之罪河西有寧遠子稅所橫徵與儔言病民得裁去木裏喇嗎左所有山產銀銅郡守徇奸民之求請布政司符縣開礦與儔覘知出銀之山實士官經堂所據彼人重經堂視祖廟且開廠聚衆滋擾夷境患且不測力持不可上游是之檄往覆勘至則礦山者果在其經堂右其衆嚴兵以待瞻與儔貌又聆溫語皆解甲羅拜縣令入土司境居有供行有餽與儔盡卻其物又懸諸禁比還老幼遮道多有垂涕者舉治行卓異以父憂去職服闋事母十四年終養後改遵義府學教授創祠漢三賢於學宮左日以樸學倡其徒舉閩若璩六經宗服鄭百行法程朱之榜以樹依歸其國朝專經大師所爲故訓如易惠氏書閻氏詩陳氏禮江氏說文段氏王氏未嘗隔三宿不言其示諸生謂學莫先於正趨向趨向之正不正

視乎義利之明不明又謂讀書當求實用經典所載孰非師法言言而求諸身事
事而思其用則讀一卷書自有一卷書之益遵義之人爭就受業學舍不足僦居
半城市道光二十一年卒於官年七十九自來言都勻地理者率自五代後始有
據依與儔參互史籍作都勻府南齊以上地理攷所爲書有二南近說四卷仁本
事韻二卷詩文雜藁四卷門人鄭珍子友芝並通許鄭之學珍別有傳 友芝字
子偲道光十一年舉人咸豐八年截取知縣且選官意不樂棄去同治初中外大
臣密薦學問之士詔徵十四人友芝其一也朋好爭勸出仕謝不就友芝少承先
訓通會漢宋兩學於蒼雅故訓六經名物制度靡不探討旁及金石目錄家之說
遇人無貴賤一接以和而中故介然有以自守黔自有明開省文獻乃稍可述與
儔有貴州置省以來建學記以見黔文興起之所由又蒐采黔人詩歌斷自明代
成黔詩紀略三十二卷同治十年卒年六十有一著有經說詩文集又聲韻考略
四卷過庭碎錄十二卷樗繭譜注一卷唐本說文本部箋異一卷宋元舊本書經
眼錄三卷附錄二卷遵義府志四十八卷

陳壽祺 子喬樞 謝震 何治運 孫經世 柯蘅

陳壽祺字恭甫福建閩縣人父鶴書歲貢生以質行稱壽祺少能文年十八臺灣平撰上福康安百韻詩並序沈博絕麗時稱爲才子然壽祺自咎不能高行遂學不可告人乃從同縣孟超然游爲宋儒之學慍然以古君子自期嘉慶四年成進士改翰林院庶吉士散館授編修尋告歸性至孝不忍言仕家貧無食父命之入都九年充廣東鄉試副考官十二年充河南鄉試副考官十四年充會試同考官旋記名御史壽祺以不得迎養常愀然不樂將告歸俄聞父憂慟幾絕奔歸服除乞養母母歿終喪年五十三有密薦於朝者卒不出壽祺會試出朱珪阮元門乃專爲漢儒之學與同年張惠言王引之齊名又及見錢大昕段玉裁王念孫程瑤田諸人故學益精博解經得兩漢大義每舉一義輒有折衷兩漢經師莫先於伏生莫備於許氏鄭氏壽祺闡明遺書著尙書大傳箋三卷序錄一卷訂誤一卷附漢書五行志綴以他書所引劉氏五行傳論三卷序曰伏生大傳條撰大義因經屬指其文辭爾雅深厚最近大小戴記七十子之徒所說非漢諸儒傳訓之所能及也康成百世儒宗獨注大傳其釋三禮每援引之及注古文尙書洪範五事康誥孟侯文王伐崇弋耆之歲周公克殷踐奄之年咸據大傳以明事豈非閎識博

通信舊聞者哉且夫伏生之學尤善於禮其言巡狩朝覲郊尸迎日廟祭族燕閭塾學校養老擇射貢士考績郊遂采地房堂路寢之制后夫人入御太子迎問諸侯之法三正之統五服之色七始之素八伯之樂皆唐虞三代遺文往往六經所不備諸子百家所不詳今其書散逸十無四五尤可寶重宋朱子與勉齋黃氏纂儀禮經傳通解攬摭大傳獨詳蓋有裨禮學不虛也五行傳者自夏侯始昌至劉氏父子傳之皆善推飭福著天人之應漢儒治經莫不明象數陰陽以窮極性命故易有孟京卦氣之候詩有翼奉五際之要春秋有公羊災異之條書有夏侯劉氏許商李尋洪範之論班固本大傳摭仲舒別向歆以傳春秋告往知來王事之表不可廢也是以錄漢書五行志附於後以備一家之學云又著五經異義疏證三卷序曰石渠議奏之體先臚衆說次定一尊覽者得以考見家法劉更生采之爲五經通義惜皆散亡白虎通義亦多闕佚且經班固刪集深沒衆家姓名殊爲疏失不如異義所援古今百家皆舉五經先師遺說其體仿石渠論而詳贍過之許君又著說文解字綜貫萬原當世未見遵用獨鄭君注儀禮既夕記小戴禮雜記周禮攷工記嘗三稱之所以推重之者至矣顧於異義爲之駁者祭酒受業賈

侍中敦崇古學故多從古文家說司農囊括網羅意在宏通故兼從今文家說此其判也案張懷瓘書斷叔重安帝末年卒鄭君別傳康成永建二年生鄭氏於許爲後進而繩糾是非爲汝南之諍友夫向歆父子猶有左穀之違何鄭同室奚傷箴育之作聖道至大百世莫殫仁者見仁智者見智斬於事得其實道得其真而已今許鄭之學流布天下此編雖略然典禮之闕達名物之章明學者循是而討論焉其於昔人所譏國家將立辟雍巡守之儀幽冥而莫知其原者庶乎可免也他著又有左海經辨二卷左海文集十卷左海駢體文二卷絳跣堂詩集六卷東粵儒林文苑後傳二卷東觀存稿一卷壽祺歸後阮元延課詁經精舍趙坦徐養原嚴杰洪頤煊等皆從問業元纂羣經古義爲經郭壽祺爲撰條例明所以原本訓辭會通典禮存家法而析異同之意後主泉州清源書院十年主龍峰書院十一年與諸生言修身勵學教以經術作義利辨知恥說科舉論以示學者規約整肅士初苦之久乃悅服家居與諸當事書於桑梓利弊蒿目痍心雖觸忌諱無所隱明儒黃道周孤忠絕學壽祺搜輯遺文爲之刊行又具呈大吏乞疏請從祀孔廟議上如所請道光十四年卒年六十四子喬樅 喬樅字樸園道光五年舉人

二十四年以大挑知縣分發江西歷官分宜弋陽德化南城諸縣署袁州臨江撫州知府以經術飾吏治居官有聲同治七年卒於官年六十一初壽祺以鄭注禮記多改讀又嘗鈎考齊魯韓三家詩佚文佚義與毛氏異同者輯而未就病革謂喬樅曰爾好漢學治經知師法他日能成吾志九原無憾矣喬樅乃紬繹舊聞勒爲定本成禮記鄭讀考六卷三家詩遺說考十五卷又著齊詩翼氏學疏證二卷詩緯集證四卷謂齊詩之學宗旨有三曰四始曰五際曰六情皆以明天地陰陽終始之理考人事盛衰得失之原言王道治亂安危之故齊先亡最爲寡證獨翼奉存其百一且其說多出詩緯察躔象推曆數徵休咎蓋齊學所本也詩緯亡而齊詩遂爲絕學矣又著今文尙書經說考三十四卷歐陽夏侯經說考一卷謂二十九篇今文具存十六篇既無今文可考遂莫能盡通其義凡古文易詩書禮論語孝經所以傳悉由今文爲之先驅今文所無輒廢向微伏生則萬古長夜矣歐陽大小夏侯各守師法苟能得其單辭片義以尋千百年不傳之緒則今文之維持聖經於不墜者豈淺眇哉喬樅撰述多準壽祺遺訓又有詩經四家異文考五卷毛詩鄭箋改字說四卷禮堂經說二卷少喜治三禮撰東夾西夾考一篇推勘

精密王引之亟稱之最後爲尙書說時宿儒漸蕪考據家爲世警獨湘鄉曾國藩見其書以爲可傳國朝古學元和惠氏高郵王氏外惟喬樅能修世業張大其家法壽祺同里治古學者有謝震何治運 謝震原名在震字甸男福建侯官人乾隆五十四年舉人順昌學教諭震嘗與閩縣林一桂甌寧萬世美爲經會與一桂世美俱精三禮震尤篤學嗜古史傳百家篆隸金石靡不通曉然斷斷持漢學好排擊宋儒鑿空逃虛之說壽祺與震鄉試同年少震六歲視爲畏友震重氣誼有志用世而不遇於時嘗過漢中謂人曰終南亙七百餘里連跨數郡秦蜀門戶也守險安可忽鄖庸以西夔巫以東巴閬之北武都之南大山老林螻蛄其間今將吏狃昇平而弛控馭不數稔難其作乎及嘉慶初邪教起震言皆驗年四十卒弟子輯其遺著有禮案二卷精覈勝敖氏又有四書小箋一卷四聖年譜一卷工詩有櫻桃軒詩集二卷 何治運字郊海福建閩縣人嘉慶十二年舉人治聞疆識篤志漢學粵督阮元嘗聘纂廣東通志後遊浙中巡撫陳若霖爲鈐其經解及論辨文字四卷名何氏學又著有公羊精義論語解詁孟子通義周書後定太元經補注道光元年卒年四十七治運與壽祺友及卒壽祺以謂無與爲質不獲以

輔成其學也 孫經世字濟侯福建惠安人壽祺弟子也壽祺課士不一格遊其門者若仙遊王捷南之詩禮春秋諸史晉江杜彥士之小學惠安陳金城之漢易將樂梁文之性理建安丁汝恭德化賴其煥建陽張際亮之詩古文辭皆足名家而經世學成早世世以儒林推之經世少喜讀近思錄後沈研經義謂不通經學無以爲理學不明訓詁無以通經不知聲音文字之原無以明訓詁著說文會通十六卷爾雅音疏六卷釋文辨證十四卷韻學溯源四卷十三經正讀定本八十八卷經傳釋辭續編八卷又著春秋例辨八卷孝經說二卷夏小正說一卷詩韻訂二卷惕齋經說六卷讀經校語四卷其四書集解十二卷周易本義發明十二卷則少作也經世善事父母居喪不御酒肉不居內泉俗好鬪訟大姓爲甚孫氏族衆萬數漸漬身教竟爲仁里新城陳用光督學閩中舉優行第一嘗詫於涇縣包世臣曰吾歸裝得一濟侯勝筭河三百石矣筭河朱筠號筠去閩時士各饋一石因積成山建三百三十三士亭故用光云然經世又謂治經當體之身心用之家國嘗欲編定經義纂集古今之言學言治以證明之名曰通經略書未竟道光十二年卒於京邸年五十 柯蘅山東膠州人從壽祺受許鄭之學嘗以史漢諸表

爲紀傳之綱領而譌誤舛奪最稱難治乃條而理之著漢書七表校補二十卷爲例十一曰辨事誤二曰辨文字誤三曰辨注誤四曰辨諸家考證之誤五曰以本書證本書之誤六曰史漢互證而知其誤七曰漢書荀紀互證而知其誤八曰漢書水經注互證而知其誤九曰據紀傳以補表之闕十曰據今地以證表之誤鈎稽隱蹟掇拾繁碎凡前人之說皆取而辨其是非至前人之未及者又得二三千事亦專門之學也尤長於詩論者謂可配其鄉先輩王士禎趙執信著有聲詩闡微二卷舊雨草堂詩集四卷其說經說史之作門人集爲舊雨草堂札記

馬宗槌 子瑞辰

馬宗槌字器之安徽桐城人由舉人官東流縣教諭嘉慶六年成進士又一年卒少從舅氏姚鼐學詩古文詞所作多沈博絕麗旣而精通古訓及地理之學鄉舉時以解論語過位升堂合於古制大興朱珪亟拔之後從邵晉涵任大椿王念孫遊其學益進嘗以解經必先通訓詁而載籍極博未有彙成一編者乃偕同志孫星衍阮元朱錫庚分韻編錄適南旋中輟後元視學浙江萃諸名宿爲經籍纂詁其凡例猶昔年所手訂也生平敦實行寡嗜好惟以著述爲樂嘗撰左氏補注三

卷博徵漢晉諸儒之說不苟同立異論者謂足與顧炎武惠棟兩家之書相表裏其自序云效子慎之作解誼家法是守鄙冲遠之爲疏證曲說鮮通蓋紀實也所著別有毛鄭詩詁訓考證周禮鄭注疏證穀梁傳疏證說文字義廣注戰國策地理考南海鬱林合浦蒼梧四郡沿革考嶺南詩鈔共數十卷校經堂詩鈔二卷子瑞辰 瑞辰字元伯嘉慶十年進士改翰林院庶吉士散館授工部營繕司主事擢郎中因事罣誤發盛京效力旋賞給主事奏留工部補員外郎復坐事發往黑龍江效力未幾釋歸歷主江西白鹿山東嶧山安徽廬陽書院講席咸豐三年冬髮逆陷桐城衆驚走賊脅之降瑞辰大言曰吾前翰林院庶吉士工部都水司員外郎馬瑞辰也吾命二子團練鄉兵今仲子死少子從軍吾豈降賊耶賊熱其背而擁之行行數里罵愈厲遂死年七十九事聞奉旨贈道銜賜卹廕如例敕建專祠瑞辰豐頤長身言論娓娓勤學著書耄而不倦嘗謂詩自齊魯韓三家既亡說詩者以毛詩爲最古據鄭志答張逸云注詩宗毛爲主毛義隱略則更表明是鄭君大旨本以述毛其箋詩改讀非盡易傳而正義或誤以爲毛鄭異義鄭君先從張恭祖受韓詩凡箋訓異毛者多本韓說其答張逸亦云如有不同卽下己意而

正義又或誤合傳箋爲一毛詩用古文其經字多假借類皆本於雙聲疊韻而正義或有未達於是撰毛詩傳箋通釋三十二卷以三家辨其異同以全經明其義例以古音古義證其僞互以雙聲疊韻別其通借篤守家法義據通深同時長洲陳奐著毛詩傳疏亦爲專門之學由是治毛詩者多推此兩家之書子三俊字命之優貢生舉孝廉方正學宗程朱兼取陸王之說詩古文亦力追秦漢魏晉以國難家仇憤欲殺賊四年六月率練勇追賊至周瑜城力戰死年三十五著有馬徵君遺集

林春溥

林春溥字立源福建閩縣人嘉慶七年進士改翰林院庶吉士散館授編修歷充順天鄉試會試同考官以父年八十陳請歸養遂家居不出咸豐十一年重與恩榮宴得旨賞加四品卿銜十二月卒年八十七春溥自少至老丹鉛不少閒有得卽隨手筭記其著述貫串經史一衷至當以金履祥通鑑前編本之皇極經世強事繫年鑿定甲子乃推究竹書紀年證以他書上溯黃帝下接左氏爲古史紀年十四卷又唐僧一行大衍曆每據竹書以推古年甲子其佚雜見他說端委靡竟

亦資異聞乃表而列之參稽同異爲說於後爲古史考年異同表二卷又以武王克殷甲子見於武成逸書乃參之傳記爲武王克殷日記一卷又以傳春秋者左氏杜預始分經之年與傳相附乃參以公穀國語史記諸書附注其異文其逸事不知日月附錄於後爲春秋經傳比事二十二卷又以戰國諸侯史記滅於秦火史遷掇拾秦記日月不備傳聞異詞乃本通鑑綱目之舊增而輯之爲戰國紀年六卷表一卷又以竹書出後人綴輯乃旁考諸家所引疏通證明復取後人所以致疑者統爲後案爲竹書紀年補證四卷他著又有開闢傳疑二卷滅國五十考一卷孔子年表二卷孔子世家補訂一卷孟子列傳纂一卷孟子外書補證一卷四書拾遺五卷古書拾遺四卷開卷偶得十卷

嚴可均 嚴元照

嚴可均字景文浙江烏程人嘉慶五年舉人官建德縣教諭引疾歸可均博文強識精考據之學與姚文田同治說文徧索異同爲說文長編亦謂之類考有天文算數地理類草木鳥獸蟲魚類聲類說文引羣書類羣書引說文類積四十五冊又輯鐘鼎拓本爲說文翼十五篇將校定說文撰爲疏異孫星衍促其成乃撮舉

大略就毛氏汲古閣初印本別爲校義三十卷專正徐鉉之失又與丁溶同治唐石經著校文十卷自序云余弱冠治經稍見宋槧本既又念若漢若魏若唐若孟蜀若宋嘉祐紹興各立石經今僅嘉祐四石紹興八十七石皆殘本而唐太和石壁二百二十八石巋然獨存此天地閒經本之最完最舊者夫唐代四部之富埒於梁隋而鄭覃唐元度輩皆通儒頗見古本苟能彙正積非歸於真是卽方駕熹平不難而僅止於是今也古本皆亡欲復舊觀已難爲力可慨也然而後唐雕版實依石經句讀鈔寫歷宋元明轉刻轉誤而石本幸存縱不足與復古以匡今謬有餘也獨怪數百年來學士大夫尠或過問者閒有一二好古之士亦與冢碣寺碑同類而並道之康熙初顧炎武始略校焉觀其所作九經誤字金石文字記刺取膠膠是非寡當又誤信王堯惠之補字以誣石經顧氏且然況其他乎嗚呼石經者古本之終今本之祖治經不及見古本而並荒石經匪直荒之又交口誣之豈經之幸哉余不自揆欲爲今版本正其誤爲唐石經釋其非爲顧氏等祛其惑隨讀隨校凡石經之磨改者旁增者與今本互異者皆錄出輒據注疏釋文旁稽史傳及漢唐人所徵引者爲之左證而石臺孝經附其後焉嘉慶十三年詔開全

唐文館可均以越在草茅無能爲役慨然曰唐之文盛矣哉唐以前要當有總集乃輯全上古三代秦漢三國六朝文使與全唐文相接多至三千餘家人各系以小傳足以考證史文皆從蒐羅殘賸得之覆檢羣書一字一句稍有異同無不校訂一手寫定不假衆力唐以前文咸萃於此焉又校輯諸經逸注及佚子書等數十種合經史子集爲四錄堂類集千二百餘卷又著有鐵橋漫稿十三卷其說文類考稿佚惟聲類二卷存道光二十三年卒年八十二 嚴元照字九能浙江歸安人諸生治經務實學尤熟於爾雅說文嘗曰說文古文家學爾雅今文家學也著爾雅匡名八卷旁羅異文佚訓鈎稽而疏證之又有悔菴文鈔八卷詩鈔詞鈔娛親雅言等書嘉慶二十二年卒年三十五

焦循 子廷琥 顧鳳毛 鍾懷 李鍾泗

焦循字里堂江蘇甘泉人嘉慶六年舉人曾祖源祖鏡父葱世傳易學循少穎異八歲在阮廣堯家與賓客辨壁上馮夷字曰此當如楚辭讀皮冰切不當讀如縫阮奇之妻以女旣壯雅尙經術與阮元齊名元督學山東浙江俱招循往遊性至孝丁父及嫡母謝艱哀毀如禮一應禮部試後以生母殷病愈而神未健不復北

行殷歿循毀如初服除遂託足疾不入城市者十餘年葺其老屋曰半九書塾復構一樓曰雕菰樓有湖光山色之勝讀書著述其中嘗歎曰家雖貧幸蔬菜不乏天之疾我福我也吾老於此矣嘉慶二十五年卒年五十八循博聞彊記識力精卓每遇一書無論隱奧平衍必究其源以故經史曆算聲音訓詁無所不精幼好易父問小畜密雲二語何以復見於小過循反復其故不可得既學洞淵九容之術乃以數之比例求易之比例漸能理解著通釋二十卷自謂所悟得者一日旁通二曰相錯三曰時行旁通者在本卦初與四易二與五易三與上易本卦無可易則旁通於他卦亦初通於四二通於五三通於上先二五後初四三上爲當位不俟二五而初四三上先行爲失道易之道惟在變通二五先行而上下應之此變通不窮者也或初四先行三上先行則上下不能應然能變而通之仍大中而上下應如乾四之坤初而成小畜復失道矣變通之小畜二之豫五姤二之復五復初不能應姤初則能應小畜四不能應豫四則能應坎三之離上成井豐失道矣變通之井二之噬嗑五豐五之渙二豐上不能應渙上則能應井三不能應噬嗑三則能應此所謂時行也比例之義出於相錯如睽二之五爲无妄井二之噬

嗑五亦爲无妄故睽之噬膚卽噬嗑之噬膚坎三之離上成豐噬嗑上之三亦成豐故豐之日昃卽離之日昃豐之日中卽噬嗑之日中漸上之歸妹三歸妹成大壯漸成蹇蹇大壯相錯成需故歸妹以須須卽需也歸妹四之漸初漸成家人歸妹成臨臨通遯相錯爲謙履故眇能視跛能履臨二之五卽履二之謙五之比例也旣復提其要爲圖略八卷又成章句十二卷總名易學三書初循以易學質王引之引之以爲鑿破混沌年四十七病危以書未成爲憾後乃誓於先聖先師盡屏他務凡四易稿乃成其學易時隨筆記錄有易餘籥錄二十卷易話二卷註易日記三卷易廣記三卷又以古之精通易理深得義文周孔之旨者莫如孟子生子作疏其難有十然近代通儒已得八九因博采諸家之說而下以己意合孔孟相傳之正旨又著六經補疏以說漢易者每屏王弼然弼解箕子用趙賓說讀彭爲旁借雍爲甕通孚爲浮解斯爲廝蓋以六書通借其解經之法未遠於馬鄭諸儒爲周易王注補疏二卷以尙書僞孔傳說之善者如金縢我之不辟訓辟爲法居東卽東征罪人卽管蔡大誥周公不自稱王而稱成王之命皆非馬鄭所能及

爲尙書孔氏傳補疏二卷以詩毛鄭義有異同正義往往雜鄭於毛比毛於鄭爲毛詩鄭氏箋補疏五卷以左氏傳稱君君無道稱臣臣之罪杜預揚其辭而暢衍之預爲司馬懿女壻目見成濟之事將以爲司馬節卽用以爲己飾萬斯大惠士奇顧棟高等未能摘姦而發覆爲春秋傳杜氏集解補疏五卷以禮以時爲大訓詁名物亦所宜究爲禮記鄭氏注補疏三卷以論語一書發明義文周公之旨參伍錯綜引伸觸類亦與易例同爲論語何氏集解補疏三卷合之爲二十卷又錄當世通儒說尙書者四十一家書五十七部仿衛湜禮記之例以時之先後爲序得四十卷曰書義叢鈔又著禹貢鄭注釋一卷毛詩地理釋四卷毛詩鳥獸草木蟲魚釋十一卷陸璣疏考證一卷羣經宮室圖二卷論語通釋一卷循於天文算術以梅文鼎弧三角舉要環中黍尺撰非一時繁複無次戴震句股割圓記務爲簡要變易舊名著釋弧三卷又以弧線之生緣於諸輪輪之弗明法無從附著釋輪二卷又以雍正癸卯律書用橢圓法實測隨時而差則立法亦隨時而改著釋橢一卷又以九章不能盡加減乘除之用而加減乘除可以通九章之窮著加減乘除釋八卷又得秦道古數學大略因著天元一釋二卷開方通釋一卷吳縣李

銳序之云此書於帶分寄母同數相消之故發揮無餘蘊李欒城郭彤臺後爲此學者未能如此妙也他著有北湖小志六卷揚州足徵錄一卷邦記六卷里堂道聽錄五十卷最愛柳柳州文習之不倦謂唐宋以來一人而已著有雕菰樓文集二十四卷又詞三卷詩話一卷循壯年卽名重海內錢大昕王鳴盛程瑤田等皆推敬之始入都謁座主英和和曰吾知子之字曰里堂江南老名士屈久矣歿後阮元作傳稱其學精深博大名曰通儒世謂不愧云子廷琥 廷琥字虎玉優廩生性醇篤善承家學阮元稱爲端士循嘗與廷琥纂孟子長編三十卷後撰正義其廷琥有所見亦本范氏穀梁之例爲之錄存循又以測圓海鏡益古衍段二書不詳開方之法以常法推之不合旣得秦道古數學九章有正圓開方法爲開方通釋乃謂廷琥曰汝可列益古衍段六十四問用正圓開方法推之廷琥布策下算一一符合著益古衍段開方補一卷陽湖孫星衍不信西人地圓之說以楊光先之斥地圓比孟子之距楊墨廷琥謂古之言天者三家曰宣夜曰周髀曰渾天宣夜無師承渾蓋之說皆謂地圓泰州陳氏宣城梅氏悉以東西測景有時差南北測星有地差與圓形合爲說且大戴有曾子之言內經有岐伯之言宋有邵子

程子之言其說非西人所自剏因博搜古籍著地圓說二卷他著有密花館詩文鈔 顧鳳毛字超宗江蘇興化人乾隆四十九年高宗南巡召試列二等五十三年副貢生父九苞字文子長於詩禮九苞母任氏大椿祖姑通經達史九苞之學母所教也四十六年進士歸時卒於路著述不傳鳳毛亦受經於祖母年十一通五經及長傳九苞學與焦循同學循就鳳毛問難始用力於經鳳毛又學音韻律呂於嘉定錢塘撰楚辭韻考入聲韻考毛詩韻考皆得塘旨又撰毛詩集解董子求雨考三代田制考未成而卒年二十七卒後循理其喪作招亡友賦哭之 鍾懷字保岐甘泉人優貢生與儀徵阮元同縣焦循相善共爲經學旦夕討論務求其是居恆禮法自守不與世爭名交遊中稱爲君子嘉慶十年卒年四十五所著有春秋考異說書區別錄祭法解周官識小論語考古漢儒考等書凡十三種卒後循刺其精華編爲蔽匡考古錄四卷其漢儒考較陸德明所載增多十餘人 李鍾泗字濱石亦甘泉人嘉慶六年舉人治經精左氏春秋撰規規過一書抑劉伸杜焦循服其精博

李銳 汪萊 張敦仁 談泰 陳懋齡

李銳字尙之江蘇元和人諸生篤學樸厚長於經義習公羊春秋虞氏易嘗著周易虞氏略例十八篇爲一卷幼好算術因受經嘉定錢大昕聞中西異同之奧大昕誨之曰凡爲弟子者不勝其師不爲賢弟子於是閉戶沈思五年盡通疇人家言尤深古曆自三統以迄授時悉能洞澈本原以鄭注召誥周公居攝五年二月三月嘗爲一月二月不云正月者蓋待治定制禮乃正言正月故也鄭君精於步算此破二月三月爲一月二月以緯候入部數推知上推下驗一一符合江聲王鳴盛以爲據召誥十二月戊辰逆推之其說未覈因著召誥日名考融會古曆以發明經術大昕嘗以太乙統宗寶鑑求積年術日法一萬五百歲實三百八十三萬五千四十八分二十五秒爲疑銳據宋同州王湜易學謂每年於三百六十五日二千四百四十分之外有終於五分者五代王樸欽天曆是也以七千二百爲日法有終於六分者近年萬分曆是也以一萬分日法有終於五六分之間者景祐曆法載於太乙遁甲中是也以一萬五百分爲日法此暗用授時法也試以日法爲一率歲實爲二率授時日法一萬爲三率推四率得三百六十五萬二千四百二十五分卽授時之歲實也大昕釋然銳勤於探討每得一書必窮幽極微王

孝通緝古算經詞隱理奧無能通之者銳與友人張敦仁共著細草三卷詳論二十術而商功之平地役功廣袤之術較若列眉又於同邑顧廣圻處得秦九韶九章算經乃窮究天元一術論其法與借根方不同於是郭守敬李冶之說始明而知唐順之顧應祥書甚無謂也銳嘗謂四時成歲首載虞書五紀明曆見於洪範曆學乃致治之要爲政之本以通典通考置而不錄因著曆法通考其書體例大略以顓頊夏殷六曆記載久缺太初曆本之殷曆立法疏闊三統術雖推法較密然亦用太初四年增一日之術是四分術無異太初也故斷自三統術始國朝之橢圓法止唐瞿曇悉達九執曆宋荆執禮會天曆史佚其法乃於開元占經寶祐四年會天曆中求其術而爲之說惜未成書惟三統術注四分術注乾象術注奉元術注占天術注日法朔餘強弱攷六科而已儀徵阮元督學浙江延銳校禮記正義及輯疇人傳元以今之敬齋稱之敬齋李冶號也他著有方程新術草句股算術細草弧矢算術細草回回曆元攷磬折說戈戟攷等書卒以攻苦得疾嘉慶二十二年卒年四十五又著開方說三卷下卷未就易簣時命弟子黎應南續成之應南字見山廣東順德人嘉慶二十三年舉人官浙江麗水平陽知縣經史輿

地無不貫通於天元尤精熟嘗做水道提綱例著地理沿革提綱未成而卒年四十八銳與甘泉焦循歙縣汪萊齊名時稱談天三友循自有傳 汪萊字孝嬰安徽歙縣人優貢生大學士祿康薦修天文時憲二志書成選石埭訓導嘉慶十八年卒於官年四十六萊少慕其鄉江永戴震諸人之學力通經史百家及推步曆算其學不由師授默識靜會洞悉本原性善攻堅不苟同於人嘗與焦循李銳論宋秦九韶元李冶立天元一及正負開方法銳謂少廣一章得此始貫於一萊獨推其有可知有不可知互相齟齬萊墨守西法不逮銳之通變然循稱銳善言古人所已言而闡發得其真萊善言古人所未言而引伸得其間絕學之顯厥由兩君云其治經務熟習本文博通注疏以一知半解爲陋與人接無厓岸有以撰著相質者必首尾研究爲之疏通證明同縣程瑤田撰磬折古義以明一矩有半之句倨謂設縣於股在鼓上稍右股橫於上所以壓之使正泥成說者或疑之萊駁以重心比例之法而磬鼓直縣之制以定萊嘗製渾簡平一方各儀器觀測官訓導時又考製樂舞等器一十七宗一百五十八件所著有衡齋算學七卷參兩算經十三經注疏正誤聲譜說文聲類今有錄及詩文集 張敦仁字古餘山西陽

城人乾隆四十年進士歷官直隸南宮江西高安廬陵縣知縣銅鼓川沙廳同知江寧揚州南昌吉安府知府洊陞雲南鹽法道以末疾乞歸生平實事求是居官勤於公事暇則研究經史雖老病家居亦不廢學官揚州時得元和顧千里所藏撫本禮記鄭注因取各本校讎爲攷異二卷又有鹽鐵論考證通鑑補識誤通鑑補略諸書尤嗜曆算初官江西借錄督學李潢所藏秦李諸書因得窺立天元一求一之妙及來吳門與李銳相友善因共討論著輯古算經細草又以大衍求一術載在秦書鮮有知者後著求一算術上中下三卷上以究其原中下以明其法中爲雜法下則演紀也又以測圓海鏡有翻法在記之注疑李冶別有開方記一書佚而不傳因取秦書所載正負開方法列式而詳稽之用補李氏佚書爲開方補記九卷道光十四年校刊成六卷遂卒年八十一李潢字雲門湖北鍾祥人博綜羣書尤精算學與李銳齊名稱南北李乾隆三十六年進士官至工部左侍郎談泰字階平江蘇上元人乾隆五十一年舉人官山陽南匯教諭泰淹通經史專志撰述不爲世俗之學尤精律算嘗從錢大昕游大昕贈序稱其學深造自得交游中習於數者戴東原歿後幸得階平泰於算例初從西法入後覺其不善及

交汪萊焦循見循所撰天元一釋遂渙然冰釋謂可與同門李銳所校測圓海鏡益古演段相輔而行泰嘗引申大昕從子塘周徑之說爲書一卷又以梅穀成赤水遺珍中有方田度里一篇正王制注疏之誤其法以原數立算與鄭康成注互合但所列諸率不明言乘除之數恐觀者無從稽覈因爲之疏解並用三率互視法詳推爲王制井里算法解一卷附列里數各表使初學易明皆有裨經義他著有禮記源流考二卷先聖生卒年月日辨二卷三十六字母陰陽辨一卷古今音韻識餘二卷古今樂疑義三卷絲竹考異與人歌譜三卷九宮辨二卷春秋戰國歲次考二卷談氏族考一卷多聞闕疑六卷偶讀漫記四卷歲次月建異同辨一卷明算津梁四卷推步稿三卷天元釋例四卷平方立方表六卷北斗考三卷疇人傳三卷桐音館雜文四卷 陳懋齡字勉甫亦上元人乾隆五十七年副貢生官青陽教諭博聞強記學歷於里中謝廷逸得梅氏之傳著有經書算學天文考一卷爲儀徵阮元所稱又有春秋朔閏交食考六朝地理考

朱琚 胡世琦 左暄 包世榮

朱琚字蘭坡安徽涇縣人生三歲而孤祖命爲季父後琚事嗣母孝與生母同嘉

慶七年成進士改庶吉士與幸翰林院柏梁體聯句宴賜什物散館授編修十二年充山東鄉試副考官尋擢贊善遷侍講與修明鑑以事降編修二十五年充會試同考官道光元年入直上書房屢蒙宣宗嘉獎有品學兼優之褒二年充會試同考官尋以母病乞養歸琦愛書如命治經蒐討古訓不隅守一家之說而必求心之所安儀徵阮元稱其腓字手弓諸解徵實精確嘉興沈濤稱其言易彖辭爻辭皆用韻乾三爻終日乾乾與田人天淵韻說文引夕惕若夤夤亦韻初九潛龍勿用龍與用韻上九用九悔與首韻又言詩鄭箋申毛非改毛毛公訓詁用段借字鄭所改字卽傳之段借字皆前人所未道琦以我朝經學書散而不聚因捃拾各家文集札記分典章名物訓詁音韻四類爲詁經文鈔七十卷續二十卷告歸後主鍾山正誼紫陽書院垂三十年以實學造士成就者衆著有說文段借義證二十八卷經文廣異十二卷文選集釋二十四卷古文宗桐城有小萬卷齋詩文集七十卷又輯有國朝古文彙鈔二百七十二卷三十年卒年八十二 胡世琦字玉鏢亦涇縣人嘉慶十九年進士改翰林院庶吉士散館授山東費縣知縣再補曹縣以事罷歸世琦與琦少相友善治經從文字聲音訓詁以會通其旨趣嘗

著小爾雅疏證考校精博爲段玉裁所推又著三家詩輯禹貢地理彙說未成而卒年五十五左暄字春谷亦涇縣人拔貢生官蒙城教諭暄博通經史勤於著述有三餘偶筆十六卷續筆十二卷其體例仿宋景文筆記洪容齋隨筆古義燦然如於詩證棘革之字同於爾雅辨犧獻之音合於春秋公羊傳定提月是月之本通又謂說文以偏旁諧聲可考古音因斥徐鉉反切盡依孫愐唐韻之非朱珔稱其考訂精核皆有益學者他著有五經文字考異二卷性道闡言二卷瓶管記疑六卷詩文鈔各四卷暄豐姿超邁自壯年喪偶不再娶官教諭時造就多名下士告歸後猶閉戶討論矻矻不倦年九十一卒包世榮字季懷亦涇縣人道光元年舉人深於漢學嘗謂毛公恪遵雅訓義最優簡直難曉故鄭氏時出別義以輔之非好學深思者莫能猝通至於草木鳥獸之性質體用詩人所由託興又古文習於禮故舉時舉地舉器服卽以見得失寓美刺斯三者有一不明則茫然不得其解因成訓詁八卷草木蟲魚四卷輿地一卷名曰學詩識小世榮與甘泉薛傳均儀徵劉文淇旌德姚配中相友善朝夕講貫博覽羣籍尤嗜荀屈呂覽四史通典通鑑諸書每歲必數過又著有吉凶典禮器服樂章十卷毛詩禮徵

李富孫 兄超孫 弟遇孫 馮登府

李富孫字旣沔浙江嘉興人嘉慶六年拔貢生良年來孫從祖集字敬堂乾隆二十八年進士官鄖縣知縣精研經學以漢唐爲宗嘗爲學規論以課窮經課經濟著有願學齋文鈔富孫學有原本與伯兄超孫從弟遇孫有後三季之目長遊四方就正於盧文弨錢大昕王昶孫星衍飫聞緒論阮元撫浙肄業詁經精舍遂湛深經術尤好讀易所經眼者不下百餘種深斥圖讖之說著易解賸義謂易學有三派有漢儒之學鄭虞荀陸諸家精矣有晉唐之學王弼孔穎達諸家卽北宋胡瑗石介東坡伊川猶是支流餘裔至宋陳邵之學出本道家之術創爲圖說舉義文周孔之所未及漢以後諸儒之所未言者以自神其附會之說理其理而非易之所謂理數其數而非易之所謂數而前聖之易道晦矣因歎李鼎祚所輯易解精微廣大聖賢遺旨略見於此然其餘三十六家之說尙多未采其遺文賸義間見他書猶可蒐輯爰綴而錄之成書三卷校異一卷又著七經異文釋就經史傳注諸子百氏所引以及漢唐宋石經宋元槧本校其異同辨其得失折衷以求一是凡易六卷尙書八卷毛詩十六卷春秋三傳十二卷禮記八卷同里馮登府稱

其詳該奧博爲詁異義者集其大成又謂說文一書保氏六書之指賴以僅存自篆變爲隸隸變爲眞文字日繁譌僞錯出或有形聲意義大相區別亦有近似而其實異後人多混而同之或有一篆之形從某爲古籀爲或體後人竟析而二之經典文字往往昧於音訓擅爲改易甚與本義相迕夫段借通用說文自有本字有得通借者有不容通借而并爲俗誤者因援據經典以相證契俾世之踵謬沿譌焯然可辨爲說文辨字正俗八卷同里錢泰吉謂其書大旨折衷段注而亦有段所未及者讀說文之津梁也他著有漢魏六朝墓銘纂例四卷鶴徵錄八卷後錄十二卷曝書亭詞注七卷梅里志十六卷校經廡文稿十八卷 超孫字引樹嘉慶六年恩科舉人會稽縣教諭剖析經義尤深於詩嘗以毛詩草木蟲魚則有疏名物則有解地理則有考而詩中所稱之人則未有纂輯成書者因取詩人氏族名字博考經史諸子及近儒所著述並列國之世次泊其人之行事搜羅薈集爲詩氏族考六卷官會稽時課諸生依寧化雷鏞學規條約士習日上又著拙守齋集 遇孫字金瀾嘉慶六年優貢生處州府訓導幼傳祖訓淹貫經史著有尙書隸古定釋文八卷漢孔安國以科斗文難知取伏生今文次第之爲隸古定宋

薛宣因之成古文訓遇孫又以隸古文難知引說文諸書疏通之譌者是正疑者則闕性嗜金石有芝省齋碑錄八卷金石學錄四卷官處州時以處州地僻山遠阮元兩浙金石志未免脫漏乃搜輯百餘種爲括蒼金石志八卷他著有日知錄補正一卷校正一卷古文苑拾遺十卷天香錄八卷隨筆六卷詩文集十八卷

馮登府字雲伯浙江嘉興人嘉慶二十五年進士改翰林院庶吉士散館授江西將樂縣知縣不兩月以親病去官服闋官寧波府教授大吏重其才將薦舉之力辭後以告歸時已得咯血疾聞英人滋事寧郡失守病遂劇尋卒登府幼書媚學於兩漢唐宋諸儒之經誼旁及諸子百家傳注靡不强識博通而聲音訓詁尤爲深邃嘗從儀徵阮元遊元重其學契洽甚至與同縣李富孫交尤密每著一書輒與商榷富孫以爲錢大昕全祖望之比所著有三家詩異文疏證六卷補遺四卷以毛詩多段借字三家詩多本字因卽宋王應麟書爲之疏證與傳箋互相發明又著三家詩遺說翼證二十卷皆勝范家相書又著論語異文考證十卷蒐羅遺佚并援前人之說稽其同異以闡明古義詮釋最爲精審又著十三經詁答問十卷石經考異十二卷金石綜例四卷並見稱於時其自謝詩有新書難得故人刊

之語熟於掌故中歲遊閩修鹽法志福建通志名震海嶠間他著有閩中金石志十四卷金屑錄四卷石餘錄四卷浙江磚錄一卷唐宋詞科題名錄一卷玉堂書史補六卷梵雅一卷小謫仙館摭言十卷酌史巖摭譚十卷古文宗桐城詩宗朱彝尊兼工倚聲有文集八卷詩四卷詞四卷同時海鹽崔應榴字秋谷諸生生平究心經史子集老而彌篤著吾亦廬稿四卷阮元刻入經解中又著有廣孝編廣慈編詩文集

洪頤煊 兄坤煊 弟震煊

洪頤煊字旌賢浙江臨海人五世祖若皋順治十二年進士著南沙文集十二卷頤煊苦志力學與兄坤煊弟震煊讀書僧寮夜每借佛燈圍坐談經不輟時有三洪之稱學使阮元招頤煊震煊就學行省頤煊尤精研經訓熟習天文貫串子史嘉慶六年拔貢生爲山東督糧道孫星衍撰孫氏書目及平津館讀碑記十二卷考據明審於唐代地理尤多所得入貲爲直隸州州判署廣東新興縣事適阮元督兩廣知頤煊吏才短而文學優也延之入幕諏經諮史以爲常嘗謂禮經莫大於宮室宮室不明則古人行禮之節周旋升降皆茫然莫知其處宋李如圭釋宮

祇舉其凡近人考證亦多未密因思古人宮室制度與今人不甚相遠時醇世樸寢廟明堂不若後世之千門萬戶細繹禮經皆有丈尺可尋名位可辨著禮經宮室答問二卷又著孔子三朝記注八卷孝經記注補證一卷諸史考異十八卷漢志水道疏證四卷管子義證八卷讀書叢錄二十四卷經典集林三十五卷台州札記十二卷筠軒詩文鈔十二卷頤煊好聚書嶺南市多舊本重貲購之家藏善本書三萬餘卷碑版二千餘通多世所罕覩有倦舫書日十卷 坤煊字載厚早慧好讀書才氣奮迅精訓詁之學亦能爲古文詞爲督學朱珪所賞以拔貢入京師乾隆五十七年舉順天鄉試榜發十餘日而歿著有地齋詩文鈔 震煊字百里少有雋名阮元稱之曰侍郎之後復見洪生侍郎天台齊召南也元修十三經校勘記震煊任小戴禮修經籍纂詁震煊任方言所刊書籍多經其手嘗謂太史公書以魯定公十二年冬孔子去魯適衛爲誤定爲十三年春就史記正之又讀夏小正鞠則見知鞠星卽虛星爾雅釋詁鞠盈也盈與虛相反鞠之爲盈猶治之爲亂甘之爲苦且用夏正日躔以求昏旦絕無差忒因著爲說又辨禹貢泂鄭康成以淇水爲泂亦古文家舊說浙江卽岷江非漸江舉漢地理志郭璞山海經注

以證酈道元之誤兼精選學在閩中時適重構三百有二十士亭成酌酒賦詩又手立就舉坐閣筆嘉慶十八年拔貢生既廷試貧不能歸入直隸督學幕中二十年以微疾卒於深州年四十六著有夏小正疏義五卷楷堂詩鈔一卷石鼓文考異一卷

徐養原 咸壽恭 張應昌 周中孚 凌塋

徐養原字新田浙江德清人嘉慶六年副貢生養原讀書有識年十三隨父天柱官京師從一時名宿問業於學術源流靡不洞曉性至孝父乞養歸順事左右說經以博親歡母善鼓琴嘗自製譜乃復講求音律以娛母及父母歿不復應舉家居誦讀考論非疾病喪紀不輟業然安粗糲遠聲譽偶爲邑人評所著書嘉定錢大昕見之大驚歎浙撫阮元集高材生校勘諸經注疏養原任尙書儀禮儀禮脫文錯簡視他經爲多養原所校特精爲諸人所不及嘗言曰古之儒者必修六藝郵之書數居之禮樂以養性也於是條通經傳著其大者爲明堂說井田議禘祫廟制郊社辨等篇又考樂器聲律歌詩及考工記諸制著頑石廬經說十卷其說多墨守鄭氏至論明堂失之隘計侯道失之遠若斯類比乃參正他說又著周官

故書考四卷儀禮今古文異同疏證五卷春秋三家異同考一卷論語魯讀考一卷其儀禮疏證辨敖氏之誤甚多可與褚寅亮管見並傳其於六書有六書故檀園字說僮籀急就篇考異說文聲類毛詩類韻周易楚詞經傳諸子音證古音備徵記字說糾二徐釋許之誤聲類增析段氏十七部得十九部求其得聲之原尤精算學自言學之二十年有周髀解九章重差補圖劉徽割圓表長廣方說帶縱諸乘方記乘方補記三角割圓對數比例對數新論欲中西之法各明其真無相雜揉謂古義明可以知西法之莫能外也晚欲悉取太衍天元借根對數諸法次於古九章以會數度之全書未成道光五年卒年五十八他雜著及詩文尙十餘種嘉興錢儀吉述人言謂養原經爲人師行爲儀表洵無愧云 臧壽恭原名耀字眉卿浙江長興人嘉慶十二年舉人性耿介澹於進取嗜漢儒經學兼通天文句股之術烏程嚴可均少許可獨契壽恭以女妻之道光二十六年卒壽恭嘗以諸家經學後人輯述已徧惟春秋買服義尙無所屬乃著左氏春秋經古義左氏傳古義二書凡七易稿始成經與傳分者依陸德明經典釋文也其據三統以考正歲星超辰朔閏之次又備掇漢志所引劉歆之說以左氏之學興於歆皆有裨

古義體例簡質亦得古注家法卒後無子傳稿全佚經則闕昭公二十三年以下其弟子歸安楊峴補完之爲六卷壽恭依公穀日食三十六以爲正經止此峴補獲麟後日食一與劉歆左氏日食三十七相足壽恭又有春秋朔閏表天步證驗句股六術衍張應昌字仲甫浙江歸安人錢塘籍嘉慶十五年舉人官內閣中書應昌孝友恂謹舉止若寒素鍵戶著述肆力於春秋者三十餘年嘗謂屬辭比事春秋教也聖經書法必聯屬其辭排比其事乃明若以例說春秋則拘泥穿鑿害不勝言蓋史所謂例乃策書之大體簡牘之恆辭於聖經筆削無涉也先儒傳說字字鑿生議論至謂聖人改正朔貶天王誅賞諸侯黜陟列國誣聖已甚而卒於全經不可通於是徧取三傳以下及國朝諸儒書四百餘家彙輯辨說於卷首分隸辨說於各門破其褻貶穿鑿之例折衷一是成春秋屬辭辨例編八十卷吳縣吳鍾駿稱其網羅舊聞比之李鼎祚周易集解衛湜禮記集說同治九年同里詹事夏同善等進呈是書得旨嘉獎有耆年好學之諭是年重宴鹿鳴十三年卒年八十五他著有補正南北史識小錄二十八卷國朝詩鐸二十六卷壽彝堂集周中孚字信之浙江烏程人嘉慶十八年副貢生博聞強識邃於考證以紀事

纂言爲己任阮元修經籍纂詁中孚與焉著鄭堂讀書記凡經十四卷史二十二卷子二十三卷集二卷又有孝經集解逸周書補注金石識小錄等書皆佚不傳惟存讀書記五卷 凌埜字仲訥亦烏程人十歲失後母愛日事榜箠兄以杖死埜求死不得乃走山西習醫卜轉徙恆忻朔代閒友人授以易筋經術盡傳其技嘗遇盜數十人於野行劫曳馬揮鞭擊之盜披靡後父官山西尋得之教之學中道光十一年舉人性奇僻好異書與黟縣俞正燮友善侯官林則徐嘗目之爲國士儀徵阮元埜座主也命之治經乃爲漢學深懲嚮壁虛造之言尤惡新說謂其以理殺人如酷吏舞法著尙書述周易翼學春秋禮辨又著德輿子論時政甚具長推步算術嘗於學春秋之暇表其嬗代興廢又以歲星紀年及太歲超辰之法漢以後失墜因爲之辨著王朝列國紀年一卷元刻入經解中埜客代時得不耕之地數頃畫溝洫引溱沔水委折漑之成剛田畝稻十五六鬴分十之二歲作疏防又分其六七以利佃徑畛種諸蔬溝渠育魚蝦歎曰推是以富天下管仲不足爲矣晚官金華教諭於署中作圃行區田法每畝倍收成豐十年粵匪寇湖州棄官歸城陷罵賊死

胡承珙 胡秉虔

胡承珙字景孟安徽涇縣人嘉慶十年進士改翰林院庶吉士散館授編修十五年充廣東鄉試副考官尋遷御史轉給事中自以身居言路當周知天下利弊陳之於上方不負職故其數年中陳奏多見施行而其條陳虧空弊端一疏尤爲深切著明二十四年授福建延建邵道尋調補臺灣道臺灣素稱難治承珙力行清莊弭盜之法在臺三年民番安肅旋乞假歸里道光十二年卒年五十七承珙究心經學尤專意於毛氏詩傳歸里後鍵戶著書與長洲陳奐往復討論不絕於月著毛詩後箋三十卷其書主於申述毛義自注疏而外於唐宋元明諸儒之說及近人爲詩學者無不廣徵博引而於名物訓詁及三家詩異同類皆剖析精微折衷至當其最精者能於毛傳本文前後會出指歸又能於西漢以前古書中反復尋考貫通詩義證明毛旨凡四易彙手自寫定至魯頌泮水章而疾作遺言屬奐校補奐乃爲續成之又以鄭君注儀禮參用古今文二本撮其大例有必用其正字者有卽用其借字者有務以存古者有兼以通今者有因彼以決此者有互見而並存者閱意妙旨有關於經實夥遂取注中疊出之字並讀如讀爲當爲各條

排比梳櫛考其訓詁明其假借參稽旁采疏通而證明之作儀禮古今文疏義十七卷又謂惠氏棟九經古義未及爾雅遂補撰數十條成二卷小爾雅原本不傳今存孔叢子中世多謂爲僞書作小爾雅義證十三卷斷以爲眞復著有求是堂詩文集三十卷 胡秉虔字伯敬安徽績谿人嘉慶四年進士官刑部主事改甘肅靈臺縣知縣陞丹噶爾同知卒於官秉虔自幼嗜學博通經史嘗入都肄業成均夜讀必盡燭二條應酬紛紜課不少減後出彭元瑞朱珪阮元之門又與姚文田王引之張惠言爲同年友故其學有根柢尤精於聲音訓詁著古韻論三卷辨江戴段孔諸家之說細入毫芒確不可易說文管見三卷發明古音古義多獨得之見末論二徐書有灼見語蓋其所致力也他著有周易小識八卷尙書小識六卷論語小識八卷卦本圖考一卷尙書序錄一卷漢西京博士考二卷甘州明季成仁錄四卷河州景忠錄三卷又有經義聞斯錄槐南麗澤編月令小識四書釋名小學卮言對牀夜話惜分齋叢錄消夏錄詩文集

沈欽韓 陳逢衡

沈欽韓字小宛江蘇吳縣人嘉慶十二年舉人安徽寧國府訓導欽韓質敏而爲

學甚勤晷夕苦蚊置兩足於甕讀書常至漏三下家貧借書於人計日歸輒成誦遂淹通經史旁及諸子百家類書雜記其學自詩賦古文詞外尤長於訓詁考證嘗謂左氏親承聖訓博驗寶書依經立傳而公穀家攻之欲顯復晦杜氏注出雖得列學官然多人以邪說陰敗禮教其蠹左氏也逾於明攻爲左傳補注十二卷左氏地理補注十二卷以漢書顏氏注淺陋章懷後漢書注雜集衆手劉氏注司馬八志頗宏富而少統貫爲兩漢書疏證七十四卷以裴氏三國志注專補其事迹而典章名物闕焉爲補訓詁八卷釋地理八卷以地理之學古書惟存酈氏水經注近人戴震校定其倒置羨脫趙一清爲之刊誤其書乃漸可讀然戴氏短在憑臆趙氏蔽於輕信至如古書之有足證與近今志乘之目驗可據者二家又皆蒐討未逮也故爲水經注疏證四十卷然後郡縣之廢置沿革山川之高深變遷流合派分昔通今塞皆如提挈在手指掌可談又爲韓昌黎集補注王荊公詩補注文集注蘇詩查注補正又注范石湖集深明唐宋兩朝典章故實多得作者之意其爲注先寫於書上下左右幾無隙乃錄爲初藁久之增刪又錄爲再藁每一書成輒三四易藁兼工詩古文辭尤嗜駢體氣骨騫舉脈絡微至爲自來所未有

著有幼學堂文集八卷詩集十七卷道光十一年卒年五十七 陳逢衡字穆堂江蘇江都人諸生道光元年舉孝廉方正力辭不就父好藏書爲瓠室積十萬餘卷與馬氏玲瓏山館齊名逢衡四歲入塾讀書成誦比長喜治經恥爲帖括學中年開讀騷樓招致東南文學之士戶外之屨恆滿又嘗北遊燕薊窺邊關而返著有竹書紀年集證五十卷敘略一卷逸周書補注二十四卷穆天子傳注補正六卷讀騷樓詩二卷二集二卷博物志考證爲晚年定本尤精覈凡奇情異事而核以庸言至理旁推交通無不畢貫嗜古之儒多躋之道光十一年卒年七十一

劉逢祿 宋翔鳳 戴望

劉逢祿字申受江蘇武進人祖綸大學士諡文定自有傳外祖莊存與舅莊述祖並以經術名世逢祿盡傳其學嘉慶十九年進士改翰林院庶吉士散館授禮部主事二十五年仁宗睿皇帝大事逢祿搜集大禮創爲長編自始事至奉安山陵典章具備道光四年補儀制司主事時河南學政請以尙書湯斌從祀文廟議者以斌康熙中在上書房獲譴乾隆中嘗奉駁難之逢祿攬筆書曰后夔典樂猶有朱均呂望陳書難匡管蔡尙書汪廷珍善而用之遂奉俞旨是年越南貢使陳請

爲其國王母請人濫得旨賞給而諭旨有外夷貢道之語其使臣欲請改爲外藩部中以詔書難更易逢祿草牒復之曰周官職方王畿之外分九服夷服去王國七千里藩服九千里是藩遠而夷近說文羌狄蠻貊字皆從物旁惟夷從大從弓考東方大人之國夷俗仁仁者壽有東方不死之國故孔子欲居之且乾隆間奉上諭申敕四庫館不得改書籍中夷字作彝裔舜東夷之人文王西夷之人我朝六合一家盡去漢唐以來拘忌嫌疑之陋使者無得以此爲疑越南使者遂無詞而退逢祿在禮部十二年恆以經義決疑事爲衆所欽服類如此其爲學務通大義不專章句由董生春秋闢六藝家法由六藝求觀聖人之志嘗謂世之言經者於先漢則古詩毛氏後漢則今易虞氏文辭稍爲完具然毛公詳故訓而略微言虞翻精象變而罕大義求其知類通達微顯闡幽者則公羊在先漢有董仲舒氏後漢有何劭公氏子夏喪服傳有鄭康成氏而已先漢之學務乎大體故董生所傳非章句訓詁之學也後漢條理精密要以何劭公鄭康成氏爲宗然喪服於五禮特其一端春秋文成數萬其旨數千天道浹人事備以之貫羣經無往不得其原以之斷史可以決天下之疑以之持身治世則先王之道可復也於是尋其條

貫正其統紀爲公羊春秋何氏釋例三十篇又析其凝滯彊其守衛爲箋一卷答難二卷又推原穀梁氏左氏之得失爲申何難鄭四卷又博徵諸史刑禮之不中者爲議禮決獄四卷又推其意爲論語述何夏時經傳箋中庸崇禮論漢紀述例各一卷別有緯略二卷春秋賞罰格一卷愍時學者說春秋皆襲宋儒直書其事不煩褒貶之說獨孔廣森爲公羊通義能抉其蔽然不能信三科九旨爲微言大義所在乃著春秋論上下篇以張聖權逢祿論春秋左氏傳據太史公書本名左氏春秋若晏子春秋呂氏春秋比自王莽時國師劉歆增設條例推衍事迹彊以爲傳春秋冀奪公羊博士師法所當以春秋歸之春秋左氏歸之左氏而刪其書法凡例及論斷之謬於大義孤章斷句之依附經文者庶以存左氏之本真俾攻左者不得爲口實更成左氏春秋考證二卷知者謂與閻惠之辯古文尙書等逢祿於易主虞氏於書匡馬鄭於詩初尙毛學後好三家有易虞氏變動表六爻發揮旁通表卦象陰陽大義虞氏易言補各一卷又爲易象賦卦氣頌撮其旨要尙書今古文集解三十卷書序述聞一卷詩聲演二十七卷又以其餘力取史記天官書及甘石星經爲之疏證成書數卷又著說文衍聲記以舉分韻之要又仿經

典釋文之例存異文古訓爲五經考異已就兩經而未成他著石渠禮論一卷詩文集八卷道光九年卒年五十六弟子潘準莊濱澍趙振祚皆從學公羊及禮有名宋翔鳳字于庭江蘇長洲人嘉慶五年舉人湖南新寧縣知縣亦莊述祖之甥述祖有劉甥可師宋甥可友之語劉謂逢祿宋謂翔鳳也翔鳳通訓詁名物志在西漢家法微言大義得莊氏之真傳著論語說義十卷序曰論語說曰子夏六十四人共撰仲尼微言以當素王微言者性與天道之言也此二十篇尋其條理求其旨趣而太平之治素王之業備焉自漢以來諸家之說時合時離不能盡一常綜覈古今有纂言之作其文繁多因別錄私說題爲說義又有論語鄭注十卷大學古義說二卷孟子趙注補正六卷孟子劉熙注一卷四書釋地辨證二卷卦氣解一卷尙書說一卷尙書譜一卷爾雅釋服一卷小爾雅訓纂六卷五經要義一卷五經通義一卷過庭錄十六卷論語發微經問樸學齋札記咸豐九年重賦鹿鳴次年卒年八十二戴望字子高浙江德清人諸生望始好辭章繼讀博野顏元書爲顏氏學最後謁長洲陳奐通聲音訓詁復從宋翔鳳授公羊春秋遂通公羊之學著論語注二十卷用公羊家法演劉逢祿論語述何之微言他著有管

子校注二十四卷顏氏學記十卷謫磨堂遺集四卷望性倨傲門戶之見持之甚力生平作書點畫悉本小篆見者以爲江聲復生同治十一年卒年三十七歲

雷學淇王萱齡

雷學淇字瞻叔順天通州人父鐔字宗彝乾隆二十七年舉人江西崇仁縣知縣道光初元詔天下臣民嚴冠服之辨鐔著古今服緯以申古義抑奢侈至九年書成年九十矣學淇嘉慶十九年進士任山西和順縣知縣改貴州永從縣知縣生平好討論之學每得一解必求其會通務於諸經之文無所牴忤以父鐔著古今服緯爲之注釋附以釋問一篇異同表二篇又以夏小正一書備三統之義究心參考二十餘年以堯典中星諸經曆數采虞史伯夷之說據周公垂統之文檢校異同訂其譌誤網羅放失尋厥指歸著夏小正經傳考二卷又考定經傳之文爲之疏證成夏小正本義四卷每慨竹書紀年自五代以來頗多殘闕爰博考李唐以前諸書所稱引者積以九年之蒐輯頗復舊觀著考定竹書紀年十四卷謂孟子先至梁後至齊此經之明文卽無他左驗亦當從之爲說況竹書曰梁惠成王後元十五年齊威王薨十七年惠成王卒然則惠王後元十六年齊宣王始卽位

孟子至梁當卽在後元十六年王卒之前一歲也史記誤謂惠王立三十六年卽卒故云三十五年孟子至梁而以惠王改元之後十六年爲襄王之世今據竹書稱梁惠會諸侯於徐州改元稱王故孟子呼之曰王史謂孟子至梁之二年惠王卒襄王立以本經考之其言可信但卒於改元後之十七年非三十六年也襄王既立孟子見其不似人君乃東至齊據竹書卽齊宣卽位之二年也梁至齊千數百里故曰千里而見王若孟子先見齊宣王由鄒之齊六百餘里不得云千里矣齊人取燕孟子明謂宣王時事史記於齊失載悼子侯剡二代將威宣之立皆移前二十二年於齊人伐燕事不知折衷孟子而年表謂在湣王十年司馬溫公終求其說而不得乃將宣之卽位下移十年以遷就孟子自後說者疑信各半皆未有定論今據紀年則伐燕在宣王七年實周赧王之元年凡孟子書所記古人年歲以史記漢書之說推之皆不合者以紀年推之無不合且以竹書長曆推驗列宿之歲差歷代之日蝕自唐虞以來無有差貸嘗自云傳箋注疏取舍多殊非敢嘗議前賢期於事理之合云爾他著校輯世本二卷古經天象考十二卷附圖說二卷亦鬻鬻齋經義考及文三十二卷 王萱齡字北堂順天昌平人道光元年

副貢旋舉孝廉方正官新安柏鄉兩縣教諭嗜漢學精訓詁受業於高郵王引之經義述聞中時引其說著有周秦名字解詁補一卷卽補引之所闕疑者

沈濤

沈濤字西雝浙江嘉興人嘉慶十五年舉人官江蘇如皋縣知縣擢守直隸真定等府有政聲以候補道分發江西歷署鹽法糧儲道會粵匪事棘隨巡撫張芾嬰城拒守四十九日解圍後授福建興泉永道未到官改發江蘇病歿泰州濤幼有神童稱嘗從金壇段玉裁遊深研經訓著有論語孔注辨僞二卷謂孔注之僞其證有五漢書藝文志不云有孔氏說是安國未嘗作傳一也集解序云古論惟安國爲之集解而世不傳既不傳矣平叔所集又從何得二也司馬遷親從安國問故宜不背其師說今考之孔子世家弟子列傳皆與孔注不合三也鄭康成就魯論篇章考之齊古爲之注以齊古讀正凡五十事今釋文所引鄭讀之從古者孔注率同魯論安國既注古論字豈轉不從古四也說文序稱論語古文今說文所引之字每與孔注不同五也蓋當塗之世鄭學盛行平叔思有以難鄭故託安國以欺天下後世耳他著有說文古本攷十四卷銅熨斗齋隨筆八卷交翠軒筆談

四卷生平學尙考訂兼嗜金石官真定時搜郡中古碑自周穆王至元順帝凡二百五十餘種多前人所未見爲常山貞石志二十四卷又有文集四卷詩集四卷詩話三卷

江藩黃承吉黃爽

江藩字子屏江蘇甘泉人監生受業吳縣余蕭客及元和江聲得惠棟之傳博綜羣經尤深漢詁旁及九流二氏之書無不綜覽所爲古文詞豪邁雄俊作河賦以匹景純元虛江海二賦性不喜唐宋文每被酒輒自言文無八家氣人目爲狂不顧也爲人權奇倜儻能走馬奪槊豪飲徧遊齊晉燕趙閩粵江浙韓城王杰極重之曾恭撰純廟詩集注由杰進呈恩賞御製詩五集後諭召對圓明園值林爽文陷臺灣報至遂輟人惜其遇幼蓄書萬餘卷以好客貧其家歲饑盡以易米作書窠圖志感年五十以易筮之得坎之節乃思守所傳之經終老於家因自號節甫初惠棟作周易述未竟而卒闕自鼎至未濟十五卦序卦雜卦二傳藩乃著周易述補五卷羽翼惠氏歎凌廷堪謂棟猶不免用王弼之說藩悉無之方之惠書有過之無不及也又著漢學師承記八卷於兩漢儒林家法之承授國朝經學之源

流盪然可考又取諸家撰述專精漢學者倣唐陸德明經典釋文傳注姓氏之例著國朝經師經義目錄一卷凡言不關乎經義小學意不純乎漢儒詁訓者悉不著錄論者以爲二百年來談漢學不可少之書又錄孫奇逢以下諸人分南學北學附記著宋學淵源記三卷少嘗爲爾雅正字道光元年年六十一復重加刪訂爲爾雅小箋三卷他著有隸經文四卷炳燭室雜文一卷江湖載酒詞二卷卒窮困以終初藩著漢學師承記仁和龔自珍諍之大旨謂讀書者實事求是而已若以漢與宋爲對峙恐成門戶之見其後壽陽祁寯藻囑光澤何秋濤爲續記秋濤曰是編當依阮元疇人傳之例改爲學人傳若特立一漢學之名宋學家羣起而攻之矣方東樹漢學商兌所由作也然藩所著宋學淵源記多以禪學爲宋學亦爲世所譏云 黃承吉字謙牧江蘇江都人嘉慶十年進士補廣西興安縣知縣調攝岑溪時有乙爲甲傭忽告歸不至乙妻子控甲因鬪斃乙承吉察甲辭色非殺人者究得乙匿於廣東羅定州欲以詐甲財遣役捕獲之甲寃始白尋以事罷歸承吉幼聰敏博綜兩漢諸儒論說兼通曆算與同里江藩焦循李鍾泗友善以經義相切劘時有江焦黃李之日族祖生有字詒義府二書承吉爲加按語以發

明聲音訓詁其他著述校證經史多曠識嘗以司馬遷爲孟子後尊聖道明六經第一人而揚雄謂遷行不副文是非謬於聖人班固助雄抑遷以爲己地卽以其語爲遷傳贊漢書本不應爲雄立傳固特變史例全錄雄自序爲傳遂於仕莽事略不及因並論雄毀東方朔致毀柳下惠爲鄉原仁賊設勸風二字貶賦就以誣陷司馬相如追序甘泉賦自謂風戒其實通篇皆以崑崙諛頌趙昭儀所作太元自謂合天應曆然皆臆數與天曆不合著文說十一篇以辨正之總三十餘萬言儀徵阮元稱其正文章明臣節卓然必傳又有周官析疑二十卷讀毛詩記經說夢陔堂文集十卷詩集五十卷道光二十二年卒年七十二 黃奭字右原江蘇甘泉人以資入爲刑部郎中道光中以順天府尹吳傑薦欽賜舉人奭少聰敏家世貨殖而奭獨嗜學嘗從南城曾煥遊煥異之曰爾勿爲時下學余薦老師宿儒一人爲爾師乃江藩也奭修重禮延藩館其家四年自是專精漢學藩以惠棟著十三經古義惟爾雅未成命奭卒其業奭乃就陸德明釋文敘錄十家舊注博引羣書爲之疏證更於十家外攬拾爲衆家注成爾雅古義十二卷藩卒又獨學十餘年閉戶探尋足不出外其學專鄭氏輯有高密遺書十三種嘗以所學質於儀

徵阮元元稱其勤博他著有端綺集二十八卷存悔齋集杜詩注三卷

凌曙

凌曙字曉樓江蘇江都人國子監生曙好學根性家貧讀四子未畢卽去鄉作雜傭保而績學不倦年二十爲童子師問所當治業於歙包世臣世臣曰治經必守家法專法一家以立其基則諸家漸通乃示以武進張惠言所輯四子書漢說數十事曙乃稽典禮考故訓爲四書典故覈六卷歙洪梧甚稱之旣治鄭氏學得要領又從吳沈欽韓問疑義益貫穿精審後聞武進劉逢祿論何氏公羊春秋而好之及入都爲儀徵阮元校輯經郭盡見魏晉以來諸家春秋說深念春秋之義存於公羊而公羊之學傳自董子董子春秋繁露識禮義之宗達經權之用行仁爲本正名爲先測陰陽五行之變明制禮作樂之原體大思精推見至隱可謂善發微言大義者然旨奧詞蹟未易得其會通淺嘗之夫橫生訾議經心聖符不絕如綫乃博稽旁討承意儀志梳其章櫛其句爲注十七卷又病宋元以來學者空言無補惟實事求是庶幾近之而事之切實無過於禮著公羊禮疏十卷公羊禮說一卷公羊問答二卷家居讀禮以喪服爲人倫大經後儒外議是非頗謬作禮論

百篇引申鄭義阮元延曙入粵課諸子曙出與元商榷乃刪合爲三十九篇爲一卷道光九年卒年五十五曙有甥儀徵劉文淇貧而穎悟愛而課之遂知名其學實則曙出云

朱駿聲

朱駿聲字豐芑江蘇吳縣人年十三受許氏說文一讀卽通曉十五爲諸生從錢大昕遊錢一見奇之曰衣鉢之傳將在子矣嘉慶二十三年舉人官黟縣訓導肆力著述諸生造門請業者常數十人官舍至不能容俞正燮歎曰朱君眞名士也咸豐元年以截取知縣入都進呈所著說文通訓定聲等四十卷序云此書以直說文轉注假借之隱略以稽羣經子史用字之通融題曰說文表所宗也曰通訓發明轉注假借之例也曰定聲證廣韻今韻之非古而導其源也先之以東字遵康熙字典之例使學者便於檢閱也終之以韻準就今一百六韻區分之俾不繆於古亦不悖於今也附之以說雅明說文之上繼爾雅可資以參互考訂也文宗披覽嘉其賅洽賞國子監博士銜旋遷揚州府學教授引疾未之官六年卒年七十一駿聲著述甚博不求知於世兼長推步明通象數嘗論爾雅太歲在寅推大

昕說謂其時自以實測之歲星在亥定太歲在寅命之曰攝提格以紀年歲星所合之辰卽爲太歲然歲星閱百四十四年而超一辰至秦漢而甲寅之年歲星在丑太歲應在子漢詔書以太初元年爲攝提格者因六十紀年之名歷年以次排敘不能頓超一辰故仍命以攝提格也於是後人以寅卯等爲太歲強以攝提格等爲歲陰其實爾雅所云歲陽歲陰非如後人說也他著有六十四卦經解八卷尙書古注便讀四卷詩傳箋補十二卷儀禮經注一隅二卷夏小正補傳二卷大戴禮記校正二卷左傳旁通十卷左傳識小錄三卷論孟塙解二卷懸解四卷經史問答二十六卷天算瑣記四卷數度衍約四卷離騷補注一卷淮南書校正六卷說解商十卷小學識餘四卷說叢十二卷

薛傳均 薛壽

薛傳均字子韻江蘇甘泉人諸生少工駢文香麗冠儕輩後博覽羣籍強記精識然沈潛謙退不以所能自高十赴鄉試輒報罷以家貧就福建督學陳用光聘用光見所著書恨相見晚旋以疾卒於汀州試院年四十一傳均於十三經注疏及資治通鑑功力最深注疏本手自校勘旁行斜上朱墨爛然於先儒訓詁抱殘守

闕實事求是未嘗以臆竄改讀史則研究治亂得失之故於遺文瑣事亦記誦靡遺嘉定錢大昕說文答問深明通轉假借之義傳均博引經史以證之成疏證六卷又以文選中多古字條舉件繫疏通證明爲文選古字通十二卷 薛壽字价伯江蘇江都人諸生性介直嗜學幼卽著揚州十二經師頌以志嚮往督學祁篤藻賞其精於說文擢第一告其友曰吾試揚州得二士謂劉毓崧及壽也壽專力許書於音韻尤有深造好以讀若例說詩經用韻正轉又欲分廣韻入聲緝盡爲一部葉帖以下爲一部皆未有成書著有續文選古字通二十卷讀經笱記二卷學古齋文集二卷

方成珪 趙坦 嚴杰

方成珪字國憲浙江瑞安人嘉慶二十三年舉人官海寧州學正陞寧波府教授成珪研精小學尤勤於校讎官俸所入悉以購書儲藏數萬卷丹黃殆徧老尤矻矻不倦嘗以晉干寶易注亡於北宋其學原本孟京輔翼奉六情十二律風角之占而證諸人事則專以殷周之際水衰土王反復推闡以明經義蓋易之興於殷末世周盛德當文王與紂之事聖言足徵塙有依據因攬摭佚文詳爲疏釋爲干

常侍易注疏證二卷又謂古韻書之存者莫善於集韻因據宋槧本及近時段玉裁嚴杰汪遠孫陳慶鏞諸家校本正曹刻之誤復以方言說文廣雅經典釋文玉篇廣韻諸書正宋槧本及景祐元修之誤爲集韻攷正十卷吳縣吳鍾駿及定海黃式三敍其書深推其精博又謂流俗字書承譌襲謬其所爲字有出於類篇集韻外者或矯其弊則又一以說文繩今隸惟元李文仲字鑑述古準今斟酌悉當因詳加考釋爲字鑑校注五卷其他著述有韓集箋正十卷正宋廖瑩中世綵堂本韓愈集注之誤又寶研齋詩鈔二卷咸豐間以老病告歸卒 趙坦字寬夫浙江仁和人諸生道光元年舉孝廉方正坦少與錢塘嚴杰以品學相砥礪遂於經術長洲陳奐遊杭州聞兩人緒論服其淵博坦善說易謂孟氏主卦氣而章句闕佚難考虞仲翔原出孟氏發明消息之旨然於卦爻過求變動又與居則觀象之經不合惟鄭康成采爻辰卦氣諸說別爲變通閎深博大確可依據惜僅存十之三四因本武進張惠言書循其例而引申其說著周易鄭注引義十二卷其書之例凡十七曰中氣曰三才曰六位曰當位曰據乘承曰得應曰雜卦氣曰相直曰互卦曰卦象曰爻辰值宿曰爻辰取象四時五行十二肖曰爻辰通消息卦曰爻

辰得卦氣曰爻體曰爻體通辰曰爻位相就其繫傳引義取於乾鑿度爲多亦惠
言意也又著春秋異文箋十三卷又寶璧齋札記文集多說經之文 嚴杰字厚
民浙江錢塘人國子生儀徵阮元嘗使編經籍纂詁及皇清經解著有小爾雅疏
證蜀石經殘本毛詩考證

劉文淇 字毓崧 孫壽曾 方申

劉文淇字孟瞻江蘇儀徵人嘉慶二十四年優貢生父錫瑜以醫名世文淇殫精
古籍貫串羣經於毛鄭賈孔之書及宋元以來通經解誼博覽冥搜實事求是尤
肆力春秋左氏傳嘗謂左氏之義爲杜注剝蝕已久其稍可觀覽者皆係襲取舊
說爰輯左傳舊注疏證一書先取賈服鄭三君之注疏通證明凡杜氏所排擊者
糾正之所剿襲者表明之其沿用韋氏國語注者亦一一疏記他如五經異義所
載左氏說皆本左氏先師說文所引左傳亦是古文家說漢書五行志所載劉子
駿說實左氏一家之學經疏史注御覽等書所引左傳不載姓名而與杜注異者
皆賈服舊說凡若此者皆稱爲舊注而加以疏證其顧惠補注及近人專釋左氏
之書說有可采咸與登列末始下以己意定其從違上稽先秦諸子下考唐以前

史書旁及雜家筆記文集皆取爲證佐俾左氏之大義炳然著明草創四十年長編已具然後依次排比成書爲左氏舊注疏證八十卷又謂左傳義疏多襲劉光伯述議隋經籍志及孝經疏云述議者述其義疏議之然則光伯本載舊疏議其得失其引舊疏必當錄其姓名孔穎達左傳疏序祇云据以爲本初非故襲其說至永徽中諸臣詳定乃將舊注姓氏削去襲爲己語因細加剖析成左傳舊疏八卷又據史記秦楚之際月表知項羽曾都江都覈其時勢推見割據之迹成楚漢諸侯疆域志三卷又據左傳吳越春秋水經注等書謂唐宋以前揚州地勢南高北下且東西兩岸未設隄防與今運河形勢迥不相同成揚州水道記四卷又讀書隨筆二十卷文集十卷詩一卷文淇事親純孝父年篤老日嘗侍起居朝夕扶掖寒夜侍寢以溫其足舅氏凌曙極貧遺孤毓瑞文淇收育之延同里方申爲其師遂補諸生卒年六十六子毓崧孫壽曾能世其學 毓崧字伯山道光二十年優貢生從父受經長益致力於學以文淇故治左氏續述先業成春秋左氏傳大義二卷又以文淇考證左傳舊疏因承其義例著周易尙書毛詩禮記舊疏考正各一卷又謂六藝未興之先學各有官惟史官之立爲最古不獨史家各體各類

並支裔之小說家出於史官卽經子集三部及後世之幕客書吏淵源所昉亦出於史官班氏之志藝文論述史官尙未發斯旨其敍九流以明諸子所出之官必有所授而其中仍有分省失當者既析九流中小說家流歸入史官又辨道家非專出於史官改爲出於醫官又增益者凡三家曰名家出於司士之官兵家出於司馬之官藝術家出於考工之官統爲十一家博稽載籍窮極根要成史乘諸子通義各四卷又經傳通義十卷王船山年譜二卷彭城獻徵錄十卷舊德錄一卷通義堂筆記十六卷文集十六卷詩集一卷卒年五十 壽曾字恭甫同治三年光緒二年兩中副榜父毓崧主金陵書局爲江督曾國藩所重毓崧卒後招壽曾入局中所刊羣籍多爲校定初文淇爲左氏春秋長編晚年欲編輯成疏甫得一卷而歿毓崧思卒其業未果壽曾乃發憤以繼志述事爲任嚴立課程孜孜罔懈至襄公四年而卒年四十五其讀左筭記春秋五十凡列表皆治左疏時旁推交通發明古誼者屬草亦未竟他著有昏禮別論對駁義南史校議集平博雅堂集芝雲雜記 方申字瑞齋本出自申爲舅氏後故姓方亦儀徵人諸生性至孝少孤奉母甘旨備盡色養受學於文淇通虞氏易自言幼年讀宋易注怪其舍實象

而言虛理及長博考古注參閱諸緯與春秋內外傳然後知易之有卦象猶詩之有比興箋詩者不言比興則美刺之意不彰述易者不言卦象則吉凶之理不著著周易卦象集證一卷又以易家言象虞氏最密惠棟所述凡三百三十則張惠言所述凡四百五十六則顧其所引仍屬未備且間有字誤乃縷析條分一一羅列共得逸象千二百八十一則著虞氏易象彙編一卷又以諸家易象雖與虞氏未盡符合然揆其宗旨所在則固不甚相遠著諸家易象別錄一卷又著周易互體詳述一卷周易變卦舉要一卷道光二十年卒年五十

胡培翬 楊大培

胡培翬字載平安徽績溪人嘉慶二十四年進士官內閣中書戶部廣東司主事居官勤而處事密時人稱其治官如治經一字不肯放過絕不受胥吏財賄而抉隱指弊胥吏咸憚之假照案發司員失察者數十人惟培翬及蔡紹江無所汚然猶以隨同畫諾鐫級歸里後立東山書院又主講鍾山雲間於涇川一再至並引翼後進爲己任去涇川日門人設飲餞者相望於道篤友誼郝懿行胡承珙遺書皆賴培翬次第付梓道光二十九年卒年六十八門人祀之鍾山書院績溪胡氏

自明諸生東峯以來世傳經學培翬涵濡先澤又學於歛淩廷堪尤邃精三禮官京師時嘗與新城陳用光涇朱珩胡承珙桐城徐璈光聰諧武進張成孫元和蔣廷恩太倉陳奐陳兆熊鶴山馮啟綦邵陽魏源考定鄭康成之生爲永建二年七月五日公祀之萬柳堂初著燕寢考三卷王引之見而善之旣爲儀禮正義上推周公孔子子夏垂教之旨發明鄭賈得失旁逮鴻儒經生之所議張皇幽渺闡揚聖緒二千餘歲絕學也其旨見與順德羅惇衍書曰培翬撰正義約有四例一曰疏經以補注二曰通疏以申注三曰彙各家之說以附注四曰采他說以訂注書凡四十卷至賈氏公彥之疏或解經而違經旨或申注而失注意不可不辨別爲儀禮賈疏訂疑一書宮室制度以朝制廟制寢制爲綱以天子諸侯大夫士爲目學制則分別庠序館制則分別公私皆先將宮室考定而以十七篇所行之禮條系於後名曰宮室提綱陸氏經典釋文於儀禮頗略擬取各經音義及集釋文以後各家音切挨次補錄名曰儀禮釋文校補培翬覃精是書凡四十餘年晚歲患風痺猶力疾從事尙有士昏禮鄉飲酒禮鄉射禮燕禮大射儀五篇未卒業而歿門人江寧楊大培從學禮爲補成之他著有禘祫答研六室文鈔 楊大培字雅

輪江蘇江寧人諸生篤學寡交研窮經訓初從元和顧廣圻吳縣鈕樹玉游備聞蒼雅闕奧著說文重文考六卷純以聲音求假借以偏旁繁省求古籀異同之變又作五廟考專駁王肅之失江督陶澍以防海議試諸生大堵洋洋千言大略謂中國官恃客氣居上臨下視洋人若小負販顧彼雖好利而越數萬里海洋至此此必非無所挾持者鹵莽行之必生邊鄰將來之患不可勝言時承平久人習附和之談讀者變色他著論語正義毛詩補注三禮義疏辨正經亂皆散失

迮鶴壽

迮鶴壽字蘭宮江蘇吳江人道光六年進士選池州府教授父朗乾隆五十四年舉人鳳陽府訓導以文章名鶴壽少承父教好學篤行精研古義每事必究其根原嘗謂劉歆三統曆稱成王元年正月己巳朔此命伯禽俾侯於魯之歲也先是周公攝政五年孟統二十九章首積月六千五百八十無閏餘積日十九萬四千三百十三大餘三十三小餘七故推至此年爲正月己巳朔金仁山移侯魯於攝政之元年則正月乃庚辰朔矣其精心探索類如此以漢翼氏治齊詩言聞五際之要十月之交篇五際之說出於齊詩則四始之說亦出齊詩五際必兼四始言

之蓋四始爲之綱五際爲之紀也四始五際配陰陽五行久成絕學因考詩篇之部分值歲之多寡而銓次之著齊詩翼氏學四卷論者謂其洩千餘年不傳之祕又嘗讀劉昭續漢志注所引帝王世紀有堯時墾田若干頃民口若干人數語因推衍三代土田戶口之數至三萬餘言又爲夏殷周九州經界疏證分土疏證謂近代言禹貢者必東極朝鮮南踰嶺嶠西跨強臺北抵沙漠荒遠無憑非則壤成賦之指周九州之界限自雁門以北長沙以南亦非所轄又謂封建之法有穀土三等地有廩里九等地有溝洫三等地有采邑三等地有山林六等地有山澤邑居地孟子與周禮一舉其土地一舉其封疆非有二制井田始於公劉夏殷之田不以井授武王亦祇行於圻內非盡天下而井之或五十或七十或百畝若今江南之行田改移甚便復爲孟子班爵祿正經界兩章疏證以暢其說凡百二十卷鶴壽通籍時年已五十四官教授十年猶閉戶著書矻矻不倦云

丁晏

丁晏字柘堂江蘇山陽人性嗜典籍勤學不輟阮元爲漕督以漢易十五家發策晏條對萬餘言江藩稱其撫羣籍之精闡漢易之奧好學深思爲當世冠道光元

年舉人晏以顧炎武云梅賾僞古文雅密非賾所能爲考之家語後序及釋文正義而斷爲王肅僞作謂肅雅才好博好作僞以難鄭君鄭君之學昌明於漢肅爲古文孔傳以駕其上後儒遂誤信之而皆莫能發其覆近世惠棟王鳴盛頗疑肅作而未能暢明其旨特著論以申辨之誤尙書餘論二卷又以胡渭禹貢錐指能知僞古文而不能信好古學旣爲正誤以匡其失復采獲古文甄錄舊說斷以己意自史漢水經注及許鄭古學傳以後儒之解證以地志輯禹貢集釋三卷生平篤好鄭學於詩箋禮注研討尤深以毛公之學得聖賢之正傳其所稱道與周秦諸子相出入康成申暢毛義修敬作箋孔疏不能尋繹誤謂破字改毛援引疏漏多失鄭旨因博稽互考證之故書雅記義若合符誤毛鄭詩釋四卷康成詩譜宋歐陽氏補亡今通志堂刊本譌脫踏駁爰援正義排比重編誤鄭氏詩譜攷正一卷以康成兼采三家詩王應麟有三家詩攷附刊玉海之後舛繆錯出世無善本迺蒐采原書校讎是正誤詩考補注二卷補遺一卷鄭氏注禮至精去古未遠不爲憑虛臆說迄今可考見者如儀禮喪服注多依馬融師說士虞記中月而禫注二十七月依戴禮喪服變除周禮大司樂鼓鼗注依許叔重說與先鄭不同小胥

縣鐘磬注二八十六枚在一虞依劉向五經要義小宗伯注五精帝依劉向五經通義射人注稱今儒家依賈侍中注考工記山以章注作犢依馬季長注禮記檀弓瓦不成味注當作沫依班固白虎通王制大綏小綏注當爲綏依劉子政說苑玉藻元端朝日鄭讀爲冕依大戴禮朝事義祭法幽宗雩祭鄭讀爲禳依許氏說文鄭君信而好古原本先儒確有依據凡此釋義補孔之遺闕皆前人未發之祕疏通證明燭若燿火撰三禮釋注共八卷又輯鄭康成年譜署其堂曰六藝取康成六藝論以深仰止之思然晏治經學不掊擊宋儒嘗謂漢學宋學之分門戶之見也漢儒正其詁詁正而義以顯宋儒析其理理明而詁以精二者不可偏廢其於易述程子之傳撰周易述傳二卷於孝經集唐元宗宋司馬光范祖禹之注撰孝經述注一卷尤熟於通鑑故經世優裕嘗與人論鈔幣謂輕錢行鈔必有利而無害論禁洋煙謂不禁則民日以弱中國必疲禁則利在所爭外夷必畔且禁煙當以民命爲重不當計利立法當以中國爲先不當擾夷後悉如其言在籍時辦隄工司賑務修府城浚市河開通文渠中支均有功於鄉里咸豐二年粵匪蔓延大江南北兩江總督檄行府縣教練鄉勇廣積穀米爲守禦計以晏主其事旋以

事爲人所劾奉旨遣戍捐繳臺費部議免行十年捻匪擾淮安北關晏號召團練分部要隘城以獲全十一年以團練大臣晏端書薦奉旨隨同差遣委用敘前守城績由侍讀銜內閣中書加三品銜花翎同治十一年重譙泮林晏少多疾病迨長讀書養氣日益強固治一書畢方治他事手校書籍極多必徹終始光緒元年卒年八十二所著書四十七種凡一百三十六卷其已刊者爲頤志齋叢書

王筠

王筠字貫山山東安邱人道光元年舉人游京師三十年與漢陽葉志詵道州何紹基晉江陳慶鏞日照許瀚商確今古後官山西鄉寧縣知縣鄉寧在萬山中民樸事簡訟至立判暇則把一編不去手權徐溝再權曲沃地號繁劇二縣皆治然亦未嘗廢學少喜篆籀及長博涉經史尤長於說文嘗謂桂馥書專臚古籍取足達許說而止不下己意惟是引據失於限斷且泛及藻績之詞段玉裁書體大思精所謂通例又前人所未知惟是武斷支離時或不免又謂文字之奧無過形音義三端古人之造字也正名百物以義爲本而音從之於是乎有形後人之識字也由形以求其音由音以考其義而文字之說備六書以指事象形爲首而文字

之樞機卽在乎此其字之爲事而作者卽據事以審字勿由字以生事其字之爲物而作者卽據物以察字勿泥字以造物且勿假他事以成此事之意勿假他物以爲此物之形而後可與蒼頡籀斯相質於一堂也今說文之詞足從口木從屮鳥鹿足相似從匕苟非後人所竄亂則許君之意荒矣乃標舉分別疏通證明著說文釋例二十卷釋例云者卽許書而釋其條例猶杜元凱之於春秋也又以二徐書多涉草略加以李燾亂其次第致分別部居之脈絡不可推尋段玉裁旣創爲通例而體裁所拘未能詳備乃采桂段諸家之說著說文句讀三十卷句讀云者用張爾岐儀禮鄭注句讀之名謂漢人經說率名章句此書疏解許說無章可言故曰句讀也筠治說文之學垂三十年其書獨闢門徑折衷一是不依傍於人論者以爲許氏之功臣桂段之勁敵其後吳縣潘祖蔭見其書謂筠書晚出乃集厥成補弊救偏爲功尤鉅云又有說文繫傳校錄三十卷文字蒙求四卷他著有毛詩重言一卷附毛詩雙聲疊韻說一卷夏小正正義四卷弟子職正音一卷正字略二卷蛾術編禹貢正字讀儀禮鄭注句讀刊誤四書說略咸豐四年卒年七十一同治四年子彥侗由禮部進呈所著釋例句讀二書奉旨覽

俞正燮 王曜南

俞正燮字理初安徽黟縣人讀書過目不忘年二十餘負其所業北謁孫星衍於兗州時星衍既爲伏生建立博士復求左氏後裔正燮因作左邱明子孫姓氏論左山攷申雜難篇星衍多采其文以折衆論故其議論學術與星衍恆相出入道光元年舉人十二年館新城陳用光所爲校顧氏方輿紀要明年儀徵阮元主會試闈中經義策問皆折衷羣言如讀唐人正義馬氏通考而汰其繁縟會有驚其迂誕者束之高閣元後知之嘗語人引以爲恨正燮足跡半天下得書卽讀讀卽有所疏記每一事爲一題巨冊數十鱗比行篋中積歲月證據周徧斷以己意一文遂立其治經以漢儒爲宗不纏牽於注疏偶有所作薈萃羣書走筆立就尤善言天象暨日官法以爲泰西法極精然豈三代秦漢人所豫解以某時法衡某時象是非犁然則三代秦漢人不能委其過又善言地輿說方域以爲中外同軌不道險今昔異履不詳憲惟殊方遐國人所忽必當察乃至掌故之巨名物之細聲詰之雅七緯三式釋典道藏素靈之冊景教之碑諸儒橋舌方皇者引稱首首如肉貫串皆非恆量所測識手成官私鉅書如欽定左傳讀本續行水金鑑之類不

自名者甚多自名者有癸巳類稿癸巳存稿說文部緯校補海國紀聞而類稿爲最著十九年爲江蘇學政壽陽祁篤藻校寫三古六朝文目因聘掌教惜陰書舍未逾年卒年六十六性孝友少時侍父獻句容縣訓導署中飲食必先嘗味不正者不敢進居鄉邑言動不苟誘掖後進亶亶忘倦所得修脯盡濟親友之急篤藻嘗以經師人表稱之弟正禧亦舉人湛深經史善論文多義行與正燮齊名王曜南字燦文安徽婺源人貢生敦行嗜學殫心經義綜覈漢唐以來注疏及宋五子書剖晰異同數十年寒暑不輟晚更融貫百家獨抒心得著述極富咸豐元年舉孝廉方正辭不就授徒自給平居深衣方履兢兢以守身爲主著有禮書條考十五卷樂律條考五卷春秋釋義十二卷春秋總說四卷十二公時事略二卷詩經集義九卷毛詩采要四卷禹貢水道釋圖二卷儀禮醒要四卷離騷集注二卷務本堂文集六卷

姚配中

姚配中字仲虞安徽旌德人諸生少穎悟博覽經史百家尤嗜易初得張惠言虞氏義因研究李氏集解以鄭爲主而參以漢魏經師成周易參象後復定爲周易

姚氏學凡十六卷其言曰天一地二天三地四天五地六天七地八天九地十者何也一也一者元也元者易之原也是故不知一者不足與言易元藏於中爻周其外往來上下而易道周是故不知周者不足與言易日月爲易坎離相推一陰一陽窮理盡性是故不知太極之始終者不足與言易爻畫進退變化殊趣差之毫釐謬以千里是故不知四象之動靜者不足與言易以十翼爲正鵠以羣儒爲弓矢博學以厚其力思索以通其神審辨以明其旨庶乎其不遠也夫時儀徵劉文淇甘泉薛傳均丹徒柳興恩涇包世榮包慎言並治漢學與配中善皆歎爲莫及配中又以月令一編實先王體天窮民之大經其義一本於卦氣爲周易通論月令二卷素嗜琴時琴學有金陵常熟武林三派而皆出廣陵配中謂其傳譜多誤因爲琴學二卷嘗語涇包世臣謂七絃各有本數倍數半數損益上下旋相爲宮以定宮商角徵羽正變清濁之位而六十律三百六十四聲俱以和相應凡吟揉必在角羽位蓋君臣所有事皆爲民物故吟而上揉而下往復遲回必當民物之位也世臣請其鼓琴配中於對几設副琴鼓半副琴絃自鳴几案間杯盞及櫺隔時或響應怪問之曰凡物各有數數同則聲應唐書載寺磬無故自鳴萬寶常

爲剋磬成痕而鳴止蓋其磬與宮中鐘同數鐘鳴則磬應剋之則數與鐘異故鳴止也配中家貧而守堅有司慕其學行求識面不可得督學張鱗尤重之謂拔貢呂賢基曰姚生學行寧廣九學無匹若歸當益親近請業庶不致終於孤陋寡聞也道光二十四年卒年五十三世榮字季懷慎言字孟開並舉人世榮著有詩禮徵文十卷慎言著有經義考義公羊曆譜十卷

羅士琳 願觀光

羅士琳字次璆江蘇甘泉人國子生嘗遊京師考取天文生以推算道光初元日月合璧五星聯珠見知於時爲同輩所嫉不得官東出山海關客汴梁楚中所至爲名德通人所賓接儀徵阮元尤推重之事母孝家貧餬口四方以供菽水未嘗一日輟學咸豐元年舉孝廉方正未就試三年粵匪陷揚州死於難年垂七十矣士琳少治經學精六書已乃專力步算嘗以春秋置閏失者十之四舊史誤者十之二傳鈔錯者十之二若夫元術絕滅七曆互相後先則不過十之一乃稽其同異著春秋朔閏異同又因讀書而旁及算術著淮南天文訓存疑周無專鼎考初精西法著憲法一隅比例匯通後連獲佚書悔其少作以爲天算書得周髀精意

者莫過於宋秦九韶之正負開方法與國朝李銳之天元一術而元朱世傑實集其成遂壹意專精通貫其術其言秦氏學有句股截積和較算例言李氏學有句股容三事拾遺三卷附例一卷三角和較算例一卷弧矢算術補一卷言朱氏學有四元玉鑑細草二十四卷四元釋例一卷演元九式一卷臺錐積演一卷校正算學啟蒙三卷四元玉鑑銳嘗欲補草而未果士琳殫精一紀就原書二十四門門各補草阮元以爲精思神解卽今之世傑算學啟蒙道光中始出土琳校其名術義例多與玉鑑相表裏因列七證定爲世傑書如謂玉鑑斗斛之斗別用斛此段借字本漢書平帝紀及管子乘馬篇尙雜見於唐以前孫子五曹張邱建諸算經其鈞石之石說文本作秬玉鑑作碩碩與石古雖互通然段碩爲鈞石之石則僅見於毛詩甫田疏引漢書食貨志而算書罕見又若玉鑑皖田之皖雖見於李籍九章音義而字書所無此書并同亦其證也時稱其確他著有推算日食增廣新術一卷綴術輯補二卷校正國朝明安圖割圓密率捷法四卷續疇人傳六卷博能叢話觀我生室臚彙 顧觀光字賓王江蘇金山人少好讀書博通經史百家精校勘好輯古人逸書不下數十種其古史逸文卽所以補馬氏繹史者也尤

究極中西曆算能抉其所以然而蒐補其未備西人求對數以正數屢次開方對數屢次折半立術繁重同時諸人并有新術而未盡其理觀光別爲變通以求二至九之八對數因任意設數立六術以御之得數皆合復立還原四術又推而衍之爲和較相求八術自來言對數者未之聞也又謂數之用莫便於施之八綫而西人未言其立表之根因冥思力索得之仍用諸乘差法迎刃而解尤造微之詣其他算術亦多所糾正著有算牘初續編二卷九數存古九數外錄六曆通考九執歷解回回曆解推步簡法新曆推步簡法五星簡法等書嘗謂積世積測積人積智曆算之學後勝於前微特中國西人亦然然舊法者新法之所從出也而要
不離乎舊法之範圍且安知不紬繹焉而別有一新法在乎故凡以爲已得新法
舊法可唾棄者非也時以爲通論他著有古韻二十二卷七國地理考十四卷國
策編年考一卷同治元年卒年六十四

曾釗 林伯桐 李輔平 吳懋濟

曾釗字敏修廣東南海人道光五年拔貢生官合浦縣教諭調欽州學正釗篤學
好古讀一書必校勘譌字脫文遇祕本或雇人影寫或懷餅就鈔積七八年得數

萬卷自是學求經義文字則考之說文玉篇訓詁則稽之方言爾雅雖奧晦難通而因文得義因義得音類能以經解經確有依據入都時見武進劉逢祿逢祿曰篤學若冕士吾道東矣冕士釗號也儀徵阮元督粵震澤任兆麟見釗所校字林以告元元驚異延請課子後開學海堂以古學造士特命釗爲學長獎勵後進嘗因元說日月爲易爲合朔之辨在朔易更發明孟喜卦氣引繫辭懸象莫大乎日月死魄會於壬癸日上月下象未濟爲晦時元以爲足發古義宜再暢言之以明孟氏之學因著周易虞氏義箋七卷他著有周禮注疏小箋四卷謂惟王建國國謂諸侯國賈馬說是引左傳師服曰天子建國注立諸侯祭法天下有王分地建國注建國封諸侯爲證又引詩周頌序賚大封於廟也樂記武王未及下車而封黃帝之後於薊封帝堯之後於祝封帝舜之後於陳以駁賈疏王國未立先建諸侯之說謂辨方正位鄭司農云正君臣之位其說不可破鄭君引召誥謂定宗廟失之周營洛原以均諸侯貢道非有遷都之意故周末東遷以前宗廟皆在豐鎬詩振鷺潛及黍離序可證漢書韋元成傳禮廟在大門內不敢遠其親也五行志董仲舒災異對曰高廟不當居遼東譏原廟也苟洛立宗廟是原廟不始於漢矣

如斯之類皆特精審又詩說二卷長洲陳奐詩疏中往往采其說又詩毛鄭異同辨一卷毛詩經文定本小序一卷考異一卷音讀一卷虞書命義和章解一卷論語述解一卷讀書雜誌五卷面城樓集十卷其輯古書有楊議郎著書一卷異物志一卷交州記二卷始興記一卷歙程恩澤典試粵東耳釗名欲取作榜首適釗持服未預試榜發後恩澤邀釗飲於蒲澗作詩云我求明珠向南海離朱喫詬驚愚頑昆侖第一未卽得羊鬚首捋緣希慳謂釗也釗好講經濟之學二十一年洋人焚掠海疆以祁墳還督兩粵番禺舉人陸殿邦獻議填大石獵德瀝濬河道以阻火船墳舉以問釗釗言易稱設險者不恃天塹不藉地利在人相時設之而已入省河道三獵德瀝濬皆淺由大石至大黃濬水深數丈三四月夷船從此入當先事防之以固省城城固然後由內達外墳甚踴之委釗相度堵塞形勢釗以大石爲第一要區糾南海番禺二縣團勇三萬六千晝夜演練防務遂密二十三年墳謀修復虎門礮臺釗進礮臺形勢議十條已而廉洋賊起墳以釗習知廉州情形委釗與軍事海賊投首咸豐四年卒於家 林伯桐字桐君廣東番禺人嘉慶六年舉人生平好爲考據之學宗主漢儒而踐履則服膺朱子無門戶之見事親

孝道光六年試禮部歸父已卒悲慟不欲生居喪悉遵古禮蔬食不入內者三年自是不復上公車一意奉母與兩弟友愛教授生徒百餘人咸敦內行勉實學嘗言內行者默而成之不言而信者也行之著於外非其人之意鶴鳴九皋聲聞于天不自知也又曰篤行君子無所慕於外而有所得於己非學則不能故稱人必曰學行也粵督阮元鄧廷楨皆敬禮之元延爲學海堂學長廷楨聘課其二子然伯桐以道自重絕不預外事二十四年選授德慶州學正閱三年卒於官年七十伯桐於諸經無不通尤深於毛詩謂傳箋不同者大抵毛義爲長孔疏多以王肅語爲毛意又往往混鄭於毛爲毛詩學者當分別觀之庶幾不失家法因考鄭箋異義爲毛詩通考三十卷又著毛詩傳例二卷又綴其碎義瑣辭著毛詩識小三十卷皆極精覈他著有易象釋例十二卷易象雅訓十二卷三禮注疏考異二十卷冠昏喪祭儀考十二卷左傳風俗二十卷古音勸學三十卷史學蠡測三十卷供冀小言二卷古諺箋十一卷兩粵水經注四卷粵風四卷修本堂稿四卷詩文集二十四卷 李黼平字繡子廣東嘉應州人幼穎異年十四精通樂譜及長治漢學工考證嘉慶十年進士改翰林院庶吉士散館授江蘇昭文縣知縣洩事一

以寬和慈惠爲宗不忍用鞭扑獄隨至隨結公餘卽手一編民間因有李十五書生之目以虧擢落職繫獄數年乃得歸會粵督阮元開學海堂聘閱課藝遂留授諸子經所著毛詩紬義二十四卷元爲列入皇清經解中後主東莞寶安書院課士一本諸經人咸愛重之道光十二年卒年六十三他著有易刊誤二卷文選異義二卷讀杜韓筆記二卷其論詩謂心聲所發含宮嚼羽與象簫胥鼓相應故所爲詩專講音韻能得古人不傳之祕有著花菴集八卷吳門集八卷南歸集四卷續集四卷 吳懋清字澄觀廣東吳川人嘉慶十五年舉人懋清聰敏力學年十二能誦十三經長益肆力於箋注義疏學政姚文田陳嵩慶亟賞之會試不第館京師爲連平顏伯燾海康陳昌齊定安張岳崧及同邑林召棠所推重名噪一時鄉試受知於胡承珙暇時出所學相質以是日益進其學巨儲而約舉喜深湛之思漢唐以來作者皆搜剔纂錄以爲生古人後讀書始得如是爲文淵深古茂力追先正性孝友樂善教人以敦行爲本時出所學誘後進學者以列弟子籍爲榮晚年著述自娛雖病日精思不衰道光二十五年卒年七十二著有尙書解五卷尙書古今文測七卷尙書三文訂譌六卷今古文尙書洞答二卷尙書訂定古本

七卷詩經解五卷詩經測九卷毛詩訂本七卷毛詩復古錄六卷周官鄭注訂詒
十二卷儀禮測八卷大戴禮記測十三卷春秋傳注訂一卷纂輯十三經注疏十
九卷四書解十二卷四書推解十卷論語考八卷孟子考八卷朱文公儀禮通解
弗一卷國語章注訂詒四卷天洞測一卷詩賦雜文十八卷

魏源 鄭漢勛

魏源字默深湖南邵陽人道光二年順天舉人試卷進呈宣廟手批嘉賞名籍甚
入貲爲內閣中書改知州二十四年成進士發江蘇以知州用權東臺興化縣事
二十九年大水河督將啟開源力爭不能得則躬赴制府擊鼓總督陸建瀛聞報
立往勘始得免啟七州縣士民皆德之未幾補高郵州坐驛遞遲誤免尋以緝獲
梟匪功副都御史袁甲三奏復其官咸豐六年卒年六十三源經術湛深讀書精
博初崇尚宋儒理學後發明西漢人之誼於書則專申史記伏生大傳及漢書所
載歐陽夏侯劉向遺說以難馬鄭撰書古微十二卷於詩則謂毛詩晚出顧炎武
閻若據胡渭戴震皆致疑於毛學而尙知據三家古義以證其源因表章魯韓墜
緒以匡傳箋撰詩古微二十二卷於春秋則謂漢書儒林傳言董生與胡毋生同

業治春秋而何休注但依胡母生條例於董生無一言及近日曲阜孔廣森武進劉逢祿皆公羊專家亦止爲何氏拾遺補缺而董生之書未之詳焉若謂董生疏通大義不列經文不足頡頏何氏則其書三科九旨燦然大備且宏通精森內聖而外王蟠天際地遠在胡母生何休章句之上撰董子春秋發微七卷他所著有庸易通義說文擬雅兩漢經師今古文家法考論語孟子類篇孟子小記小學古經大學古本孝經集傳曾子章句明代食兵二政錄老子本義孫子集注元史新編多未成其例日見集中性兀傲高自標樹惟論古今成敗國家利病學術本末反復辨論不少衰四座皆屈嘗謂禹分天下爲九州外薄四海咸建五長而朔南所暨說者謂北距大漠不能越乎其外至我朝而龍沙雁海之國萬潼億彘之民獨峯駝無尾羊之部奔走萬里臣妾一家因借觀史館祕閣官書參以士大夫私家著述故老傳聞排比經緯馳騁往復成聖武記十四卷統四十餘萬言又喜談經濟其論河務謂宜改復北行故道咸豐五年銅瓦廂之決河復北流由大清河入海適與所論相合又作籌漕篇上兩江總督陶澍謂漕政之要不出化私爲官而緝私不與焉自古有緝場私之法無緝鄰私之法鄰私惟有減價敵之而已非

減價何以敵私非輕本曷以敵減價非裁費曷以輕本非變法曷以裁費迨陸建瀛當漢岸火災之後始力主行之晚遭夷變謂籌夷事必知夷情知夷情必知夷形因據粵督林則徐所繹西夷之四州志及歷代史志明以來島志近日夷圖夷語成海國圖志一百卷番禺陳澧常歎以爲奇書又謂其調客兵不如練士兵及裁兵併糧水師將弁用舵工礮手出身諸條爲最善惟議攻篇以夷攻夷之說尙有可議後源至粵聞其說大悅因定交焉其虛心受善如此所自著有古微堂文內集三卷外集七卷詩集六卷而賀長齡所著皇朝經世文編亦源襄輯之力居多 鄒漢勛字叔績湖南新化人咸豐元年舉人父文蘇字望之歲貢生以古學教授鄉里關學舍曰古經堂制度悉依周禮與諸生肄士禮其中其考據典物力尊漢學而談心性則宗朱子道光十一年卒年六十三子六人皆以才稱漢勛爲最年十五通左氏義佐伯兄漢紀撰左氏地圖說博物隨鈔又佐仲兄漢潢撰羣經百物譜諸書年十八九撰六國春秋鄉居苦書少詣郡學借觀鬻畝購書未嘗計貧以漢去古未遠諸經注皆有師承故推闡漢學不遺餘力所著讀書偶識三十六卷自言破前人之訓故必求唐前之訓故方敢用違筭傳之事證必求漢前

之事證方敢從尤深音韻之學初著廣韻表十卷自敘謂五韻之別萬有二千經之以五紀之以三判之以八程之以廿奠之以五而萬有二千具矣何謂奠之以五五者五音也氏印上去入是也四聲本五誤切爲四與夫言六音七音八音十聲者皆非也何謂程之以廿廿者廿聲也喉舌脣齒是謂四聲有深喉淺喉舌頭舌腹齒本齒頭開脣合脣聲二之故八是應八音深喉舌腹譬之八音猶草木皆一聲餘六物猶金石絲竹匏土皆三聲一其二三其六故有廿聲何謂判之以八八者八呼也呼有內外有大小有輕重錯之則八釋家謂之八梵等韻家謂之八等漢晉之儒謂之橫口閉口籠口踈口而皆有輕重總之曰外言內言何謂經之以五紀之以三均類之謂也韻有宮商角徵翳是謂五韻韻有三統五而三之則十又五類一曰戈黃鍾爲宮之類二曰孤林鍾爲徵之類三曰媧大蕤爲商之類是爲宮韻四曰岡大蕤爲宮之類五曰公南呂爲徵之類六曰扇姑洗爲商之類是爲商韻七曰官姑洗爲宮之類八曰昆應鍾爲徵之類九曰涓蕤賓爲商之類是爲角韻十曰乖林鍾爲宮之類十一曰傀大蕤爲徵之類十二曰該南宮爲商之類是爲徵韻十三曰高南呂爲宮之類十四曰甘姑洗爲徵之類十五曰弁應

鍾爲翳之類是爲翳韻此之謂經之以五統之以三晚爲五韻論說尤精粹時以江戴目之於史學長地理嘗謂知古者期以用於今今古之不通官名氏族法制典章州郡地名皆是而地名尤叢雜難據故考覈獨詳性溺苦於學衣履垢敝不精修飾初應聘校刊王夫之之遺書凡五十一部三百餘卷均錄其序跋附以案語以是知名後應聘修寶慶及貴陽大定興義安順諸郡志所撰新寧形勢說及貴陽循吏傳皆洞中日後情事公車報罷訪同郡魏源於高郵互出所著相參訂漢勛研究曆算與源共譔堯典釋天一卷又爲繪天象諸圖會賊陷江寧乃間道歸長沙時弟漢章已隨江忠源守南昌漢勛上曾國藩以援堵守三策並用之說謂不援江西堵廣西湖南亦不能守國藩用其言命江忠淑偕漢勛率楚勇千人援南昌圍解紱勞以知縣用未幾忠源擢安徽巡撫約漢勛從既至廬州助守大西門賊三爲隧道攻之城圯數丈登陴矣漢勛力擊卻之忠源上其功有詔褒獎以同知直隸州用賞戴花翎凡堅守三十七日水西門地雷復發城遂陷漢勛憤甚痛飲拔所佩刀直前殺賊十數人力盡死之年四十九事聞贈道銜祀廬州及湖南昭忠祠生平於易詩禮春秋論語說文水經等書皆有撰述凡二十餘種

合二百餘卷同治二年土匪焚其居俱燬於火後人搜輯賸稿惟存讀書偶識八卷五韻論二卷顓頊曆考二卷數藝齋文三卷詩一卷紅崖刻石釋文一卷南高平物產記二卷

陳澧 侯康 侯度

陳澧字蘭甫廣東番禺人道光十二年舉人河源縣訓導澧九歲能爲詩文及長與同邑楊榮緒南海桂文耀爲友復問詩於張維屏問經學於侯康凡天文地理樂律算術古文駢文填詞篆隸眞行書無不研究中年讀諸經注疏子史及朱子書日有課程遂輟作詩初著聲律通考十卷謂周禮六律六同皆文之以五聲禮記五聲六律十二管還相爲宮今之俗樂有七聲而無十二律有七調而無十二宮有工尺字譜而不知宮商角徵羽懼古樂之遂絕乃考古今聲律爲一書自周禮三大祭之樂爲千古疑義今考唐時三大祭各用四調而周禮乃可通以此知古樂十二宮本有轉調又據隋書及舊五代史而知梁武帝萬寶常皆有八十四調宋姜夔謂八十四調出於蘇祇婆琵琶近時凌廷堪燕樂考原遂沿其誤至唐宋俗樂凌氏已披尋門徑然二十八調之四韻實爲宮商角羽其四韻之第一聲

皆名爲黃鍾凌氏於此未明其說亦多不合且宋人以工尺配律呂今人以工尺代宮商此今人失宋人之法律呂由是而亡凌氏乃以今人之法駁宋人尤不可不辨若夫古今樂聲高下則有隋志所載歷代律尺皆以晉前尺爲比而晉前尺則有王厚之鐘鼎款識傳刻尙存今依尺以製管隋以前樂律皆可考見宋史載王朴律準尺亦以晉前尺爲比又可以晉前尺求王朴樂求唐宋遼金元明樂高下異同史籍具在可排比句稽而盡得之至於晉泰始之笛可仿而造唐開元之譜可按而歌古器古音千載未泯又切韻考六卷外篇三卷謂孫叔然陸法言之學存於廣韻宜明其法而不惑於沙門之說又漢志水道圖說七卷謂地理之學當自水道始知漢水道則可考漢郡縣湘鄉曾國藩見聲律水道二書服其精博南海鄒伯奇亦謂所考切韻超越前人其於漢學宋學能會其通謂漢儒言義理無異於宋儒宋儒輕蔑漢儒者非也近儒尊漢儒而不講義理亦非也著漢儒通義七卷晚年尋求大義及經學源流正變得失所在而論贊之外及九流諸子兩漢以後學術爲東塾讀書記謂孝經爲道之根源六藝之總會謂論語爲五經之鎔鑄謂中庸肫肫其仁此語最善形容可據以增成朱注愛之理心之德之說愛

是肫懇心德亦是肫懇論語言仁者五十八章以愛與心德解之而稍覺未密合者以肫懇之意增成之則無不合謂孟子所謂性善者人人之性皆有善荀楊輩所未知程朱謂論性不論氣不備然孟子言性非不兼氣質性中有仁義禮智者乃所謂善本無不圓備之病其論治經之法謂說詩者解釋辨駁然不可無紬繹詞意之功謂讀禮者既明禮文尤明禮意而禮意則鄭注最精謂鄭氏諸經注有宗主復有不同中正無弊勝於許氏異義何氏墨守之學時惠棟張惠言孔廣森劉逢祿之書盛行於世澧謂虞氏易注多不可通所言卦象尤多纖巧惠棟易學有存古之功然當分別觀之又謂漢書儒林傳云費直以彖象系辭十篇文言解說上下經此千古治易之準的謂公羊以叔術爲賢者此公羊之謬不宜墨守謂何劭公注有穿鑿之病謂孔廣森通義序云春秋重義不重事以宋伯姬爲證然若公羊不詳記此事則伯姬死於火耳何以見其賢又謂三傳各有得失知三傳之病而後可以治春秋知杜何范注孔徐楊疏之病而後可以治三傳三傳注疏之病動關聖人之褒貶宜棄其所滯擇善而從其論漢以後諸儒謂魏晉以後天下大亂聖人之道不絕惟鄭學是賴謂國朝考據之學源出朱子不可反詆朱子

嘗曰吾之書但論學術非無意於天下事也以爲政治由於人才人才由於學術吾之意專明學術幸而傳於天下此其效在數十年後故於論語之四科學記之小成大成孟子之取狂狷惡鄉原言之尤詳則意之所在也其教人不自立說嘗取顧炎武論學之語而申之謂博學於文當先習一藝韓詩外傳曰好一則博多好則雜也非博也讀經史子集四部書皆學也而當以經爲主尤當以行己有恥爲主爲學海堂學長數十年至老主講菊坡精舍與諸生講論文藝勉以篤行立品成就甚衆邵陽魏源著海國圖志初成中有可議者澧論辨之後源至粵見而大悅遂與定交並改其書寶應劉寶楠著論語正義未成而卒命子恭冕成之並言當就正於澧恭冕後寄書至粵道意光緒七年粵督張樹聲巡撫裕寬以南海朱次琦與澧皆耆年碩德奏請褒異奉旨朱次琦陳澧均著加恩賞給五品卿銜八年卒年七十三卒後門人請於大吏祀其主菊坡精舍所著讀書記已成十五卷又稿本十卷遺命名曰東塾雜俎他著有說文聲表十七卷水經注提綱四十五卷水經注西南諸水考三卷三統術詳說三卷弧三角平視法一卷琴律譜一卷申范一卷摹印述一卷東塾集六卷子宗誼字孝通性孝友勤學尤好讀朱子書

著朱子語類日鈔一卷年二十一卒 侯康字君謨亦番禺人道光十五年舉人少孤事母孝家貧欲買書母稱貸得錢買十七史讀之卷帙皆敝遂通史學及長精研注疏湛深經術時人比之孔廣森汪中與同里陳澧交最久澧嚴事之在師友之間嘗謂漢志載春秋古經十二篇者左經也經十一卷者公穀經也今以三傳參校之大要古經爲優穀梁出最先其誤尙寡公羊出最晚其誤滋甚乃取其義意可尋者疏通證明之著春秋古經說二卷又治穀梁以證三禮以公羊雜出衆師時多偏駁排詆獨多著穀梁禮證未完帙僅成二卷又以左氏傳注近儒多尊賈服而排杜然杜固有勝賈服者欲著一書以持其平亦未成其餘羣經小學皆有論說多前人所未發又欲做裴松之注三國志例盡注隋以前諸史嘗曰注古史與近史異注近史者羣書大備注古史者遺籍罕存當日爲唾棄之餘今日皆見聞之助宜過而存之因爲後漢書補注續一卷三國志補注一卷後漢稱續者以有惠棟補注三國志杭世駿注未完善故不稱續也又以隋以前古書多亡著書者多湮沒不彰補撰後漢三國晉宋齊梁陳魏北齊周十書藝文志而自注之後漢三國成經史子三部各四卷餘未成又考漢魏六朝禮儀貫串三禮著書

數十篇澧嘗歎以爲精深浩博初擅詩名又愛南北朝諸史所載文章爲文輒效其體爲粵督阮元所賞體羸弱而讀書恆至夜深以此致疾十七年卒年四十弟度侯度字子琴與康同榜舉人以大挑知縣分發廣西署河池州知州州居萬山中無城廣西賊起度伐木爲柵因山勢聯絡堅固可守又使民十家爲牌民有從賊者做趙廣漢鋸笮法使良民告奸民十得六七旣而賊攻桂林巡撫復命度守城宿堞旁數月賊退以病告歸至家遂卒時咸豐五年年五十七度洽熟經傳尤長禮學時稱二侯嘉興錢儀吉嘗稱其研覈傳注剖析異同如辨懿伯惠伯之爲父子三老五更之爲一人證明鄭義皆有據依所著書爲夷寇所焚其說經文刻學海堂集中

鄒伯奇

鄒伯奇字特夫廣東南海人諸生少聰穎絕人於諸經義疏無不孳究覃思聲音文字度數之原尤精曆算能薈萃中西之說而貫通之嘗作春秋經傳日月考以時憲術上推二百四十二年朔閏及食限然後以經傳所書質其合否乃知有經誤傳誤術誤之分又謂向來注經者於算學不盡精通故解三禮制度多所疏失

因作深衣考以訂江永之謬作戈戟考以指程瑤田之疏以文選景福殿賦陽馬承阿證古宮室阿棟之制以體積論槩氏爲量以重心論懸磬之形皆繪圖注說援引詳確又以甄鸞五經算術疏略王伯厚六經天文篇亦無辨證因卽經義中有關天算或先儒所未發或闡發而未明者隨時錄出之成學計一得二卷時番禺陳澧遂於經學兼明曆算與伯奇最契伯奇語澧謂墨子書有算術且有西法發書讀之相對撫掌澧因欲告儀徵阮元以墨子補入疇人傳會元卒乃已又嘗謂澧大戴禮說明堂所謂二九四七五三六一八者此當有圖而記其數橫書之自左而右及圖亡字存後人縱寫之自右而左故錯亂如此且圖有赤點白點以記戶牖故曰赤綴戶也白綴牖也綴者點也澧聞爲之驚喜後以告鎮江柳興宗亦驚喜爲錄其說而去其論算術謂董方立而後諸家極思生巧出於前人之外如華嚴樓閣彈指卽見實抉窳奧然恐後之學者不循途轍遽趨捷法將久而忘其所自是亦可憂人服其所慮之遠其於天象著甲寅恆星表赤道星圖黃道星圖各一卷又謂繪地難於算天乃手摹皇輿全圖其格緯度無盈縮而經度漸狹相視皆爲半徑與餘弦之比例橫九幅縱十一幅合之則成地球滂沱四頽之形

又變西人之舊作地球正背兩面全圖其正面以京師爲中背面之中卽爲京師對衝之處旁爲廿四向審中土與各國彼此之勢經緯俱以十度爲一格因推演其法著測量備要四卷進備物致用四目一丈量之器二測望之儀三檢數之書四畫圖之具又按度考數四目一明數二步量三測算四步圖測量製器本與西人重學光學化學相連伯奇冥搜古籍深明其理故測地繪圖尤多創解時修南海縣志圖爲伯奇手勘密合無憾南豐吳嘉善錢塘夏鸞翔遊粵聞其名與訂交甚篤鸞翔客死爲刻其遺書同治三年侍郎郭嵩燾特疏薦之兩奉優詔令督撫送咨伯奇澹於仕進堅以疾辭江督曾國藩欲於上海機器局旁設書院延伯奇教授屬學使劉熙載致書亦不就八年卒年五十一所著又有補小爾雅釋度量衡一卷格術補一卷對數尺記一卷乘方捷術三卷存稿一卷

華長卿

華長卿原名長懋字枚宗直隸天津人道光十一年舉人咸豐三年選開原訓導在任二十六年以病告歸奉天學政王家璧以勤學善教薦奉旨加國子監學正學錄銜光緒七年卒年七十七長卿幼有宿慧工詩與任邱邊浴禮寶坻高繼珩

稱畿南三才子夙講小學於許書研究有年嘗按其偏旁別爲編纂以譜六書之統系爲說文形聲表十五卷又按畫分部詳注音義及所從之字於下爲正字原七卷又著說文引經考一卷又取爾雅十九篇專論字義與形聲表互相發明爲說雅十九卷生平敦行勵學究心經史其治經有古本周易集注十二卷尙書補闕一卷毛詩識小錄四卷春秋三傳異同辨二卷論語類編一卷其於史以自晉迄隋南北擾攘閱時最久統緒易紊年歲易淆名位易舛因仿五代史十國年譜始晉惠甲子終隋開皇八年爲兩晉十七國南北朝年表三卷又以五代當黜朱梁而以後唐繼唐黜石晉而以南唐繼後唐因取綱目事實始唐天祐四年終宋開寶九年筆削增改爲唐宋陽秋五卷自序謂誅亂討逆褒忠貶姦正名分以植倫常辨是非以定功罪不以建都爲統緒而以族姓爲紹述竊比蜀漢繼東都之例官開原時府尹倭仁奇其才聘纂盛京通志踰年成志彙三十卷開原地處邊隅向學者少長卿劇以經史士風日起尤好甄拔寒峻士有一藝之長莫不容接每談經籍夜分不倦他著又有歷代宰相表五卷文廟從祀考二卷石鼓文存一卷漢碑所見錄三卷疑年錄小傳四卷畿輔人物表六卷方輿韻編二卷姓數四

卷泉譜二卷韻籟四卷詩文鈔三十二卷詞鈔二卷同時獻縣劉書年字仙石道光二十五年進士官編修遂於經學有貴陽說經殘藁一卷爲吳縣潘祖蔭所稱

柳興恩 許桂林 鍾文烝

柳興恩原名興宗字賓叔江蘇丹徒人道光十二年舉人貧而好學敦實行受業於儀徵阮元初治毛詩以毛公師荀卿荀卿師穀梁穀梁春秋千古絕學元刻皇清經解公羊左氏俱有專家而穀梁缺焉乃發憤沈思成穀梁春秋大義述三十卷以鄭六藝論云穀梁子善於經遂專從善經入手而善經則以屬辭比事爲據事與辭則以春秋日月等名例定之其自序曰烏乎穀梁之學之微也久矣乃今而知春秋託始於隱之旨獨在此矣何言之公羊予桓公以宜立穀梁罪桓以不宜立宜立則罪在桓不宜立則罪在隱傳曰先君之欲與桓非正也邪也探先君之邪志以與桓是則成父之惡也如傳意則隱在惠公爲賊子傳曰爲子受之父爲諸侯受之君廢天倫忘君父如傳意則隱於周室爲亂臣孟子曰孔子成春秋而亂臣賊子懼夫所謂賊者豈待刺之刃乃爲賊哉成父之惡卽賊子矣所謂亂者豈但犯上作逆乃爲亂哉廢倫忘君卽亂臣矣烏乎以輕千乘之國者而不能

逃亂賊之誅然則千秋萬世臣子之懼心必自隱公始矣況傳曰先君既勝其邪心以與隱是惠公未失正也明其不必託始於惠也傳曰讓桓不正見桓之弑逆隱實啟之也併明其無庸託始於桓也且惠反諸正以與隱隱乃不行卽位之禮以啟桓是隱之納於邪也然則隱之元年尤邪正絕續之交春秋之託始於此卽於不書公卽位見之孔子志在春秋故知我罪我之言亦出於不得已此春秋之微言亦卽春秋之大義也其書凡例謂聖經既以春秋定名而無事尤必舉四時之首月後儒謂日月非經之大例未爲通論穀梁日月之例泥則難通比則易見與其議傳而轉謂經誤不若信經而併存傳說述日月例第一謂春秋治亂於已然禮乃防亂於未然穀梁親受子夏其中典禮尤與論語夏時周冕相表裏述禮例第二謂穀梁之經與左氏公羊異者以百數漢書儒林傳云穀梁魯學公羊乃齊學也此或由齊魯異讀音轉而字亦分述異文第三謂穀梁親受子夏故傳中用孔子孟子說其他暗合者更多述古訓第四謂自漢以來穀梁師授鮮有專家要不得摛諸師說之外述師說第五謂漢儒師說之可見者惟尹更始劉向二家然搜獲寥寥其說已亡而名僅存者自漢以後併治三傳者亦收錄焉述經師第

六謂穀梁久屬孤經茲於所見載籍之涉穀梁者循次摘錄附以論斷并著本經廢興源流述長編第七書甫成就正於元元惜其見之之晚番禹陳澧嘗爲穀梁箋及條例未成後見輿恩書歎其精博遂定交焉并出其說備采不復作他著有周易卦氣輔四卷虞氏逸象考二卷尙書篇目考二卷毛詩注疏糾補三十卷續王應麟詩地理考二卷羣經異義四卷劉向年譜二卷儀禮釋宮考辨二卷史記漢書南齊書校勘記說文解字校勘記宿臺齋詩文集光緒六年卒年八十有六弟榮宗字翼南著有說文引經考異十六卷同時爲穀梁之學者有許桂林鍾文烝 許桂林字同叔江蘇海州人嘉慶二十一年舉人少孤孝於母及生母無間言家貧不以厚幣易遠游體素弱不耐勞惟讀書始精神煥發故日以詁經爲事道光元年丁內艱以毀卒年四十三桂林於諸經皆有發明尤篤信穀梁之學著春秋穀梁傳時日月書法釋例四卷其書有引公羊互證者有駁公羊而專主者陽湖孫星衍嘗以條理精密論辨明允許之又著易確二十卷大旨以乾爲主謂全易皆乾所生博觀約取於易義實有發明別有毛詩後箋八卷春秋三傳地名考證六卷漢世別本禮記長義四卷大學中庸講義二卷四書因論二卷嘗以其

餘力治六書九數著許氏說音十二卷以配說文又著說文後解十卷又以岐伯言地大氣舉之氣外無殼其氣將散氣外有殼此殼何依思得一說以補所未及蓋天實一氣而其根在北北極是也北極不當爲天樞而當爲氣母因采集宣夜遺文以西法通之著宣西通三卷又以算家以簡爲貴乃取欽定數理精蘊撮其切於日用者著算牖四卷生平所著書四十餘種凡百數十卷儀徵阮元嘗手書談天祕欲傳宣夜學海深須到鬱洲句贈之甘泉羅士琳從之遊後以四算名世鍾文烝字殿才浙江嘉善人道光二十六年舉人文烝於學無所不通而其全力尤在春秋穀梁經傳補注一書嘗謂春秋一書非記人事乃記人心也凡人事皆人心之所爲也惟穀梁子獨得此意又謂穀梁解春秋似疏而密甚約而該經固難知傳亦難讀學者旣潛心於茲又必熟精他經融貫二傳備悉周秦諸子及二千年說者之得失然後補苴張皇可無遺憾因沈潛反覆三十餘年成書二十四卷序曰魯之春秋魯所獨也孔子之春秋孔子所獨也故梁鄭正其名石鵠盡其辭正隱治桓皆卓然出於周初典策之上夫梁鄭舊文也而名有所必正則其加損舊文者可知矣石鵠微物也而辭必有所盡則大焉者可知矣正隱治桓揭

兩字於卷首則全書悉可知矣然而斯義也左氏公羊不能道獨穀梁子稱述而發明之實爲十一卷大指總要之處推之千八百事無所不通故穀梁傳者春秋之本義也其書網羅衆家折衷一是其未經人道者自比梅鷲之辨僞書陳第之談古韻略引其緒以待後賢文烝兼究宋元諸儒書書中若釋禘祫祖禴諡法以及心志不通仁不勝道以道受命等皆能提要挈綱實事求是又著論語序說詳正一卷光緒三年卒年六十

朱右曾

朱右曾字尊魯江蘇嘉定人道光十八年進士改翰林院庶吉士散館授編修二十五年召對稱旨授徽州府知府丁憂服闋補鎮遠府調遵義府所治連蜀境伏莽甚衆桐梓民楊鳳倡亂右曾堅守五閱月以失守屬邑罷官遵義圍解奉旨開復署大定府卒右曾覃思著述精於訓詁輿地之學以逸周書孔晁注疏略乃集諸家之說正其訓詁詳其名物爲周書集訓校釋十卷不言逸周書亦不言汲冢書者復漢志之舊題也又著春秋左傳地理徵二十卷據杜氏地名譜而進退之定著國邑土地山川名一千二百八十一闕者二百二十六考其封域詳其并吞

而繫以漢及今之郡縣又輯服氏解誼三十卷兼取劉歆賈逵鄭衆之說又詩地理徵二卷長洲陳奐治毛詩於其精當處引用頗多

鄭珍 王崧

鄭珍字子尹貴州遵義人道光十七年舉人以大挑二等選荔波訓導咸豐五年叛苗犯荔波知縣蔣嘉穀病珍率兵拒戰卒完其城苗退告歸同治二年大學士祁寯藻薦於朝特旨以知縣分發江蘇補用卒不出三年卒年五十九珍初受知於歙縣程恩澤語之曰爲學不先識字何以讀三代秦漢之書乃益進求諸聲音文字之原與古宮室冠服之制方是時海內之士崇尚攷据珍師承其說實事求是立異不苟同洞知諸儒者之得失復從莫與儔游益得與聞鉅儒宗旨於經最深三禮墨守司農不敢苟有出入儀禮十七篇皆有發明半未脫稿所成儀禮私箋僅有士昏公食大夫喪服士喪四篇凡八卷而喪服一篇反覆尋繹用力尤深又以周禮攷工記輪輿鄭注精微自賈疏以來不得正解說者日益支蔓成輪輿私箋三卷尤長於說文之學所著說文逸字二卷附錄一卷說文新附考六卷皆見稱於時他著有鳧氏圖說深衣考汗簡箋正說隸等書又有巢經室詩鈔文

鈔明鹿忠節公無欲齋詩注而所撰遵義府志古今文獻蒐羅精密好古之士比之華陽國志珍嘗謂遵義漢牂柯也自郡人尹珍道真從許慎應奉受經書圖緯教授南域後無有以經術發聞者於是以道真自命而取以爲名故學成而哀然爲西南巨儒焉子知同能傳其學 王崧字樂山雲南浪穹人嘉慶四年進士山西武鄉縣知縣滇士最爲樸陋崧獨徧覽羣籍學問淹通儀徵阮元總督雲貴延崧主通志稱其地理封建諸篇能得魏收杜佑之遺法著有說緯六卷

劉寶楠 子恭冕 潘維城

劉寶楠字楚楨江蘇寶應人父履恂字迪九乾隆五十一年舉人國子監典簿著有秋槎雜記寶楠生五歲而孤母氏喬教育之始從從父台拱請業以學行聞鄉里爲諸生時與儀徵劉文淇齊名人稱揚州二劉道光二十年進士授直隸文安縣知縣文安地窪下隄堰不修遇伏秋水盛漲輒爲民害寶楠周履隄防詢知疾苦爰檢舊冊依例督旗屯及民同修而旗屯恆怙勢相觀望寶楠執法不阿功遂濟嘗夜冒雨至大城助修固獻等隄堵塞演馬莊隄工決口在縣三歲皆獲有秋再補元氏會歲旱縣西北境蝗表延二十餘里寶楠禱東郊蜡祠令邨保設廠購

捕蝗爭投阬井或抱禾死歲則大熟咸豐元年調三河值東省兵過境故事兵車皆出里下寶楠謂兵多差重非民所堪雇車應差給以民價民得不擾在官十六年衣冠樸素如諸生時勤於聽訟官文安日審結積案千四百餘事每雞初鳴燭入噉食少許興坐堂皇隨鞠隨結毋許吏胥撓言凡涉親故族屬訟者諭以睦婣概令解釋訟獄既簡吏多去籍歸耕曹舍晝閉或賃與人爲書畫肆遠近翕然著循良稱咸豐五年卒年六十五寶楠於經初治毛氏詩鄭氏禮後與劉文淇及江都梅植之涇包慎言丹徒柳興恩句容陳立約各治一經寶楠發策得論語病皇邢疏蕪陋乃蒐輯漢儒舊說益以宋人長義及近世諸家仿焦循孟子正義例先爲長編次乃薈萃而折衷之著論語正義二十四卷其最有功經訓者如謂有子言禮之用章是發明中庸之說夫子五十知天命是知天生德於予之義告子游子夏問孝是言士之孝乘桴浮海是指今高麗地興於詩立於禮成於樂民可使由之不可使知之是夫子教門弟子之法文王既沒文不在茲乎是指所得之簡策言樊遲從游於舞雩之下問崇德修慝辨惑是魯行雩祭樊遲舉雩祭之詞以問朋友切切偲偲兄弟怡怡是言朋友責善兄弟不可責善謂伯魚爲周南召南

是謂伯魚受室後示以閨門之戒四海困窮是指洪水之災堯舉舜敷治之凡此皆先聖賢之旨沈羶二千餘載一旦始發其蘊至八佾鄉黨二篇所說禮制皆至詳確因官事繁未卒業命子恭冕續成之他著有釋穀四卷於豆麥麻三種多補正程氏九穀考之說漢石例六卷於碑志體例考證詳博寶應圖經六卷勝朝殉揚錄三卷文安隄工錄六卷所爲文淵雅翔實有韞山樓詩文集子恭冕 恭冕字叔俛光緒五年舉人守家學通經訓入安徽學使朱蘭幕爲校李貽德春秋賈服注輯述移補百數十事後主講湖北經心書院敦品飭行崇尚樸學幼習毛詩晚年治公羊春秋發明新周之義關何劭公之繆說同時通儒皆躋之卒年六十著有論語正義補何休論語註訓述廣經室文鈔 潘維城字閔如江蘇吳縣人從同里夏文燾游繼受業元和李銳爲錢大昕再傳弟子得聞經師緒論謂論語爲何晏所亂惟鄭康成彙通古今文集諸儒之大成迺蒐輯鄭注又采漢魏古義及近儒之說爲古注集箋十卷子錫爵卒其業

龍啟瑞 苗夔 龐大埜

龍啟瑞字翰臣廣西臨桂人父光甸字見田嘉慶二十四年舉人歷官黔陽武陵

知縣乍浦台州同知所至斷滯獄修文教摘姦發伏以廉幹稱著有宰黔防乍錄及詩文集道光二十九年卒年五十八啟瑞道光二十一年一甲一名進士授翰林院修撰二十三年充順天鄉試同考官二十四年充廣東鄉試副考官二十七年大考翰詹二等七名以侍講陞用七月提督湖北學政湖北人士知禮尙文啟瑞專以根柢之學振之著經籍舉要一書以示學者又以學政之職有三要一曰防弊二曰厲實學三曰正人心風俗故所作文檄告誡周詳既復舉舊日所聞及近所施行者爲視學須知一卷三十年丁父憂回籍咸豐元年六月廣西巡撫鄒鳴鶴奏辦團練以啟瑞總其事二年七月省城圍解以守城敘功得旨以侍講學士陞用並賞戴花翎五年回京六年四月擢通政司副使十一月提督江西學政七年三月授江西布政使時髮逆踞東南江西僅省會暨一府未沒於賊庫藏久虛啟瑞焦勞籌度饑糈賴以不竭會歲旱蝗齋心祈禱力求驅捕之法蝗患頓除嘗勸民積穀備荒復以暇修普濟育嬰諸善政惠心澤民都邑感慕八年九月卒於官同治十一年奉旨入祀江西名宦祠啟瑞少與其鄉呂璜朱琦王錫振爲古文步趨桐城已從上元梅曾亮遊文日益進後交漢陽劉傳瑩切劘經義尤講求

音韻之學貫穿於顧江苗段王孔張劉諸家之書而著古韻通說二十部其論古韻寬嚴得失曰論古韻者自顧氏以前失之疏自段氏以後過於密江氏酌中亦未爲盡善顧氏規模粗備其考據精確有不可磨滅者段氏分之脂支三部發前人所未發餘所分者求之古經率多可據雖分配入聲未極精審不免千慮之失然而分合周備條理井然可謂文而不煩博而知要者矣後之陽湖張氏高郵王氏曲阜孔氏歙江氏諸子之學博足以綜其蕃變精足以定其指歸皆由段氏精而求之以極於無可復加之地至張氏之分爲二十一部與高郵王氏略同其依據說文折衷經韻使人觀形可以得聲之誤復審音可以定形之譌而於通轉流變之間尤能言之盡意同時武進劉氏復有詩聲衍之作觀其序論及標目部分蓋亦竊取張氏之意而爲之者也其論入聲同部異韻及異部同用較諸家尤爲明備覺段氏之精於說文猶未見及張氏有言凡言古韻者分之不嫌密合之不嫌廣惟分之也密故其合之也脈絡分明不至因一字而疑各韻可通亦不至因各韻而疑一字之不可通故今之集古韻也意主於嚴而其爲通說也則較之顧氏而尙覺其寬其分也有所以可分之由其合也有所以得合之故皆爲剖而明

之不敢拘前人成說不敢執一己私見亦曰參之古書以求其是質之人心而得其安而已論本音曰許書實兼音形義三者爲訓諧聲一門幾居全書之八然比而論之無不與經訓符合未有母聲在此而子聲在彼者間有出入即可據爲古音通轉之證中有讀若讀同之例雖偶用方言俗字未必盡出古音然要取諸同部其轉入他部者亦必有說每文下所載古文或體亦然今於經韻後載說文諧聲諸字以見音隨字寓之原而於偏旁讀若小異者皆爲梳鬻而證明之其有古今音變難爲強說者仍從蓋闕論通韻曰二十部大旨貴於密而不貴於疏然證之於古或齟齬而不合則不得不爲之說以通其變然其所通者必有其所以可通之故而非若唐人之通韻僅取便於時俗而已論轉音曰轉音卽雙音之異名天地間自有不可磨滅者古經中用韻及字書偏旁有不合者苟求之於是無不可通必謂古一字祇有一音非確論也此條所以濟本音通韻之窮而讀古書及說文者愈釋然而無疑矣論通說曰學者從事於二十部之古韻則於其紛紜轉轄者有若涇渭之難淆燕越之各判矣然於此而與之道古或不免拘執而難通又將諱其所不合以爲安則又與於誣古欺人之甚故爲之說有十以通之大都

本通韻之文爲之根柢通韻祇通其數字通說則舉其一字蓋全書皆嚴其所以分之界而於此終著其所以合之由是古韻之學之大成也故以名其全書焉啟瑞又以爾雅一書學者多苦其難讀因采邵郝盧阮諸說於發疑正讀之交講明至是間復參以己見著爾雅經注集證三卷他著有小學高注補正是君是臣錄班書識小錄通鑑識小錄諸子精言莊子字詁及經德堂詩文集十二卷 苗夔字仙麓直隸肅寧人幼卽嗜六書形聲之學讀許氏說文若有夙悟已又得顧炎武音學五書慕之彌篤曰吾守此終身矣舉道光十一年優貢生高郵王念孫父子聞夔之說禮先於夔與暢論音學源流由是譽望日隆夔以爲許叔重遺書多有爲後人妄刪或附益者乃訂正說文凡六朝五代以來聲傳訛者八百餘字爲說文聲訂二卷顧氏音學所立古音表十卷宏綱已具然猶病其太密而戈麻旣雜西音不應別立一部於是併耕清青蒸登於東多併戈麻於支齊定以七部隲括羣經之韻字以聲從韻以部分爲說文聲讀表七卷宋濂篆韻集鈔謂說文建首五百四十字卽蒼頡讀六朝五代人無能得其句讀者皆以俗韻失之也夔以毛詩韻部定其音紐爲建首字讀一卷詩自毛傳鄭箋而後主義理者多主聲韻

者少雖有陸元朗詩經音義亦不能專主古音然古音時有未盡改者夔治毛詩尤精於諧聲之學嘗以齊魯韓三家證毛而又以說文之聲讀參錯其間采太平戚氏之漢學諧聲詩經正讀無錫安氏之均徵爲毛詩韻訂十卷書出識者歎其精審他著有說文聲讀考集韻經存韻補正經韻鈎沈四種咸豐七年五月卒年七十五生平苦思專一雖處困約有以自怡將歿戒其子葬衆書叢中子玉璞乃擇書之尤嗜者納棺中殉焉 龐大埜字子方江蘇常熟人嘉慶二十四年舉人究心音韻之學嘗謂顧江戴段孔王諸家分部互有出入者以入聲配隸無準耳入聲有正紐反紐今韻多從正紐古韻多從反紐故用王氏說別出緝盡十八部第一部歌戈麻分支齊佳第二部魚虞模分麻其入鐸陌昔分藥覺麥錫皆喉音第三部蒸登分耕第四部之哈分皆灰尤其入職德分屋麥第五部東冬鍾江第六部尤侯幽分虞蕭宵肴豪其入屋沃燭覺分錫第七部陽唐耕第八部蕭宵肴豪其入藥分鐸屋沃覺麥錫第九部耕清青分庚第十部支佳分齊其入麥錫分昔皆鼻音第十一部真諄臻文殷魂痕先分刪山仙第十二部脂微齊皆灰分哈祭其入質術櫛物迄沒黠屑分牽薛第十三部元寒桓刪山仙分先第十四部祭

泰夫廢分霽怪其入月曷末牽薛分黠屑皆舌齒音第十五部侵覃添咸凡分鹽第十六部緝合帖洽乏分葉第十七部談鹽銜嚴第十八部盍葉狎業分帖皆屑音祭無平上聲緝盍無平上去聲陽類陰類各九部陽奇陰偶兩兩相配一從陸氏法言所定爲正紐一從顧江戴王氏所定爲反紐其轉音之法有五一正轉同部者是也一遞轉同音者是也一旁轉相比及相生者是也一雙聲同母者是也大塋又謂欲明古音必先究唐韻乃可定其分合因取徐鉉所引孫愐音切參以徐鍇之篆韻譜按部排纂爲唐韻輯略五卷備考一卷又以說文正字按部排纂以聲相統而別出其流變之字爲形聲輯略一卷備考一卷又以說文諧聲經典用韻合之唐韻按部排纂以紐相承而表出其分收之字別收之字爲古音輯略二卷備考一卷其論等韻則謂字母三十六爲天地自然之音不可增減不可移易取切韻指掌圖四聲等子切韻指南參互考訂合門法爲八分十六攝爲六十一圖以唐韻廣韻集韻五音集韻及玉篇玉海之字按紐排纂附注切音爲總圖以提其綱爲略例以舉其凡爲備考以覈其實又推之玉篇廣韻皇極經世之論音以暢其說又推之天竺西番藏經十二家之譯字以盡其變爲等韻輯略三卷

他著有易例輯略五卷子鍾璠官至刑部尙書

陳立

陳立字卓人江蘇句容人道光二十四年進士改翰林院庶吉士散館授刑部主事洊陞郎中記名御史授雲南曲靖府知府召對時顯皇帝有爲人清慎之褒時以道梗不克之任流轉東歸所至賓禮先後受事皆刑名至重立處以詳慎於喪服變除宗法淆異多能折衷協於禮律少讀書過目成誦隨父客揚州師江都梅植之受詩古文辭師江都凌曙儀徵劉文淇受公羊春秋許氏說文鄭氏禮而於公羊致力尤深文淇嘗謂漢儒之學經唐人作疏其義益晦徐彥之疏公羊空言無當近人如曲阜孔廣森武進劉逢祿謹守何休之說詳義例而略典禮訓詁立乃博稽載籍凡唐以前公羊古義及國朝諸儒說公羊者左右采獲擇精語詳草創三十年長編甫具南歸後乃整齊排比融會貫通成公羊義疏七十六卷初治公羊因及漢儒說經師法謂莫備於白虎通先爲疏證以條舉舊聞暢隱抉微爲主而不事辨駁成白虎通疏證十二卷幼受爾雅因取唐人五經正義中所引隄爲舍人樊光劉歆孫炎李巡五家悉甄錄之謂郭注中精言妙諦大率胎此附以

郭音義及顧沈施謝諸家切釋成爾雅舊注二卷又以古韻之學蔽蝕已久而聲音之原起於文字說文諧聲卽韻母也因推廣歸安姚文田說文聲系之例刺取許書中諧聲之文部分而綴紘之以象形指事會意爲母以諧聲爲子其子之所諧又卽各綴於子下其分部則兼取顧汪戴孔王段劉諸家精研而審覈之訂爲二十部成說文諧聲孳生述三卷爲文淵雅典碩不尙空言大抵考訂服制典禮及聲音訓詁爲多有句溪雜著六卷生平甘淡泊恥干謁與人交懇款惻怛客揚州久師門誼最篤卒年六十一

桂文燦

桂文燦字子白廣東南海人道光二十九年舉人同治元年獻所著經學叢書論曰桂文燦所呈諸書考證箋注均尙詳明羣經補正一編於近儒惠棟戴震段玉裁王念孫諸經說多所糾正薈萃衆家確有依據具見潛心研究之功二年正月應詔陳言四十條若津貼京員製造輪船海運滇銅諸奏先後得旨允行光緒九年選湖北鄖縣知縣留江夏治獄每決一獄大吏未嘗不稱善十年海上事起長江戒嚴文燦建議宜增槍隊練軍法並在田家鎮多設守禦方略以防未然又以

邪說誣民宜正人心爲急務擬宣講聖諭章程及履任無幕客無家人事無大小皆躬親之未及期年以積勞卒於任粵東自阮元設學海堂經學日興人才彬彬輩出其後承學之士喜立門戶遵朱者與鄭違鄭者又與朱違文燦追述阮元遺言謂周公尙文範之以禮尼山論道教之以孝苟博文而不能約禮明辨而不能篤行非聖人之學也鄭君朱子皆大儒其行同其學亦同因著朱子述鄭錄二卷他著有易大義補一卷書古今文注二卷禹貢川澤考四卷毛詩傳假借攷一卷鄭讀考一卷釋地六卷詩箋禮注異攷一卷周禮通釋六卷今釋六卷春秋列國疆域攷一卷圖一卷箴膏肓起廢疾發墨守評各一卷四書集注箋四卷論語皇疏攷證十卷重輯江氏論語集解二卷孟子趙注考證一卷孝經集證四卷集解一卷羣經補證六卷經學輯要一卷經學博采錄十二卷羣經輿地表一卷說文部首句讀一卷子思子集解一卷弟子職解詁一卷周髀算經攷一卷廣東圖說九十二卷四海記一卷海國表一卷海防要覽二卷掌故紀聞二卷疑獄紀聞一卷牧令芻言二卷潛心堂文集十二卷

陳奐 金鶚 管禮耕 陸元綸

陳奐字碩甫江蘇長洲人諸生成豐元年舉孝廉方正奐始從吳縣江沅治古學金壇段玉裁寓吳與沅祖聲善嘗曰我作六書音韻表惟江氏祖孫知之餘鮮有知者奐盡一晝夜探其梗概沅嘗假玉裁經韻樓集奐竊視之加朱墨後玉裁見之稱其學識出孔賈上由是奐遂受學玉裁刻說文解字注校訂之力奐居多游京師高郵王念孫暨子引之棲霞郝懿行績溪胡培翬涇胡承珙臨海金鶚咸與奐締交引之著經義述聞每一卷成必出相質承珙撰毛詩後箋自魯頌泮水以下奐爲補編郝氏爾雅義疏胡氏儀禮正義金氏求古錄皆爲校刊以行奐嘗言大毛公詁訓傳言簡意該漢儒不遵行錮蔽久矣遂殫精竭慮專攻毛傳以毛傳一切禮數名物自漢以來無人稱引韜晦不彰乃博徵古書發明其義大抵用西漢以前舊說而與東漢人說詩者不苟同又以毛氏之學源出荀子而善承毛氏者惟鄭仲師許叔重兩家故於周禮注說文解字多所取說著詩毛氏傳疏三十卷敍曰鄭康成初學韓詩後見毛詩義精好爲作箋亦復閒雜魯詩併參己意故作箋之旨實不盡同毛義近代說詩兼習毛鄭不分時代不尙專修不審鄭氏作箋之旨而又苦毛義之簡深猝不得其涯際漏辭偏解迄無鉅觀竊以毛詩多記

古文倍詳前典或引伸或假借或互訓或通釋或文生上下而無害或辭用順逆而不違要明乎世次得失之迹而吟詠情性有以合乎詩人之本志故讀詩不讀序無本之教也讀詩與序而不讀傳失守之學也漢書藝文志毛詩二十九卷毛詩故訓傳三十卷古經傳本各自爲書自傳與箋合併而久失原書之舊今置箋而疏傳者宗毛詩義也是書剖析同異訂證闕訛有功毛氏不淺如葛覃傳父母在以下九字爲箋語竄入引泉水箋爲證與我行其野篇宣王之末以下十九字爲傳誤入箋者皆確不可易毛於言告言歸下旣云婦人謂嫁曰歸於此則第訓寧爲安蓋歸寧卽序之歸安父母謂已嫁而可以安其父母之心卽所謂無父母遺懼也潛夫論斷訟篇云不枉行以遺憂故美歸寧之志一許不改蓋所以長真潔而寧父母也此正足以發明序傳之義又如以煩擱解生民之蹂黍里旅證公劉之廬旅皆確有依據而以爾雅之不遁不蹟不徹爲一句以釋日月沔水十月之交三詩尤爲精絕又以疏中稱引博廣難明更舉條例立表示圖爲毛詩說一卷準以古音依四始爲毛詩音四卷做爾雅例編毛傳爲義類十九篇一卷以鄭多本三家詩與毛異爲鄭氏箋考徵一卷又有詩語助義三十卷公羊儀禮考徵

一卷師友淵源記一卷禘郊或問宋本集韻校勘記其論尙書大傳與毛傳同條共貫論春秋之學從公羊以知例治穀梁以明禮穀梁文句極簡必得治禮數十年而後可明其要義論釋名與毛傳說文多不合然可以討漢末說經家之沿流論丁度集韻云集韻總字具見類篇先以類篇校集韻再參之釋文說文玉篇廣韻博雅則校讐之功過半矣又云陸氏釋文宋本當於集韻求之今尙書釋文經開寶中陳諤等刪改之本集韻則未經刪改者也皆爲後學開塗徑於子書中尤好管子嘗命其弟子元和丁士涵爲管子案四卷家居授徒從游者數十人同郡管慶祺馬釗費寶鏗浙西戴望蔣仁榮其尤著也同治二年卒年七十有八 金鶚字誠齋浙江臨海人優貢生博聞強識邃精三禮之學受知於山陽汪廷珍至京師居廷珍第中與廷珍析難辨論成禮說二卷陳奐往見之與語恨相見晚嘉慶二十四年卒於京邸所著求古錄一書取宮室衣服郊祀井田之類貫串漢唐諸儒之說條考而詳辨之發明三禮不拘墨守奐書稱其鎔鑄故訓眞爲一代大作手胡承珙毛詩後箋中亦往往引用其說鶚又嘗輯論語鄉黨注釐正舊說頗得意解卒後稟全佚奐求得之釐爲求古錄禮說十五卷鄉黨正義一卷後吳縣

潘祖蔭復得其遺著彙刊之爲禮說補遺二卷 管禮耕字申季江蘇元和人歲貢生父慶祺受業長洲陳奐嘗手校陸氏釋文禮耕守家學尤長詁訓馮桂芬爲說文段氏注攷證屬成十五卷禮耕雖博通載籍而細謹不輕著書嘗言唐以正義立學官漢魏六朝遺說積久半闕不完凡所攷見獨存釋文而今本踳剝非其舊思綜稽羣籍爲校證未及半而卒年四十著有操教齋遺書四卷 陸元綸字績銘江蘇長洲人道光二十三年副貢生充八旗官學教習咸豐元年舉孝廉方正辭不受九年卒年五十九少穎敏從吳鍾駿游肆力於經學中年於三禮義疏用力最深自馬鄭賈孔而下及國朝江永戴震惠士奇惠棟段玉裁諸家說禮之書無不考核屢訪陳奐研究六書奇訓學術源流晚更究心宋五子書以爲立身事親之法於廿四史通鑑綱目及他叢書中嘉言懿行可師可法隨筆手鈔名曰宗輝錄林則徐撫吳時深賞之朱珔嘗謂束修自勵研經好學若陸生者吳中碩士也所纂有三禮彙鈔說文小箋著有御珍駕齋集

黃式三子以周

黃式三字薇香浙江定海人歲貢生事親孝父與梧性端嚴先意承志恆得歡心

嘗赴鄉試母裘暴疾卒於家馳歸痛絕誓不再應鄉試父老且臥病數年衣食饋洗必躬親之比歿持喪以禮於學不立門戶博綜羣經治易言卦辭一意相承六十四卦爻辭同者亦一意相承又釋繫辭傳衰世之意謂伏羲氏衰而神農作易之興也其於中古乎中古謂神農也以此申鄭君神農重卦之義著易釋四卷治春秋作釋救執釋人釋名釋殺盜釋入釋以以訂杜預釋例之訛謂魯春秋一國之史不赴告不書孔子修之不得增史之所不書傳引列國史文之異者以備參攷疑以傳疑其事不可牽合爲一必牽合反害於經也著春秋釋二卷尤長三禮論禘郊宗廟謹守鄭學論封域井田兵賦學校明堂宗法諸制有大疑義必釐正之其復禮說崇禮說約禮說識者以爲不朽之作生平於經說不拘漢宋擇是而從恆恐私智穿鑿得罪聖經中夜自思怵然不寐嘗著論語後案二十卷謂鄭康成就魯論篇章攷之齊古爲之注當時貴之魏末何平叔之徒酷嗜莊老而作集解以行世晉宋齊梁媚佛成俗聖教不明其始以儒亂釋其終遂以釋亂儒皇疏黜鄭注而宗何有由來矣邢氏祇刪皇氏而就簡耳自朱子注既出六百餘年之儒說羣奉正宗後之人補輯鄭君之遺逸考校何氏之異同各明嫡家卒未聞有

繼漢軼魏實能駕朱子上者則朱子之所得大且多也雖然漢魏諸說之醇有存於何氏之解皇邢之疏及陸氏釋文諸書而不可盡廢者諸經注疏與子史中雜引經文及諸說解有可拾遺而補闕者元明數百年遵朱子注有能發明之而糾正之者近日大儒實事求是各盡所長有考異文者精訓詁者辨聲類者稽制度名物者譔聖賢事蹟者有考驗身心辨析王霸學務見其大者有不惑於老釋復明析於儒之近老釋學務得其正者凡此古今儒說之薈萃苟有裨於經義雖異於鄭君朱子皆宜擇是而存因廣收衆說附以己意而爲是書吳縣吳鍾駿上元朱緒曾皆以爲漢宋持平之著可垂國胄他著有尙書啟蒙四卷詩叢說一卷詩序說通二卷詩傳箋考二卷周季編略九卷傲居集經說四卷史說四卷嘗作求是室記曰天假我一日卽讀一日之書以求其是作畏軒記曰讀經而不治心猶將百萬之兵而自亂之蓋自道云讀史喜文獻通考而時論定馬氏之闕失嘗應聘佐軍幕當路以外寇問作備外寇議問者色沮式三日不從此言數年後必有大寇事果驗同治元年卒年七十四歲從子以恭子以周俱能傳其學江東稱經師者必曰黃氏以恭字質庭光緒元年舉人著有尙書啟蒙疏二十八卷讀詩管

見十二卷八年卒年五十四 以周字元同同治九年舉人由大挑教職歷署遂昌海鹽於潛訓導補分水訓導光緒十四年以學政瞿鴻禨保薦賜內閣中書銜十六年復以學政潘衍桐保薦奉旨陞用教授旋補處州府教授二十五年卒年七十二性孝友四歲喪母長而追思不已事繼母如所生少傳父式三學與從兄以恭作經課互相質督學吳存義試寧波以明堂考命題以周據隋宇文愷傳謂考工記夏后氏世室堂修二七二爲衍文存義深賞之嘗居浙城聞兵警以周獨研索經義積十晝夜而知孟子夏五十殷七十周百畝之異異在步尺非在井疆自謂足破二千年之疑難其堅銳如此初治易著十翼後錄治羣經著讀書小記而三禮尤爲宗主以爲三代下經學鄭君朱子爲最而漢學家破碎大道宋學家棄經臆說不合鄭朱何論孔孟因守顧炎武經學卽理學之訓以追討孔門之博文約禮其考帝王禮典務在求通以告後聖可行如後世不明報祀立廟之典說之曰劉歆云天子七廟七者其正法數可常數者也宗不在此數中宗變也苟有德則宗之不可預爲設數故周公爲無逸之戒舉殷三宗以勸成王劉氏此說甚明蓋殷三宗周成宣後世宗其德別立廟以報祭之凡報必有廟特不在宮寢左

與正廟並爾展禽言虞報幕夏報杼商報上甲微周報高圉太王竊謂三宗祖甲亦商之所報也姜嫄亞圉成王宣王亦周之所報也魯頌閟宮毛傳以爲先妣姜嫄之廟在周左傳敢忘高圉亞圉賚逵服虔以爲周人不毀其廟而報祭之王子朝之亂單子盟百官於平宮杜預以爲平王廟時尙在則成王宣王亦必有宮矣又如舊說誤指饋食爲時享禮說之曰周官大宗伯分肆獻裸饋食時享爲三等禮經特牲少牢皆以饋食名篇非時享矣士虞禮云孝子某哀薦禘事適爾皇祖某甫以濟祔爾孫某甫皇祖者太祖也故稱新死者爲爾孫適爾皇祖者謂之太祖廟而合祭之也故曰哀薦禘事其祔祭之禮亦明云如饋食則饋食合祭也明矣特牲禮筮日筮尸之命辭云適其皇祖文同士虞禮少牢禮云用薦歲事於皇祖歲事者禘事也以薦歲事於皇祖告卽特牲禮告以適爾皇祖之義則特牲少牢饋食爲薦禘事也明矣自注疏不以饋食爲祭名編禮家遂以此爲大夫士之時祭禮而天子時享據此爲例則天子饋食禮遂失而時享一日歷七廟反有日力不足之疑矣時享之禮殺於饋食鄭注以饋食當時享失之時享日享一廟而七廟之牲可同日視之祭後有繹爲饋食時享無繹又如詳考明堂封禪之制則

曰封禪古禮也自漢人侈其志後世莫敢舉明堂古制也自漢人侈其事後世莫敢行皆議禮者之失也詳考學校選舉之制則以古學校必升士而斥漢以後學校不升士之弊以古鄉舉里選在學校賢能皆有學之人而斥漢以後選舉不由學校之弊凡此類皆務告古禮可行初讀秦蕙田五禮通考病其吉禮好難鄭軍禮太阿鄭因著禮說略後乃放戴君石渠奏議許君五經異義爲禮書通故一百卷凡敘目四十九閱十九年而後成書自敘稱高密箋詩而屢易毛傳注禮而屢異先鄭識已精通乎六藝學不專守於一家是書之作竊取茲意論者謂其博學詳說去非求是足以窺見先王制作之譚輿比秦蕙田書博雖不及精或過之又以經有訓詁所以明經而造乎道也乃仿儀徵阮元性命古訓廣爲二十四日著經訓比義三卷論者謂陳北溪字義墨守師說戴震孟子字義疏證專難宋儒是書詳引諸經各注異於陳戴之自立一幟有益後學生平以明經傳道爲己任辨虛無辨絕欲而以執一端立宗旨爲賊道鎮海胡洪安悅象山之言與以周縱言義禮以周曰經外之學非所知也江蘇學政黃體芳聘主南菁講舍凡十五年又兼課寧波辨志精舍諸生經成就甚衆晚以子思承孔聖以啟孟子著子思子輯

解七卷舉子思所述夫子之教必始詩書而終禮樂及所明仁義爲利之說謂其爲傳授之大旨書成年六十九矣他著有軍禮司馬法攷徵二卷倣季雜著二十二卷黃帝內經九卷集注九卷

李善蘭

李善蘭字壬叔浙江海寧人諸生甫入學偶受教官訓言遂辭出終身不就試少從長洲陳奐受經通辭章訓詁之學而於算術好之獨深年十歲竊九章閱之以爲可不學而能後得測圓海鏡句股割圓記所造漸精因思割圓法非自然深思得其理嘗謂道有一貫藝亦有一貫測圓海鏡每題皆有法有草法者本題之法也草者用立天元一曲折以求本題之法乃造法之法法之源也算術大至躔離交食細至米鹽瑣屑其法至繁以立天元一演之莫不能得其法故立天元一者算學中之一貫也並時明算如錢塘戴煦南匯張文虎烏程徐有壬汪日楨歸安張福僖皆友善時相問難咸豐初客上海識英吉利偉烈亞力艾約瑟韋廉臣三人偉烈亞力精天算通華言善蘭以歐几里幾何原本十三卷續增二卷共十五卷明時祇譯六卷因與偉烈亞力同譯後九卷西士精通幾何者眇各國俗本多

掣去七八九十四卷其第十卷闡理幽元非深思力索不能驟解故譌奪甚多善
蘭筆受時輒以意匡補譯成偉烈亞力言西士他日欲得善本當反求諸中國也
偉烈亞力又言美國羅密士爲天算名家取代數微分積分合爲一書分款設題
較若列眉復與善蘭同譯之譯成名曰代微積拾級共十八卷代數變天元四元
別爲新法微分積分二術又借徑於代數實中土未有之奇祕善蘭隨題剖析自
言得力於海鏡爲多又與艾約瑟譯重學二十卷附曲綫說一卷又與偉烈亞力
譯談天十八卷又譯物學八卷以粵匪陷吳越從曾國藩安慶軍中相依數歲同
治七年巡撫郭嵩燾以通算薦徵入同文館充算學總教習總理衙門章京積官
至戶部郎中晉三品卿銜善蘭課同文館生以海鏡而以代數演之合中西爲一
法成就甚衆光緒十年卒於官年垂七十矣所著羣經算學考未成燬於兵有方
圓闡幽一卷弧矢啟祕三卷對數探原二卷垛積比類四卷四元解二卷麟德解
三卷橢圓正術解二卷新術一卷拾遺四卷火器真訣一卷對數尖錐變法釋一
卷級數回求一卷天算或問一卷附考數根法一卷統名則古昔齋算學善蘭聰
彊絕人蓋有天授其於算能執理之至簡馭數之至繁故衍之無不可通之數抉

之卽無不可窮之理所譯各書皆信筆直書了無疑義世謂梅文鼎悟借根之出天元善蘭能變四元而爲代數蓋梅氏以後一人云

李聯琇

李聯琇字秀瑩江西臨川人父宗瀚由編修官至工部侍郎聯琇少失怙恃奮然自勵於學道光二十五年成進士改翰林院庶吉士散館授編修咸豐二年大考第一擢侍講學士三年提督福建學政遷大理寺卿五年調江蘇學政與巡撫趙德轍會疏請以宋陸秀夫從祀孔子廟廷詔從之以病告歸同治四年主講江南鍾山書院院長舊多大師聯琇績學敦行別擇精審來學者日盛兵燹之餘士氣復振總督沈葆楨稱其與故院長錢大昕姚鼐諸人埒光緒四年卒年五十九院中人士祀之講堂聯琇爲學自天文輿地名物訓詁典章制度旁及瑣聞軼事鉤鈎釃解釋洞見癥結所爲書數十萬言皆實事求是又遇事敢言於江西團練舉在籍紳士熊守謙等八人西北捻匪萌芽疏請山東巡撫視賊聚散而痛懲之舉滕縣知縣黃良楷專任捕務後良楷卒殺賊捍患顯名當世性澹泊寓江蘇二十年屏絕榮利貴要不通一書大學士曾國藩與語云將疏薦之辭退語人曰吾官侍

從因病乞休若再用薦起負平生所學矣且薦剡而謀之其人私也吾不可使相國有私其介特如此有好雲樓初二集四十四卷

吳樹聲

吳樹聲字鼎堂雲南保山人道光二十四年舉人以知縣分發山東攝沂水縣事土匪竄擾鄰邑震動率鄉勇擊走之勸農桑備水旱著沂水桑麻話備蝗略等書爲民謀者甚至調署肥城時粵匪方熾東省戒嚴肥邑故係土城又多圯特改建石城工竣而賊自豐口渡河而北城固得無恐補東阿縣調署壽光縣大計舉卓異又調章邱同治十二年卒於任樹聲精小學用宋戴侗六書故之例變說文部居成六書微一百一十卷首列建首字次列建首字所生之字後列新沾建首字總以子母相生爲例次諧聲次會意而全書大指則首重字形而聲與義次之參互錯綜仍歸建首一義條理秩然古人制字源流藉此可見又以顧炎武併唐韻五支之半及九麻之半各字與七歌八戈韻字爲第六部其五支韻中字皆改爲歌戈一類議者或譏其武斷江永古韻標準以平聲支脂之微齊佳皆灰哈尤魂戈去聲未怪韻字爲第二部以歌戈麻支紙寘韻字爲第六部與顧氏書雖微有

出入而大旨則同段玉裁以之哈韻字合爲第一部而爲第一類以歌戈麻支字合爲第十七部脂微齊皆灰字合爲第十五部支佳字合爲第十六部而總爲第六類以爲周秦之韻與今韻異者古本音也於古本音齟齬不合者古合韻也在段氏自有心得惟以古人聲歌必有一定之韻如後世之一東二冬且必有一定可合之韻如後世之通某轉某者則殊不然古人聲歌無非天籟既曰天籟則必有古音既不能以後世之音概古人之音又豈能以古時一方之音概古時天下人之音乎古人音韻皆矢口而成並無部類亦無同通之可言也其與今韻異者皆古音也不必言協亦不必言合其古音與古音異者皆方音也孔子繫易鄒魯之音也與三百篇除魯頌外出入者甚多屈宋南音也與兩漢續騷用韻亦多出入竊疑古者無歌麻兩部唐韻之七歌八戈九麻皆起於西域九麻之半車家等字皆自魚虞模轉入七歌八戈與九麻之半麻加等字皆自支韻施爲等字轉入因檢古書中韻語有歌麻字爲韻者一一拈出知古人自有此一類音韻成歌麻古韻考四卷援據賅審發前人所未發又輯古語二字合音如終葵爲椎蒺藜爲茨邾婁爲鄒之類成合音輯略一卷又撰詩小學三十卷訓釋字義純用雙聲疊

韻求之有不得通者始參用旁通引申之義謂詩中有古字有訛字有段借字皆言乎其形也其聲與義則有合音有一字數義一義數用一經誤讀便成舛誼乃疏通證明或因聲而定義或以義而知聲知其爲古字而後不誤於後世字知其爲訛字而後可求其正字知其爲段借字而後不牽混於所借之字知其字之形而後可以定其聲與義知其字之聲與義而後益無誤於字之形推明古訓實事求事其書出段玉裁毛詩小學上又著論語尊經錄五卷不主一說專尋釋經文而得其義他著有孟子小學一卷兩漢書小學五卷經傳釋詞續五卷皆熟精故訓爲專門之學

劉庠

劉庠字慈民江西南豐人祖衡已入循吏傳庠幼從父讀書京師執經於湘鄉曾國藩之門國藩稱其博學不倦以咸豐元年順天鄉試舉人官內閣中書充國史館方略館校對後歸里值國藩駐師撫州遣使迎之屢欲登薦庠以養親辭及移師祁門復欲招佐軍幕爲緩師期二日仍以父病不就父歿不復仕國藩聘主徐州雲龍書院值髮逆初定士習荒陋庠以經學授諸生士氣始振旋又主海州敦

善書院清江浦崇實書院先後三十餘年教人以勤學篤行爲主嘗嫉今之學者稍有所知卽泰然自封或更務爲高遠以欺世而盜名故其說經典綜漢宋兩家融會而貫通之晚悔攷據之無益謂其競尙攻擊務求勝人多至無所忌憚每見後進必勸以讀有宋諸子江淮髦俊遊其門者成就甚多著有儉德堂易說說文蒙求說文諧聲譜唐藩鎮名氏年表後漢職官考後漢郡國職官表通鑑校勘記班許水道類記文選小學漢魏音補輯意林補讀史隨筆詩文集

朱一新

朱一新字鼎甫浙江義烏人同治九年舉人官內閣中書光緒二年進士改翰林院庶吉士散館授編修十一年充湖北鄉試副考官轉陝西監察御史十二年上遇災修省疏劾及內侍懿旨詰責降主事告歸二十年卒年四十九二十三年以學政惲彥彬奏奉旨賞加五品銜一新生而穎異四歲與羣兒戲慮有傾跌者輒趨掖之長嗜濂洛關閩之學務通經以致用學政徐樹銘亟賞之鄉試受知劉有銘李文田官翰林時與袁昶朱采黃國瑾相友善嘗偕諸友游西山遇雨感疾狂言所語皆民窮財盡不力求振作非祇外患必有內憂而尤以俄爲慮聞者咸慨

其忠義憤發法蘭西窺越南上疏請擊之嘗畫海防策謂宜分北洋爲一軍江浙爲一軍閩粵爲一軍治水師扼險要儲將才精器械興團練開餉源而歸本於求實是而勵人才時論壯之及遷臺諫數上封事侃侃直陳惟論是非不計利害歸後兩廣總督張之洞延主廣雅書院講席院中額取兩廣生監百名分齋肄業一新設院規先讀書而後考藝重實行而屏華士仿古顛蒙之學分經史理文四者延四分校主之諸生人賦以冊記質疑問難以次答焉成就甚衆因輯其講學之詞成無邪室答問五卷其論學術謂近世漢與宋分文與學分道與藝分豈知聖門設教但有本末先後之殊初無文行與學術治術之別又以道咸以來士夫好講西漢公羊之學流弊至於蔑古荒經因反覆論難以正其失謂公羊家多非常可怪之論西漢大師自有所受要非心知其意鮮不以爲悖理傷教故爲此學者稍不謹慎流弊滋多近儒惟陳立深明家法不過爲穿鑿餘多蔓衍支離不可究詰凡羣經略與公羊相類者無不旁通而曲暢之卽絕不相類者亦無不鍛鍊而傅合之憑臆妄造以誣聖人二千年來經學之厄蓋未有甚於此者至其論西學西教新疆鐵路吉林兵防等數十條尤爲學識通達論日本民情浮動而狡悍好

勝與西俗同故西人之親中國不如其親日第日之患俄則視中國尤甚俄既得庫頁島勾結蝦夷爲居高臨下之勢則日之陸路可危以海參崴爲泊舟之地直指長崎一帆可達則日之水路可危故俄之經營海參崴中國之憂亦日人之患也乃不思脣齒輔車之至計轉爲遠交近攻之狡謀螳螂捕蟬黃雀在後愚亦甚矣彼惟刻不忘俄故竭力要結西人欲爲連橫之計其變服色易徽號皆所以媚西人耳抑知天下惟壤地相接者利害相同日處東海不能爲歐洲輕重歐美諸國惟利是視若有事時欲如英法之救土耳其豈可得哉雖然當今時勢旣不能閉關自治則交鄰之道固不能不講求日之交鄰雖云下策差愈於無策耳時中日之釁未兆論者歎其見之遠又著有奏疏一卷詩古文詞雜著八卷京師坊巷志四卷漢書管見四卷德慶州志東三省內外蒙古地圖考證

清史列傳 卷七十

文苑傳一

魏禧 兄際瑞 弟禮 禮子世倣 世儼 李騰蛟 邱維屏 曾燦 林時益 梁份

魏禧字冰叔江西寧都人父兆鳳明諸生甲申之變兆鳳號哭竟日不食匿迹山中翦髮爲頭陀隱居金精之翠微峰是冬筮離之乾遂名其堂爲易堂年四十卒禧兒時不樂嬉戲嗜古論史斬斬見識議年十一補縣學生甲申後日哭臨縣庭與兄際瑞弟禮及南昌彭士望林時益同邑李騰蛟邱維屏彭任曾燦等九人爲易堂學皆躬耕自食切劘讀書而三魏之名遂徧海內禧束身砥行才學尤高門前有池顏其居曰勺庭學者稱勺庭先生禧爲人形幹修頤目光射人少善病參朮不去口性秉仁厚寬以接物不記人之過與人以誠雖受欺怡如也然多奇氣論事每縱橫排募倒注不窮事會盤錯指畫灼有經緯思患豫防見幾於蚤懸策而後驗者十常八九方流賊之熾也承平久人不知兵且謂寇遠猝難及禧獨憂之移家山中山距城四十里四面削起百餘丈中徑圻自山根至頂若斧劈然緣

坼鑿磴道梯而登因置閘爲守望士友稍稍依之後數年寧都被寇翠微峰獨完喜讀史尤好左氏傳及蘇洵文其爲文凌厲雄傑遇忠孝節烈事則益感激摹畫淋漓年四十乃出游涉江踰淮於蘇州交徐枋金俊明杭州交汪胤乍浦交李天植常熟交顧祖禹常州交惲日初楊瑀方外交藥地槁木皆遺民也當是時南豐謝文洊講學程山星子宋之盛講學警山弟子著錄者皆數十百人與易堂相應和論者謂西江自歐陽鄒魏宗陽明講性學陳艾依復社工帖括其聲力氣燄皆足動一時易堂獨以古人實學爲歸而風氣之振由禧爲之領袖僧無可嘗至山中歎曰易堂真氣天下無兩矣無可明檢討方以智也友人亡其孤不能自存禧撫教安業之凡戚友有難進之言或處人骨肉間禧批卻導窅一言輒解其紛或訝之禧曰吾每遇難言事必積誠累時待其精神與相貫注夫然後言康熙十七年詔舉博學鴻儒禧以疾辭有司催就道不得已昇疾至南昌就醫巡撫昇驗之禧蒙被臥稱疾篤乃放歸後二年赴揚州卒於儀徵年五十七妻謝氏絕食十三日以身殉著有古文集二十二卷日錄三卷詩八卷左傳經世十卷 際瑞原名祥字善伯禧兄學使侯峒曾見其文亟賞之國變後禧禮並謝諸生際瑞歎曰吾

爲長子祖宗祠墓父母尸饗將誰責乎遂出就試順治十七年歲貢生寧都民亂
贛軍進討索饒於山砦際瑞身冒險阻往來任其事屢瀕於死際瑞重信義人以
爲無宿諾之子路翠微峰諸隱君子暨族戚倚際瑞爲安危者三十餘年康熙十
六年滇將韓大任踞贛當事議撫之久未就大任曰非魏際瑞爲安危者三十餘年
瑞館總鎮哲爾肯所遂遣之家人泣勸毋往際瑞曰此鄉邦宗族所關也吾不行
恐禍及行而無成吾自當之遂往甫入營官兵遽從東路急攻大任疑賣已謂際
瑞曰先生將爲賈林乎抑酈食其也際瑞無以應因拘留之八月大任變計走降
閩拔營之日際瑞遂遇害年五十八子世傑殉焉際瑞篤治古文喜漆園太史公
書著有文集十卷五雜俎五卷 禮字和公禧弟少魯鈍受業於禧禧嘗笞詈之
禮弗憾曰兄固愛弟也禧喜過望方九歲父將析產持一田券躊躇曰與祥則禮
損矣奈何禮適在旁應聲曰任損我毋損伯兄父笑曰是固魯鈍者耶禮寡言急
然諾喜任難事以鬱鬱不得志乃益事遠遊足跡徧天下所至必交其賢豪物色
窮巖遺佚之士年五十倦遊返於翠微左幹之巔構屋五楹是時伯叔踵逝石閣
勺庭久虛無人諸子各散處不復居易堂禮獨身率妻子居十七年未他徙卒年

六十六著有詩文集十六卷子世儼世儼 世儼字昭士生二十餘月母口授九歌輒能成誦稍長從仲父禧讀殫意著述性狷急勇於事禧嘗謂其文一如其人鋒銳所及往往有沒羽之力以多病不應試徧游燕楚吳越一至嶺南適王士禎使粵見所作願折節與交著有耕廡文稿十卷 世儼字敬士善病如其兄然不廢翰墨與從兄世傑及兄世儻時稱小三魏著有爲谷文稿八卷 李騰蛟字咸齋亦寧都人諸生於易堂中年最長諸子皆兄事之嚴敬無敢數後居三巘峯以經學教授著周易臚言年六十卒 邱維屏字邦士亦寧都人三魏姊婿也明諸生督學侯峒曾奇賞之再試皆第一爲人高簡率穆讀書多玄悟所爲古文爲易堂諸人所推禧嘗從之學晚爲曆數易學及泰西算法僧無可與布算退語人曰此神人也彭士望與維屏交三十餘年未嘗見其毀一人然維屏獨推服禧嘗貽禧書曰拒諫飾非者大惡也不拒諫而嘗自拒諫不飾非而嘗自飾非尤惡之惡也足下敢於自信自處有故而持之益堅拒諫飾非蓋有如此者禧得之痛服維屏教授弟子手批口講日夜不輟業康熙十八年卒年六十六垂歿示子曰食有菜飯穿可補衣無譎戾行堪句讀師士望服其言著有周易剽說十二卷松下集

十二卷邦士文集十八卷 曾燦字青藜亦寧都人明給事中應遴仲子歲乙酉楊廷麟竭力保南贛應遴以閩嶠山澤間有衆十萬命燦往撫之既行而應遴病卒贛亦破乃解散尋祝髮爲僧遊閩浙兩廣間大母及母念燦成疾乃歸寧都以大母命受室築六松草堂躬耕不出者數年後僑居吳下二十餘年客游燕市以卒著有六松堂文集西庵草堂詩集 林時益本明宗室名議霽字確齋江西南昌人彭士望同里兩人謀居士望與魏禧一見定交極言金精諸山可爲嶺北耕種處乃攜家偕士望往僑居十餘年與魏氏昆弟相講習康熙七年詔明故宗室子孫衆多竄伏山林者還田廬復姓氏時益久客寧都弗樂歸卜居冠石結廬備田非其力不食冠石宜茶時益以意製之香味擬陽羨所謂林茶者也晚好禪悅著有冠石詩集五卷確齋文集 梁份字質人江西南豐人少從彭士望魏禧遊講經世之學工古文辭嘗隻身遊萬里西盡武威張掖南極黔滇徧歷燕趙秦晉齊魏之墟覽山川形勢訪古今成敗得失遐荒軼事一發之於文方苞王源皆重之其論山海關謂關自明洪武間始設隋置臨渝於西唐爲榆關東北古長城燕秦所築距關遠皆不足輕重金之伐遼自取遷民始李自成席卷神京敗石河而

失之天之廢興人之成敗而決於山海一隅荒榛千百世之上而偏重於三百年間天下定則山海安山海困則天下舉困其安危之重如此生平以未游山海爲憾爲人樸摯強毅守窮約至老不少挫卒年八十九著有懷葛堂文集十五卷西陲今略八卷

顧柔謙 子祖禹

顧柔謙字剛中江蘇無錫人遷常熟幼時家難蠶起資產皆盡嘗同兄出門遊有數人擁之行行乃擠大澤中母忽心動急呼老僕往跡之得不死補弟子員甲申之變柔謙哀憤往往形諸詩歌讀者悲之不安交遊以父執師事馬士奇而江陰黃毓祺嘉定黃淳耀皆一見定交諸人殉國難柔謙皆設位以哭盡哀柔謙子祖禹見柔謙常閉門默坐或竟日不食祖禹叩頭寬譬柔謙乃曰汝能終身窮餓不思富貴乎祖禹跪應曰能柔謙曰汝能以身爲人机上肉不思報復乎祖禹復應曰能柔謙喜曰吾與汝偕隱耳遂更名隱署其室曰伐檀常夜蹴祖禹曰汝他日得志如舊怨何祖禹曰每憶幼時祖母抱兒置膝上爲言家難及墮大澤中事祖禹不敢忘柔謙曰嘻汝何見之隘吾家數傳以來頗盈盛以祖父之才而竟中折

天也於彼何尤且彼敗我家者曾有勝我乎吾苟有力猶當衣食而覆被之慎無以前事爲念且同室之中寧彼以非禮來吾不可以非禮報汝謹識之著有補韻略六書考定山居贅論 祖禹字復初性沈敏有大畧善著書柔謙精於史學嘗謂明一統志於戰守攻取之要類皆不詳山川條列又復割裂失倫源流不備祖禹承其志撰歷代州域形勢九卷南北直隸十三省一百十四卷川瀆異同六卷天文分野一卷共一百三十卷名曰讀史方輿紀要凡職方廣輿諸書承譌襲謬皆爲駁正詳於山川險易及古今戰守成敗之蹟而景物名勝皆在所略創稿時年二十九及成書年五十矣寧都魏禧見之歎曰此數千百年所絕無僅有之書也其論最偉且篤者有二一以爲天下之形勝視乎建都故邊與腹無定所有此爲要害彼爲散地此爲散地彼爲要害者一以爲有根本之地有起事之地立本者必審天下之勢而起事者不擇地蓋深思遠識有在於言語文字之外其傾倒如此世以其書與梅文鼎曆算全書李清南北史合鈔稱三大奇書然李書實非二者匹也祖禹與禧爲金石交禧客死祖禹經紀其喪徐乾學奉敕修一統志延致祖禹將薦起之力辭罷後終於家

周茂蘭 楊无咎 金俊明 葛芝 紀映鍾 冷士喟 王大經 顧有孝

周茂蘭字子佩江蘇吳縣人明吏部主事順昌子年十九補諸生順昌被逮下獄死崇禎初茂蘭刺十指血書疏訟父冤後以疏中有鼎湖勸進字非宜因復刺舌血改書以進卒得白時死難之家皆追封三代茂蘭力也順昌忠清絕世無宦產遺子女八人茂蘭轉側閭巷間次第婚嫁並爲順昌營賜塋起特祠奉母吳尤盡孝以憂勞毀瘠成痼疾後遇異僧授導引術疾乃瘳國變後杜門不出有詔纂修明史大吏薦茂蘭辭弗就晚歲喜靜坐及讀先儒語錄尤邃於易間及二氏書與里中耆逸方外揮麈清游灑然自得是時天童三峯兩家聚訟不解青原南岳又有派數多寡之爭茂蘭以調人爲之騎郵不辭勞攘湯斌撫吳式廬就見固請應賓筵講鄉約爲國人矜式茂蘭力辭彭定求嘗謁之茂蘭勉以循禮尙恥定求爲悚然康熙二十五年卒年八十二卒前數日謂子靖曰生平無不可對人言者差可見先人於地下將屬纊復自語曰今日方閒良久乃歿著有參同契衍義靖字敕寧諸生博學工書法受業於陸隴其之門講求身心性命之理能傳其家學著有篆隸考異八卷 楊无咎字震百亦吳縣人父廷樞明末殉難蘆墟无咎年十

二痛未從死杜門隱居七十餘年與徐枋朱用純相友善三人者並以先人死忠乃益用名節相砥礪時稱吳中三高士无咎幼穎慧覃思經學多前人所未發工書法嗜鼓琴自遭大故絕不復鼓生平著述甚富然隨手散佚徐枋臨歿時招无咎至命五歲孫出拜曰此亡兒文止遺腹子也兒向辱先生教不幸早卒今余且死念非先生無可託者願以此累先生其爲枋信重如此无咎卒年八十九著有譚經錄三易卦位圖說小宛集又有示後管窺諸錄論世唐風諸選繼妻張工詩詞十歲作采蓮賦爲通人所稱與无咎窮居偕隱日手經史教二子著有花樵集十餘卷 金俊明原名袞字孝章亦吳縣人明諸生少隨父官寧夏往來燕趙間以任俠自喜諸邊帥爭欲延至幕府不就既歸里折節讀書自經史子傳以至天文水利諸書靡不研究著名復社中嘗赴鄉試以焦氏易筮得蠱之艮愀然曰天豈欲我高尚其志乎遂不赴試國變後棄諸生杜門傭書自給不復出工詩古文善書畫小楷師曹娥碑草書師聖教序四方士大夫以詩文及書來請者相次不絕晚益自名一家三吳碑版多出俊明筆喜畫樹石尤工墨梅時擬之鄭思肖蘭嘗寫陶詩及畫梅寄王士禎兄弟士禎甚寶之世稱三絕天性孝友修行純潔平

居繕錄經籍祕本及交游文稿凡數百種居喪手書孝經數百本以示人有學使慕其名欲招致之不可得歎曰清真絕俗雖古之沈冥不過也與汪琬交莫逆琬嘗謂其激昂奇偉之材與傲兀不平之氣不得已寓諸書畫間云卒年七十四著有春草閒房集退量彙闡幽錄康濟譜 葛芝原名雲芝字瑞五江蘇崑山人明諸生少鏃礪名行於書無所不窺工古文辭九歲時聞周順昌罹璫禍吳氓擊殺緹騎垂涕曰更益我數歲庸詎不能相從於難乎時婁東二張負天下望芝爲南張壻西張高第弟子名重一時既遭國變棄諸生潛心求道一以姚江爲宗焚香危坐閉戶謝客渡浙江入石浪山訪沈國模史孝咸講性命之學久之忽豁悟因徧叩同學復以所得質之孝咸孝咸復書謂既瞥地證入猶當造純一不已之域芝入山瞑坐逾十旬時攜婦張於林下從容笑言婦亦知玄學夫婦之間自相師友閤閤如也其論學謂心本無欲欲者非心又謂利欲不能攻得喪不能撼生死不能易舉天下之物莫能役之其學定也又謂情出於性而害性者必情猶之火生於木而害木者必火嘗取謝康樂詩語名其軒曰雙寂謂張子房之借箸房元齡之善謀謝安石之圍棋賭墅劉穆之之五官並用孟珙之軍中讀易皆得之寂

論者謂其頗雜於禪著臥龍山人集十四卷容膝居雜錄六卷 紀映鍾字伯紫江蘇上元人明諸生崇禎時張溥楊廷樞張采周鍾等舉復社四方雲集響應江南既人文薈萃映鍾尤喜結納衆推映鍾及江寧顧夢游爲職志夢游早歿映鍾獨領袖羣英國變後棄諸生躬耕養母自稱鍾山遺老少與龔鼎孳友善鼎孳既貴招至京下榻焉寓京十稔此外未嘗輕投一刺尤負詩名泰州鄧漢儀稱其詩宗唐人惟其讀史十年故下筆嶄然獨與人異及卒友人爲文祭之有依隱玩世壯語高姿達官訪以當世之務名士題以風流之師時以爲實錄所著有真冷堂集補石倉集槩堂詩鈔 冷士帽字又湄江蘇丹徒人諸生兄曦福王時以參將守曲阿死士帽遂絕意進取以圖書詩史自娛終身不入城市古詩宗漢魏近體祖初盛晚年刻意學杜多激壯之音爲文章數千言立就博辨條達自成一家家本素封多藏書經亂後遂貧以授徒自給結江冷閣著書其中與同志張自烈魏禧魏禮宗元豫盛遠文點相贈答嘗北渡淮南泛洞庭過大庾嶺入會稽窮覽名勝所至輒紀以詩盡罄其貲而歸大學士張玉書過訪之不報謁及還朝招之不去或勸之仕士帽曰吾仕無害於義然不欲負初心也生平篤友誼文點嘗以先

世手澤湮滅爲憾士喟慨然以所存温州待詔三橋湖州三世墨蹟贈之皆世所罕覩晚歲家益貧無子寄居焦山僧舍四方求詩文者甚衆卒年八十餘著有江冷閣詩集十四卷文集四卷續集二卷王大經字倫表江蘇東臺人家貧年二十始肆力於學通六經子史百家言爲古文有奇氣當明末時以布衣談天下事多奇中國變後授徒養親不復出康熙間御史魏雙鳳見其文曰當世軼才也薦之朝不起會詔舉博學鴻儒太僕卿郝浴將薦之力辭乃已其學以濂洛爲宗所爲文議論獨出己見不蹈襲前人嘗作許由巢父論謂堯舜巢許皆治亂之聖人有堯舜而養人之欲給人之求使天下安然各得其所欲各遂其所求而天下之亂以治有許由巢父而一無所欲一無所求使天下之貪者廉躁者靜競者讓澹焉各懷一無欲無求之意以去泰去甚而天下之亂又以治學堯舜者必先自學巢許始晚築室淘水之東顏曰獨善學者多歸之著有周易釋箋毛詩備考三禮折衷四書逢源錄史論字書正譌醫學集要柳城塾課等書又輯有泰州中十場志十卷重修靖江縣志十八卷多佚不傳惟存獨善堂文集八卷卒年七十二顧有孝字茂倫江蘇吳江人諸生康熙十七年舉博學鴻儒不就居釣雪灘以選

詩爲事唐律及國朝近體詩皆有選本詩雋永不苟作家貧好客賓至輒留有齋菜孟嘗君之日每脫粟對飯欣然一飽而去生平胸無柴棘負海內重望不欲自顯於時所交率高尙士與徐介白俞無殊周安節稱莫逆有孝長身玉立意氣自豪樗蒲博簞窮日夜不休四方過松陵者必停橈相問訊以是名滿大江南北少受業陳子龍之門其沒也夢子龍招之自爲遺令屬門生勿擬私諡親友勿作祭文以頭陀殮輯有唐詩英華所自著有雪灘釣叟集

冒襄 子丹書 歸莊

冒襄字辟疆江蘇如皋人明副貢生少遊董其昌門其昌序其十四歲時詩方之王勃性至孝時流寇縱橫父起宗以吏部郎出歷官副使犯權貴忌抑陷襄陽監軍置必死地襄走京師泣血上書迺得調寶慶於是孝子之名聞天下所與游皆當時雄俊與桐城方以智宜興陳貞慧歸德侯朝宗矜名節持正論品覈執政裁量公卿時稱四公子襄負盛氣高才鸚湧尤能傾動人嘗置酒桃葉渡會東林六君子諸孤酒酣輒狂以悲訶詈奄黨因與諸孤結社金陵相抗馬阮當國憾之黨獄興捕得貞慧幾死襄僅免國變後遂無意用世性喜客家故有水繪園擅池沼

亭館之勝四方名士招致無虛日嘗恣遊大江南北窮覽山水每於歌樓酒壁縱談前代名卿黨逆門戶排擊是非邪正之事以及南都才人學士名倡狎客文酒游宴之歡風流文采映照一時當事屢薦於朝皆不就貞慧子維崧少而才邀至家飲食教誨之以成其名好周三黨之急嘗鬻產兩救凶荒全活無算家遂中落晚年卻掃家居構匿峯廬以圖書自娛年八十猶作擘窠大書體勢益媚人爭寶之康熙三十二年卒著有水繪園詩文集樸巢詩文集又編其師友投贈詩文爲同人集十二卷子丹書 丹書字青若貢生官同知能讀父書祖起宗歿時呼至榻前手勒十字示之曰爾父天生孝子不可不學丹書謹受教庚申秋賊挾利刃突入襄家丹書以身護父身受四創襄得脫人稱至孝著有枕煙堂西堂等集歸莊字元恭江蘇崑山人明諸生太僕寺丞有光曾孫負才使氣善罵人少入復社於書無所不窺古文得有光家法工詩善行草與顧炎武相友善嘗題其齋柱云入其室空空如也問其人囂囂然曰時皆笑之有歸奇顧怪之曰福王時仲兄昭字爾德參史可法幕死揚州叔兄繼登亦爲長興亂民所害崑山破嫂陸氏張氏俱死焉莊父亦尋卒亂定奉母隱居尋兄骨歸葬遂不出嘗作萬古愁曲子瑰

瓌恣肆於古之聖賢君相無不詆訶而獨痛哭於桑海之際爲世所傳誦擬之離騷天問魏禧至吳門莊訪之出所爲文相攻謫禧初以爲狂至是始心折焉崇禎中嘗請於學使改名祚明自是之後或稱歸妹或稱歸乎來表字或稱元功或稱園公懸弓沒後其壻金侃輯其遺詩及文名字一從其舊炎武有贈莊詩云如君節行真古人一門內外惟孤身出營甘旨入奉母崎嶇州里良苦辛莊死哭以詩云弱歲始同游文章相砥礪中年共墨衰出入三江泐悲深宗國墟勇畫澄清計不獲聘良圖斯人竟云逝其見重如此著有恆軒集山居詩

陸圻 弟培 從子繁昭

陸圻字麗京浙江錢塘人少與弟培並有盛名父運昌知江西吉水縣嘗曰圻温良培剛毅他日當各有所立事親孝嘗割股療母病久而知醫居喪執禮人擬之高子皋與陳子龍等爲登樓社世號西冷十子體十子者圻與同里丁澎柴紹炳毛先舒孫治張丹吳百朋沈謙虞黃昊陳廷會也少明敏善思誤書嘗聞韓非子至一從而咸危曰是一徙而成邑也其詩文采組六朝醫方口令觸口悉成儷語性喜成就人門生後輩下至僕隸苟具一善稱之不容口或問卿自比毛先舒吳

任臣如何曰志伊學海稚黃稚宗故當不及遭亂匿海濱尋至越入閩爲浮屠母
趣之歸常賣藥長安市上適湖州莊廷鑑私撰明史以圻名高列之卷首與查繼
佐范驥皆被株連事白歎曰今幸得不死奈何不以餘生學道耶先遁之黃山子
寅徒步入山號泣請歸曰昔者所以歸汝大母在今大母亡矣何所歸以祭墓請
諾之既歸弟堦患心痛留治之八月餘與弟同室臥終不入內既愈遂遊嶺南會
金堡遜迹浮屠南雄知府陸世楷爲營丹崖精舍居之絙鐵鎖上下圻因依焉忽
易道士服遁去遂不知所終或云隱武當山爲道士莫得其詳也子寅既舉進士
釋褐後往來萬里尋數年不得竟以死時稱其孝圻著有從同集威鳳堂集西陵
新語詩禮二編靈蘭堂墨守 堦字梯霞少與兄圻培爲復社之冠稱陸氏三龍
門與陳子龍相友善以經濟文章自任國變後培避兵橫山自經死堦奉母隱於
河渚以佃漁爲食圻每月一歸省歸則牽一舟奉母居其中飲食歡笑以爲樂圻
以史事被逮堦走京師力爲營救旋得釋歸授徒從游者如市同郡貧士僞堦名
投閩中閩士爭闢館舍委贄焉繼知其故堦笑曰彼亦名士以貧故借僕名且安
見僕非僞也浙撫張鵬翮聞堦名構書院於萬松山集十一郡學士讀書其中延

爲師每會赴者千人因輯所講四書錄爲大全六十卷年八十三卒又著有白鳳樓集十四卷 繁昭字拒石培子窮居著書以孝義爲鄉里表率工駢體文年十五作春郊賦辭藻流美筆不停揮伯父圻以爲王筠荀爽遜其敏正平鸚鵡讓其工時陳維崧吳綺皆下世繁昭自許儷語爲海內無雙弟子章藻功等得其講畫多足名家詩豪華精整著有善卷堂詩文集十二卷拒石子二十卷小賦雜著詩續各二卷康熙三十九年卒

柴紹炳 毛先舒 丁澎 沈謙 孫治 吳百朋 陳廷會 虞黃吳 張丹

柴紹炳字虎臣浙江仁和人生而端重甫入塾聞正心誠意之旨欣然若有會及長與同里汪灝應搗謙相切劘自天文輿地樂律典禮農田水利兵制賦役無不涉其崖略明亡棄諸生隱居南屏山以實學開羣蒙著考古類編十二卷尤究心音韻著古韻通八卷同時毛先舒擅長音學紹炳輒掩其疵病先舒無以難也性抗直不能容人過與人辨疑必歸於正雖十往反不憚時有創異說論學於廣坐者紹炳之友陳廷會面斥其非其人愕而反走問門者曰彼豈柴先生耶其爲人敬憚如此教子弟悉本躬行自言有得於曾子省身之學題其居爲省軒痛父

卒於官不及含飯喪將終猶哭泣友人規之曰禮有卒哭謂何答曰謂不設行哭禮耳哀至淚隨豈能忍耶既葬猶時過墓林欷歔見者哀之與兄同居終身不析箸工詩文西冷十子中紹炳名最著嘗與先舒爲十子詩選斟酌論次力追淵雅康熙八年詔舉山林隱逸之士巡撫范承謨將薦之力辭不就踰年卒年五十五他著有省過記年錄家誠明理論各二卷省軒文鈔十卷詩鈔二十卷白石軒雜藁八卷 毛先舒字稚黃亦仁和人初以父命爲諸生改名騃父歿棄諸生不求聞達少奇慧八歲能詩十歲能屬文十八歲著白榆堂詩陳子龍見而奇賞之因師子龍復著有歆景樓詩子龍爲之序又從劉宗周講學文不一格而必本經術常曰文須具根柢根柢無他誠厚虛靜而已矣誠通天心厚養元氣虛則受益靜乃生慧文章本根端在乎是與毛奇齡毛際可齊名時人爲之語曰浙中三毛文中三豪詩音調瀏亮有七子餘風以古學振起西冷天下士翕然稱之柴紹炳嘗謂其詩如伶倫調管氣至音成比竹之能而欲近天籟人以爲中的好談韻學著韻學指歸以爲字有聲有音有韻而韻爲尤要顧韻有六說一穿鼻二轉輔三歛唇四抵齶五直喉六閉口又撰唐韻四聲表詞韻南曲韻大指與柴氏韻通顧氏

韻正相表裏其講學以宋儒爲歸取宋儒習語有裨實行者錄之題曰鍼心類鈔
惟論格物則專言去欲謂欲去則理存所謂閑邪而存誠克己而復禮也康熙二
十七年卒年六十九著有東苑文鈔二卷東苑詩鈔一卷思古堂集四卷匡林二
卷撰書八卷小匡文鈔四卷蕊雲集一卷晚唱一卷格物問答三卷螺峯說錄一
卷聖學真語二卷詩辨坻四卷南唐拾遺書聲韻叢說韻白鸞情集選填詞名解
丁澎字飛濤亦仁和人順治十二年進士官刑部主事調禮部十四年充河南
鄉試副考官洊陞郎中以事謫塞上居五年乃歸澎少有雋才未達時卽名播江
左與仲弟景鴻季弟灤皆以詩名時稱三丁有白燕詩流傳吳下士女多采撫以
書衫袖初官刑部無事日作詩與宋琬施閏章輩稱燕臺七子旣調禮部兼司主
客貢使至譯問主客爲誰廉知爲澎持紫貂銀鼠美玉象犀從吏人易其詩歸國
京師搢紳榮之澎天性愉快不耐披剔染翰伸紙宛爾妍好其詩蓋以自然勝也
及謫渡遼海崎嶇三千里至靖安卜築東岡躬自飯牛與牧豎同臥起一日爨無
煙取蘆粟小米和雪齧之日晡忽聞扣門聲童子喜從隙窺之虎方以尾擊戶澎
吟誦自若所作詩語多忠愛無怨誹意著有扶荔堂集信美堂詩選 沈謙字去

矜亦仁和人少穎慧六歲能辨四聲長益篤學尤好詩古文隱於臨平東鄉嘗謂其友張丹曰居山食貧亦能不改其樂所憾無黔婁之婦穎士之奴聲名藉藉戶外車轍恆滿耳性孝友父歿毀瘠嘔血東鄉盜起焚其堂堂故屬兄既燼割己宅居之兄欲徙謙念兄貧苦僦屋居留以讓兄人以此益重之與柴紹炳毛先舒皆長於韻學紹炳作古韻通先舒作南曲正韻謙作東江詞韻皆爲時所稱詩初喜溫李後乃由盛唐以窺漢魏尤工於詞海鹽彭孫適見謙及董士驥詞俱極推許著有東江草堂集 孫治字宇台亦仁和人諸生與陸圻陳廷會齊名友善人見之者以爲神理都肖宛平梁以樟至武林一見傾契謂人曰若孫子者所謂雲中白鶴邴根矩劉士光之儔也精京氏易及潛虛嘗與圻各占晴雨皆驗人咸異之以著述稱於時四方求文戶外屢滿其文刻意摹古雖質不佻篤於友誼吳百朋宰南和客死治往經紀其喪著有鑒庵集 吳百朋字錦雯浙江錢塘人少奇敏讀書五六行並下操筆爲文數千言立就未嘗起草博物洽聞與徐世臣輩創爲瓊麗奇偉之文天下誦之陸圻目之曰天下經綸徐世臣天下青雲吳錦雯嘗遊寓蘭陵酒徒劍客及弄阮咸撥箜篌者盈座上日解縑袍貰酒酒酣對客揮毫詩

才斐媿兼有氣勢崇禎十五年舉於鄉入國朝久乃謁選兩爲蘇州推官改令南和有異政病歿於官百姓建祠祀之兒童亦疊瓦礫爲小屋祠吳公云所著有樸庵集 陳廷會字際叔亦錢塘人以家貧教授河間性至孝居父喪斷酒肉儻然肯立旦夕哀號聞者爲之酸感營葬發穴得舊棺急掩之曰冥漠君不安卽親靈未安也文筆雅健陸圻以爲典冊類相如尤篤於友誼圻弟培殉難屬以妻子廷會爲教其子繁昭成立 虞黃昊字景明亦錢塘人康熙五年舉人官臨安教諭十歲善屬文嘗薄柳州乞巧更作辭巧文人知其遠到五言古體尤號獨步比於毛先舒 張丹初名綱孫字祖望亦錢塘人與毛先舒陸圻等所稱西泠十子者也丹性淡泊喜遊覽深溪邃谷不避險阻爲詩悲涼沈遠七律義兼比興擅杜甫之長朱彝尊尤賞其五言古體波瀾老成蓋諸子中之傑特者所著有秦亭詩集十二卷

王暉 沈用濟

王暉初名棐字丹麓浙江仁和人諸生性好博覽聚所藏經史子集數萬卷於霞舉堂縱觀之每讀一書必首尾貫穿始放去其所論著終始條貫斐然成一家言

文

苑

傳

卷七十

十一

二

生平好賓客客至典衣命酒士大夫至武林者多與納交當時名士讌集未嘗不在然束身自下悃悞如山中人性至孝事父嚴謹無事必侍左右父命與幼弟析產欲更授一屋以厚適長固卻曰已違古人取少之義敢益多以重戾耶父卒喪葬盡禮走千里徧告當世能文者乞爲志傳成帙曰幽光集晚辟牆東草堂吟獻其中堂內設量書尺每歲積四方投贈詩文於除夕量之準以六尺上下家既落猶喜刻書嘗刻有檀几叢書五十卷所自著有遂生集十二卷今世說八卷霞舉堂集三十五卷雜著十種十卷牆東草堂詞其今世說一仿劉義慶書而成惟載入己事頗乖體例云 沈用濟字方舟浙江錢塘人國子生母柴氏名靜儀工詩善琴著有凝香室詩鈔用濟少承母教家居色養以琴詠相娛及長出游至山東登岱岳又之楚之閩之粵足跡半天下莅廣南與屈大均梁佩蘭定交所詣益進及之關塞留右北平一變燕趙聲至京師安和親王蘊端重之名大噪一時名流幾莫與抗然以詩質同人或譏彈之卽改定不自恡也幼與弟遡泗合刻其詩名荆花集毛先舒陸繁昭深賞之遡泗氣逸體裕進止合度用濟則持格極嚴而饒有思致晚益遁上婦朱氏名柔則亦能詩畫嘗作畫卷系以詩寄用濟用濟卽日

歸一時傳爲美談用濟嘗與成都費錫璜著漢詩說十卷所自著有方舟集貧老無子依參議張廷校終身歿後遺藁廷校爲收弄之

歐陽斌元 陳宏緒 徐世溥 賀貽孫 章懃 陳允衡

歐陽斌元字憲萬江西新建人明諸生幼奇慧讀書十行俱下終身不忘學使蔡懋德侯峒曾俱以國士目之同邑姜曰廣楊廷麟尤相推重廷麟嘗曰斌元奇才博學王景略之流亞也生平師多於友學一藝卽下拜稱弟子好物色異人雖道旁乞人語有得卽叩首同寢食留旬月不舍去嘗道遇道士許雲房雲房仰天歎曰河鼓星曲縮失度朔方當失大將天下自此亂矣斌元異之從受易數又嘗師事西洋人學統及天文日月食測量諸法後與樂平王綱南昌彭士望爲兄弟交講求經濟以學業相砥礪作十交贊謂今日交道將絕我輩交友各以類從我無浚求彼得恰受不苛不濫不亦善乎福王時從呂大器至南京每會以斌元習知典故多令起草授事旋爲大器草疏劾馬士英二十四大罪士英銜之斌元懼禍就史可法募可法甚奇之嘗爲畫守白洋河策可法大歎服在軍中與同臥起疏薦推官士英擯弗用遂歸國變後隱居不出以幽憂卒年四十四斌元爲文能獨

開風氣與陳宏緒徐世溥皆不惑於公安竟陵之說著有文集十二卷 陳宏緒字士業亦新建人明兵部尙書道亨子以任子薦授直隸晉州知州時真定屬邑多被兵閣臣劉宇亮出督師欲移師入晉州宏緒拒不納遂被劾緹騎逮問士民哭闕下頌其保成功得釋謫浙江湖州經歷署長興孝豐二縣事有惠政嘗獻剿撫流寇策謂變起於夷狄者患其驟至而不患其持久變起於內地者患其蔓延而不患其猝發自古禦寇要不外剿撫兩途而剿有剿之方略撫有撫之機權未有僅持空名而遂能妄冀其實效者欲定剿賊方略則必先變主客之情形然後逞志於一擊覘其驍悍所在以全力扼之則餘匪膽落可以徐議招撫矣而招撫之機權則又有前人已驗之實事各因其意向而招徠之行之以漸守之以誠賊不足平也尋免歸入本朝屢薦不起移居章江輯宋遺民錄以見志工古文與徐世溥齊名爲文不務詭奇不假修飾所作西陽藏書鈔本書二記王士禎見之歎曰名下固無虛士也著有士業全集十六卷寒夜錄四卷周易備考四卷詩經解義八卷尙書廣義若干卷 徐世溥字巨源亦新建人明諸生父良彥官宣大巡撫以忤魏闡削籍戍清浪崇禎初起大理卿遷工部侍郎世溥博學能文艾南英

聞其名與約爲兄弟錢謙益姚希孟萬時華輩皆以杓斗推之南贛巡撫潘曾紘得祥符王執儉所修宋史特屬世溥重加更定國變後山居晦迹絕意進取陳名夏柄政欲修徵辟故事作手書遣司理持禮幣往山中致之世溥堅拒不受司理去後盜夜入其室索幣以火炙之遂死世溥才雄氣盛屢試不第以著述自娛著有易繫若干卷夏小正解一卷韻藁一卷榆溪詩鈔二卷逸詩二卷其榆墩集文九卷詩二卷熊人霖選十之一爲刊行 賀貽孫字子翼江西永新人九歲能文稱神童時江右社事方盛貽孫與陳宏緒徐世溥等結社豫章國變後高蹈不出順治七年學使慕其名特列貢榜不就御史筮重光按部至郡欲具疏以博學鴻儒薦書至貽孫愀然曰吾逃世而不能逃名名之累人實甚吾將變姓名而逃焉乃剪髮衣緇結茅深山無復能蹤迹之者初工詩繼撰史論識者擬之蘇軾後又著激書激書者備名物以寄興紀逸事以垂勸援古鑒今錯綜比類言之不足故長言之長言之不足故危悚惕厲沈痛惻怛必暢其所欲言而後已雖自寫其憂患沈鬱之懷抑將以律己者律人激濁揚清爲世運人心勸始自貴因終於空明凡四十一篇晚年家益落布衣蔬食無愠色惟日以著作自娛所著又有易觸詩

觸詩笈掌錄水田居詩文集 章慥字仲實江西南城人明諸生隱居華子岡灌園養母與謝文洊論學有鍼芥之投文洊每心折焉好讀史衡論精審發前人所未發魏禧稱其發微闡幽有功後學著有二十一史童觀集閱史偶談 陳允衡字伯璣江西南昌人父本官御史直聲動天下風采凝峻有山斗之日家東湖避亂寓蕪江杜門窮巷以詩歌自娛與王士禎施閏章交最篤嘗在廣陵論士禎詩譬之昔人云偶然欲書此語士禎以爲得詩文三昧五言清深沖淡似韋蘇州倪元鎮體清羸雙瞳碧色食貧不輕以言干人有引其家伯玉者答曰吾愛吾琴耳因署其堂曰愛琴并以名其詩結屋南州之蘇公亭畔嘯歌自適好表章故人遺書所選婁堅徐世溥古文人競傳之嘗因平湖陸叔度著古人幾部始管夷吾終史天澤雖成大功定大業者咸在而亦有功成身死名立毀至者定是不變無以語權乃更定之錄古之明哲保身者八十一人仍顏爲古人幾部共六卷選魏裔介以下五十餘家詩爲國雅又有詩譔詩慰等書所自著有澄懷閣愛琴館諸集

毛乾乾 李子金

毛乾乾字用九初名惕江西南康人明諸生甲申後絕意進取築室匡廬山講學

其中山中老稚婦女皆稱毛先生而天性純篤言動不苟有志於聖賢身體力行
之學及長毅然以明道爲己任盡焚諸制藝以格物窮理爲主間有與程朱小不
合者人輒疑之乾乾曰理之是非得失雖程朱不嫌質辨非敢有所訾議也豈若
陽儒陰釋者自立門戶故相矛盾乎尤精推數通中西之學謝廷逸訪之以所著
推步全儀爲贄乾乾驚曰古人無此儀器也與之論方圓分體方圓合義方圓衍
數不謀而合遂以女妻之後與廷逸偕隱宜興宣城梅文鼎造門求見乾乾與論
周徑之理方圓相容相變諸率先後天八卦位次不合者文鼎師之乾乾亦謂人
曰文鼎廷逸老人畏友也家貧嘗賣卜中州金陵姑蘇所爲文體格奇古學使至
不能句讀晚年著論孟述未成遂病康熙四十八年卒著有樂述易述大學中庸
述測天偶述推算偶述詩經音韻延陵書院會語語錄詩文集樂述凡三卷六易
彙乃成謝廷逸字野臣江蘇宜興人寄居江都精曆算之學著述甚富多前人所
未發書不傳是以知其名者寡云 李子金原名之鉉以字行河南鹿邑人少聰
穎九歲文理燦然明末李自成寇河南學使改試士於輝縣或徵召名俊七八十
人結大社蘇門山社時觀者如堵主社請進衆弗敢前子金以一寒畯少年獨歷

階上已而文出沈雄華暢一日之間聲動兩河學使拔置柘城諸生甲申後棄去以著述自娛生平負壯志慕崔浩李泌之爲人論古今成敗如指掌其爲學研經鑽史要以適於用者爲極凡奇僻奧邃人所不能通者必冥心孤詣務求其所以然之故尤精算數嘗游京師與客聚飲客問鄭家樓高幾許子金以小尺就地上縱橫量之使一人縋上垂繆於地不差銖黍又嘗渡河睨視水面卽知水深淺與王錫闡梅文鼎游藝揭暄輩以算術相高其所研究經籍之外絲竹博弈無所不好亦無所不工友人田蘭芳嘗譏其玩物喪志子金不以介意也性和易不拘形檢自販夫孺子及富貴家素不相識者有邀之至亦不辭然鄙猥之談未嘗出諸口聞有言人過者卽色變拂衣竟去年八十欲收拾秦漢以來儀文度數以續三禮未成而卒著有律呂心法三卷書慎餘二卷算法通義五卷天弧象限表二卷幾何易簡集四卷秣範三卷閒居五操一卷傳聲譜一卷解環譜一卷周易後天圖說一卷狂夫之言三卷蛩吟錄一卷凡十二種總名曰隱山鄙事其刊行者僅六種

李世熊 薛銘

李世熊字元仲福建寧化人明諸生少豪宕不羈於書無所不窺而獨好屈原韓非韓愈之書每縱論古今興亡儒生出處及江南利害備兵屯田水利諸大要慷慨自負其爲文奇偉悽麗長於推測情變馮之圖謂其得秦文氣多漢文氣少世熊歎爲知言嘗單車走泉州出安海潛視鄭芝龍唐王時黃道周何楷曹學佺以尙志博學薦徵拜翰林博士不赴大兵入閩序應歲貢辭自是杜門不出有齟齬於郡帥者親知逼入郡世熊復書曰天下無官者十九豈盡高士來書謂不出山慮有不測夫死生有命豈遂懸於要津且余年四十八矣諸葛瘁躬之日僅少六年文山盡節之辰已多一歲何能抑情違性重取羞辱哉時蜚語洶洶世熊迄不爲動疑謗亦釋住泉上四十餘年足跡不入州府居恆常戚戚其母謂之曰汝官耶對曰然兒弱冠食餼歲糜朝廷十餘金而無所於用能無媿乎因號曰媿庵辛卯壬辰間建昌潰賊黃希孕過其里有卒摘世熊園中二橘希孕立鞭之駐馬園側視卒盡過乃行粵寇至燔民屋火及世熊園其魁劉大勝遣卒撲救曰奈何壞李公居室故諸鄉落多殘破而其鄉獨完有司以世熊故亦恆薄其鄉人徭賦魏禮嘗謂兒曹曰李先生真萬曆時人非二百餘年承平積厚之氣不產是也嘗詣

江西泛彭蠡登匡廬放浪山水與謝文海甘京彭士望魏禧魏禮游甚相契耿精忠反遣使者敦聘世熊嚴拒之卒得免世熊以文章氣節著一時鄉人宗之有爲不善者曰毋使李先生知也康熙二十五年卒年八十五著有寒支集八卷錢神志二十卷史感物感各一卷本行錄三卷經正錄三卷寧化縣志七卷 薛鎔字子燮福建福清人明侯官諸生崇禎末屢卻徵辟入國朝抱道守節喜綜述忠孝節義舊聞其爲文清幽遒勁長於敘事嘗作道德經跋謂道德經爲大易後一書其道博大難名取之無盡百家衆技所爲源流又謂其書爲百家用者十二三爲吾用者十八九又謂儒者之書爲中人設法故云爲多而神化少老氏之書爲賢智者加鞭故云爲少而神化多其推尊甚至又嘗取楚騷越絕書合訂之謂大泌山人稱吳楚越皆大國採風不及故有騷以補楚之缺有越絕以補吳越之缺余謂離騷古詩之始變也越絕雜說耳謂騷以補風則可謂越絕以補風則不可雖然以屈平之才之忠作越絕書者之隱其姓名有待來世其志皆可哀庶幾類我而恍遇之乎其所寄託如此著有南窗草存六卷南窗草又存十卷存存草十卷草腴二卷筠陽詩集二卷籙書十卷禮經微解十卷先儒語錄鈔十卷

林古度 余懷

林古度字茂之福建福清人寓居江寧工詩少賦搗鼓行爲東海屠隆所知與曹學佺相友善所爲詩清綺婉縟亦復相似後楚人鍾惺譚元春游金陵古度悅之詩格一變舊家華林園側有亭榭池館之美明亡胥化爲車庫馬廐別卜居真珠橋南陋巷窟門貧甚暑無蚊幃冬夜眠敗絮中或遺之帷帳則舉以易米施閨章憐之謂古度曰暑無懨病於寒無氈君能守之當爲計古度笑謂願守之以虎客皆絕倒乃製紵帳書絕句其上屬同志各題一詩以寄之慮其不能守也兒時一萬曆錢終身佩之嘗寓法水寺詩人袁孟逸死厝寄寺旁古度弔之取摺扇畫停棺敗室狀題詩其上以授僧卒爲募葬晚年與王士禎唱和於紅橋平山堂間諸名流咸集古度攜其詩藁屬士禎曰千秋之事一以付子士禎選其辛亥以前詩不入楚音者二卷爲茂之詩選又著有賦一卷年八十七卒 余懷字澹心福建莆田人僑居江寧才情豔逸工詩生明季亂離之際詞多淒麗嘗賦金陵懷古詩王士禎以爲不減劉禹錫與杜濬白夢鼐齊名時號余杜白金陵市語轉爲魚肚白詞藻豔輕俊爲吳偉業龔鼎孳所賞晚隱居吳門徜徉支硎靈巖閒徵歌選曲

有如少年年八十餘矣嘗撰板橋雜記三卷記狹邪事哀感頑豔亦唐人北里志之類又有硯癖蓄硯最多既老分與內外諸孫著硯林一卷後竟以客死著有味外軒文彙研山堂集秋雪詞一卷宮闈小名後錄一卷

杜濬 弟界

杜濬字于皇湖北黃岡人明副貢生少倜儻嘗欲赫然著奇節既不得有所試遂刻意爲詩於並世人獨重宣城沈壽民吳中徐枋避地金陵寓居鷄鳴山之右茅屋數間梁欹棟朽求詩者踵至濬多謝絕功令有排門之役有司注籍優免濬曰是吾所服也躬雜廝輿夜巡綽衆莫能止性廉介不輕受人之惠晚年窮飢自甘王猷定嘗問窮愁何似答曰往日之窮以不舉火爲奇近日之窮以舉火爲奇猷定笑曰所言抑何儻也濬嘗曰吾有絕糧無絕茶嘗舉所用茶之敗葉聚而封之謂之茶邱已而貧益甚往來維揚間遂卒年七十七貧無以葬陳鵬年知江寧府始葬諸蔣山北梅花邨著有變雅堂集弟界 界明諸生亦工詩與濬同避亂金陵方壯喪偶遂不復娶所居木榻敝帷數十年未嘗易每日中不得食兒女嗶號而意色間無幾微不自適後濬七年卒年亦七十七著有香山集

陳恭尹 陳子升 屈紹隆

陳恭尹字元孝廣東順德人明贈兵部尙書邦彥子性聰敏端重幼承父訓習聞忠孝大節邦彥殉國難時恭尹十餘齡無家可歸留閩浙者七年一日有父友遇於途責之曰君先人未葬宗祀無託奈何徒欲以一死塞責絕忠臣後耶恭尹泣而謝之既乃歸葬先人於增城因泛舟出虎門渡銅鼓洋訪故人於海外久之歸與陶窳梁無技就同邑何衡何絳兄弟家抑志讀書相砥礪世稱爲北田五子已復游贛州轉泛洞庭再游金陵至汴梁北渡黃河徘徊太行之下於是南歸戢影田間築室羊城之南以詩文自娛自稱羅浮布衣恭尹修髯偉貌氣局深沈其爲詩真氣盤鬱激昂頓挫足以發幽憂哀怨之思而寓忠孝纏緜之致自言志學以往皆爲憂患之日故於文辭取諸胸臆者爲多又有志當世之務嘗繪九邊圖疏明扼吭晰若毫芒不欲僅以詩傳也年七十一卒著有獨漉堂集新城王士禎趙執信至粵於廣州詩人獨重恭尹其後杭世駿洪亮吉皆於恭尹推挹尤至云

陳子升字喬生廣東南海人明諸生讀書一覽輒成誦幼時應童子試太守顏俊彥賞其文拔之冠一郡稱曰奇童雖世貴而學力刻苦兄子壯明末殉國難子升

以同產竄避艱險萬狀明亡後麥秀黍離之感一發於詩有中洲草堂遺集 屈紹隆字翁山廣東番禺人明諸生遭亂棄去爲浮屠名今釋後返初服更名大均能書善詩嘗讀書祁氏寓山園不下樓者五月久之游吳北走秦隴與李因篤輩爲友又自固原攜妻至代州上谷走馬射生縱博飲酒世嘲笑之不顧也再上京師下吳會泝江寧還粵詩長於山林邊塞五言近體尤工與陳恭尹齊名王士禛亟稱之著有九歌草堂集

李鄴嗣 陳汝登 周容 陳洪綬 彭孫貽

李鄴嗣原名文允以字行浙江鄞縣人明諸生生而風骨不凡年十二三能詩有秀句年十六隨父桐官嶺外通人張孟奇歎異之爲忘年交及長益肆力爲詩古文辭與黃宗羲校覆古文雅鄭而推原於道藝之一又與萬泰徐鳳垣等從清苑梁以樟倡和嘗自言得宗羲而後敢爲文得以樟而後敢爲詩其詩文破除王李鍾譚之窠臼卓然成家鄞人多師事之里中有鑑湖社仿場屋之例糊名易書以鄴嗣爲主考甲乙樓上少長畢集樓下候之一聯被賞多士臚傳如加十賚甲申後父被逮杭州鄴嗣亦驅至定海縛馬廐中七十日甫得脫父喪自杭歸一慟幾

絕後再下府獄得免自是絕意人世酒痕墨蹟多在僧寮野廟中嘗與萬泰救黃宗炎得不死康熙三年南屏之難大帥搜得其與中士薦紳往還筆札欲按籍殺之鄴嗣以奇計使中止其所保護尤多有客以故宮什器求售鄴嗣一見其題識流涕洟瀾其人亦泫然去全祖望嘗謂鄴嗣一身流離國難則宋之謝翱鄭思肖委蛇家禍則晉之王裒唐之甄逢周旋忠義之間則漢之王敞閻子直云所著有漢語南朝語續世說新語漢語不列曹氏一門三語中亦多寓筆削予奪又集甬上耆舊詩爲三十卷人爲之傳搜尋殘帙於布衣孤賤尤所惋結書成立詩人之位祀以少牢聞者爲之軒渠又有果室文鈔六卷詩鈔七卷 陳汝登字山學亦鄞縣人初受業於黃宗羲之門後從萬斯同游篤學工詩文與全祖望交莫逆祖望輯續甬上耆舊詩多汝登讎校性純粹篤友誼遇才士力不瞻者傾筐相助無所吝同里陳坊赤貧輒割十畝所入周之晚年坐是困乏然文酒自娛頽然白髮神明不衰閨門以內畫紙敲鍼至老如一日著有證人講義續證人講錄竹湖日知錄二山老人集 周容字鄧山亦鄞縣人明諸生少卽工詩出入於少陵聖俞放翁之間嘗以詩謁錢謙益謙益稱爲才人錄入吾炙集賦越絕一首以贈之國

難後棄諸生放浪湖山間無日不飲無飲不醉狂歌慟哭雜以詼諧世比之徐渭少爲御史徐心水所賞契心水避亂天童海賊劫之去要質金帛容挺身入賊壘以身質之心水得返而容代受刑酷乘間竊歸自是足爲之蹙因別署蹙翁生平負才使氣足迹徧天下所至皆有詩與鉅鹿楊思聖相友善已而歸里築室數楹爲終老計會有以非意干之者乃復入京師時舉博學鴻儒科朝臣爭欲薦之以死力辭康熙十八年卒於京邸年六十一閩若璩嘗曰鄧山吾家白奪山人之儔而詩過之白奪山人者沛縣閩爾梅也容工書畫書法歐褚畫不拘宗法疏木枯石尤佳所爲文睠睠故國全祖望謂讀其神宗皇帝御書記白尙書古卣記及髮冢銘黍離麥秀之音令人魂斷時稱容畫勝於文詩勝於畫書勝於詩去著有春酒堂詩集十卷文集四卷詩話一卷 陳洪綬字章侯浙江諸暨人工詩善畫與萊陽崔子忠齊名號南陳北崔年四歲就塾婦翁家畫漢前將軍關侯像於壁上長十尺餘翁見之大驚下拜旣長師事劉宗周講性命之學崇禎末入貲爲國子生尋歸里旣遭亂混迹浮屠縱酒自放醉後慟哭不已有求畫者靳不與及酒間召妓卽自索筆墨小夫穉子無弗應也嘗與友期飲西湖遇他舟徑登其席主人

知爲洪綬亟稱其畫大駭竟去其繪事本天縱尤工人物得李公麟法論者謂在仇唐之上詩有逸致爲畫所掩朱彝尊王士禎皆賞之嘗與毛奇齡約某時蕭山相訪以年暮畏死先期至晚亦稱老遲著有寶綸堂集 彭孫貽字仲謀浙江海鹽人明拔貢生天性孝友讀書過日成誦與同邑吳蕃昌創瞻社爲名流所重時稱武原二仲貌魁偉好談諧豪於飲人有長鯨之目生平恥爲齷齪士動以古人自命痛父殉國難蔬食籜冠終身不仕工詩七言律詩效放翁爲王士禎所賞其虔臺寒食怨一篇感劉生之義實抱先人隱痛焉著有甲申亡臣表流寇志方士外紀彭氏舊聞錄五言妙境茗齋集

馮班 兄舒 吳受 宗元鼎

馮班字定遠江蘇常熟人少爲諸生與兄舒齊名連蹇不得志遂棄去發憤讀書工詩其詩沈酣六代出入溫李小杜之間其論詩謂王李死擬盛唐戒不讀唐以後書詩道因是大壞爰窮流溯源自三百篇以下一一考其根柢明其變化又嘗與兄舒評點才調集以國初風氣矯太倉歷城之習競尙宋詩遂藉以排斥江西遵崇崑體又著嚴氏糾謬辨滄浪詩話之非班博雅善持論爲文亦考據精確了

無牽合附會嘗謂韓吏部之文古文也歐公之文祇是今文不如唐人四六尙有古意古語所著鈍吟雜錄十卷凡家誠二卷正俗一卷讀古淺說一卷嚴氏糾謬一卷日記一卷誠子帖一卷遺言一卷通鑑綱目糾謬一卷將死之鳴一卷其論事多達物情論文皆究古法雖間有偏駁而所得爲多性不諧俗意所不可掉臂去胸有所得曼聲長吟旁若無人然當其被酒無聊抑鬱憤悶輒就座中慟哭班行第二時日爲二癡趙執信於近代文章家多所訾警獨折服班一見班所著卽歎爲至論至具朝服下拜嘗謁班墓以私淑門人刺焚於冢前傾倒甚至書四體皆精尤工小楷有晉唐人風致順治十年卒著有馮氏小集鈍吟詩文藁子行賢字補之能詩善書康熙十八年舉博學鴻儒不售歸里卒其詩初學溫李如其父晚乃稍規白傅變綺麗而清真著有餘事集 舒字已蒼幼承父教篤志讀書年四十謝去諸生與弟班並自爲馮氏一家之學吳中稱二馮其學肆力於古含咀經史穿穴百家尤邃於詩賓筵客坐辨論鋒起凡當世所推尙若前後七子悉受掎擊嘉定程嘉燧時日爲詩老而舒塗抹其集幾盡家多藏書皆宋元善本丹黃甲乙手自讎勘構小閣設兩廚各題一銘以寶藏之婁東張溥倡爲復社屢招舒

舒以社名犯父偏諱謝弗往平生抗直遇事敢爲不避權勢小人嫉之如仇明崇禎丁丑邑紳錢謙益瞿式耜爲奸民張漢儒誣訐舒委曲營救漢儒黨陳履謙竄舒名於捕檄中途并逮舒下錦衣獄移刑部訟繫經冬誦讀不輟會漢儒等敗舒乃得釋歸里邑中漕糧諸弊惟舒洞悉其詳思蘇民困順治初屢上書爭之邑令時邑令瞿四達性貪酷憾甚羣小又構釁其間指所選懷舊集爲謗訕曲殺之士林痛焉所著有空居集北征浮海諸詩空居閣雜文二卷炳燭齋文一卷文毅二卷歷代詩紀一百卷又有詩紀匡謬一卷校定玉臺新詠十卷猶子武校而刊之武字寶伯能詩善書著有書法正傳二卷遙擲集十卷 吳安字修齡江蘇崑山人工詩王士禎嘗以善學西崑許之其論詩謂詩之中須有人在趙執信服膺以爲知言所著圍爐詩話七卷有云意喻之米文炊而爲飯詩釀而爲酒飯不變米形酒則變盡又云唐詩有比興其詞婉而微宋詩少比興其詞徑以直又云作詩學古則窒心騁心則違古惟學古人用心之路則有入處閻若璩嘗讀之歎以爲哀梨并翦云 宗元鼎字定九江蘇江都人七歲詠梅爲先達所賞酷嗜梅花堂有古梅一株時人謂之宗郎梅性狷介釜甑屢空未嘗以貧告人父母歿後事庶

母盡子職鄉里誦其孝所居荒僻高亢不宜秔稻元鼎課老僕樹黍秣力耕而食客至始一出柴門地多柳龔鼎孳榜曰新柳堂後隱於東原在城東數十里宜陵之南仍名其堂曰新柳堂後有芙蓉別業相傳爲謝安石舊址一時前輩如周亮工曹溶王士祿兄弟鄒祇謨等重其才名不惜千里命駕式其廬皆歎爲南陽高士宗氏少文敬徵復生時學詩者或尙七子或尙鍾譚元鼎詩以風調爲主少宗晚唐中年仰攀初盛風格一變王士禎嘗曰今日善學才調集者無如元鼎古文詩餘亦工康熙十八年貢太學部考第一銓注州同知未仕卒所著有新柳堂詩集數十卷芙蓉集二十卷小香詞二卷元鼎與從弟元豫元觀從子之瑾之瑜時稱廣陵五宗元豫有史論雜文數十卷元觀及之瑾之瑜皆工詩

任元祥 畫以寧 鄒祇謨

任元祥字王谷江蘇宜興人明諸生工詩古文辭與陳維崧侯方域相友善嘗規陳維崧倉猝取辦有才無情好何李雲間而不知宗杜又規侯方域師杜五言古而不知有漢魏時以爲確論文初學六朝一變入韓歐再變浸淫漢氏熟於明制所著制科職官制祿漕運賦役制錢等議皆能指其得失嘗與魏禧遇於毘陵元

祥貌朴魯對人訥訥禧意輕之及觀其文乃大驚語人曰彼神明內蘊致工也予則瞠乎其後矣又嘗與湯士錡講陽明之學以爲顏之卓爾孟之躍如周子之無極程子之天理王子之良知其歸一也性孝友持身嚴肅言動不苟建宗祠定宗法族人世世遵之著有鳴鶴堂詩集十一卷文集十卷歿後貧不能付梓妻黃蠶績刺繡十餘年傾其貲爲刻詩十卷時稱賢婦焉 董以寧字文友江蘇武進人諸生少明敏爲古文詩歌數十萬言尤工填詞以是聲譽蔚然同里結國儀社其啟札皆以寧爲之與鄒祇謨齊名時稱鄒董又與陳維崧及祇謨有才子之目今所傳國儀集皆以寧少作也性豪邁慷慨不可一世喜交游急然諾纏綿婉篤比於膠漆魏裔介未一識以寧面而傾倒欲絕以寧於曆象樂律方輿之指多所發明晚年棄詞章之學專肆力於經於易闡錯綜之妙於春秋則欲參三傳別爲一書執經弟子恆數百人其學蓋與任元祥相埒云著有正誼堂集蓉渡詞 鄒祇謨字訐士亦武進人順治十五年進士性穎特過目不忘自經籍子史及天文百家之書古今人爵里姓氏世次年譜靡不悉記性至孝母教之極嚴卽以讀書娛其母與人真摯交久不忘妙於言語小詞單文令人色飛神豔古文辭與陳維崧

董以寧黃永稱毘陵四子嘗見寧都三魏文歎曰今乃有如是文乎逢人輒稱道海內知有三魏者實自祇謨始也王士禎在揚州祇謨與撰倚聲集以繼卓珂月徐野君詞綜之後著有遠志齋集麗農詞永字雲孫亦武進人順治十二年進士官至刑部員外郎

谷應泰

谷應泰字賡虞直隸豐潤人聰敏能強記少工制舉文及長肆力經史於書無所不窺順治四年進士改戶部主事尋遷員外郎授浙江提學僉事校士勤明所拔多一時名俊陸隴其其尤粹者也杭州擅湖山之勝應泰衡校之暇輒登臨眺覽創書舍爲遊息地旣去官浙人懷之爲修葺勿置應泰嗜博覽思采集有明一代典章事實購得山陰張岱石匱藏書用袁樞通鑑紀事本末例爲明史紀事本末八十卷時明史未經欽定靡所折衷如紀惠帝遜國歷載黔滇遊蹟懿安后死節而以爲青衣步入成國公第皆不免沿野史傳聞之誤然排比次序首尾秩然每篇論斷倣晉書體以駢偶成文遣詞隸事曲折詳盡取材博而用力勤論者多躋之又著有築益堂集

竇遴奇 井在 米漢雯

竇遴奇字德邁直隸大名人順治三年進士改戶部主事擢郎中出爲江南潁壽道僉事遷徽寧廣德道以疾歸卒年五十四遴奇和易坦直經緯大政不露崖岸初以戶曹督饒上谷旋權蕪湖關董理漕政所至清白自持務除積弊治江南清盜藪誅豪強風紀肅然與人洞傾底裏無妄言人多服其誠工詩劉體仁謂其古體樸雅近體簡遠其至處往往與元次山抗行歸後益肆力於風雅著有倚雉堂集十二卷 井在字存士順天文安人順治十六年進士官山西興縣知縣初任平陽司李精敏獨任決獄多平反疑案不可究詰者務寬期以致正兇不急於鍛鍊人人罪嘗謂急之則彌縫益密緩之則洩漏可期及令永安值李唐宗與劉盡忠謀逆事覺率鄉勇直搗其巢斬之南嶺平再遷興縣緣事罷歸日以詩文自娛著有天文纂要八卷鐵潭詩集六卷文集二卷合河署詩集一卷講約六諭解一卷麓潭集四卷 米漢雯字紫來順天宛平人順治十八年進士歷知河南長葛江西建昌等縣康熙十八年召試博學鴻儒授翰林院編修二十年充雲南鄉試正考官以事削籍旋供奉內廷擢侍講賜第西華門尋卒漢雯爲明太僕寺卿萬

鍾孫王崇簡之壻性放浪不羈多技藝金石篆刻靡不精妙家蓄古硯太僕物也嘗渡江沈於水遣沒人求之勿得將解纜忽紅霞起水面光燭天舟人索之硯隨手出焉工詩所交遊皆海內知名士新城王士禎與友善時有唱和書畫頗得家法徑寸大字尤勁媚或評之曰紫來天才造詣當在友石先生之上時呼小米其詩名蓋爲書畫所掩著有漫園詩集始存集

楊思聖 申涵光 殷岳 張蓋

楊思聖字猶龍直隸鉅鹿人順治三年進士改翰林院庶吉士散館授編修六年充會試同考官歷官至侍讀學士尋授山西按察使擢河南布政使調四川思聖天材雋妙幼有神童之目與申涵光殷岳讀書廣羊山中工詩擅晉人書法官翰林時世祖召詞臣能書者面給筆札思聖所書縑幅獨稱旨賞賚甚厚嗣陳臬山右屢決大獄遷豫治蜀均以廉潔稱時蜀方新造土荒不治又連年用兵歲權不滿三千緡思聖悉心綜理首募開荒增額至數萬次招外商平劑物價四方擔負日集蜀境漸復凡四載入覲拜袍服之賜旣欲自投劾歸巡撫羈留之遂病行抵軹關卒思聖於詩挾唐賢之精髓明人中獨喜李空同何大復涵光稱其俊音亮

節上宗老杜近比信陽魏裔介作五君詠首推思聖及蔚州魏象樞時稱楊魏生平鑑別人倫接引寒素有若飢渴疾亟殷岳爲延太原傅山治之冒暑五晝夜走千里及至而思聖已沒其得士心如此著有且亭詩集 申涵光字和孟直隸永年人明太僕寺丞佳允子少穎異博涉經史爲文章高潔宕逸尤長於詩聞父殉國難痛不欲生徒步走都門於搶攘中扶柩歸里郡人爲之感動順治間世祖詔訪故明死事諸臣或誤列佳允爲自縊涵光復麻衣經帶入京師具述投井狀遂蒙特恩諭祭賜墓田予諡端愍輦下士大夫高涵光孝行爭折節訂交旣歸則杜門奉母足跡絕於城市自髻齡嗜爲詩吐納百氏不名一家而音節頓挫沈鬱一以少陵爲師早與楊思聖殷岳爲石友後又與岳及同里張蓋稱畿南三才子里居十餘年乃襆被出遊陟泰山過歷下登李攀龍白雪樓復訪楊思聖於太原旣而偕殷岳謁孫奇逢於夏峯執弟子禮自是獲聞天人性命之旨不復作詩康熙七年詔徵山林隱逸之士大學士魏裔介欲薦之力辭乃止涵光玩味諸先儒之書不釋手嘗曰主靜不如主敬敬自靜也又曰求放心只是敬又曰士人要有岸然自命之氣又有欲然若不足之心皆格言也晚年學益進悔名之爲累也蓬蒿

滿徑長吏式廬者遜避不出卒年五十九著有聰山集十四卷弟涵盼亦以文學有聲 殷岳字伯巖直隸雞澤人父太白明陝西副使爲楊嗣昌誣陷下獄岳走京師上書訟冤而父遽卒乃乞遺骸歸順治初除江蘇睢寧知縣騎驢之任申涵光移書勸之歸岳慨然曰吾豈以一官易我友遂罷歸仍騎驢還不持一錢曰恐無以見吾故人也所居鄉曰小砦茅屋三楹幽廊曲檻與涵光唱和相樂後南遊福州客死年六十八其爲詩自魏晉以下屏不觀所作惟古體莽莽然肖其爲人有留耕草堂詩一卷 張蓋字覆輿直隸永年人明諸生少敦氣節以能詩聞兼工草書甲申後得狂疾築土室村外閉戶絕人跡穴而進食歲時一出拜母雖妻子不見也飲酒醉輒痛哭惟申涵光殷岳至則延之入土室談甚洽其爲詩哀憤過情恆自毀其藁久之狂益甚竟死涵光輯其遺詩得百篇其五言尤高簡在右丞左司之間

宋琬 曹爾堪

宋琬字玉叔山東萊陽人父應亨明天啟中進士官直隸清豐縣知縣有惠政罷歸崇禎十六年殉節萊陽贈太僕寺卿琬少負雋才著聲譽順治四年進士授戶

部主事七年監督蕪湖鈔關潔己卹商稅額仍溢累遷吏部郎中十年授陝西隴西道十一年道出清豐縣民扶老攜幼遮邀至所建應亨祠下追述往績相持泣戀琬益自刻勵期不墜先緒適秦州地震加意撫卹生全者無算十四年遷直隸永平道十七年調浙江寧紹台道十八年擢按察使時登州于七爲亂琬同族子因宿憾思陷琬遂以與聞逆謀告變立逮下獄闔門縲繫者三載緣坐中有需外訊下督撫治之巡撫蔣國柱鞠得誣狀上聞頗與部讞牴牾悟命覆質得申雪康熙三年冬得旨免罪放歸流寓江南寄孥泖上往來秦淮鍾阜陟金焦攬武林山水以自適十年有詔起用復來京師琬始官吏曹與給事中嚴沆部郎施閏章丁澎輩相唱和有燕臺七子之目旣出任外臺猝罹无妄凡所遭豐瘁一發之於詩王士禎點定其安雅堂集爲三十卷十一年授四川按察使十二年入覲值吳三桂叛成都陷琬家屬皆在蜀聞變驚惋遂以疾卒年六十所爲詩零落略盡越二十餘年族孫邦憲僅綴輯爲拾遺六卷琬詩格合聲諧明靚溫潤撫時觸緒類多淒清激宕之調而境事旣極亦復不戾於和平王士禎嘗舉施閏章相況目爲南施北宋云 曹爾堪字子顧浙江嘉善人順治九年進士改翰林院庶吉士散館授

編修遷侍讀陞侍講學士以事罷歸爾堪淹博強記多識掌故所過山川阨塞無不指畫形勢與之遊無貴賤俱能識其家世積久不忘人比之虞世南行祕書李守素人物志嘗扈瀛臺南苑受詔與吳偉業同注唐詩書成得旨嘉許工詩在京師時與宋琬沈荃王士禎施閏章相唱和士禎嘗薈其詩並王士禎汪琬程可則詩刻之稱海內八家罷官後優游田園閒爲遠遊篇什益富爲詩清麗可諷尤侗謂爾堪兄弟人目爲雲祢王謝風貌阮何卒年六十三著有南谿文畧二十卷詞畧二卷杜鵑亭藁

施閏章 高詠

施閏章字尙白安徽宣城人祖鴻猷以儒學著世紹其業孝友雍睦江南言家法者推施氏閏章少失怙恃鞠於祖母侍祖母孝事叔父譽如父譽怒必跪解之俟色霽乃起里徵士沈壽民有聲當世閏章從之遊遂博綜羣籍善詩古文辭順治六年成進士授刑部主事歷員外郎引經斷獄期於平允尋以試高等充山東學政取士必先行而後文崇雅黜華有冰鑒之譽秩滿遷江西參議分守湖西道所轄吉臨袁三府故殘破歲凶瘠致盜閏章徧歷巖谷問拊循帖然人呼爲施佛子

嘗作彈子嶺大阮歎竹源阮等篇告諸長吏讀者皆曰今之元結也俗多溺女復作歌勸誘捐資收養全活無算遇事爬梳薶櫛不以爲勞尤崇獎風教於袁重建昌黎書院於吉葺白鷺書院課諸生屢會講青原山從者至千百人臨江城圯築輒潰閨章禱於神越日城成新淦峽江患虎製文祝之俄有虎自墜深塹迄無害歲旱徒跣號籟雨大浹新淦人或闚牆適閨章講學其地聞孝弟忠信禮讓之言兄弟相持哭詣階下服罪其誠感如此康熙六年以裁缺歸民留之不得咸醵金創龍岡書院祝瓣香焉初閨章駐臨江江環城下民過之每歎曰是江如使君清因改名使君江及是去職傾城送江上會水漲所乘舟爲御史贈輕不能渡民爭買石膏載之已渡乏食乃鬻其舟十八年召試博學鴻儒列二等四名授翰林院侍講纂修明史覈同異析是非無所回枉二十年充河南鄉試正考官二十二年轉侍讀尋病卒年六十六閨章之學以體仁爲本磨礪砥礪歷寒暑靡間每語所親曰我輩旣知學道自無大戾名教但終日不見己過便絕聖賢之路終日喜言人過便傷天地之和平生廉謹而解推不倦廣置義田以贍宗戚篤窮交好扶掖後進才士矢志多方爲之延達死喪困危振卹備至天下士益歸其門奉爲楷模

文章率原本道義不欲馳騁張皇意樸氣靜守歐曾矩度詩與萊陽宋琬齊名號南施北宋新城王士禎愛閏章五言詩溫柔敦厚得風人之旨而清辭麗句疊見層出別爲摘句圖士禎門人洪昇問詩法於閏章閏章曰爾師如華嚴樓閣彈指卽見余則不然如作室者瓴壁木石一一就平地築起議者以爲確不可易又謂山谷言近世少年不肯深治經史徒取給於詩故致遠則泥此最爲鍼砭詩如其人不可不慎觀其持論卽宗旨可見云著有學餘堂文集二十八卷詩集五十卷端谿硯品一卷試院冰淵一卷矩齋雜記二卷蠖集詩話二卷擬明史七卷青原志畧補輯十二卷閏章與同邑高詠友善據東南詞壇者數十年號曰宣城體高詠字阮懷亦宣城人幼有神童之目祖維岳知湖北興國州清直無長物詠賣書給膏火日夕一編其學無所不窺然秋闈屢蹶年近六十始貢入太學崑山徐乾學奇其才延入家塾康熙十八年舉博學鴻儒召試授翰林院檢討與修明史所撰史彙皆詳慎不苟未幾假歸卒時論謂己未薦舉諸人難進易退立意較然如詠庶可無愧詩近體極澹遠之致歌行優入古人以兼工書畫世稱三絕有遺山堂若巖堂等集

王庭 從兄翊 李明整

王庭字言遠浙江嘉興人少家貧杜門自守日事詩古文順治六年成進士時兩廣初定以三甲除廣州府知府十一年充廣東鄉試同考官遷廣西左江道按察副使移四川川北道布政使擢四川按察使江西右布政使以憂歸服闋補山西右布政使所至以清惠稱嶽嶽不屈居外八年未嘗與京朝官通一函所遷皆極邊卽日單車就道在江西時奏免浮糧數十萬民甚德之年六十一致仕歸後布衣芒屨足跡不入城市至民間利弊所繫則力爭之嘉秀善三邑田賦舊有互嵌聚訟數百載莫能定讞庭爲著嵌田論設十二問答剖晰詳盡人咸折服議遂定優游林下幾三十年以著書明道自任嘗以宋明諸儒互有得失因以己意訂正之著理學辨一卷其意欲掃衆說之轆轤破諸家之門戶然好爲異論兼取陸王世所不許也詩格閒澹不傍古人少與從兄翊相唱和旣歷任凡山川風土廢興治亂之跡友朋離合之感皆見於詩五言清古有陶韋之風與石湖邢昉相伯仲著有秋聞三仕二西漫餘諸草卒年八十七 翊字介人家故業染手古書與布商菜傭相答弱冠偶覽元人詞曲欣然會意曰此無難據案學之竟合調遂工詞

崇禎末詩歸盛行人沿竟陵派翫慨然以起衰自任獨尙唐音旣遭世變多感憤歎咤之作游山陰與陳洪綬友善所居室如斗大抱膝苦吟不問家人生產然好奇計多大言遇知己岸幘抵掌談論不休從弟庭官嶺南翫詣之次贛州被盜詩集雜著皆沒於水抵廣州終夜擁被記憶十不存一復撫拾記聞作詩二百餘首比歸又爲鼠嚙塗次京口卒歿後朱彝尊選鈔一帙庭序而刊之名曰二槐詩存

李明愨亦嘉興人順治元年舉人官福建古田教諭受知於巡撫佟國鼐延掌書記時聞有流民數千入境或疑爲寇欲發兵剿之明愨力白其寃皆得免又土匪事平將檄按閩士之脅從者人情洵懼明愨謂國鼐曰此邦初定猶新國也宜用輕典請廣招徠以安反側國鼐從之於是諸生畢出復業全閩以安後引疾歸以著述終其身工詩文嘗入蘇門山與孫奇逢辨析理學宗傳奇逢推重之著有樂志堂詩集

熊伯龍 劉子壯

熊伯龍字次侯湖北漢陽人原江西進賢籍順治六年一甲二名進士授國史館編修十一年充浙江鄉試正考官十六年奉命提督順天學政累官祭酒侍讀學

士洵陞至內閣學士兼禮部侍郎銜伯龍博學工詩古文詞制義尤精與劉子壯齊名世稱熊劉所爲古文雄渾雅健在陳廷敬張玉書之間詩直抒胸臆五言古體尤有太古之音性謹厚自少至老手一編不置歷官二十年恂恂如諸生不妄交遊不立崖岸易簣時惟以不得澤被生民爲憾著有貽穀堂集集中代言諸作尤樸茂有東京之遺 劉子壯字克猷湖北黃岡人順治六年一甲一名進士授國史館修撰廷對策萬言畧謂二帝三王治本於道道本於心講學爲明心之要修身爲齊家治國平天下之本一時士林傳誦八年充會試同考官尋告歸九年卒年四十四子壯博綜羣籍精制舉文雄厚排鼻凌鑠一切詩古文亦以氣勝九歲失恃每念母輒爲孺子泣遂以岷思名其堂性端恪日晝所爲夜必焚香以告數十年如一日所著有岷思堂集

胡亶

胡亶字保叔浙江仁和人順治六年進士改翰林院庶吉士散館授編修出爲江蘇常鎮道鎮多黠盜每擒治一人輒株連百餘家大吏欲按籍鈎索亶毅然爭曰鼠輩特欲緩須臾死害及無辜庸可信乎使者數至數不與復正色曰殺人媚人

吾不爲也何惜一官爲數百人請命耶卒力白之會海寇犯境直親佩弓韉力保危城惠澤留於江上入爲鴻臚寺卿進右通政以親老乞養歸居官三十年室無妾媵橐無旨蓄世稱清白吏歸後不以寸牘干官府然邑有利弊則竭力爭之事父母以孝聞父患脾疾日夜侍湯藥衣不解帶目不交睫中褻廁牕皆自滌之父卒三日勺水不入口一慟吐血數升遂以哀毀成疾尋亦卒直博綜羣書古文辭亦典雅尤精天官家言日月薄蝕星辰躔度推測毫髮無遺在京師與監中西洋專家反覆辨論羣皆歎服嘗著中星譜一卷推論晝夜永短寒暑循環地殊勢異與所引經傳記載考定歲差釐分昏旦皆簡明詳切其書成於康熙八年在欽定算書以前明徐光啟新法算書以後應搢謙得其書時時觀玩以爲鄉野邨落不問何地何時苟有星光皆能得其漏刻可謂奇書又著有周天現界圖步天歌行世晚歲甘旨之餘閉門力學不問家人生產性謙下不以行能驕人著述甚富末年燬於火後人求留札梓之曰勵齋文集

唐夢賚 孫蕙 杜煥 王鉞 張貞

唐夢賚字濟武山東淄川人順治六年進士改翰林院庶吉士散館授檢討會命

翰林院譯文昌化書夢賚慨然曰此非聖之書何由得徹御覽因上疏陳孔孟之道謂不在六經之科者不當並進請移此以輯聖賢經世大訓以佐平明之治越數日御史張煊以外補上疏反噬干重典給事中陰潤壓閣其間夢賚復疏糾之侃侃數千百言甚切直卒罷歸夢賚少有異姿髻年問父讀書以何句爲要父曰在止於至善時雖從事章句遂知求程朱之學及壯負經濟才凡天經地志性理體數會計之書無不貫綜洞悉平生所著約數十萬言皆窮極理奧斐然成家其所論籌餼積穀銅鈔改漕之法尤鑿鑿可見諸施行論者謂賈長沙陸宣公無以過之工詩文王士禎稱其文近蒙莊詩近東坡歸後居般水之陽與士禎高珩相友益肆力希古作者性好山水嘗變姓名出遊所歷燕趙吳越悠然忘返事親以孝聞視異母弟如手足以大宅讓其弟而卜築城東南隅好善篤友誼同年友林嗣環客死杭州爲營葬又爲其子完娶手錄遺稿以歸而嗣環實未嘗一面也汲引後進經其指授率成名士嘗仿雲棲放生池遺式於城西傅家灣二水匯處作放生磯數里上下網罟俱絕康熙二十七年卒年七十二士禎傷之以爲鄭子皮死無與爲善云著有志壑堂集二十四卷後集八卷選集十四卷濟南府志二十

四卷淄川縣志八卷借鶴樓小集二卷林皋漫錄 孫蕙字樹百亦淄川人順治十八年進士官至給事中少以文章氣節顯初任江蘇寶應知縣循卓有聲縣水旱七年荒疲甚蕙飲冰茹糜撫字維勞大吏以苛令濬河將中以非法士民感憤不呼而至者萬餘人負畚河干兩月之工六日夕遂成大吏不能難轉薦其賢士民繪圖歌詩以紀之及官給諫甫歲餘章十數上有格於例者聖祖多斷行焉會三方底定之後請蠲陝西田糧疏劾錄用叛帥蹇諤不避權要康熙二十年充福建鄉試正考官道路所經於吏治民隱亟致意蕙爲人磊落洞達見義必爲有貴育之勇尤喜爲詩簿書期會舟車行役皆未嘗廢詩格清麗無塵俗氣王士禛稱其五七言雖古作者亦無以加嘗彙歷代循良事蹟爲錄惟載縣令而不及他官蓋謂令與民最近也自秦漢以迄近代爲一卷他著有笠山詩選五卷安宜治畧等書 杜濼字子濂山東濱州人生而英特七歲塾師授李翰蒙求讀竟悉諳典故順治四年成進士授直隸真定推官屢決大獄從總督張存仁平榆園賊以所俘屬訊濼錄渠魁釋脅從凡活數百人以治行高等薦入爲禮科給事中荆隆口河決疏請專遣大臣行河且言疏上游以去其壅導支流以殺其勢然後乘水涸

併力塞之在臺諫十閱月疏數十上侃侃直陳出分守溫處道參議遷副使備兵通薊以事去官旋白復以副使備兵淮海缺裁改巡視寧紹道缺裁家居十二年復起爲開歸道參政兼理驛傳鹽法漕當官屹屹再任監司懲豪猾行保甲剔鹽弊而尤以除溺女淹喪錮婢三事爲善政民甚德之生平風流儒雅吐屬無俗語詩有奇氣類山陰徐渭南城陳允衡撰國雅取淡詩壓卷人以爲定論兼工書法適媚得大令之神性孝友嘗以母命置簞室詢知爲士人女贈匳嫁之康熙二十四年卒年六十有四著有湄湖吟湄村全集 王鉞字仲威山東諸城人順治十六年進士兄鏜官至江南布政使有破夢齋詩草鉞以母老留養不赴官母歿康熙八年選廣東西寧縣知縣在任八年訟庭闕寂孫延齡反陷梧州警報達西寧遠近震動鎮帥班際盛駐兵水口亦謀走避鉞移書極言不可際盛然之賊果退已而賊復至知西寧有備遁去以治最行取平南王尙可喜具疏請留鉞知之信必反可喜不能制遂引疾歸杜門講學晚歲益進十八年舉博學鴻儒辭不赴家居三十餘年耽靜樂善爲鄉里祭酒所爲文通暢詳贍詩學宋人自成結構著有水西紀畧粵遊日記一卷星餘筆記一卷朱子語類纂十三卷讀書叢殘三卷暑

窗牕說二卷世德堂集四卷 張貞字起元山東安邱人康熙十一年拔貢生官翰林院孔目十八年舉博學鴻儒以母憂未與試博雅好古精鑒別工金石篆刻尤工古文嘗遊施閏章之門與王士禎交莫逆士禎垂老求貞定其文亦手定貞文論者謂可於愚山堯峯間展一席地不喜爲詩自謂生平好讀詩然爲之不似蓋天性也事母孝間歲出遊吳越與高士名僧邂逅山間觴詠爲樂購書千百卷歸晚居杞城故園著述自娛以古有杞宋無徵之歎博引古書作杞紀二十卷士禎謂其體大思精得史遷家法閏章亦謂其原原本本可補正史之遺又著有鄉賢傳或語耳夢錄半部彙潛州集娛老集

李來泰

李來泰字仲章江西臨川人年十二補諸生屢試輒冠其曹有英絕領袖之目順治九年成進士授工部主事釐剔積弊十二年提督江南學政飭學校十二事嘗謂學臣宗伯屬也上以導鄉會之源下以端校塾之習實兼有司徒敷教之意夫教士譬之射然內志正外體直持弓矢審固矣猶必容盡比於禮節盡比於樂然後可以言中不然羿蒙養由基之技於矍相何取焉其持論如此所獎拔多寒畯

士習丕變十七年授江蘇蘇松糧儲道除耗費申官兌之法民以爲便願以漕折不中額奪官尋起用康熙五年授分守蘇松常道是年八月缺裁遂乞免歸康熙十八年應博學鴻儒科試列二等第一授翰林院侍講與修明史遷侍讀二十年吏部都察院遵諭甄別各部院司屬官年老不稱職者來泰例應革任特邀恩免供職如故是年秋充湖廣鄉試正考官所取文皆雅正不尙詭異時稱得人二十三年卒於京師來泰文窮極彫鏤詩獨以平正通達行之著有蓮龕集四十餘卷燬於火後人搜集僅得其半今存者十六卷

侯方域 王猷定

侯方域字朝宗河南商丘人祖執蒲明太常卿父恂戶部尙書季父恪祭酒皆以東林忤閹黨方域少問業於上虞倪元璐元璐謂文必馳騁縱橫務盡其才而後軌於法嘗游江左寓金陵司業山陰周鳳翔得其所撰策立造訪之談讌彌日是時主復社者太倉張溥貽書推爲領袖主幾社者青浦陳子龍贈詩曰漢家宣室爲君開其他海內清望胥締附之性豪邁不羈嘗與楊廷樞夏允彝醉登金山臨江悲歌指評當世人物而料事尤多奇中方恂之督師援汴也方域進曰大人受

詔討賊廟堂議論牽制願破文法以賜劍首誅一甲科令守之不應徵辦者而晉帥許定國師噪當斬以徇軍事辦威立疾馳渡河收中原土寨團結之衆以合左良玉於襄陽約陝督孫傳庭犄角並進則汴圍不救自解矣恂叱曰此跋扈也小子多言趣遣歸道遇永城叛帥劉超方域曰君所坐不過殺一御史奈何遽反今畿輔有警君帥所部疾走勤王必可轉禍爲福卽不然亦湔洗惡名失此則身死名裂超不能從懷寧阮大鍼故魏闢義兒也屏居金陵謀復用諸名士共檄大鍼罪作留都防亂揭宜興陳貞慧及貴池吳應箕主之大鍼愧且恚然無可如何知方域與二人者相善也私念因方域以交於二人事當已乃屬其客來交權方域覺之謝客弗與通大鍼乃大怒恨次骨甲申南都擁立大鍼驟枋用興大獄將盡殺黨人捕貞慧入獄方域夜出走渡揚子江依鎮帥高傑得免生平頗以經濟自詡任俠使氣然一語合輒吐肝肺譽之不容口既負才不試以明經累舉於鄉輒報罷順治八年中式副榜初放意聲伎已而悔之發憤爲詩古文倡韓歐學於舉世不爲之日嘗游吳下將刻集集中文未脫藁者一夕補綴立就人益奇之順治十一年卒年三十七方域健於文與寧都魏禧長洲汪琬並以古文擅名禧策士

之文琬儒者之文而方域則才人之文蓋其天才英發吐氣自華善於規撫絕去蹊徑不戾於古而亦不泥於今當時論古文率推方域爲第一遠近無異詞所著有壯悔堂文集四憶堂詩集 王猷定字于一江西南昌人拔貢生父時熙明進士官太僕寺卿天啟中名在東林猷定工詩古文爲人倜儻自豪對客斷斷講論每舉一事輒原其本末聽之醉心少時馳騁聲伎狗馬陸博神仙迂怪之事無所不好故產爲之傾史可法聞其賢徵爲記室可法迎立福王傳檄四方情文動一時皆猷定爲之謀也袁繼咸奉命江楚亦疏薦猷定可大用猷定堅臥復書累千言道不樂仕進意旣入國朝遂絕意人世日以詩文自娛晚寓浙中西湖僧舍大吏重其人皆虛左事之按察使宋琬尤與相契已而琬以事被逮賓客散亡猷定獨周旋患難中所爲文多鬱勃如殷雷未奮又如崩崖壓樹枒槎盤礴旁枝得隙突然干霄自明季公安竟陵之說盛行文體日瑣碎猷定能獨開風氣名與方域相埒論者謂其自出機杼成一家言然如義虎湯琵琶等傳頗苦其誕而不經云其行書楷法亦自通神所著曰四照堂集

王士祿 弟士祐 徐夜 傅辰

王士禎字子底山東新城人刑部尙書士禎之兄順治九年進士清介有守篤於友愛自少能文章工吟詠以詩法授諸弟咸有成就而士禎遂以風雅爲海內宗仰始舉禮部投牒改官選萊州府教授尋遷國子監助教擢吏部主事遷員外郎康熙二年充河南鄉試正考官以磨勘望吏議逮下獄久之得雪免官時士禎方任揚州推官兩親皆就養士禎因南遊往省既見士禎持之泣士禎都不及患難事直取一巨編置前曰弟視吾詩較前差進否遂移權杭州歷覽湖山之勝居數年再起補吏部員外郎好持正論學士張貞生御史張棠先後建言下吏議力直之人以爲難未幾又坐免母歿歸飲食不入口者數日竟以毀卒年四十八時康熙十二年也其爲文條鬯芊蔚絕去雕飾詩則幽閒澹肆極乎性情之所之而一歸於正於唐人獨愛孟襄陽嘗吟曰自從舉世矜高調誰識襄陽孟浩然其於諸書能綜擇折衷獨成義例辨子貢詩傳申公詩說皆僞書尤有功經學所著有讀史蒙拾然脂集表餘堂詩存十笏山房辛甲上浮諸集弟士祐 士祐字子測幼穎異十歲時客有疑焦竑字弱侯者卽從末坐應曰此出考工記竑其輻廣以爲之弱也咸驚其夙慧嘗與諸兄弟夜集東堂擬和輞川絕句士祐詩先成士禎爲

擊節既貢成均與兄士祿弟士禎同在都門時交推之有三王之目吳江計東嘗曰三王並負才名子測之才詎肯作蜂腰哉其爲時所重如此性友愛士祿以典試磨勘下獄士祿奔走營救炎蒸風雨不以爲勞既出兄弟相抱泣士禎官揚州病困士祿馳千里往視晝夜手自調藥病遂已康熙九年成進士未仕而卒年五十嘗南遊溯大江而上過京口徧眺三山至姑孰攬青山采石之勝更歷吳楚篇什遂多士禎搜輯爲古鉢山人遺集其詩長於情韻在吳興與宋琬輩遊白雀寺賦五言詩清絕人比之孟浩然微雲河漢云 徐夜字東癡亦新城人爲士祿外從兄弟初名元善慕嵇叔夜之爲人更名夜字曰嵇菴年二十九棄諸生居東皋鄭潢河上掘門土室絕跡城市久之乃出遊錢塘過孤山訪林逋故居渡淞江湖桐廬登巖光釣臺展謝翱墓徘徊賦詩而返會開博學鴻儒科有司欲舉以應詔以疾辭遂杜門不復出詩學陶韋巉刻處更似孟郊士禎目之爲礪松露鶴嘗索其藁不可得乃就所藏爲編綴百餘篇刻之 傅辰字蘭生亦新城人順治十二年進士除直隸河間府推官明允爲畿輔第一浹歲之間五登薦剡十四年行取入京授御史十七年出按江西聞九江兵缺餉七月且變疾馳至湖口逆風而渡

鎮卒列營東郊將弁屬橐鞬迎道左屐具威儀而入盛服坐堂皇諭以大義給兩月餉士卒皆震動感泣亂遂定十八年以乞養歸康熙十八年舉博學鴻儒罷歸屐事繼母以孝聞修軀偉貌鬚眉如戟博聞強記能詩文作詞曲亦跌宕有致嘗於滄州道上賦柳枝詞二十首多可誦同里王士禎少於屐屐見其賦激賞之以文章相切劘爲人忠信樸直嘗訓諸子曰吾願汝爲道義君子不願汝爲功名中小人也卒年七十四著有奏疏二卷古賦一卷詩文集二十卷詞曲二卷詩話二卷讀書涉筆二卷硯田漫筆四卷續筆二卷姓譜增補十卷韻府補遺六卷增訂堯山堂外紀一卷新城軼事一卷傅氏博考一卷

顧大申 邱象升 象升弟象隨 馬世俊 崔華 朱克生

顧大申字震雉江蘇華亭人順治九年進士授工部主事洊擢郎中分司夏鎮河道陞洮岷道僉事卒於官大申留心經濟嘗著河渠論十二則圖經二十八篇後濬劉河吳淞江皆用其議官夏鎮河道時節省公費以築鎮城設兩湖書院以造士人服其廉幹詩工樂府七律高華可追王李大抵襲七子之餘風初與同郡王廣心周茂源宋徵輿諸人倡和又與施閏章相酬答博雅喜文辭善書畫嘗輯毛

詩楚騷及文選詩并唐人詩著詩原二十五卷於詩教頗有裨益他著有鶴巢集燕京倡和泗亭諸集後自刪併爲堪齋詩存八卷雲間自陳臥子後詩格漸衰惟大申可以接武云 邱象升字曙戒江蘇山陽人順治十二年進士改翰林院庶吉士散館授編修遷侍講外調廣東瓊州府通判缺裁補湖北武昌府通判官至大理寺左寺副少與弟象隨以詩文名時稱二邱所至有政績官瓊州時黎酋數叛象升簡精銳自將擒其渠黎震懾不敢動及攝廣州海防事時平南王藩府人倚勢虐鄉民大吏莫敢問象升乘間啟平南王有再犯者論如律藩府肅然官武昌時值通城民變單騎往諭通城民數千環之象升喻以巡撫意令速解散大軍至無遺類矣辭意慷慨亂遂定入爲大理寺引經折獄多所平反大學士李蔚甚賢之以乞養歸卒年六十一幼聰警日讀書盈寸亂後益發憤旁及詩歌古文皆有神解篤於友誼旣病猶校刊其亡友張春重靳應昇遺集著有嶺海轂音入燕白雲草堂諸集 象隨字季貞年十四卽工詩才名藉甚順治十一年拔貢生康熙十八年召試博學鴻儒授翰林院檢討官至洗馬性孝父歿廬墓三年母以食魚致疾遂終身不食魚通籍後積俸置祭田族人賴之著有西山紀年集 馬世

俊字章民江蘇溧陽人順治十八年一甲一名進士授翰林院修撰官至侍讀未第時留京師貧甚以卷謁龔鼎孳孳歎曰李嶠真才子也歲暮贈薪炭金及廷對侃侃直陳稱王者天下爲家不宜示同異時論偉之何焯謂我朝大魁前劉後韓世俊居其間鼎足而三云幼聰穎工詩古文辭兼精書畫有二右之目謂右軍右丞也所爲詩潛思雋旨聲戛金石一洗詩人之習性樸儉釋褐時貧不能具軒策蹇驢老蒼頭攜宮袍隨之士林傳爲佳話著有匡庵詩文集 崔華字不雕江蘇太倉州人順治十七年舉人居直塘性孤潔寡合吳偉業日爲直塘一崔詩清異出塵嘗有句云溪水碧於前渡日桃花紅似去年時又有云丹楓江冷人初去黃葉聲多酒不辭人呼爲崔黃葉王士禎華舉主也極賞其詩著有櫻桃軒集朱克生字國楨江蘇寶應人諸生幼穎異七歲能文於書無所不讀尤肆力於詩與陶澄陳鈺唱和以風格相高爲寶應三詩人新城王士禎長洲汪琬皆愛重之所爲詩才氣高爽士禎以爲得少陵之骨其論詩云自三百篇外一變而爲離騷再變而爲蘇李三變而爲曹劉四變而爲阮陸陶謝鮑庾五變而爲沈宋李杜高岑王孟於是菁華竭矣詩者節宣性情者也若夫探奇索隱鉤深抉幽或云似杜

少陵或云似李長吉或云似皮襲美陸魯望不知奇非字句雕斲之謂而格局變化之謂也隱非嶮巖詭僻之謂而含章蓄意之謂也深貴蘊藉而不貴晦味幽貴沈鬱而不貴尖細其爲道也獨杜少陵備之若長吉則具其一體皮陸又李唐之最下者也又嘗倣左太沖體作武夷山賦工麗雅贍名聞一時生平足跡半天下所至皆紀以詩性孝康熙三年就試銓曹聞父病冒暑南還八晝夜抵里好急人難表章前哲嘗搜羅邑中忠孝節義諸事蹟爲人物志著有毛詩考證恆陽消夏錄雪夜叢談秋舫日記憶游偶記詩準環溪秋崖詩集又輯有唐詩品彙康熙十八年卒年四十九從子經字恭亭歲貢生著有燕堂詩鈔八卷

秦松齡 倪燦 嚴繩孫

秦松齡字留仙江蘇無錫人順治十二年進士改翰林院庶吉士散館授國史館檢討以通糧案削籍康熙十八年薦舉博學鴻儒科試列一等復授檢討二十年充日講起居注官尋充江西鄉試正考官歷左贊善遷諭德二十三年充順天鄉試正考官復以磨勘落職松齡官庶常時世祖章皇帝召試詠鶴詩有高鳴常向月善舞不迎人之句指示閣臣曰此人必有品置第一既削籍以薦從軍荆襄總

督蔡毓榮請於軍中講學松齡爲陳說忠孝大義介冑之士無不聳聽及歸里居二十餘年耽研經訓尤深於詩著有毛詩日箋六卷做黃氏日鈔之例取歐蘇王呂程李輔巖諸家以及明郝敬何楷近時顧炎武之言互相參校而以己意斷之不專主小序亦不專主集傳有疑義乃爲疏解亦不盡解全詩新城王士禎甚稱之家有園在惠山之麓暇輒招集故人遺老倡和其中與士禎同年友善常緘詩一編題曰寄阮集著有蒼峴山人文集六卷詩集五卷微雲詞一卷 倪燦字闇公江蘇上元人康熙十六年舉人十八年召試博學鴻儒列一等二名授翰林院檢討卒於官著有雁園諸集燦爲諸生以淹雅著名既官檢討與修明史所爲藝文志序窮流溯源與姜宸英刑法志序並稱傑作書法詩格亦秀絕一時云 嚴繩孫字蓀友江蘇無錫人明刑部尙書一鵬孫六歲能作徑尺大字及長以詩古文辭擅名康熙十八年以布衣舉博學鴻儒試日遇日疾僅賦省耕詩一首聖祖素重其名列二等末授翰林院檢討與修明史充日講起居注官二十年充山西鄉試正考官二十二年遷右中允尋告歸繩孫讀書不務彊記案上唯置一編終日不易然既讀則終身不忘性高曠淡於榮利拜官日卽揭歸去來辭於壁在史

館分撰明史隱逸傳所作序文容與蘊藉多自道其志行歸後杜門不出築堂曰雨青草堂亭曰佚亭布以窠石小梅方竹宴坐一室以爲常兼工書畫梁溪人爭以倪雲林目之爲文宗范史詳雅有度詩詞婉約深秀獨標神韻四十一年卒年八十著有秋水集詩八卷文七卷詞二卷

丁煒 林侗 侗弟佶 許友 友子遇

丁煒字瞻汝福建晉江人少孤弱齡補諸生順治十二年定遠大將軍濟度統師取漳州詔便宜置郡縣以下官且致閩士試幕下量授職既試煒居第一授漳平教諭歲餘改河南魯山縣丞遷直隸獻縣內遷戶部主事時議稅閩鹽煒力陳不可事得寢除兵部武選司郎中調職方司出爲江西贛南道時亂初定師旅驛騷調撥尠暇日煒身親經度單露於郊原咸得其理又上所部十弊請禁革總督于成龍善之閩人佃於贛者乘亂暴橫號田賊淫殺無辜煒設法捕治之民情大洽遷湖北按察使有重囚二十餘人皆劫盜所誣者煒廉得實竟雪其罪俄以事謫官居武昌適武昌叛卒夏包子作亂脅使署僞巡撫煒以死誓東走安慶謁安徽巡撫楊素蘊乞師會剿事平補雲南姚安府知府素蘊移撫湖廣以煒事聞復按

察使赴闕道得目疾假歸數年卒煒善爲詩其論詩曰鍾譚詩歸出明季操觚家奉爲津筏去文存質將以救飛揚蹈厲之失然天地英華刊削瀟落風氣之衰亦中於運祚又曰詩貴新不貴襲貴獨造不貴依傍然厭常之弊或至詭趨俗流之失究且忘源海內詩人漸以漢魏三唐爲不足法駸駸流入宋元以下意在標新領異方駕前人究之倣蘇襲黃蹊徑故未脫也則何如現於漢魏三唐之爲近古無弊乎又曰清而不已閒入於薄真而不已或至於率率與薄相乘漸且爲俚爲野又曰詩貴合法法勝則離詩貴近情情勝則俚故煒詩力追唐賢萊陽宋琬新城王士禎秀水朱彝尊皆推之以爲麗而則清而腴著有問山詩集十卷文集八卷紫雲詞一卷 林侗字同人福建閩縣人歲貢生嘗隨宦關中蒐討金石著來齋金石考昭陵石蹟考略李忠定年譜井野識塗荔水莊詩草年八十八卒弟佶佶字吉人康熙五十一年特賜進士授內閣中書佶工於楷法亦善篆隸文師汪琬詩師陳廷敬王士禎琬之堯峯文鈔廷敬之午亭文編士禎之精華錄皆其手書付雕廷敬士禎之集皆刻於名位烜燿之時而琬集則繕寫於身後故世以是稱之佶家多藏書徐乾學錢通志堂經解朱彝尊選明詩綜皆就傳鈔著有樸

學齋集 許友初名宰字有介福建侯官人諸生善書工書詩尤孤曠高迥錢謙益嘗錄其詩入吾炙集王士禎朱彝尊並稱之少師倪元璐晚慕米芾爲人構米友堂祀之著有米友堂詩集子遇 遇字不棄歲貢生知河南陳留縣事調江蘇長洲仕有惠政公餘禮士唱酬吟詠不輟卒於官少授詩於王士禎七絕尤擅長亦工畫松竹梅石有紫藤花庵詩鈔遇子鼎均俱能詩鼎字伯調雍正元年舉人官浙江遂昌知縣有少少集刺桐城紀遊均字叔調康熙五十七年進士改翰林院庶吉士散館授吏部主事性嚴正勇於任事擢禮部郎中有玉琴書屋詩鈔閩中以詩世其家者咸曰許氏也

黎士宏

黎士宏字媿曾福建長汀人少師寧化李世熊稱入室弟子以詩文名應試三山見福州曾異撰作蘭與蘭語詩爲贊異撰大擊節且語人曰黎生漢魏之苗裔也新建徐世溥嘗與錢謙益書謂今海內人士惟媿曾及漢陽李文孫耳而周亮工謂黎自可單行若比漢陽恐疑噲伍其爲名流推獎如此順治十一年舉順天鄉試授江西廣信推官以裁缺補永新知縣舉廉卓第一擢甘肅甘州同知再舉廉

卓遷江蘇常州知府會吳三桂叛三秦震動大吏奏除洮岷道副使署甘山道事王輔臣叛河東失守士宏以鎮兵雲集必一事權言於巡撫謂恢復河東非用河西之兵不可用河西兵非責之提督張勇不可疏奏授勇靖逆將軍節制諸鎮及復蘭州士宏多贊畫焉寧夏營將叛殺提帥鎮城危急改鎮寧夏嚴守禦安反側又密請免衛所逋糧七萬五千餘石康熙十八年賊平敘功晉布政司參政以母老乞歸家居二十八年卒年八十少時詩好李賀文好王勃所爲文清新俊逸未嘗步武前人而動與古會詩格隨年而變不相近也然大抵刊落陳言多清真樸老之作著有託素齋詩文集十卷仁恕齋筆記三卷

汪琬 葉燮

汪琬字茗文江蘇長洲人順治十二年進士授戶部主事充大通橋監督遷員外郎改刑部郎中以奏銷案降北城兵馬司指揮再遷戶部主事權江寧西新關以疾假歸結廬堯峯山閉戶著書者九年康熙十八年以左都御史宋德宜翰林院掌院學士陳廷敬薦召試博學鴻儒列一等授翰林院編修纂修明史在史館六十日撰史藁百七十五篇以病乞歸康熙二十九年卒年六十七初聖祖仁皇帝

嘗問廷敬今世誰能爲古文者廷敬舉琬以對遂薦琬應鴻博及琬病歸仁皇帝南巡還次無錫諭巡撫湯斌曰汪琬久在翰林文名甚著近又聞其居鄉不與外事是誠可嘉特賜御書一軸當時榮之琬少孤自奮於學銳意爲古文辭古文自明代膚濫於七子纖佻於三袁至啟禎而敝極國初風氣還醇一時學者始復唐宋以來之矩矱琬學術既深軌轍復正其言大抵原本於六經灑灑疏暢頗近南宋諸家廬陵南豐固未易言接跡唐歸無媿色也其敘事尤善一時公卿誌銘表傳必以琬爲重詩則兼范成大陸游元好問之勝少年所擬六朝三唐諸體則夷然棄之嘗歎文章家好名寡實鮮自重特立之士故褻譏不少寬假又性卞急不能容人過意所不可輒面批折人雖詩文小得失不肯稍徇以是人多嫉之士友相傳汪鈍翁喜嫚罵人鈍翁琬號也然坦率無城府後進片語之佳稱揚不容口遇其服善處不難俛首至地常語人曰學問不可無師承議論不可無根據出處不可無本末其大指如此其所歷京朝官雖僚屬皆有名蹟可紀爲刑部郎援經附律務毋枉縱爲兵馬司指揮懲豪家奴以勢凌脅人者見路死暴屍親爲收瘞任滿去民送之者溢衢巷再入戶部盡心鈎校議民輸糧加漕贈外五米十銀爲

官收官兌法而旗弁之橫息議裁吳三桂兵餉以充國用而強藩之勢沮其端皆自琬發之琬前自輯詩文爲類彙六十二卷先刊板置之堯峯皆山閣歸田後十年爲續彙三十卷又取明史列傳彙汪氏族譜及其父行略爲別集二十六卷刻之後復取其愜意者爲堯峰詩文鈔屬門人林佶繕之惠周惕序之世間多有其本而類彙遂不顯 葉燮字星期浙江嘉興人父紹袁明天啟中進士燮幼穎悟年四歲紹袁授以楚辭卽能成誦及長工文喜吟咏康熙九年成進士十四年選江蘇寶應縣知縣旋罷歸徧遊四方晚年乃定居吳縣之橫山人因以橫山日之始燮之官寶應也適三逆煽亂軍事旁午地當南北往來之衝接應靡暇日縣境濱臨運河東西延袤二百里時虞潰決又值歲穀不登民乏食燮極意經畫境賴以安以伉直不附上官意用細故落職而嘉定知縣陸隴其亦同時登白簡燮聞之不以去官爲憂以與隴其同効爲幸也於是縱遊泰岱嵩高黃嶽匡廬羅浮天台雁蕩諸山海內名勝畧徧年七十有六猶以會稽五洩近在數百里內未遊爲憾復裹三月糧窮其輿而歸歸途疾越一年卒燮言詩以杜甫韓愈爲宗陳見俗障墁而空之其論文與長洲汪琬不合往復詆謫及琬歿慨然曰吾失一諍友今

誰復彈吾文者取向所短汪者悉焚之寓吳時以吳中稱詩多獵范陸之皮毛而遺其實遂著原詩內外篇力破其非吳人士始而訾訾久乃更從其說新城王士禎稱燮詩古文鎔鑄古昔能自成一家言所著有已畦文集十卷詩集十卷原詩四卷殘餘一卷

王命岳

王命岳字恥古福建晉安人少受易於漳浦黃道周家貧有志尙順治十二年進士改翰林院庶吉士世祖章皇帝御試或定雲貴策命岳以天下瘡痍物力未復江楚協餉維艱宜仿趙充國屯田西陲以服諸羌俟兵食旣足然後抵孫李之隙一舉可平奏上上異之擢工科給事中命岳上經國遠圖疏曰國家所最急者財也今歲入千八百一十四萬有奇歲出二千二百六十萬有奇出浮於入者四百餘萬通計國用所以不足之故皆由養兵耳各省鎮滿漢官兵俸米豆草之費至千八百三十八萬零大兵所過芻秣之費約四十萬其在京王公及百官俸薪披甲月餉不過二百萬有奇耳是歲費二千二百餘萬凡十分在用兵一分在雜用也今各行省之地兵燹早潦荒田極多宜令各省駐防官兵分地耕種稍做明洪

武中屯田之法給與牛種耕具餼糧使自食其力其爲利甚溥而今日不行者由各將帥所隸兵丁皆以僕從充數下至廚役優伶皆應兵名故食糧有兵充伍無兵官有陞遷兵隨官去既無定兵難議屯種爲今之計當先覈兵使有定數官有陞降兵無去來然後可給地課耕漸收富彊之利竊見今日因賊而設兵因兵而措餉因餉而病民而民復爲賊輾轉相因實可隱憂故深籌經國遠圖而不爲苟且目前之計議格不行已復疏請復軍屯衛官曰今日小醜未盡用兵未休師行糧食所費不貲不得已而取諸民民窮勢變所伏隱憂又有在意計之外者夫富彊之法莫若兵屯前陳經國遠圖疏已議格矣大抵將帥樂責餉於官而不樂責耕於民故稱不便耳竊謂前明軍衛屯田之制當洪武中養兵百萬不費民間一錢今天下各衛與食田之軍具在一舉而清之國家可崇朝而得數百萬之餉數百萬之兵請備言之自我朝定鼎以來勝國指揮千百戶等官悉落職不襲而軍獨擁田又或典兌於鄉紳富民之家雖曰今日屯田已派入民田納糧其實在勝國時屯以養軍亦未嘗不納糧於官也臣請按籍而稽其現屬舊軍管掌者報名於官官給新帖人有限田歲時操練以備戰守無漕之地專禦封疆有漕之地更

番輓運其有絕戶無人而已經典兌者令自首以歸於官官選經制之兵以補受屯之軍如此則經制之兵不必處處皆設按屯之數可以得兵養兵之費不必仰給司農按屯之數可以得餉矣而又復設指揮千百戶等官以勞久功多之臣膺其任世其子孫官有長子孫之心必有護桑梓之念而債帥虐民之患息軍有世管之官卽安受約束之條而奸猾偷盜之弊亡此臣所以因清屯而請設官也時雲南歲餉軍九百萬有奇總括一省夏稅秋糧鹽課礦商魚牛稅共正雜銀止十六萬有奇命岳憂國計日紕疏言九百萬兩者天下正賦其數尙不及此以盡天下之正賦而奉一隅之滇南以九百萬之金而營十六萬頃之地竭百姓脂膏以事邊兵則國必虛國虛民怨天下之患不在雲南餘寇矣爲今之計急議兵屯以紓國用按雲南原有舊屯計一萬一千一百七十一頃零科糧三十八萬九千九百九十二石零皆見有原種之軍今敕令巡撫責成原軍換帖領種永爲世業軍旣領田卽爲我兵籍其丁壯復爲勁旅如軍故丁絕招人代墾兵燹之後牛耕種絕撫臣暫發二十萬金借給軍民牛孳種收經年銷算二十萬金必無虧損又可以收復三十八萬九千餘石之舊額不惟此也官收額內軍餘額外米粟

既登價值自賤如天之庇一石三金則視今年每石二十金者已省餉費四分之三矣況賤於此者乎臣惟平西王一意辦寇撫臣袁懋功一意辦屯庶兵食兼足不致竭天下奉一隅以釀禍患世祖下其奏詔發銀十萬如所議施行其餘上吏治樞政漕弊救荒諸疏皆軍國大計由工科歷戶兵二科既乞假歸密訪海盜情狀還朝上靖寇四事一曰審長短之形明布置之法二曰知接濟之途與物三曰收難民之心以破賊譎用反間之術以攜賊心四曰芟除土賊以孤賊黨安插投誠以消隱患上嘉納之聖祖仁皇帝嗣位奉使廣東卻尙金粵人以為吳隱之復生浙江布政使員盡忠居官貪穢吏部奏遷廣東左布政使制下矣命岳劾其不職請為粵東殘黎驅除大憝聖祖褒歎久之曰非王命岳莫敢言尋遷刑科給事中疏請敕下密議剿撫陳豹之策又以肇高雷瓊諸郡兵飢且叛請速處置朝議欲裁天下教官以其祿俸佐兵餉抗疏力爭乃止上為動容以議獄不當坐謫官康熙六年夏直隸大旱詔求直言命岳猶草民間利病諷有心者入告嘗以天子沖齡萬幾之暇宜披覽古今以為法戒乃錄夏商至元明故實名曰千秋寶鑑書既成未及上而卒年五十九時比之汲黯田錫云著有恥躬堂文集十八卷讀

易雜卦牖中天一卷讀詩牖中天一卷

梅清 梅庚

梅清字潤公安徽宣城人少讀書竟夜不倦既長英偉豁達以博雅稱順治十一年舉人再赴禮部試不第南北往還周覽燕齊梁宋之間士大夫多與之交新城王士禎崑山徐元文尤傾服焉清所爲詩凡數變當年壯氣盛時叱咤成篇久之意不自滿取舊作校刪過半其沈摯纏綿之意則見於巖棲旅食者爲多自訂爲天延閣前後集晚歲又合未刻之藁編爲瞿山詩畧共三十三卷康熙三十六年卒年七十五清工書做顏真卿楊凝式畫尤多奇氣嘗作黃山峯十二幅極烟雲變幻之勝清族人庚與清齊名 庚字耦長少孤能力學承其祖鼎祚父朗中之傳益昌大之善八分書間作畫曠逸有雅韻尤長於詩同邑施閏章一見稱賞引爲忘年交客遊京師公卿咸爲倒屣性狷介不妄投一刺人以此益重之康熙二十年舉江南鄉試爲秀水朱彝尊所得士亦遊王士禎門屢困公車士禎主禮闈復被黜士禎贈詩有如何古戰場亦復失李華之句尋知浙江泰順縣以經術佐吏治邑苦歲修海船庚莅任五年累不及民民德之嘗自作修船謠人以比春陵

行未幾以老告歸卒著有天逸閣集

劉體仁 劉榛 周在浚

劉體仁字公戡河南潁川衛人順治十二年進士有家難棄官從蘇門孫奇逢講學後官吏部郎中與長洲汪琬新城王士禎以詩文相倡和體仁善鼓琴嘗於慈仁寺彈御風操士禎贈詩有與君更作他年約黃鵠山前訪戴行之句京口黃鵠山戴容所居也後五年果相遇黃鵠山下其友素嗜琴歿數年體仁一日過其墓停車酌酒爲操一曲而去其標致如此詩有奇氣刻削似孟東野喜作畫鑒識甚精與孫承澤以博古相高嘗做雲烟過眼錄爲識小錄一冊詩初名蒲庵集後爲七頌堂文詩集凡十四卷七頌者慕成連陸賈司馬徽桓伊沈麟士王績韋應物之爲人人爲之頌故以名堂也 劉榛字山蔚河南商邱人諸生少聰穎力學恆以古人自處性冲穆落落不妄交遊與睢州田蘭芳同里鄭廉相友善其文法初得之同里徐作肅以秀潔稱其後學益進文益工粹然儒者之言四方以文字來請者無虛日與蘭芳齊名中歲歷齊魯吳越與當世賢士大夫盱衡古今得失人物臧否上下數千百年間出其博考廣覽之所得一一瞭然如指諸掌孫奇逢湯

斌宋犖亟稱之性至孝以父早卒不及逮事爲憾名其廬曰事庵生母張教之極嚴每予杖拱手俯受退則萊舞於側以爲常嘗從學使遊兩浙忽念母辭歸生平以義自高不恤人言謗亦隨之然諸輕豪少年遇榛廣坐中未嘗不斂容屏息竇克勤建朱陽書院欲聘之會卒年五十六著有女使韻統虛直堂集諸書鄭廉字介夫亦諸生工古文辭與相切劘著有柳下堂集 周在浚字雪客河南祥符人官經歷父亮工官戶部侍郎著有賴古堂集在浚夙承家學淹通史傳嘗注南唐書十八卷爲王士禎所稱又嘗合天發神讖碑三段貫以鉅鐵重爲釋文一卷考證精審論者謂可正金石集古二錄之誤工詩嘗作金陵百詠及竹枝詞流傳最盛著有雲烟過眼錄二十卷晉稗梨莊遺谷集秋水集

吳兆騫 弟兆宜 顧貞觀 楊寶

吳兆騫字漢槎江蘇吳江人少有雋才童時作膽賦五千餘言其師計名見之詫曰此子異時有盛名然不免於禍矣及長繼復社主盟才名動一世時有江左三鳳凰之目謂華亭彭師度宜興陳維崧及兆騫也順治十四年舉於鄉以科場事逮繫遣戍寧古塔居塞上二十三年侘傺不自聊一發之於詩嘗作長白山賦數

千言詞極瑰麗聖祖遣侍臣祭長白山歸獻之上動容咨嗟後其友顧貞觀商於納蘭性德徐乾學爲納綏康熙二十年蒙恩赦還踰三年卒年五十四著秋笳集三卷西曹雜詩一卷前集一卷雜體詩一卷後集一卷雜著一卷兆騫駢體文驚才絕艷詩風骨遒上出塞後尤工故當時以才人目之弟兆宜 兆宜諸生亦善屬文嘗註徐庾二集又註玉臺新詠才調集韓偓詩集其箋釋詞藻頗足備參考云 顧貞觀字遠平江蘇無錫人康熙十一年舉人官內閣中書貞觀美風儀才調清麗文兼衆體能詩尤工樂府少與吳兆騫齊名年二十餘遊京師題詩寺壁柏鄉魏裔介見之卽日過訪名遂大起兆騫以事戍寧古塔貞觀悉力爲之贖緩得入關嘗作金縷曲二闋以寄兆騫納蘭性德見之曰山陽思舊之作都尉河梁之什並此而三矣爲人儁爽敦古誼聞塞外多暴骨卽募僧歛金徧歷戰場收瘞無算又遊蹤所至贖去鄉鬻身者數家晚歲移疾歸構積書巖坐擁萬卷臨歿時自選詩一卷授門人杜詔不滿四十篇其嗜古淡不自足如此所作彈指詞聲傳海外與陳維崧朱彝尊稱詞家三絕云他著有鱸塘積書巖等集 楊賓字可師浙江山陰人父坐友人累偕妻戍寧古塔賓年十三上奉祖母下攜弱弟艱苦備

嘗聖祖南巡賓與弟寶叩御舟請代父戍不得達遂間往侍父歿例不得歸葬賓走京師日搏頽哀籲於當道輿前有憐之者爲奏請更例遂迎母奉父柩歸時稱楊孝子少聰慧八歲能擘窠書稍長工詩古文務爲有用之學不樂仕進康熙十七年僑寓吳門巡撫舉賓應博學鴻儒力辭去侍父戍所時著柳邊紀略柳邊者插柳爲邊今寧古塔界其書網羅鉅細足以訂史書之謬而補版圖之缺塞外人稱楊夫子詩主沈著身後散佚惟存一卷皆辛苦愁慘之音

計東 宋實穎

計東字甫草江蘇吳江人寄籍浙江嘉興工爲文年十五補諸生聲譽日起順治十四年舉順天鄉試十八年以江南奏銷案被黜大學士王熙器重東屢欲薦之未果會詔舉博學鴻儒而東已前一年卒年五十二東少負經世才意氣勃發嘗自比王猛馬周始遭世變著籌南五論經畫明晰持謁史可法可法奇之以時勢所值弗能用也伏匿里門深自韜晦既貧無以養始出就舉已而復黜益放廢失志縱遊四方自京師北走宣雲南歷漳洛邢魏東之濟兗覽山川之形勝所至交其賢士大夫相與投分贈言而去外若不羈內行修謹事母至孝嘗從睢州湯斌

講學寓書柏鄉魏裔介論聖學知統錄歷指程朱見知聞知諸子之當補入者又以統有正必有閏陸氏之徒亦當擇其行誼及論說近正者存之以大著其防若舉而去之其學終不可泯宗之者反得藉爲口實所論殊有確見又從長洲汪琬受歐曾義法故作文具有本源而一出以醇正和雅初遊河南時見商邱宋犖輒引重目爲嚴武李德裕一流人既犖巡撫江蘇東歿已二十餘年特序其遺文刊之爲改亭集十六卷又詩集六卷 宋實穎字旣庭江蘇長洲人順治十七年舉人康熙十八年舉博學鴻儒罷歸後官興化縣教諭少負盛名一時有江東獨秀之目醇靜寡欲動止有常至京師輒攝衣據諸貴人上坐意氣岸然自名公卿訖四方士日夜持謁以望見顏色爲幸旣爲慎交社宗主提唱後學士林重之繆彤嘗執經於門其學得諸實穎爲多嘗作黜朱梁紀年圖論云王莽不得爲新安祿山不得爲燕全忠豈獨得爲梁乎且其時移檄興復唐室者有晉岐蜀淮南四國或爲唐之臣子或爲唐之世族則唐實未嘗亡也今黜朱梁紀年而以晉岐淮南之稱天祐者爲主始於天祐四年至後唐莊宗同光元年而亦春秋書公在乾侯之義也學者服其持論之正實穎一門節孝母妻兩弟皆死難與計東稱石交以

女字其子無何計東子殤女不食殉之著有讀書堂老易軒玉磬山房等集

唐甄 余齋

唐甄字鑄萬四川達縣人父階泰明吳江知縣甄性至孝侍親官舍親疾衣不解帶及居喪獨處殯室三年枕塊席苫痛故鄉淪陷遂卜地葬吳門之虎邱順治十四年舉人選山西長子縣知縣導民蠶桑以身率之日省於鄉三旬而樹桑八十八萬本民業利焉甫十月以逃人註誤去官僦居吳市僅三數椽蕭然四壁炊煙嘗絕日采廢圃中枸杞葉爲飯衣敗絮陶陶然振筆著書不輟曰君子當厄正爲學用力之時窮阨生死外也小也豈可求諸外而忘其內顧其小而遺其大哉乃研精覃思著衡書曰衡者志在權衡天下也後以連蹇不遇更名潛書書分上下篇言學者爲上篇始自辨儒終於博觀凡五十篇言治者爲下篇始於尙治終於潛存凡四十七篇其自述曰上觀天道下察人事遠正古迹近度今宜根於心而致之行如在其位而謀其政非虛言也寧都魏禧見而歎曰是周秦之書也今猶有此人乎康熙四十三年卒年七十有五又著有毛詩傳箋合義春秋述傳潛文潛詩日記 余齋字生生四川青神人明諸生世襲錦衣衛國變後謀結勳衛子弟

兵殺流賊不克逃之江南參戎幕復去之鄞遂家焉所居借鑑樓臨西湖上結七子詩社日與諸名士唱和其中齠年最長羣奉爲祭酒當是時諸名士在湖上居者有觀日堂南軒歲寒館與借鑑樓相望詩箋往復不輟齠居樓中二十年嘗曰吾雖死猶當作湖上寓公全祖望謂自山東焦先生以理學居鄞大函山中吾鄉得私淑伊洛之傳其外劉正仲以授經葛慶隆以詩張玉田以下與青神余生生皆寓公之生色者也著有增益軒詩草

毛際可 方象瑛

毛際可字會侯浙江遂安人順治十五年進士授河南彰德府推官改知城固縣調祥符康熙十八年舉博學鴻儒罷歸尋膺卓異行取賜袍服以事去官少負雋才淹雅博聞以文章名居官有異政爲推官翦迸豪猾歸德防將倚勢淫掠窮治之皆棄市然於疑獄多所平反盜犯房有才等十三人奏當大辟力白其冤釋之宰城固值歲旱禱涌泉洞之龍湫下山卽雨及官祥符巡撫聞其司刑有名委以通省欽部件戴星出入無虛日直大兵過有肆擾者立白其帥寘之法及歸益致力爲古文虛懷善下輒好人譏彈其文至於朋友往還必以無所規益相督勉尤

樂汲引後進四方從遊恆履滿戶外其學不及毛奇齡之博而亦不似奇齡之強悍堅僻二十二年浙撫修通志聘爲總裁康熙四十七年卒年七十六著有春秋五傳考異十二卷松皋文集十卷安序堂文鈔三十卷松皋詩選二卷拾餘詩藁四卷浣雪詞鈔二卷黔遊日記一卷 方象瑛字渭仁亦遂安人明少傅逢年孫天資穎異九歲能詩十歲作遠山淨賦驚其長老少負氣自豪里中爲文會友人方苦吟面壁象瑛與毛際可獨握手修篁恠石間縱談天下事誦所爲詩歌日向午振筆直書雲舒濤怒不可端倪國初浙閩未定避兵杭州後復遊鄴遊燕遊越遊楚康熙六年成進士授內閣中書十七年充順天鄉試同考官十八年以倉場總督嚴沈薦召試博學鴻儒列二等授翰林院編修與修明史二十二年四川平補行鄉試充正考官及還爲錦官集二卷凡山川之阨塞風土之同異悉見於詩尋遷侍講以告歸家居時苞苴干牘一不至於門邑多秕政與仲兄象璜籲當道歲省費以萬計卒之日邑人爲建思賢祠於城南著有健松齋詩文集三十四卷封長白山記一卷松窗筆乘三十卷

黃與堅 顧澐 王揆 王昊

黃與堅字庭表江蘇太倉州人童年穎悟三歲能識字五歲能誦詩十四歲慨然有志於古學欲徧讀周秦以下書甫三年讀周末諸子及六朝以上者幾盡究心經術輯解甚多易學闡其一也性拓落與人交當生死患難不肯相背負順治十六年進士授知縣康熙十八年由江南巡撫慕天顏薦舉召試博學鴻儒授翰林院編修與修明史二十三年充貴州鄉試正考官尋遷贊善明史告成復命分修一統志雖出入禁林而所居委巷版門竟日無剝啄聲凝塵蔽榻寂寞著書如窮愁專一之士著有忍庵集其文醇雅而不冶簡質而不繁謹嚴而不夸詩風情骨格在韓偓元好問之間吳偉業選婁東十子詩以與堅爲冠其九人爲周肇許旭顧湄王揆王撰王忭王攄王昊王曜昇也肇著有東岡集旭著有秋水集 顧湄字伊人亦太倉州人居州之鳳里事母以孝聞其父夢麟長於毛鄭之學稽經緝傳自成一家吳偉業嘗訪湄於其里茅齋三楹衡門兩版庭階潔治地無纖塵出而歎曰夢麟有子矣詩陶冶性情清麗婉約陳瑚以爲遠過元人所著有水鄉集 王揆字端士亦太倉州人順治十二年進士父時敏字遜之崇禎初以廕歷官太常寺卿工詩文兼精隸書畫師黃子久爲海內所珍與從子王鑑弟子王翬稱

三王時敏尤爲領袖入國朝隱居不仕卒年八十九著有西田集揆承家學與弟撰扑摠結課賦詩宗尙正軌揆詩曰芝廩集田雯甚稱之康熙十八年巡撫慕天顏疏薦博學鴻儒揆力辭居鄉志切民生嘗請當事釐別蘆洲稅課蠹弊劉家河久淤上書巡撫請浚鑿之撰字異公兼工畫及隸書有三餘集扑字懌民詩工樂府有健菴集摠字虹友兄弟中尤矯矯有蘆中集沈德潛謂太原王氏昆季多才不啻過江王謝云揆子原祁官至戶部左侍郎 王昊字維夏亦太倉州人束髮授書一過能記誦稍長涉獵書史詩古文辭縱筆爲之並如宿習作鴻門行兀稟驚拔吳偉業歎爲絕才於婁東十子中尤錚錚有聲性傲岸不肯就省試時吳下文社盛起爭欲致昊昊亦具供張設爲槃敦以應之往來江浙間與諸豪俊締交好家以是困乃歸築當恕軒寢處其中研經繹史授徒自給康熙十八年舉博學鴻儒召試授正字上以昊文學素著念其年邁加內閣中書銜命下而昊已卒年五十三所著當恕軒隨筆時稱博洽又有碩園集弟曜昇字次谷諸生與昊皆有文名以奏銷罣誤悒悒出游入都客死著有東皋集

葉封

葉封字井叔先世籍浙江嘉興父長青令黃陂以殉節死縣人德之因家焉遂爲湖北黃陂人家貧讀書樊山下益自刻苦黃岡王澤宏聞而重之順治十六年成進士除福建延平府推官延有巨猾善持官府短長封按誅其魁餘皆屏息然折獄矜慎他郡有冤者皆願得封讞之缺裁改河南登封縣知縣勸開墾革火耗平徭役厚儲待息爭訟禮學校興教化一切以經術治之縣距河五百里歲派河夫民費不貲封條十事上之巡撫佟鳳彩納其言疏改民夫爲官雇鄰郡皆德之遷西城兵馬司指揮田雯宋犖曹禾王又旦顏光敏輩咸與唱酬康熙十八年薦試博學鴻儒報罷二十六年銓授工部主事封已卒年六十五封家武昌之樊湖以漁釣自娛泊宦遊嵩陽詩益雅健可誦王士禎嘗點定其慕廬集又取其嵩山諸詩爲嵩遊集序而刻之他著有嵩志二十一卷復旁求漢唐以來碑版文字爲嵩陽石刻集記二卷辨證精博人比之劉敞薛尚功云

董俞 田茂遇

董俞字蒼水江蘇金山衛人順治十七年舉人康熙十八年舉博學鴻儒罷歸童時喜讀古人詩略上口卽能爲聲偶之言與兄含並以才名顯尤善賦學嘗爲鏡

賦燕賦采桑賦清婉流麗論者謂可與吳綺相頡頏入都時與王士禎相唱和嘗渡洞庭至鹿角山風浪大作覆舟蔽湖而下僮僕震懼無人色俞坦然危坐賦二詩投湖中竟得無恙其鎮靜如此俞父官少宰本貴公子江南通賦之獄起紳士同日除名者萬餘人俞隸焉遂棄帖括究極於風雅正變之間爰及漢魏下訖三唐朝齋暮鹽蕭然如寒峻而其詩亦閎深涵演非小乘所敢望晚卜築南村灌園鋤菜嘯歌自得著有樗亭浮湘度嶺等集又與田茂遇同編高言集兄含字閔石順治十二年進士著有藝葵集安蔬堂集 田茂遇字楫公江蘇青浦人順治十四年舉人授直隸新城知縣不赴康熙十八年舉博學鴻儒罷歸少負時名善屬文讀書穿穴經傳落筆爲詩歌古文袞袞不能自休師夏允彝以詩文雄於時陳子龍嘗以偉器稱之赴試時客都門與王崇簡魏裔介唱和成帙與人交傾身爲之盡力窮達盛衰不得而移尤好獎掖後進妻孥終歲布衣糲食客至則治具甚盛留數月不厭世謂茂遇家貧而能好客才高而能好善子龍歿後代其子償官田租二十年又爲梓其遺集謂人曰無以償黃門大德生平每以爲愧晚築水西草堂觴詠以老選有燕臺文鈔十五國風高言集清平詞等書所自著爲水西草

堂集

吳農祥 王嗣槐 徐林鴻 陸次雲

吳農祥字慶百浙江錢塘人諸生明中允太沖長子少異敏一覽成誦家富藏書農祥登樓去梯盡發所藏讀之學益博與吳任臣齊名武林呼爲二吳性耿介不以私干人族兄守蘇州六年賓客闐咽農祥一以書問無恙而已他日邂逅於可中亭欲載與俱歸不可則以縑置船中農祥遽捨船去康熙十八年舉博學鴻儒罷歸著書自娛總督李之芳既定閩亂聞農祥名請見欲留之幕中固辭爲文條貫五經尤精於易與蕭山毛奇齡友善然質疑辨難不肯苟同駢散文詩賦小詞俱工益都馮溥評鷲諸人古文稱農祥汪琬駢文稱農祥陳維崧詩賦稱農祥毛奇齡小詞推陳維崧彭孫通又以農祥爲首其見重如此康熙十七年卒年七十七所著有蕭臺集二百四十卷梧園雜志二十卷流鉛集四十卷詩餘二十四卷又嘯臺讀史綠窗讀史錢邑志林唐詩辨疑 王嗣槐字仲昭浙江仁和人諸生康熙十八年舉博學鴻儒老不與試授內閣中書性簡脫與俗忤日偕友人散髮袒裸嬉笑怒罵不復知人閒事然慷慨善談論於書無所不窺少工駢體晚乃專

爲大家文尤善作賦詩與陸繁昭並推益都馮溥延致邸第與吳農祥吳任臣毛奇齡陳維崧徐林鴻稱爲佳山堂六子薦鴻博時撰賡盛詩一百韻又爲長白瀛臺二賦文詞瑰麗二十七年太皇太后升祔禮成撰孝德廣運頌上南巡奏獻於靈隱寺後羣臣送聖駕特召嗣槐至河干溫諭嘉許觀者榮之嘗謂太極圖說出於北固老僧華山道士疑非周子作著太極圖說論十四卷論者謂可破圖書之僞有功易義他著有桂山堂偶存嘯石齋詞 徐林鴻字大文浙江海寧人錢塘諸生康熙十八年舉博學鴻儒罷歸工詞翰時婁東雲間江左與武林諸名士以文章震耀一時林鴻以年少馳騁其間爭相引重嘗遊豫章涉江笑謂送客曰吾過洪都惜子安已沒無可與言詩者客或乞吾書正恐麻姑碑版羞見吾耳其簡傲如此尤善鑒別顧豹文出蠶尊飲林鴻問曰此何年製林鴻曰北齊文宣帝天保六年避暑晉陽宮作也驗其下款識果然所學博通今古凡山川險隘錢穀鹽莢之出納律令格式之寬嚴皆總其要又工於奏疏大吏交引自助賦才瀏亮古詩音偪齊梁近體和平婉麗獨不愛填詞有強之者倚聲歌之悉中律其於史事尤洞達本末不曲徇黨人之論分撰通志發凡起例綱目秩然論者以林鴻不與

修明史爲惜性篤於友誼漢陽王世顯南昌王猷定客死杭太倉王昊四明周容卒京師皆爲治喪嘗爲貴陽使作龍番諸志所自著有兩閒草堂詩文集四十卷陸次雲字雲士浙江錢塘人康熙十八年舉博學鴻儒罷歸後官河南郟縣知縣以憂歸復起知江蘇江陰縣居官有善政去郟之日民走送累百里宰江陰載酒徵歌風雅好客一時名士至常郡者必過訪績學能詩文所爲詩本性情時有新意著述甚富有八紘繹史四卷紀餘四卷八紘荒史二卷峒谿織志三卷志餘一卷湖壩雜記一卷北墅緒言五卷其餘論經史者有尙論持平二卷析疑待正二卷事文標異二卷又有澄江集一卷玉山詞一卷

顧景星 張仁熙 劉醇驥 王戩

顧景星字黃公湖北蘄州人性穎悟六歲能作賦八九歲徧讀經史日數行下時稱聖童爲文縱橫奧衍與廣濟張仁熙竟陵胡承諸俱著名江漢間熊文燦挈海賊過蘄諸賊中張獻忠尤黠景星年十六聞之曰熊公不得死所矣明年獻賊果焚穀城叛福王立授景星推官馬士英使人密招卻之因浮家澱湖爲長隱計康熙十八年以貢生舉博學鴻儒科因病不與試居京師與施閏章友善出所爲詩

屬爲之讎校閨章稱其恢博雄悍不讓古人景星記誦淹博才氣尤不羈著述富
瞻歸後杜門息影倏然遺世顏其堂曰白茅取易无咎之義也有白茅堂集四十
六卷讀史集論九卷贖池錄一百十八卷顧氏列傳十五卷南渡來耕集七十三
卷阮籍詠懷詩注二卷李賀詩注四卷 張仁熙字表仁湖北廣濟人明諸生家
多藏書年十一屬文有奇氣文宗尙王李謂歸太僕秀善而衷於宋氏之理秀善
則易柔衷於宋氏則理信而詘於氣乃貫穿史學慨然思有以見用於世與同里
劉醇驥相切劘文震孟極賞之自是名著江漢間流寇躡楚職方楊又先議安插
格里眼左金玉諸降賊斬黃山後號曰新民仁熙奏記謂新民坐食民粟而弗佃
舊民之畝食且盡將去而蠶食他方公乃以爲檻虎不憂其餓而噬人誤矣昔武
侯兵民雜處涓濱而不亂以屯田耳項襄毅之於房竹王文成之於桶岡大藤亦
在操縱有方始能鎮服後卒如所料國變後山居謝絕貴遊宋犖守黃州於雪堂
築東齋延仁熙與論詩仁熙謂時弊雖深慎勿相救公安救歷下失於佻竟陵救
公安陷於孱時以爲知言會詔中外臣薦隱逸尙書吳正治諸人欲舉仁熙或以
爲不可屈遂止嘗自結五經社與從兄肆力於學垂老猶進曾元孫口授六經大

義書法在顏米間卒年八十四著有藕灣詩集十卷二集十卷文集九卷雪堂墨品一卷又有日庵野錄雨湖莊論別錄草窗祕錄近詩文都三十卷 劉醇驥字千里亦廣濟人生而有文在手曰歷及長治詩古文辭詩宗盛唐五七言近體尤工文宏麗生獍寡兀幾不能句或譏之益自喜年過壯始悔之嘗自序其詩云奉嘉隆間二三名入集要去其襲迹以近古爲是不能作宋元下廉纖支折語又作鍾惺譚元春傳謂學王李未至襲風格備鏗鏘猶俟諸三餘儉儒苦古帙浩繁便援公安竟陵而以其竅鳴也其不肯附和時流類如此又究心儒先書以歲貢入都與魏裔介曹本榮魏象樞講業極懽或勸之仕曰吾固不任是也遂歸李呈祥分巡興國率博士弟子數十人迎至赤庵師事之康熙十四年卒年六十九所著詩賦傳記通書五經諸解大易論語孟解學庸古本解共百卷已刊行者古本大學解二卷芝在堂集十五卷卒後同里金德嘉晤裔介象樞皆嘖嘖稱醇驥君子云 王戩字孟穀湖北漢陽人康熙四十七年副貢生嗜學好古於書無所不窺工詩古文辭下筆千言立就與同邑李以篤彭心錦文師鴻江穎齊名時稱漢陽五家又稱楚中二王前湘潭王岱後戩也詩宗溫李一洗近調少刻意研究上下

千古源流派別瞭如指掌既受業王士禎門乃盡變少作蓄才於法一以氣韻爲主士禎謂其銜華佩實自名一家楚才自胡承諾顧景星而外僅見此人居京師時湯右曾吳士燾咸推重之文酒唱和無虛日善飲徹夕不辭座客出僻典相難輒曰出某書某卷其淹雅如此後中外辟舉山林隱逸九人譏與焉不赴性篤孝父士乾教授長沙爲人誣訟罷官徒步走三千里訴於司寇事得白著有突星閣詩集

劉獻廷

劉獻廷字繼莊順天大興人先世本吳中以祖父官太醫遂家順天獻廷年十九復寓吳居吳江者三十年晚更遊楚復之燕後返於吳康熙三十四年卒年四十八少穎悟絕人嗜讀書竟夜不臥父母禁不與膏火則然香代之因眇一目及長博覽經史百家慨然負大志不肯爲詞章之學嘗言聖人所以謂人爲天地之心者以天地不能爲者人心之知能爲之剝復否泰存乎運而轉移者心之仁人苟不能幹旋氣運徒以其知能爲身家之謀則不得謂之人何足爲天地之心哉故其爲學主於經世自象緯律曆邊塞關要財賦軍器之屬旁而岐黃者流以及釋

道之言無不留心生平講學之友嚴事者無錫顧培衡陽王夫之而尤心服者南昌彭士望也崑山徐乾學善下士又多藏書大江南北宿老爭赴之獻廷遊其間超然獨得議論不隨人後鄞萬斯同於書無所不讀最心折獻廷引參明史館事顧祖禹黃儀長於輿地亦引獻廷參一統志獻廷謂諸公考古有餘而猶未切於實用其論向來方輿書大抵詳於人事而天地之故概未有聞當於疆域之前別添數則先以諸方之北極出地爲主定簡平儀之度制爲正切綫表而節氣之後先日蝕之分杪五星之陵犯占驗皆可推矣諸方七十二候各各不同如嶺南之梅十月已開桃李臘月已開而吳下梅開於驚蟄桃李開於清明相去若此之殊今世所傳七十二候本諸月令乃七國時中原之氣候今之中原與七國之中原不合則曆差爲之今於南北諸方細考其氣候取其核者詳載之爲一則傳之後世則天地相應之變遷可以求其微矣燕京吳下水皆東南流故必東南風而後雨衡湘水北流故必北風而後雨諸方山水之向背分合皆當按籍而列之而風土之剛柔暨陰陽燥溼之徵又可次第而求矣其論水利謂西北乃二帝三王之舊都二千餘年未聞仰給東南何則溝洫通而水利修也自劉石雲擾以訖金元

千餘年不知水利爲何事故西北非無水也有水而不能用也不爲民利乃爲民害旱則赤地千里潦則湮沒民居無地可瀦無道可行虞集始奮然言之郭守敬始毅然行之未幾竟廢三百年無過而問者有聖人者出經理天下必自西北水利始西北水利莫詳於水經酈注雖時移勢易十猶可得六七酈氏略於東南人以此少之不知水道之當詳正在西北欲取二十一史關於水利農田戰守者詳加考覈附諸家論說爲之疏以資異日施行者之考證又言朱子綱目非其親筆故多迂而不切而關係甚重者反遺之當別作紀年一書凡獻廷所撰著其運量皆非一人一時所能成故雖言之甚殷而難於畢業是亦其好大之疵也其生平自謂於聲音之道別有所窺足窮造化之奧百世而不惑嘗作新韻譜其悟自華嚴字母入而參之以天竺陀羅尼泰西臘丁話小西天梵書暨天方蒙古女真等音又證之以遼人林益長之說而益自信同時吳爰自謂蒼頡以後第一人獻廷則曰是其於天竺以下書皆未得通而但略見華嚴之旨者也獻廷之法先立鼻音二以鼻音爲韻本有開有合各轉陰陽上去入之五音陰陽卽上下二平共十聲而不歷喉腭舌齒唇之七位故有橫轉無直送則等韻重疊之失去矣次定喉

音四爲諸韻之宗而後知泰西臘丁話女真國書梵音尙有未精者以四者爲正
喉音而從此得半音轉音伏音送音變喉音又以二鼻音分配之一爲東北韻宗
一爲西北韻宗八韻立而四海之音可齊於是以喉音互相合凡得音十七喉音
與鼻音互相合凡得音十又以有餘不盡者三合之凡得音五共三十二音爲韻
父而韻歷二十二位爲韻母橫轉各有五子而萬有不齊之聲攝於此矣嘗聞康
甲夫家有紅毛文字惜不得觀之以合泰西臘丁話之異同又欲譜四方土音以
窮宇宙元音之變乃取新韻譜爲主而以四方土音填之謂諸方有土音又有俚
音蓋五行氣運所宣之不同各譜之爲一則合之土產則諸方人民性情風俗之
徵皆可推而見矣又言聖王之治天下自宗法始無宗法天下不可得治宜特爲
一書以發明之亦未就故有貲數千金以從遊者衆有困乏或罹患難則傾貲濟
之用是遂匱倦遊歸方謀與同志著書不一年而歿歿後其弟子黃宗夏輯其遺
書爲廣陽雜記鄞全祖望稱爲薛季宣王道甫一流云

黃儀 鈕琇

黃儀字六鴻江蘇常熟人精輿地學嘗謂班固地志所載諸川第言其所出所入

而中間經歷之地不可得而聞惟水經備著之然非繪圖不能了然心目乃反覆尋究每水各爲一圖凡都邑建置沿革山川險易皆縷析而條分之參伍錯綜各得其理閻若璩嘗問儀後漢志温縣濟水出王莽時大旱遂枯絕是河南無濟今且千六百七十餘年矣何酈道元言之詳且析也儀曰新莽時雖枯後復見酈氏所謂其後水流逕通津渠勢改尋梁脈水不與昔同是也祇緣杜君卿不信水經專主司馬彪志竊以彪不過紀一時災變非謂永不截河南過也儀又言趙奢解關與之圍關與有四水經注梁榆水逕梁榆城南卽關與故城也趙奢破秦於此盧湛賦云訪梁榆之虛鄆弔關與之舊平梁榆城今在遼州和順縣括地志關與聚落今名烏蘇城在潞州銅鞮縣西北二十里趙奢破秦軍處銅鞮今沁州上黨涅縣有關與聚劉昭注云史記趙奢破秦兵關與涅在今武鄉縣隋地理志武安縣有關與山在縣西南五十里卽趙奢拒秦處武安屬今彰德府磁州若在武安去邯鄲僅六十里何煩奢卷甲而趨之二日一夜乎當在潞州者近是矣尙書徐乾學奉詔修一統志開局洞庭山儀與閻若璩胡渭及常熟顧祖禹並入幕分纂從前或有沿誤者悉用其說釐正焉儀又著有訂晉書地理志詩學晚唐詞亦俊

邁吳江鈕琇稱之謂可追響東堂齊蹤西麓晚歲移居邑之鶯沙著有紉蘭集
鈕琇字玉樵江蘇吳江人康熙十一年拔貢生歷知河南項城縣陝西白水縣兼
攝沈邱蒲城事後終廣東高明縣項城多曠土民逋賦逃亡琇悉捐舊逋具牛種
以招徠之皆復業其由項城署沈邱也始至閱獄有男女六人訟繫已十七年問
之乃江南之獄所株連者琇毅然釋之以狀聞上官使歸故籍前令方遷太常博
士將行詣琇拜曰我在官十三年不敢出此人君到三日卽釋之才識過我多矣
蒲城歲方稔白晝剽劫率吏卒捕其魁沈諸河其餘黨之蔓延者村民縛以來盡
殺之盜乃息高明雖小邑正供之外尙有雜稅聽民輸納歲不過十一二公需不
給則省官用以足之邑有地名大沙圍賦繁而多水災琇下車卽鳩工築隄數百
丈自是水潦無害卒於官旅櫬蕭然越數年乃得歸葬高明人祀之名宦祠琇博
雅工詩文簿書之暇不廢筆墨宰高明時成觚賸一書記明末國初雜事能舉見
聞異詞者折衷之可補正史之闕其文幽豔悽動有唐人小說之遺詩少作驚才
絕豔方駕齊梁中歲則婉麗悲激長於諷諭如和杜秋雨歎泣柳詞皆有關理亂
足備詩史著有白水縣志十四卷臨野堂集十三卷文集十卷詩餘二卷

邵遠平 姚之駟

邵遠平初名吳遠字戒三浙江仁和人康熙三年進士改翰林院庶吉士散館授戶部主事洊陞郎中十四年督學江西陞光祿寺少卿十八年江西巡撫佟國楨薦應博學鴻儒召試授翰林院侍讀二十年充廣東鄉試正考官遷庶子二十二年年充日講起居注官晉翰林院侍讀學士擢詹事府少詹事與修一統志尋致仕歸息影湖莊杜門謝客以琴史自娛於世務泊如也聖祖南巡御書蓬觀字以賜乃自號蓬觀子性耿直不喜媵阿視學江右時值滇逆叛然士子至者輒隨其後先試之甲乙殿最取決俄頃無不驚服遠平高祖經邦明正德進士刑部主事遷員外郎建言獲罪著宏簡錄一編自唐迄宋以遼金附載之於元未遑及遠平循其例續之去舊史之重複鄙俚博徵信於載籍以爲元之不足者文也入制誥於帝紀采著作於儒林補以熊禾等十六人傳而於文苑分經學文學藝學三科悉加甄錄至於忠臣義士採輯尤多惟十三志不存然分載於紀傳闕者以補晦者以明凡四十二卷朱彝尊稱其用高曾之規矩損益三十史官之詞傳以華采一家之學非官局所能逮也別著有史學辨誤戒三文存河工見聞錄京邸粵行等

集詩酷摹唐音頗見宏贍其京邸集多典禮紀頌之章世競傳之 姚之駟字魯斯浙江錢塘人康熙六十年進士改翰林院庶吉士官至御史之駟爲諸生時值四十六年聖祖南巡以所著類林新詠進呈蒙留乙覽梓以行世生平博雅好古尤長於史學嘗蒐輯後漢書之不傳於今者八家凡東觀漢記八卷謝承後漢書四卷薛瑩後漢書張璠後漢記華嶠後漢書謝沈後漢書袁山松後漢書各一卷司馬彪續漢書四卷總二十一卷名曰後漢書補逸又嘗摘取元明諸書分門雜載爲元明事類鈔四十卷元時故實載於說部者最少之駟誌疆域則引劉郁西使記以證拓境之遠誌任官則引經世大典以證銓法之密又如引詩會小傳以誌馬祖常之耿直引名臣言行錄以誌霍肅公之公正皆足補志傳所未備至記宮殿一門雜取元掖廷記元人詩集搜羅甚博更可與析津志諸書相參云

沈珩 沈光邦

沈珩字昭子浙江海寧人康熙三年進士授內閣中書十八年召試博學鴻儒授翰林院編修與修明史二十年充順天鄉試副考官明年以疾乞歸性警穎嗜學少事制舉業輒見知先達諸名家識者知其器識不凡其學以窮經研理爲務屢

會諸生講太極圖說西銘白鹿洞規及性理經術諸書有龍山齊安諸會語欲學者於日用事務間求致知力行之要闡明濂洛關閩之傳論交當世同人有辨及異同者珩瞿然曰今日當論邪正不當論是非聞者縮舌所爲文規做廬陵自少迄老丹鉛不去手著述甚富已刊者爲耿巖文鈔初集二集及詩集卒年七十七時康熙三十四年也珩留心經濟會里中揭竿索餉族人憤之珩躡足曰此不可以憤爲也憤則無噍類矣佯與之約餉千金卒擒其魁歸後寓鴛湖時嘉興同知孫曰恕督修海船訪珩於僧寺珩引唐代轉運船場之利病見於眉山之論者以爲說孫大稱善後水師平海寇孫曰恕所部檣櫓之助尤多云 沈光邦字廷颺浙江臨海人康熙十七年舉人官內閣中書遷福建漳州府同知未之任卒少穎異能自製刻漏壺嘗精求易說取河洛象數以探先後天成卦之由參朱子啟蒙三角六角乘除句股之法配以天文律呂在星象設作三圈在律管分用八變適與六十四卦縱橫上下自然相生積二十年書成名易律通解後宋世犖讀之謂論奇而法深合易義足爲後學津梁精算術樹臬以測日影翦紙爲儀象以求日月星辰之次舍與陰陽寒暑之推遷皆不爽毫髮而尤深於律學縱考古今律法

上自隸首下及漢唐以後諸家皆窮其旨要幼年讀書樓上足不下樓者三年受知於李紱所爲詩多精湛之思有香魚十二詠爆竹八十韻盛傳於時

陸棻 徐嘉炎

陸棻字義山浙江平湖人原名世枋幼時大兵南下收平湖父被執棻奔赴求代營將指扇上詩示之曰兒能讀是卽救汝父棻朗誦曰收兵四解降王縛教子三陞上將臺此宋人贈曹武惠詩也將軍不殺人卽今之武惠矣營將喜挾與北育之爲所器重將議昏以先問名於楊辭歸遂補諸生入國學試授中書康熙六年成進士管內祕書院典籍十八年以薦召試博學鴻儒列一等授翰林院編修分纂明史尋遷詹事府左春坊左贊善二十九年充福建鄉試正考官三十二年充順天武鄉試副考官旋奉命直南書房上召至乾清宮煖閣出五台山金蓮花限韻賦詩立就蒙優獎三十三年大考列第一超擢內閣學士兼禮部侍郎銜總裁諸書局在閣時長至奏勾決本棻請出矜疑二十餘人後一年告歸棻天性孝友篤志承歡與伯兄南雄府知府世楷友愛世楷先逝棻教養遺孤俾成立居處簡易雖貴顯歆然不自足其讀書務精察不計卷帙行文未嘗拘一格顧必及於格

嘗謂緇衣曰言有物而行有格格者法也車塗有九軌仍一軌耳與世楷及譚璉譚瑄朱彝尊共學彙作正統論五篇與四人論議不合論成皆躓彙言三十八年卒年七十所著雅坪文稿十卷詩稿四十卷詞譜三卷應試進呈詩文合刻一卷又編歷朝賦格十五卷起自荀卿宋玉下迄元明分三格五類爲賦家準則徐嘉炎字勝力浙江秀水人明兵部尙書必達曾孫與松江夏存古嘉興錢不識警敏相頡頏有三神童之目又與從父善同席研人稱大小阮康熙十八年以戶部侍郎于可託薦由國子生召試博學鴻儒列一等授翰林院檢討嘉炎在史館中著作迥異恆人二十年大兵收滇黔羣臣皆獻頌嘉炎亦仿饒歌鼓吹曲自聖人出至文德舞因事立名凡二十四章二十四年元夕聖祖於南海大放燈火使臣民縱觀又作紅門花火記皆稱旨嘉炎強記絕人九經諸史均能成誦閻若璩護短而善爭見嘉炎每折服之嘗侍直上命背誦咸有一德全篇不失一字至厥德靡常數語則歛容奏曰臣不敢誦上爲嗟異又問宋元祐三黨諸人是非嘉炎數對諸人姓名始末及先儒論斷優劣語甚詳特賜御書臨蘇軾詩一卷二十五年充日講起居注官二十九年充貴州鄉試正考官洊陞內閣學士兼禮部侍郎銜

充三朝國史及會典一統志副總裁官以疾告歸賜御書直西清額及對聯詩幅著有抱經齋集二十卷

任辰旦 徐咸清

任辰旦字千之浙江蕭山人康熙六年進士授江蘇上海縣知縣十八年舉博學鴻儒報罷復以良吏薦二十二年入爲工科給事中遷兵科二十三年充湖廣鄉試正考官二十五年轉大理寺丞以憂歸卒年七十幼奇慧與毛奇齡同學誦賈長沙疏三過卽成誦旬日不忘奇齡甚敬之嘗爲權書十篇以示有用善詩文然不多作偶爲之窮極工麗擅庖鮑之勝輒棄去不存官上海時量減額租及修築黃龍浦插民利賴之大兵南征州縣趣造烏船渡湖驛徧村堡辰旦入鄉度木百姓獨遮道饒以茶棗得木皆給以值民各辭金揖讓林木間辰旦命不取值者卽還其木乃領去奇齡嘗作上海集課記以紀其績官給事中時疏五上請酌減蘇松賦額以遂民生預籌經費以貽良法慎用人以肅紀綱覈廉貪以飭吏治酌藩司護印以重憲職言皆切直陳鵬年爲辰旦典試所得士傳其學著有介和堂詩文集二卷言近錄一卷 徐咸清字仲山浙江上虞人國子生康熙十八年舉

博學鴻儒罷歸少奇慧一歲能識字五歲通一經甫束髮卽以文章名娶商周祚女嗜學能詩就稽山關廣庭構藥欄設長筵發所藏書暇輒與之博考羣籍抽牘賦詩女昭華執經於毛奇齡亦有詩才咸清洞精字學於三蒼爾雅諸書自李程以下正變沿革源流瞭然又博極墳典恣其考覈古今篆隸無不殫晰嘗取訓纂說文玉篇玉海以正字形取切韻唐韻廣韻集韻以正字聲而縱考經史子集暨唐宋元大小篇帖凡有繫於說文者悉搜採以正字義名曰資治文字凡一百卷毛奇齡稱其訂證之確引據之博爲古今巨觀入都時高陽李蔚工小學與論字辨詰是非深爲折服罷後馮溥薦之會有沮之者遂止歸十年卒

顏光敏 李澄中 曹貞吉 謝重輝 王萃 張篤慶

顏光敏字遜甫山東曲阜人顏子六十七世孫幼好讀書九歲工行草十三嫻詩賦康熙六年進士除國史館中書舍人會聖祖幸太學加恩四氏子弟之官於朝者光敏由中書授禮部主事次年充會試同考官出督龍江關稅務調吏部主事洊陞考功司郎中充一統志纂修官光敏書法擅一時尤工詩輦下稱詩有十子之目謂田雯宋犖王又旦丁澎曹禾曹貞吉謝重輝葉封汪懋麟及光敏也新城

王士禎嘗曰吾鄉後來英絕當讓此人其五言原本三謝七古在李頎杜甫之間近體秀逸深厚出入錢劉吳江計東謂以此鼓吹休明卽孔顏世室中之樂府琴瑟也當時以爲知言讀書折衷羣儒言自出新義其於大學章句持論尤斷斷雅善鼓琴精騎射蹋鞠喜山水嘗西登太華循伊闕南浮江淮觀濤錢塘沂三衢凡所遊歷光敏必命畫工爲圖得金石文恆懸之屋壁性孝友厚於睦族居鄉以禮讓人立朝遇政事侃侃不阿有一善未嘗自矜也眉宇英異銳意讀書明於律法句股之數著有未信編樂圃集舊雨堂集南行日記二十五年卒年四十七顏氏多以忠孝文學著光敏兄光猷字秩宗康熙十年進士改翰林院庶吉士散館授刑部主事歷陞郎中外擢河東鹽運使著易經說義水明樓詩弟光敏字學山康熙二十七年進士改翰林院庶吉士散館授檢討三十二年充浙江鄉試正考官次年提督浙江學政清白自勵杜絕干請去任時浙人爲立清德碑 李澄中字渭清山東諸城人始生時父夢李攀龍入室少穎異弱冠工爲文試必冠諸生尤好爲詩今體學盛唐古體學漢魏時方趨宋元詩鮮知之者久始翕然宗之康熙十八年召試博學鴻儒授翰林院檢討充明史纂修官奮筆侃侃無所避嘗召赴

瀛臺泛舟賦詩稱旨賜予稠疊大學士真定梁清標屬爲文操紙千言立就曰真奇才也由贊善歷陞中允侍講二十九年充雲南鄉試正考官或以多金遮馬首澄中勃然曰敢以此污我耶疾斥之去比還行篋蕭然孝竹松子石而外詩數冊而已尋轉侍讀年六十六告歸澄中橐筆侍從十有三年衣食粗自給及歸以長子爲寡嫂胡氏後又爲外曾祖邱氏立嗣皆割田予之坐是家中落退居灘上茅屋數椽僅蔽風雨亦終無戚戚意三十九年卒國初詩人山左爲盛澄中與萊陽宋琬新城王士禎兄弟安邱曹貞吉曲阜顏光敏後先並起各有所就了無依傍故詩家以爲難著有臥象山房集三卷附錄二卷日雲邨集八卷 曹貞吉字實庵山東安邱人康熙三年進士官至禮部郎中生而嗜書以歌詩爲性命始得法於三唐後乃旁及兩宋汎濫於金元諸家所爲詩氣清力厚一往情深而不喜矜言體格嘗爲黃山紀遊諸作宋犖見之曰此山名作向推虞山今被實庵壓倒矣在京師時和王士禎文姬歸漢等長歌極有筆力士禎選十子詩畧貞吉與焉間倚聲作詞追蹤宋人吳綺名家詞選以爲壓卷流傳江左一時推爲絕唱爲人介特自許意所不欲萬夫不能回以是多取嫉於人而亦以是爲清議所重尤篤於

師友嘗從施閏章遊閏章歿經紀其後不遺餘力每與汪士鋐話及往事涕泗交頤所作拜愚山野殯三章低徊欲絕著有朝天鴻爪黃山紀游等集其後人彙刊之曰珂雪詩然士禎感舊集所撰諸詩皆不見集中蓋全藁多散失云 謝重輝字千仞山東德州人以父廕起家官刑部郎中引疾歸博雅好古工詩與侍郎田雯齊名爲王士禎所推名在康熙十子中王士禎嘗稱其去膚存骨去枝葉存老榦後世有元次山杜清碧其人當相賞於絃指之外居官以清節著不名一錢嘗監崇文門稅至於缺額晚所詣益進十子詩畧中盛年傳作概削不存有杏村詩集七卷 王萃字秋史山東歷城人世居浙之杭州父鉞官江南上元縣衛守備流寓濟南居灤水之澣萃性孝好讀書負奔軼之才嗜古好奇視鄉里間舉無足當意者人以狂士目之尤致力於詩閉門苦吟絕交游王士禎賞其詩並奇其人德州田雯過歷下見其詩物色之稱於巡撫張鵬延見講布衣之好旣友蒲州吳雯所爲詩益清拔絕俗有亂泉聲裏才通屐黃葉林間自著書黃葉下時牛背晚青山缺處酒人行之句時稱爲王黃葉康熙四十五年成進士授知縣以母老改就成山衛教授成山近海僻陋萃載書往集諸生晨夕講論人始知學歲餘以養

母乞歸白頭侍奉孺慕若小時蓋其篤孝質直立身有本異於薄俗詩人之有文無行者所居近望水泉元于欽所編七十二泉之第二十四也自稱七十二泉主人五十九年卒年六十所著曰二十四泉草堂集又有蓼村文集四卷 張篤慶字歷友山東淄川人康熙二十五年拔貢生學殖淹博洋洋纒纒動輒千言少受知於學政施閏章會有博學鴻儒之徵或有欲薦之者篤慶力辭既貢京師公卿耳其名問字唱酬者履滿戶外應京兆試不利歸而杜戶臥崑崙山下益發憤著書詩以盛唐爲宗歌行尤擅場不失空同大復家法所著有班范肪截五代史肪截兩漢高士贊八代詩選詩文名崑崙山房集

喬萊

喬萊字子靜江蘇寶應人父可聘明末御史以伉直著聲萊康熙六年進士授內閣中書十一年充順天鄉試同考官十八年禮部主事趙隨舉應博學鴻儒召試列一等授翰林院編修與修明史二十年滇黔平二十一年二月補行鄉試命萊爲陝西正考官還充實錄館纂修官二十四年大考一等四名閒日覆試列第五上褒其學問優長文章古雅充日講起居注官尋擢中允纂修三朝典訓遷侍講

轉侍讀會御史奏濬海口瀉積水而河道總督靳輔上言濬海口不便請於邵伯高郵間置閘洩水復築長隄抵海口以束所洩之水使水勢高於海口則趨海自速下廷臣議多是河臣言適萊入直召問萊疏陳四不可行畧言河臣議開大河築長隄隄在內地者高丈六尺河寬百五十丈近海者隄高一丈河寬百八十丈勢必壞隴畝毀村落不可行一河臣議先築圍埂用車踏去埂內之水取土築隄淮陽地卑原無乾土況積潦已久一旦取土積水中投諸深淵工安得成不可行二河臣欲以丈六之隄束水一丈是隄高於民間廬舍多矣伏秋風雨驟至勢必潰卽當未潰之時瀦水屋廬之上豈能安枕不可行三至於七州縣之田向沒於水今束河使高田中之水豈能倒流入河卽不能入海淹沒之田何日復出不可行四上是之河臣議乃寢二十六年罷歸三十三年召來京旋卒年五十三萊少從王士禎遊士禎稱其使粵時詩奇秀峭拔古文師汪琬琬極推之晚研經學潛心讀易所著易俟二十卷雜采宋元諸家易說推求人事參以古今治亂得失蓋誠齋易傳之支流詩文有應制集使粵集歸田集子崇修字介夫貢生以學行聞雍正元年與漳浦蔡世遠同邑王懋竑同召見授銅陵縣教諭著有樂

玩齋集陶園集崇修子億字慕韓國子監生與沈德潛交善工詩近體在王孟錢劉間五言古體直追漢魏著有小獨秀齋詩窺園吟藁三晉遊草夕秀軒遺草惜餘存稿劍谿說詩二編杜詩義法詩臆記藝林雜錄

林麟焜 張遠

林麟焜字石來福建莆田人康熙九年進士官內閣中書二十一年檢討汪楫奉命冊封琉球麟焜爲副卻宴金廩費琉球人德之使還除戶部主事晉員外郎二十六年充四川鄉試副考官轉禮部郎中三十三年出爲貴州提學僉事拔單寒正文體士風丕變旋告歸麟焜少從王士禎游以詩名嘗題塔山牡丹絕句二首士禎亟賞之官中書時日與海內名流遞相唱和嗣耿逆之亂麟焜知閩變將作潛由邵武出杉關入京人服其先見歸後葺北村別業觴詠其中不與外事著有玉巖詩集七卷竹香詞一卷列朝外紀莆田縣志 張遠字超然福建閩縣人生兩月而孤從母陳氏受章句輒了了稍長貫穿經書大義下筆有奇氣避逆藩亂挾策游四方千里間關未嘗一輟鉛槧僑寓常熟爲贅壻因家焉偶至西江題詩滕王閣侍郎曹溶過而嗟賞招入幕所至爲延譽名大起王士禎宋犖皆深器之

引爲入室弟子與朱彝尊查慎行等唱和甚富舉康熙三十八年鄉試第一晚得雲南祿豐縣知縣卒於官遠嘗謂閩越自林子羽以平澹之詩鳴巖滄浪高廷禮先後倡爲盛中晚之說習以成風逮晉安風雅書出後之作者襲其膚淺浮泛之詞以步趨唐人餘響遂以不振所爲詩近元白長慶體在晉安詩派中爲別調沈德潛稱其大段疏朗異於局束如轅下駒云著有無悶堂詩集四十卷文集一卷

徐倬

徐倬字方虎浙江德清人十歲就童子試冠一軍十七遊會稽受知於倪元璐遂執經於門元璐復挈之謁劉宗周自是以正學爲依歸嘗作近思錄序云邵子舉元會運世與皇帝王霸之略推測於無窮自謂能以一心觀萬心以一身觀萬身以一物觀萬物以一世觀萬世而不知觀萬心者止觀一心也觀萬身者止觀一身也觀萬物者止觀一物也觀萬世者止觀一世也朱子先天之學得之邵子而近思錄取四子而不及邵其亦慮學者窮大而失居乎時明季社事朋興爭欲引倬爲重倬恥事徵逐獨講學於羌山荷浦之間從遊者日衆康熙十二年成進士改翰林院庶吉士以選入史館授編修乞歸養者十年服闋入京轉司業三十二

年充順天鄉試正考官所得多佳士姜宸英顧圖河汪繹皆出其門尋陞侍讀以年老乞歸時已七十矣四十四年聖祖南巡倬子元正扈從奉旨許以水道先行省親法駕駐西湖召試在籍諸臣以倬爲第一四十五年倬繕錄所著全唐詩錄一百卷進呈得旨嘉獎特由侍讀擢禮部侍郎以旌好學併御製序文賜帑金刊板五十年倬年八十九特賜御書壽祺雅正四大字扁額踰年卒倬兼工詩古文辭少與如皋冒襄父子友善晨夕相唱和一時名士咸推之其詩如彈丸脫手無郊島寒瘦之習晚歲學既老爲文益鉅碑版之作爛照四方求請者踵相接著有修吉堂文稿八卷應制集二卷寓園小草一卷燕臺小草一卷梧下雜鈔二卷蘋蓼閒集二卷甲乙友鈔一卷黃髮集二卷詞集二卷耄餘殘瀆二卷其後合刊之統名蘋邨類稿元正字子貞康熙四十八年進士由編修官至工部尙書著有清嘯樓草一卷鸞坡存草一卷徐氏五世翰林倬其第二世元正其第三世云

蔣伊 陸肯堂 吳暉

蔣伊字渭公江蘇常熟人少肆力於學爲諸生時卽負經世志康熙十二年成進士上所著玉衡臣鑒二錄自唐虞下至元明采其事要備法戒昭勸懲奉旨留覽

改翰林院庶吉士散館授御史巡視中城時南方用兵城邑殘破民多流亡上疏言新復州縣宜禁剽掠緩徵輸責有司招徠開墾課其戶田以爲殿最又以奸民挾仇動藉叛逆誣良善請嚴反坐之律有司若敢以賄枉法者治重罪至於蘇州駐防滿兵糜餉擾民亦請移駐他要地均下所司議行十五年疾歸十八年入京補廣西道監察御史時連年用兵征調四出且初開捐例選途雜壅乃草四疏繪十二圖上之上覽奏動容嗟歎其他論六部積習及救荒要策皆深憂至計老成謀國之言十九年出爲廣東糧儲參議革耗羨禁饋獻除差徭日買乾魚自給不取民間一物又建義學設書院集諸生肄業其中月會旬課一年人知向學粵人德之會詔求學行兼長者充督學任九卿以伊薦遷河南按察副使提督學政二十六年試開封得疾卒年五十七生平見義勇爲篤於師友會試出熊賜履門賜履被放伊聞之飲泣謂所知曰非敢阿好爲斯道惜耳嘗讀近思錄伊川答友人示奏稿書云公專以畏亂爲主吾欲以安民爲先祈財以活人不若輕財而重民生平常服膺斯言爲學兼通儒釋戒子孫行功過格無故不得特殺著有蔣氏家訓一卷疏稿一卷莘田文集卒後士請立祠祀之後二十年上賜御書祠堂扁曰

懷蓋興文以衰遺直子二陳錫官至雲貴總督廷錫官至文華殿大學士自有傳
陸肯堂字邃深江蘇長州人康熙二十四年一甲一名進士授翰林院修撰二
十六年充江西鄉試正考官旋充日講起居注官官至侍讀卒年四十七肯堂穎
悟嗜學初受知於朱彝尊王鴻緒徐乾學汪琬皆推重之相與訂交工詩古文辭
滂沛闕闕如萬斛泉不可壓止所撰誥命制敕傳記詩章務歸典要朝廷大著作
多出其手聖祖嘗謂閣臣曰陸肯堂學問人品俱優屢拜文綺之賜嘗以疾乞歸
上命內閣學士哈山三寶偕醫往視其恩遇如此著有三禮辨真懷鷗舫詩存陸
氏人物考 吳暉字元朗江蘇太倉州人康熙二十七年進士歷官至兵科給事
中以事落職旋入直武英殿充書畫譜纂修官幼擅才華工詩近體清穩時稱雅
音家人奴隸咸通音律尤留心掌故始官戶部於疆域戶口田地漕運錢法鹽課
茶馬關稅雜稅物產三庫十倉常平官俸兵食經費設官廨署自漢唐至國朝皆
爲考訂著左司筆札二十卷又有西齋集

高層雲 子不騫

高層雲字二鮑江蘇華亭人康熙十五年進士十八年舉博學鴻儒報罷旋授大

理寺左評事二十四年充廣西鄉試副考官又充一統志纂修官層雲官評事六年意所平反或與卿貳不合必力爭之不得則爲兩議以上輒如所請行尋授吏科給事中二十六年文皇后上賓詔諸王大臣集議喪禮永康左門外諸親郡王貝子貝勒公等環坐閣臣等議禮畢向諸王跪白其議時大學士李之芳年老踏地層雲彈奏謂集議國政異時無弗列坐天威咫尺非大臣致敬諸王之地諸王不宜倨受其跪失藩臣禮上是其言著爲令時遣臺省漢官隨大軍往鄂羅斯層雲慷慨請行舉朝偉之師京亢早有詔求直言時政層雲請停江淮屯田以蘇民困上嘉納焉遷通政司右參議又遷太常寺少卿二十九年卒年五十七層雲倂儻瑰瑋好大節不爲媸媸細謹少刻意爲詩文初入都時上方幸學卽泚筆爲臨雍賦見稱於時詩擬少陵頗能超俗尤工書畫時稱太常三絕著有改蟲齋集子不騫 不騫字槎客聖祖南巡至松江詔求名士可備顧問者靖逆侯張雲翼以不騫對遂以布衣召試行在稱旨命獻詩及駢體文日已晡脫口立就上大悅使扈從入都賜第西華門供奉內庭歷朝祕書多貯皇史宬人莫至命不騫乘馬入成檢視御衣御硯御書賜賚與諸臣等旋授翰林院待詔乞旨敕所司行釋褐禮

上許焉所纂方輿考畧月令輯要分注御選唐詩既成乞假葬母歸遂不出不騫少親炙朱彝尊交惠士奇何焯張大受諸名士嗜古最深其爲學長於考訂說古今典禮悉有據依詩專尙唐音歸後優遊林泉以詩文給朝夕二十九年卒年八十七著有商確集羅囊草傳天集松珩書屋集

龐塏 袁佑 邊連寶

龐塏字霽公直隸任邱人祖招俊著尙書正旨康熙中欽定書經傳說彙纂多採用招俊說塏幼有至性七歲時父緣事被逮母每夕叩天求佑塏卽隨泣拜弗輟年十四涉獵子史工爲文康熙十四年舉人十八年召試博學鴻儒授翰林院檢討分修明史明都御史某者諂附魏闈其裔暮夜懷金求勿入魏黨傳力拒之二十四年大考降補內閣中書尋遷工部主事洊陞戶部郎中勤於吏事暇則讀書敗屋土鏗彈琴詠歌以自適旋授福建建寧府知府會浦城令以嚴苛激變邑人乘夜焚册局殺吏胥罷市令懼而逃塏聞兼程赴浦集紳民明倫堂諭毋生亂變遂定僅坐重罪一人流二人浦人感之立書院以祀所屬九仙山多盜往往掠人索贖塏絕其窩引遣役密捕之前後獲數十人境內帖然未幾告歸年六十九卒

塏少嗜吟詠泊官京師與海鹽彭孫適長州馮勛山陽邱象隨李塏諸城李澄中等相倡和取杜甫詩研索其法所詣益進其論詩云性情禮義詩之體也始終條理詩之用也又曰在心爲志發言爲詩吐納英華莫非情性故其所作一以自然爲宗雅而醇奇而不肆合乎中唐風格著叢碧山房集文八卷雜著三卷翰苑稿十四卷舍人稿六卷工部稿十一卷戶部稿十卷建州稿五卷和陶稿一卷歸田稿一卷又有詩義固說二卷 袁佑字杜少直隸東明人康熙十一年拔貢官內閣中書十八年召試博學鴻儒授翰林院編修三十六年充浙江鄉試正考官官至中允少警敏下筆數千言官中書時侍直南苑著紀事詩六十首爲時所稱在史館與毛奇齡分廳起草日吟一詩然後下直其詩材力與龐塏相埒本原風雅體凡數變每變益工性至孝母嘗疾革籲天乞減算益母壽母歿居喪盡禮服除終不食肉著有詩禮疑義左史後議老子別注離騷荀揚文中子補注莊子注論杜詩注駁雪軒集 邊連寶字肇吟直隸任邱人諸生父汝元與同里龐塏以詩藝相切劘連寶能世其家雍正十三年學政錢陳羣拔之貢成均廷試時禮部尙書任蘭枝與侍郎李紱司校閱署第一發視相賀乾隆元年薦試博學鴻詞報罷

十四年復薦經學辭不赴時友人戈濤亦被薦勸之行答曰吾自審未能如漢伏
勝董仲舒安敢矯誣以倖取哉自是無意進取益肆力於古學其爲詩直達胷臆
才力縱恣出入韓愈孟郊白居易盧仝之間著有隨園集古文病餘草續草長語
卒年七十四

清史列傳 卷七十一

文苑傳二

陳維崧 吳綺 章藻功

陳維崧字其年江蘇宜興人明左都御史于廷孫父貞慧以節概稱著書自娛往還多當世碩望維崧資稟穎異十歲代祖作楊忠烈像贊比長侍父側聆諸名士議論耳濡目染學日進或讌會援筆爲記序頃刻千言瑰瑋無比皆驚歎折輩行與交嗣偕王士禛士禛宋實穎計東等倡和名益大噪時有江左三鳳凰之目維崧其一也補諸生久之不遇因出遊所在爭客之性落拓饋遺隨手盡獨嗜書無不漁獵雖舟車危駭咿唔如故嘗由河南入都與秀水朱彝尊合刻一稿名朱陳村詞流傳至禁中蒙賜問人以爲榮年過五十會開博學鴻儒科以大學士宋德宜薦召試列一等授翰林院檢討與修明史在館四年勤於纂輯嘗懷江南山水以史局需人不果歸疾篤吟斷句云山鳥山花是故人猶振手作推敲勢遂卒年五十八時康熙二十七年也維崧清臞多鬚海內稱爲陳髯與字並行生平無疾

言遽色於諸弟篤友愛其遊公卿間謹慎不泄遇事匡正以故人樂近之而卒莫之狎所著兩晉南北史集珍六卷湖海樓詩八卷迦陵文集十六卷詞三十卷集中文有散有駢駢體自喜特甚長洲汪琬謂唐以前不敢知自開寶後七百年無此等作矣琬固少許可者維崧與琬論六朝之文鈎入深微多出諸賢尋賞之外所作散文亞於駢體詩始爲雄麗跌宕一變而入杜甫沈鬱之調橫絕一世詞至千八百首尤凌厲光怪變化若神前此未有也國初以駢儷文擅長者推維崧及吳綺綺才地視維崧稍弱維崧導源庾信泛濫於初唐四傑故氣脈雄厚綺則追步李商隱以秀逸勝蓋異曲同工云 吳綺字菌次江蘇江都人五歲能詩長益淹貫順治十一年拔貢生以薦授祕書院中書舍人奉詔譜楊繼盛樂府遷兵部主事游歷郎中授浙江湖州府知府多惠政不畏彊禦湖州人稱爲三風太守謂多風力尙風節饒風雅也未幾罷歸貧無田宅購廢圃以居有求詩文者以花木潤筆因名其圃曰種字林日讀書坐臥其中簞瓢屢空泊如也性坦易喜賓客在湖州時四方名流過從賦詩遊讌無虛日其去官亦坐此所作詩詞駢體合編爲林蕙堂集二十六卷詩才華富豔瓣香晚唐詞最有名兒童婦女皆能習之以有

把酒祝東風種出雙紅豆之句號曰紅豆詞人又嘗著嶺南風物記敘述簡雅與宋范成大桂海虞衡志相伯仲輯宋金元詩永能刊除宋人生硬之病與元人縹媚之失選聲集標舉平仄足爲倚聲家程式 章藻功字豈績浙江錢塘人康熙四十二年進士改翰林院庶吉士藻功以孝友聞詩文貫串經史登臨諸詠流連悱惻情見乎詞國初以駢體名者推陳維崧吳綺藻功欲以新巧勝二家然遁爲別調著有思綺堂集

朱彝尊 子昆田

孫稻孫

李良年

譚吉璉

鍾淵映

龔翔麟

朱彝尊字錫鬯浙江秀水人明大學士國祚曾孫康熙十八年詔舉博學鴻儒科以布衣試入選者富平李因篤吳江潘耒無錫嚴繩孫及彝尊四人皆除翰林院檢討與所擢五十人同纂修明史二十年充日講起居注官是年秋充江南鄉試副考官二十二年入直南書房命紫禁城騎馬賜居禁垣東數與內庭宴被文綺時果之賚二十三年元日南書房宴歸聖祖仁皇帝以肴果賜其家人彝尊皆恭紀以詩是時彝尊方輯瀛洲道古錄私以小胥錄四方經進書爲學士牛鈕所劾降一級二十九年補原官尋乞假歸仁皇帝南巡江浙彝尊屢迎駕於無錫召見

行殿進所著經義考溫諭褒獎賜御書研經博物扁額彝尊自少時以詩古文辭見知於江左之耆儒遺老又博通書籍顧炎武閩若璩皆極稱之年逾五十以布衣入翰林數被恩遇主江南試時作告江神文貢院誓神文以自勵所撰經義考共三百卷倣鄱陽馬氏經籍考而推廣之自周迄本朝各疏其大略分存佚闕未見四門於十四經外附以逸經志緯擬經家學承師宣講立學刊石書壁鏤版著錄而以通說終焉乾隆四十二年高宗純皇帝親製詩篇題識卷首命浙江巡撫三寶刊行世以爲榮彝尊之在史館也凡七上總裁書論定凡例訪遺書請寬其期毋如元史之迫於時日多所乖謬辨從亡致身錄之不足信謂方孝孺之友宋中珩王孟縉鄭叔度林公輔諸人咸不及於難則文皇當日無并其弟子友朋爲一族戮之之事其所謂九族者本宗一族也謂東林多君子而不皆君子異乎東林者亦不皆小人作史者不可先存門戶之見而以同異分邪正賢不肖世皆以爲有識彝尊又嘗慨明詩自萬曆後作者散而無統作明詩綜百卷於公安竟陵之前銓次稍詳若啟禎死事諸臣復社文章之事亦力爲表揚之其自序云或因詩而存其人或因人而存其詩閒綴以詩話述其本事期不失作者之旨彝尊詩

不名一格少時規撫王孟未盡所長中年以後學問愈博風骨愈壯長篇險韻出奇無窮益都趙執信論國朝之詩以彞尊及王士禎爲大家謂王之才高而學足以副之朱之學博而才足以運之彞尊又好爲詞其體近姜白石張玉田加恢宏焉所著詞綜三十四卷日下舊聞四十二卷曝書亭集八十卷歐陽子五代史注瀛洲道古錄則其所草創未成者四十八年卒年八十一子昆田 昆田亦工詩文早卒有笛漁小稿附曝書亭集中孫稻孫 稻孫字稼翁貢生天資超敏濡染家法詩格適上尤工分隸初從汪士鋐學書後取柳誠懸米南宮書晨夕撫之遂自成一家王揆爲春秋館總裁官引爲助因挾其家藏二百七十餘家之書以備纂修纂成例得州判以赴友人難關中不及選乾隆元年舉博學鴻詞復報罷性剛介不諧於俗晚益窮困猶守曝書亭藏書八萬卷又刊經義考過半年七十遊揚州復籲盧見曾全刻之厥後開四庫館詔求遺書得全帙上獻流傳海內論者謂其能守先澤生平足跡半天下家居後追憶舊遊作紀行絕句二卷又擬樂府三卷訂定羅浮蝴蝶詩二卷所著六峰閣詩皆少作又有續稿十餘卷 李良年字武曾亦秀水人諸生生有雋才與兄繩遠弟符並著詩名時稱三李少與朱彞

尊王翊周貧繆泳沈進集里中爲詩課良年與彝尊齊名時又稱朱李詩初學唐人持格律甚嚴嘗鈔撮詩中禁字一卷授學者繼乃舍初盛趨中晚及宋元諸集詞不喜北宋愛姜堯章吳君特所作頗似之古文長於議論爲長洲汪琬所推許生平遊蹤徧天下後至京師舉博學鴻儒科罷歸康熙三十三年卒年六十著有秋錦山房集二十二卷繩遠字斯年由諸生入國學考授州同知著有尋壑外言五卷獺祭錄五十卷正字通補正二十卷符字分虎著有香草居集七卷 譚吉璉字舟石浙江嘉興人彝尊姑之子也少有孝行途遇寇以身蔽父寇舍之去以諸生試國子監第一授宏文院撰文中書舍人康熙九年出爲陝西延安府同知吳三桂之叛吉璉守榆林城獨完十八年薦試博學鴻儒科報罷旋遷山東登州府知府未幾卒吉璉勤於讀經能文好著述顧炎武嘗曰我行天下僅見此人其見重如此所著有延綏鎮志二十四卷肅松錄二卷爾雅綱目一百二十卷嘉樹堂集二十卷鴛鴦湖棹歌一卷 鍾淵映字廣漢亦秀水人諸生少好學熟於諸史所爲詩文橫絕時人其論駁援據古昔雖老儒鉅公莫能難居恆遇勝己者執禮甚恭不如己者或相對終日不與語以故鄉曲之士多疾之與朱彝尊李良年

等交最契而年最少彞尊每歎以爲不及遠甚也嘗以五代史與通鑑閒有異同而蜀檣杌南唐書之屬尙不下數十家欲搜採以爲五代史注約彞尊共成之甫事編纂得嘔血疾良年貽書止之猶日夕編摩不肯輟彞尊遊大同轉客太原淵映與書數百言謂五代之主其三皆起晉陽最後劉氏三世固守其地思覽其廢墟考其遺跡未幾遊京師介其友葉舒崇往見汪琬與琬辨論六經三史之源流詩歌古文辭之利病夜漏四十刻猶不止琬欲傲以所不知而淵映性甚敏識甚高琬爲之心折旋出居庸關病復作旬日卒時年三十所著歷代建元考十卷論者謂較吳肅公改元考萬光泰紀元敘韻實爲賅洽其信志堂遺詩二卷彞尊爲序刊之亦稱其和平醇雅卓然可傳 龔翔麟字天石浙江仁和人康熙二十年副貢生由工部主事歷遷至御史翔麟常官有幹實居臺中號敢言尤以文學名詩出入六季三唐而歸宿於眉山蘇氏詞以石帚爲宗旁及梅溪玉田蛻巖諸家之體與朱彞尊李良年李符沈皞日沈岸登時稱浙西六家初居武林田家灣自號曰田居其後得橫河沈氏之居謂之玉玲瓏山館著有田居詩稿十卷續三卷紅藕莊詞三卷皞日字融谷浙江平湖人貢生官湖南辰州府同知著有楚遊燕

遊等集又有柘西精舍詞一卷岸登字覃九亦平湖人性耽泉石不求聞達視褐蔬食屢空晏如兼工詩畫著有黑螻齋詩鈔四卷詞一卷

周箕 沈進 汪森

周箕初名筠字青士浙江嘉興人少嗜學遭亂棄舉子業隱於市且賈且讀未嘗一日無詩與王翊范路沈進繆泳朱彝尊朱一是相倡和四方名士過者輒留飲或醵金會餐泊舟於門相接也胸無柴棘視朋友如一身貧乏者周之傾囊不少惜友人寄千金於箕笥道溺死箕爲具棺斂呼其子至以笥還之其後生計日窘往來嘉善桐鄉間以詩格授人每出少年子弟三五執詩卷隨之行援止者或數日留留或不辭去嘗元日挈子旼至武康銅井入徑山會日暮雪甚虎迹交於塗循澀徑前進旼哭於後不少顧旼至僧舍僧曰山多虎居士遠來得不心動乎曰吾不失道心一動則飽虎口矣朱彝尊典試江南榜發後侍郎田雯與之宴箕布衣紉履與其友顏光敏至衆皆睥眄光敏曰此浙人周青士雯肅之上坐權飲而散或漆人頭爲飲器坐客莫敢視箕獨引滿三杓其儻蕩不羈多類此箕每作詩低頭沈思行街市中若無所見嘗行吟慈雲寺中誤觸當事輿詢知箕乃免又假

嘉善柯氏園月夜吟詩意得甚適郡丞以事至部與園隣攬吟聲不寐詰朝拘至將加戮辱或援之乃解王士禎聞之笑曰袁彥伯不遇謝鎮西幾不免虎口一日念彘尊不置走京師訪之居二年未嘗一詣貴人時徐乾學好士質同里徐善主其家善與質同臥起乾學欲一見之不得也將歸或削三緘贈行曰挾此可得百金答曰質不耐持竿牘伺候人卻不受行至宿遷卒年六十五時康熙二十六年也所爲詩清超樸淡奇趣流行五言尤勝嘗醉書云立言頗突兀應事還恂疏彘尊讀之笑曰先生自寫其形影也古文出入歐曾尤精詞律徧搜唐宋元諸詞家分別體裁著詞緯三十卷今詞綜十卷又有采山堂集二十四卷析津日記三卷投壺譜一卷 沈進初名敍字山子亦嘉興人諸生工詩少與朱彘尊相唱和時號朱沈後與周質賦詩合成一帙又號周沈家貧授徒以自給漁獵諸子百家喜寂靜故沈思刻意下筆有幽致嘗游京師客給事中譚吉瑄家吉瑄與彘尊中表陸圻過彘尊遇進問姓名圻大聲曰得非梅花高館落春草斷垣生之沈山子耶相與飲盡歡而散性狷狹一介不取惟招之飲不拒語人曰谷風之詩忘我大德思我小怨夫人受恩於人本無可怨思之而怨生祇見其小而已晚號知退叟所

居藍邨力圃屋三楹毀其一因目爲半巢居教子讀書其中陶然自樂也卒年六十四其詩早尙清麗晚編所作歸於冲澹著有文言會粹行國錄東園詩藍村稿半巢居稿退叟行吟力圃蕭閒詩袁溪文彙共三十餘卷汪森字晉賢浙江桐鄉人原安徽休寧籍官廣西桂林府通判調太平遷知河南鄭州事會丁母憂未赴官服闋補刑部山西司員外郎擢戶部江西司郎中年六十一以告歸森少工韻語與嘉興周貧沈進相切劘旣復與黃宗羲朱鶴齡朱彝尊潘耒諸大師商榷藝業益進乃營碧巢書屋以當吟窩築華及堂以宴賓客建裘杼樓以藏典籍海內名士舟車接於遠道詩名籍甚官粵西十年歷攝臨桂永福陽朔三縣桂林太平二府所至有惠政衡靖盜竄於苗詔楚黔粵會剿制府檄隨營監記森偵其渠馬三奇繇靖奔北復遁生苗楊灣波浪地乃提士卒兼程進涉諸險隘直擣其巢馬三奇勢迫出戰中石斃餘胥就縛及還督撫郊勞曰武弁擁鐵騎千百建功乃屬文士耶其爲所倚重如此嘗以粵西輿圖闕略考據難資因博采歷代詩文軼事記錄成帙歸田後復借朱彝尊家藏書薈萃訂補爲粵西詩載二十四卷附詞一卷文載七十五卷叢語三十卷其文載於形勢扼塞控置得失興廢利弊紀錄

尤詳論者謂爲明周復俊全蜀藝文志之亞所爲詩五言古得力於陶七言古有高岑風格近律則浸淫於大曆諸家少與兄文桂弟文柏相唱和黃宗羲甚賞之稱汪氏三子晚歲家居以著述自娛輯蟲天志名家詞話等書卒年七十四所著有小方壺存彙十五卷桐扣詞三卷

尤侗子珍

尤侗字展成江蘇長洲人少博聞強記弱冠補諸生才名籍甚歷試於鄉不售以貢謁選除直隸永平府推官吏治精敏不畏強禦怙勢梗法者逮治無所縱坐隸旗丁鐫級歸康熙十八年召試博學鴻儒授翰林院檢討分修明史撰志傳多至三百篇居三年告歸先是侗所作詩文流傳禁中世祖章皇帝以才子目之後入翰林聖祖仁皇帝稱爲老名士天下羨其榮遇比於唐李白云三十八年聖駕南巡至蘇州侗獻平朔頌萬壽詩上嘉焉賜御書鶴樓堂扁額四十二年駕復幸吳賜御書一幅卽家授侍講蓋異數也侗性寬和與物無忤汲引後進一才一藝獎藉不容口兄弟七人友愛無間白首如垂髻四十三年卒年八十七其詩詞古文才旣富瞻復多新警之思體物言情精切流麗每一篇出傳誦徧人口著述甚富

全集五十卷餘集七十卷鶴棲堂集十卷子珍 珍字謹庸康熙二十年進士改翰林院庶吉士散館授編修二十七年充會試同考官尋充大清會典明史三朝國史纂修官日講起居注官遷贊善以養親歸珍濡染庭訓深於詩學少宗唐人歸田後宗宋人晚復悔之仍歸於唐性平和服善每作一詩字字求安有譏彈之者應時改定與沈德潛交最善德潛嘗授經其家中夜論詩不少休所著滄湄筭記道作詩甘苦極詳又有滄湄類稿五十卷晬示錄二十卷卒年七十五

汪楫 汪懋麟 王巖 劉心學 心學孫中柱 張璣

汪楫字舟次安徽休寧人寄籍江蘇江都縣歲貢生署贛榆訓導康熙十八年巡撫慕天顏薦應博學鴻儒召試列一等授翰林院檢討纂修明史楫言於總裁先做宋李燾長編凡詔諭奏議邸報之屬彙輯之由是史材皆備二十一年春充册封琉球國正使條奏七事其一謂國朝文教誕敷頒賜御書於封疆大吏宜并及海外屬國上允其請命齋宸翰以往比至宣布威德王及臣民皆大悅服瀕行例有餽贈楫概卻不受國人建卻金亭誌之歸撰使琉球錄詳載禮儀暨山川景物又因諭祭故王入其廟默識所立主兼得琉球世續圖參之明代事實詮次爲中

山沿革志上以楫奉使盡職敕部優敘久之出知河南府治績爲中州最嘗置學田於嵩陽書院聘詹事耿介主講席士習丕振尋擢福建按察使遷布政使蒞官五載民戴其惠召來京途次得疾會聖祖南巡強起迎謁揚州上熟視曰非汪楫耶今老矣以御書命侍郎李枏就第宣賜二十八年卒年六十七楫伉直意氣偉然能力學處廣陵南北輻輳魚鹽之地日索奇文祕籍讀之四方客至非著聲實而擅文章者則閉戶不出見少工詩與三原孫枝蔚泰州吳嘉紀齊名所作以古爲宗以清冷峭蒨爲致務去陳言又不墮澀體詩文有悔齋正續集觀海集 汪懋麟字季角江蘇江都人與楫同里同有詩名時稱二汪康熙六年進士授內閣中書十八年薦舉博學鴻儒以持服不與試服闋以主事候補左都御史徐乾學復薦懋麟遂以刑部主事入史館充纂修官討論嚴密撰述最多懋麟學持正而才通敏其爲中書時楚人朱方旦挾邪說傾動公卿懋麟獨作辨道論詆之學士熊賜履見其文與之定交及居刑曹勤於職事聽斷矜慎雖強禦不顧也城南武某以一車一馬販米於南花園宿董之貴家之貴利其資殺之以車載屍鞭馬曳之他去武父得屍於道得車馬於劉氏之門訟諸官謂劉殺其子懋麟曰殺人而

置其車馬於門非理也乃微行縱其馬馬至之貴門駭躍悲鳴衝戶以入懋麟收之貴訊翰得實寘於法其發姦摘伏率此類旋罷歸鍵關謝賓客晝治經夜讀史日有程課銳意成一家言甫三年遽以疾卒著有百尺梧桐閣集二十六卷王巖字築夫江蘇寶應人明諸生爲人端嚴事母以孝聞凡祀其先人致齋三日獨處於外入國朝乃絕意仕進與興化陸廷掄倡爲古文其文考據經典而取道於北宋諸家執經問字者踵相接推官李念慈刑部主事汪懋麟與其兄耀麟皆學文於巖巖遺稿盈尺曰異香集曰白田布衣集爲當時所稱不在魏禧汪琬下朱彝尊爲之序謂其立言淳質於姦聲擾雜之際獨能道古其後阮元謂巖與廷掄之爲古文出於雷伯籲伯籲陝西涇陽人明季國初時隱居揚州艾陵湖劉心學字近思亦寶應人父永澄字練江明兵部主事與弟永沁從顧憲成高攀龍講學東林而善於劉宗周文震孟卒後宗周作淮南賦誅之謂其風節行誼爲羅洪先鄒守益之流亞心學少孤承母韓及永沁教補明廩生構興讓堂延諸正人講學劉宗周曰近思以垂髫繼父業予往來江淮必過其廬爲留旬日相與闡身心性命之旨悉了悟無所疑竊幸練江之學不墜嘗侍其祖疾輟省試浹旬不解衣

入國朝隱棋酒間御史朱克簡稱爲古之遺直所著有明史摘要六卷又輯神宗以後事爲四朝大政錄二卷陸嘉淑以爲可無野史亭之遺憾云孫中柱 中柱字雨峯康熙中由廩生授臨淮縣教諭遷國子監學正工詩古文辭與朱彝尊查慎行汪懋麟喬萊王式丹相倡和歷官戶部郎中奉命監京倉上賜詩軸曰求端從有術及物豈無因蓋特眷也出爲直隸真定府知府府沿明季陋規多羨餘一切裁去蠹縣李堪爲詩紀其事曰吾友王摩詰夙稱太守賢政聲今到耳果不酌貪泉摩詰者王源也未幾乞歸所著有漁山園集一卷兼隱齋詩十一卷又來館詩六卷并州百篇詩一卷及史外叢談六館日鈔諸書田雯序其詩曰體製必摹古人而意到神行簡參薊蒞所謂潘陸之華綺季之實殆其兼之子家珍亦工詩著有蠖堂彙北省集藕花書屋集 張璉字韞仲亦寶應人明崇禎舉人革代之際故明商邱縣知縣梁以樟隱居寶應璉與友善以理學節義相切劘所著有木侍樓集璉同邑喬邁字子卓翰林院侍讀喬萊之兄明增生博覽羣書於典故多所辨證尤工五言詩著有歲寒堂集

孫枝蔚李念慈

孫枝蔚字豹人陝西三原人布衣康熙十八年舉博學鴻儒以年老不能應試特旨偕邱鍾仁等七人授內閣中書枝蔚始遭闖賊亂嘗結里中少年奮戈逐賊失足墮土坎中幸不死乃走江都從賈人遊累致千金輒散之既而折節讀書肆力詩古文傲居董相祠高不見之節王士禎官揚州特訪之先之以詩稱爲奇人遂訂莫逆交然未嘗一日忘故鄉也因顏所居曰漑堂以寓西歸之思時左贊善徐乾學方激揚士類一時才俊爭趨之枝蔚獨弗屑也三十六年卒年六十七其爲詩詞氣近麤然有真意稱其人品之高所著漑堂前集九卷續集六卷後集六卷詩餘二卷原本秦聲多激壯之詞 李念慈字岷瞻陝西涇陽人順治十五年進士授直隸河間府推官改新城縣知縣緣逋賦事罷歸會有荆襄之役以奉檄運餉功再起補湖北天門縣知縣康熙十八年與孫枝蔚同舉博學鴻儒報罷性好吟詩嗜遊覽足跡幾徧天下所居曰谷口山房史稱池陽谷口在涇陽縣西北四十里念慈舊廬在焉故名著谷口山房集十卷施閏章稱其雄爽之氣勃勃眉宇自秦之晉南游江淮所遇山川風物寄興屬懷情隨境移蔚焉蒸變蓋秦風而兼乎吳楚者

潘耒 徐鉉 曹禾

潘耒字次耕江蘇吳縣人幼孤生而宿慧讀書日數行下受業於同郡徐枋顧炎武能承其教羣經諸史旁及算術宗乘無不通貫嘉定陸元輔平湖陸隴其交口許爲淹洽康熙十八年以布衣召試博學鴻儒授翰林院檢討與修明史卽作修史議以上謂明更三百年未有成史今欲創爲一書前無所因視昔之本東觀以作後漢改舊書以修新唐者其難百倍宜搜採博而考證精職任分而義例一秉筆直而持論平歲月寬而卷帙簡總裁善其說令撰食貨志兼他紀傳自洪武以下五朝彙皆所訂定尋充日講起居注官纂修實錄聖訓二十一年充會試同考官稱得士名益盛忌者頗衆二十三年甄別議起坐浮躁降調遂歸四十二年上南巡復原官大學士陳廷敬欲薦起之力辭而止耒有至性初被徵辭以母老不獲命乃行除官後復牒吏部以獨子終養請代題者三卒格於議始受職逮居喪哀毀骨立尤篤師門之誼枋歿周恤其孤孫俾得所刻顧炎武日知錄並詩文集生平嗜山水歷遊羅浮天台雁蕩武夷黃海匡廬中岳盡窮其勝各紀以詩文有遂初堂詩集十六卷文集二十卷別集四卷詩不事雕飾直抒所見登臨懷古諸

作一時名流多折服文蹊徑較平而氣體渾厚空所依傍未又因炎武音學五書爲類音八卷炎武欲復古人之遺未則務窮後世之變以爲舊字母三十六有複有漏今刪五增十九成五十母各具陰陽每母之字橫播爲開口齊齒合口撮口四呼四呼之字各縱轉爲平上去入四聲四聲之中各以四呼分之惟入聲十類餘三聲皆二十四類凡有字之類二十二有聲無字之類二以有字者排爲韻譜平聲得四十九部上聲得三十四部去聲得三十八部入聲得二十六部共爲一百四十七部蓋因等韻之法而又推求以己意於古不必合於今不必可施用然審辨通微實自成一言晚歲研究易象數著論十三篇多所心得四十七年卒年六十三 徐鉉字電發江蘇吳江人國學生康熙十八年召試博學鴻儒授翰林院檢討會當外轉遽乞歸後以原官起用不就四十七年卒年七十三鉉好古博學弱冠天才駿發下筆數千言其詩始尙華秀比壯遊與四方豪雋相切劇格調一變成南州草堂集三十卷又嘗刻菊莊樂府崑山葉方藹稱其錦麗幽深耐人尋味朝鮮貢使仇元吉見之以金餅購去鉉既工倚聲因輯詞苑叢談十二卷援據詳明具有鑿裁又有本事詩十二卷 曹禾字頌嘉江蘇江陰人康熙三年

進士官內閣中書十一年充順天鄉試同考官十八年召試博學鴻儒授翰林院編修二十年充日講起居注官典試山東洊升祭酒工詩在京師時與田雯宋犖等相唱和稱詩中十子嘗疏請封禪爲給事中王承祖所駁方象瑛與倪燦讀其文謂鍾惺評司馬相如封禪頌言長卿豈有所求直是胸中好文字不肯埋沒亦想是此意云天性簡易沈酣六經子史嘗撰靖難十六功臣傳論者謂得史漢神髓罷歸後集後進孔毓璣湯大輅耿人龍徐恪之高玉行輩爲文會家故貧至典衣鬻產以給飲饌嘗與盛符升選王士禎詩著有峨嵋集

吳雯 傅山 程康莊

吳雯字天章山西蒲州人原奉天遼陽籍諸生父允升任蒲州學正卒於官遂家於蒲康熙十八年召試博學鴻儒報罷雯少明慧流覽羣籍自六經三史外先秦兩漢下逮六朝唐宋元明四部之書旁及釋老內典祕笈皆能鉤貫旨趣含咀英華所得一發之於吟咏既屢試不售游京師謁父執梁熙劉體仁汪琬皆激賞之尤以詩見知於王士禎目爲仙才嘗語人云僕與海內談詩幾五十年雅材固不乏然得髓者終屬蒲坂生一日與葉方藹同直誦其警句方藹下直就訪之名大

起大學士馮溥以扇索其詩雯大書二絕答之其坦率如是卒以不遇亦不悔也歷游燕趙齊魯吳越秦楚之區晚訪舊京師歸未幾居母憂以毀卒雯詩有鄉人元好問之風不使才不逞博不尙聲華不求媚好峻潔微遠自露天真性尤服善趙執信論詩好用馮氏法攻人之短後相值於都門雯出卷相示曰曩之所攻悉改之矣四十三年卒年六十一著有蓮洋集二十卷蓮花洋在普陀山下雯據名山記華岳山下有蓮洋村因取以名其集云 傅山字青主山西太原人少與孫傳庭共學過目成誦憤明季諸搢紳腐惡乃堅苦持氣節袁繼成爲張振孫所誣山約曹良直等三上書訟之不得達後乃伏闕陳情袁竟得雪馬士奇作傳以謂裴瑜魏劭復出旣曹良直任兵科山貽書曰諫官當言天下第一等事曹慊然卽疏劾周延儒駱養性直聲振一時甲申後居士穴養母給事中李宗孔劉沛先薦應博學鴻儒科時年七十四矣固辭不獲至京師疾甚大學士馮溥首過之臥牀不能具禮蔚州魏象樞以山老病上聞免試特授內閣中書放還山工分隸及金石篆刻畫入逸品趙執信推山書爲國朝第一嘗失足墮崩巖見風峪甚深石柱林立則高齊所書佛經也摩挲終日乃出其嗜奇如此精醫晚年頗資以自給二

十二年卒年八十二子眉能養志每日樵山中置書擔上休擔則取書讀山時出遊眉與子共輓鹿車暮宿逆旅山課讀經史騷選諸書詰旦必成誦乃行所著有霜紅龕十二卷眉詩附焉 程康莊字坦如山西武鄉人官陝西耀州知州工詩古文詞爲時輩所推重嘗登焦山搜瘞鶴銘遺迹缺蝕不完別購善本磨崖刻之復招王士禎同遊相視叫絕各賦一詩紀其事人豔稱之蔣超謂其文瀾韓祖馬兒視樊元孫劉云著有日課堂集

黃虞稷

黃虞稷字愈邵原福建晉江籍父居中明季爲南京國子監監丞甲申聞變不食死虞稷遂家上元爲上元人諸生七歲能詩號神童康熙十八年舉博學鴻儒遭母喪不與試既左都御史徐元文薦修明史召入史館食七品俸分纂列傳及藝文志二十三年充一統志纂修官二十八年總裁徐元文假歸特詔攜志藁於家編輯元文奏言虞稷學問淵博健文筆乞隨相助許之至包山書局刻苦搜討逾年力疾竣事竟以勞卒年六十有三虞稷篤內行持己矜廉而勇於義王士禎毛奇齡吳雯咸稱其詩家世藏書凡八萬卷與江左諸名士約爲經史會以資流覽

及來京師輦下士大夫輒就之借閱無虛日著千頃堂書目三十二卷自題曰閩人者不忘本也所錄有明一代之書最爲詳備其史部分十八門簿錄一門用尤表遂初堂書目之例以收錢譜蟹錄之屬又有楮園雜誌我貴軒朝爽閣蟬窠諸集

毛晉

毛晉原名鳳苞字子九後改名晉字子晉號潛在江蘇常熟人明諸生以布衣自處父清以孝弟力田起家楊漣宰常熟時擇縣中有幹識者十人每有大役倚以集事清其首也晉奮起爲儒好古博覽構汲古閣日耕樓藏書數萬卷延名士校勘刻十三經十七史古今百家及從未梓行之書天下購善本書者必望走隱湖毛氏所用紙歲從江西特造厚者曰毛邊薄者曰毛太至今猶沿其名晉爲人孝友恭謹與人交有終始好施予遇歲歉載米徧給貧家水鄉橋梁往往獨力成之推官雷某贈詩曰行野漁樵皆謝賑入門僮僕盡鈔書蓋紀實也所著有和古今人詩野外詩題跋虞鄉雜記隱湖小志海虞古今文苑毛詩名物考宋詞選明詩紀事詞苑英華僧宏秀集隱秀集汲古閣書目共數百卷其所藏祕籍以宋本元

本橢圓印別之又以甲字印鈐於首其餘藏印用姓名及汲古字者以十數別有印曰子孫永寶曰子孫世昌曰在在處處有神物護持曰開卷一樂曰筆研精良人生一樂曰旅溪曰弦歌草堂曰仲雍故國人家曰汲古得修綆子五俱先晉卒季子屨字斧季陸貽典壻也最知名尤耽校讐有海虞毛屨手校及西河汲古後人叔鄭後裔朱記者皆是也兼精小學何焯輩並推重之孫綏萬字嘉年工詩著有破崖詩藁

鄭元慶

鄭元慶字正畦浙江歸安人從父駿孫邃於易禮元慶幼傳其業并通史傳及金石文字覃思著述期有用於世毛奇齡朱彝尊胡渭並折行輩與之交侍郎李紱知其所學及詔開博學鴻儒科曰如元慶之博物真其選也又有詔開禮局曰如元慶之治經真其選也尙書張伯行亦雅重之欲薦而未得全祖望比諸康成之邃密漁仲之瑰奇嘗撰石柱記篆釋五卷湖州石柱歐陽修謂非顏魯公不能書顧唐設五縣而記遺其二朱彝尊撫德清武康二縣事蹟補之元慶爲之篆釋徵引考證頗爲贍博又著湖錄一百二十卷凡七易稿而後成先是湖州知府侯官

陳一夔屬元慶修府志其發凡起例一稟毛奇齡朱彝尊潘耒論定又挾鉛槧徧涉七州縣訪其故家文獻駁難辨正無間寒暑朱彝尊見之喜甚盡出曝書亭藏書供博覽縱觀有明歷朝實錄及萬曆以前直省府州縣舊志數十萬卷又增潤十之四五生平精力殫於是書乾隆初知府胡承謀修志多宗之全祖望謂行水金鑑爲河道傅澤洪開雕盛行罕知出於元慶然別無顯證惟所著小谷口蒼叢今水學兩河薛鏡七省漕程附見其中晚更孳窮經義其著書處名魚計亭亭前時花疊石圖書盈架庭後有方池大旱不涸諸友過從者相與徵文考獻永日忘疲生平慕鄭子真之爲人自號鄭谷口所著有周易集說詩序傳異同禮記集說參同官禮經典參同家禮經典參同喪服古今異同考春王正月考海運議

吳嘉紀 鄞漢儀 陶季

吳嘉紀字賓賢江蘇泰州人布衣家安豐鹽場之東洵地濱海無交遊自名所居曰陋軒貧甚雖豐歲常乏食獨喜吟詩晨夕嘯咏自適不交當世郡人汪楫孫枝蔚與友善時稱道之遂爲王士禎所知尤賞其五言清冷古淡雪夜酌酒爲之序馳使三百里致之嘉紀因買舟至揚州謁謝定交由是四方知名士爭與唱和嘉

紀工爲危苦嚴冷之詞嘗撰今樂府淒急幽奧能變通陳迹自爲一家所著陋軒集多散佚友人復哀集之爲四卷其詩風骨適勁連思亦剴刻由所遭不偶每多怨咽之音而篤行潛修特爲一時推重云 鄧漢儀字孝威亦泰州人康熙十八年召試博學鴻儒以年老授內閣中書漢儀少穎悟讀書數千言尤工詩稱騷雅領袖試歸日以吟觴自適暇或扁舟至郡坐臥董子祠中執經問業者車馬塞路生平著述甚富遊淮有淮陰集居揚有官梅集遊粵有過嶺集遊穎有濠梁集遊燕有燕臺集遊越有甬東集膺薦有被徵集皆逐年編紀手自刪訂所選詩觀凡四集別裁僞體力追雅音海內詩家咸宗之 陶季江蘇寶應人初名澂字季深以字行復去深稱季人咸目爲陶季幼負異才潛心經史既棄舉子業專肆力於詩古文辭與萊陽董樵同以布衣遊輦下樵字樵俱以一字爲字遂賦詩定交稱莫逆時方詔舉博學鴻儒公卿爭欲薦季力辭不就性嗜遊北抵燕趙南浮湘沅西踰太行東歷海岱所著詩多於舟車中得之因名舟車集王士禎刪定其客滇南閩中諸詩以高岑龍標相況所著湖邊草堂集及舟車集二十卷

邵長蘅 陳玉璫

邵長蘅字子湘江蘇武進人性穎悟讀書日數行下十歲補諸生旋因事除名束髮能詩既冠則以古文辭名客遊京師會開博學鴻儒海內之士悉集輦下若施閏章汪琬陳維崧朱彝尊輩咸與長蘅雅故時時過從于喁疊唱旋入太學再應順天鄉試報罷歸寄情山水放遊浙西攬湖泖之勝會蘇撫宋犖禮致幕中講藝論文敦布衣之好長蘅亦觥觥持古義無所貶損時論賢之內惇篤居親喪力行古禮常獨力創始祖康節祠族子被略爲豪家奴捐金贖之性坦易與人交煦然以和意所不可卽髯張面赤不能媵媵爲文不沾沾樵倣要以讀書養氣爲主王士禎常稱爲荆川後一人汪琬則以爲文章似柳子厚人品似陸魯望始爲詩瀏灑頓挫步武唐賢晚乃變而之宋格律在蘇黃范陸間常選有明何李王李四家詩矯錢氏偏駁之論而以程嘉燧詩爲纖佻識者躋之康熙四十三年卒年六十九有八所著自康熙戊午以前爲青門簾藁凡文十卷詩六卷己未迄辛未爲青門旅藁文四卷詩二卷壬申以後爲贍藁文五卷詩三卷長蘅始除諸生名自署青門山人因題其集 陳玉璣字賡明亦武進人康熙六年進士授內閣中書十八年試博學鴻儒罷歸少有大志凡天文地志兵刑禮樂河渠賦役諸大事究心源

流言之娓娓讀書至夜分兩眸欲闔用艾灼臂能詩文下筆千言旬日間動至盈尺時稱俊才賓客輻輳酬應旁午彈琴投壺亦樂爲之偶有觸發見諸詩文然其失亦在貪多務得云著有史論數百卷又有學文堂集四十三卷

葉奕苞 蔡方炳

葉奕苞字九來江蘇崑山人諸生少負異才博雅擅詩歌康熙十八年舉博學鴻儒試畢閣臣以卷進呈上顧杜立德馮溥葉方藹等曰此外豈無漏珊瑚之網者乎於是馮溥以吳農祥徐林鴻徐咸清王嗣槐對杜立德以白夢鼐施清高向台對葉方藹以奕苞對且曰渠臣從弟也上不懌乃俱放歸奕苞爲人礪礪善使氣目光閃閃若巖下電酒間談說聲如洪鐘鄉里中頗有狂名家有繭園善繪事著述甚富今存金石錄二十七卷續跋七卷錢曾稱其學識遠出趙明誠上 蔡方炳字九霞亦崑山人諸生父懋德死鬪賊之難藁葬太原城外方炳與弟方炘往負柩歸哀感行路康熙十八年舉博學鴻儒以病辭性嗜學尤留心政治性理工詩文兼善篆草韜晦窮居嘗繪著書圖一時名流題詠殆遍著有增訂廣輿記二十四卷銓政論一卷歷代茶權志一卷馬政志一卷憤助編二卷及恥存齋集

趙執信 馮廷魁 洪昇

趙執信字伸符山東益都人福建按察使進美從孫進美詩名甚著有清止閣集
執信承其家學少穎慧工吟詠康熙十八年進士改翰林院庶吉士散館授編修
是時方徵鴻博之士績學雄文者麇集輦下執信往來其間傾倒座人尤爲朱彝
尊陳維崧毛奇齡所引重訂忘年交性喜諧謔士以詩文贊者合則投分不合則
畧視數行揮手謝去以是得狂名二十三年充山西鄉試正考官尋擢右春坊右
贊善二十八年以國恤中在友人寓讌飲觀劇爲給事中黃儀所劾遂削籍時年
未三十也旣歸放情詩酒所居因園依山構亭榭各極天趣性好遊嘗踰嶺南再
涉嵩少五過吳閭維揚金陵間所至冠蓋逢迎乞詩文書者至至徜徉五十餘年
年八十三卒執信詩自寫性眞力去浮靡生平服膺常熟馮班遺書稱私淑弟子
娶王士禎甥女初猶相重以求作觀海集詩序士禎屢失其期遂詬厲嘗問古詩
聲調於士禎士禎斬之執信乃發唐人諸集排比鈎稽竟得其法爲聲調譜一卷
又因士禎與門人論詩謂如神龍見首不見尾或雲中露一鱗一爪而已遂著談
龍錄有云詩以言志詩之中須有人在詩之外尙有事在又云文以意爲主言語

爲役主強而役弱則無令不從矣雖意詆士禎實通論也大抵士禎詩以神韻縹緲爲宗執信詩以思路剗刻爲主士禎之規模闕於執信而流弊傷於膚廓執信之才力銳於士禎而末派亦病於纖巧論者謂兩家互救其短乃益見所長云執信手定因園集十三卷後人又裒其所著爲飴山文集六卷詩餘一卷 馮廷樞字大木山東德州人康熙二十一年進士授內閣中書幼有奇童之日讀書一覽輒記不忘性孤峭不入貴人之門官閒無事枕籍書卷尤工於詩二十六年充湖廣鄉試副考官試畢登黃鶴樓俯江漢之流眺內方大別諸山南望瀟湘洞庭慨然遠想有詩百餘篇識者以爲騷之苗裔也生平深相契者惟趙執信儔直歸輒相過從共探六義之旨朝士或得諸葛銅鼓兩人各爲長歌七百言諸名士皆閣筆王士禎尤心賞不置其爲詩新妍峭蒨神韻泠然隨年編次爲京集晴川集雪林集曹村集身後散佚其孫德培搜輯得五百篇爲六卷名曰馮舍人遺詩執信爲之序二十九年卒年五十二 洪昇字昉思浙江錢塘人國子生遊京師時始受業於王士禎後復得詩法於施閏章其論詩引繩切墨不順時趨與士禎意見亦多不合朝貴輕之鮮與往還見趙執信詩驚異遂相友善所作高超閑淡不落

凡境兼工樂府宮商不差脣吻旗亭畫壁往往歌之以所作長生殿傳奇國恤中演於查樓執信罷官昇亦斥革年五十餘備極坎壈道經吳興潯溪墮水死著有稗村集

金德嘉

金德嘉字會公湖北廣濟人少嚮學有志於古鄉舉後得安陸教授倡明正學有安定遺風康熙二十年成進士改翰林院庶吉士散館授檢討編纂明史一統志及禮記講義通鑑講章殫思萃力館中推爲碩儒二十六年充貴州鄉試副考官尋致仕歸歸後鍵戶著書足不入城府幾二十年嘗作朱陸異同考謂集羣聖之大成者孔子集羣賢之大成者朱子又謂姚江之徒龍谿緒山假尊師煽羽翼土苴傳注糟粕前賢末流乃有何心隱李卓吾漭蕩潰決此豈姚江所及料哉又謂天下非無材之患有材而不遜志於學則大患古人之學爲己而已非蘄以勝也一有勝人之意則必言與言角夫天下後世卒不可勝則其勝人也亦暫矣是故學莫大於爲己己誠學則不暇與人角故其爲學實踐躬行於主敬存誠未嘗稍斲生平與王士禎交最善所爲文磊磊落落直抒胸臆時同郡顧景星張仁熙劉

醇驥爲文往往追摹秦漢宗尙王李訾歸有光爲秀才婉媚德嘉獨不爲高論力主韓歐存先民矩矱詩力追三唐而出之渾脫陳維崧亟稱之著有續纂元名臣言行錄又居業齋文集二十卷別集十卷

吳苑

吳苑字楞香安徽歙縣人康熙二十年進士改翰林院庶吉士散館授檢討二十七年充會試同考官尋充日講起居注官二十九年充順天武鄉試正考官三十年遷右中允三十一年遷侍講聖祖仁皇帝臨雍勸講超擢國子監祭酒視事日卽以振起士風剗剔積弊爲先務國子生教習例與助教並坐有欲抑之旁坐者請於苑苑曰助教爵尊於教習顧教習者八旗子弟師也若等其父兄也豈有父兄爲子弟延師屈之旁坐乎聞者帖服舊例國子生始就舍有到監錢歲滿當咨吏部考職有出咨錢苑曰師道也以市道行之可乎悉禁革之自是諸生益勵學課試無敢不身至者苑匡坐橫經獎其才俊董其怠荒昕夕寒暑無少倦八旗子弟在官學者舊止講經義不與考校之列苑令一體考校並奏請鄉會試八旗量增中額又奏請教習八旗子弟者期滿悉授知縣皆報可其試教習以文爲去取

不聽干求得陸士暲等二十四人皆寒素人服其至公補刻明代及國初丙戌以後十八科題名碑並請摹御書闕里萬世師表額榜之廟中得旨允行大學士王熙稱爲近今第一祭酒苑少穎異博通今古不專爲帖括之學廷對策極論淮黃分合之勢略言用淮刷黃其說始自明潘季馴而後來治河者因之然河自宋熙寧間決澶淵曹村北流斷而南徙至南清河始與淮合前此刷黃者何水平指陳剴切非經生家語嘗與纂一統志明史禮志禮經講義每奏一篇上未嘗不稱善與人交重然諾敦氣誼尤篤於師友性至孝一日讀陽城責諸生歸養語曰吾人師也身教之謂何卽以母老乞歸所爲詩多和平嗶緩之音到家一章沈德潛謂讀者忠孝之心油然而興起云著有北駱山人集大好山水錄三十九年卒年六十三

梁佩蘭 程可則 方殿元 王隼 吳文煒

梁佩蘭字芝五號藥亭廣東南海人順治十四年鄉試舉第一屢上公車不得志日與其同志砥礪文學金臺舉社事推佩蘭與朱彝尊輩主壇坫一時風雅稱盛佩蘭每有所作爭相鈔誦康熙二十七年成進士年六十矣放榜日佩蘭方坐論

正平岑牟與摩詰鬱輪袍事得捷音色不爲動第曰老而成名歸得肆力於邱索足矣改翰林院庶吉士不一年遽乞假歸途經齊魯吳越與舊遊詩筒酒醞放浪湖山里居十五年屬下詔敕守土官促詞臣久於外者令赴館就職佩蘭入都散館以不能國書不入等放歸尋卒佩蘭爲人孝友不事家人生產輕金重義屢空晏如結社蘭湖以詩酒爲樂好誘掖後進客以他事請者引疾不聽聞持詩文至則披衣倒屣指畫不少倦與南海程可則順德陳恭尹番禺王邦畿方殿元暨殿元長子還次子朝同以詩鳴粵中人稱爲嶺南七子其詩從漢魏入不借徑三唐新城王士禎秀水朱彝尊吳江潘耒尤推重之四十七年卒年七十七著有六瑩堂前後集十六卷 程可則字周量亦南海人順治九年會試第一以磨勘不得與殿試可則益沈酣經史十七年春應閣試授內閣撰文中書尋改內祕書院十八年賚詔頒賜山東康熙八年以戶部主事充順天鄉試同考官晉員外郎督理右翼倉務公慎稱職十年遷兵部職方司郎中奉命往山西勘問總兵趙良棟白其寃十二年出知廣西桂林府會檄撤藩部歸京師百務紛拏可則以敏幹稱尋卒於任可則詩文名世自兩漢六朝三唐以來罔不網羅搜討期自成一家言在

都下與宋琬施閏章王士禛陳廷敬沈荃曹爾堪連日夜爲文酒歡所爲詩其音和以舒其氣廉以達論者謂亞於士禛品在劉體仁董文驥之右惟士禛可稱魯衛云所著有海日堂集遙集樓草萍花草 方殿元字蒙章廣東番禺人康熙三年進士官山東鄒城江蘇江寧縣知縣殿元初應禮部試往來齊魯鄭衛吳越間見民困俗僞乃考古酌今爲昇平二十書至京師欲上之不果及官知縣能以經術飾吏治旣引疾去僑寓蘇州猶於故里寘祭田百畝且以田給兄弟之貧者所爲詩文皆有原本尤長於樂府著有九谷集又著環書究天人竅奧自成一家長子還次子朝居吳喜以詩結納四方詩人來吳者登廣歌堂賦詩飲酒無虛日吳下二方之名傾動藝苑還著有靈洲集朝著有勺園集 王隼字蒲衣亦番禺人父邦畿明末副貢以詩名隱居羅浮著有耳鳴集隼七歲能詩早年志棲遁嘗棄家入丹霞尋入匡廬居太乙峰六七年始歸性好琵琶家稍裕卽理書卷手胝口沫無休時窘卽彈琵琶聲益急則其窘益甚娶潘楫元女能詩兼通史漢諸書樂貧偕隱字曰孟齊女瑤湘亦能詩卒年五十七著有詩經正訛嶺南詩紀梳山七書大樗堂集十二卷 吳文煒字山帶廣東南海人康熙三十二年舉

人十歲能詩與梁佩蘭同塾唱和數十篇初效李長吉體爭奇嗜險相矜爲樂名噪一時晚以詩古文辭提倡後學主於自然靈妙而詩畫尤矜貴秀水朱彝尊嘗遊粵將歸文煒作墨竹卷子贈其行并題句云未得便留山屐住羅浮晴看紫蘿葱論者謂不減徐文長風韻家藏書甚富三十五年卒著有金茅山堂詩集

史申義 顧圖河 周起渭

史申義字蕉飲江蘇江都人康熙二十七年進士改翰林院庶吉士散館授編修三十八年充雲南鄉試正考官洊官禮科給事中乞病歸初申義年十五補諸生卽以瓊花霜鐘諸賦聲譟一時與同里顧圖河用詩學相切劇時稱維揚二妙所爲詩抽思深宵結體清高不失風騷之旨王士禎方以詩倡率海內嘗稱申義及湯右曾足傳衣鉢時又稱王門二弟子聖祖嘗以後進詩人詢大學士陳廷敬以申義及周起渭對上賜御書綾幅以示嘉獎翰苑又有兩詩人之目生平以士禎爲師以姜宸英梁佩蘭吳雯查慎行何焯爲友所著有蕪城使滇過江等集 顧圖河字書宣江蘇江都人康熙三十三年一甲二名進士授翰林院編修廷試時仁廟閱對策至治河一條曰熟悉形勢必生長江淮留心時務者入史館數月卽

乞假歸里居十年復還京預修大清一統志諸書四十五年命提督湖北學政未幾卒少負異稟嗜古貪書寒暑無間家在城東七十里外偶入城必載書滿車詩早年妍秀頗爲時稱繼乃焚棄其稿務爲恢奇奧衍之作古體多學眉山近體多學劍南史申義謂其具陵跨百代之力盡得古人師承而自立於宗派後云著有雄雉齋集 周起渭字漁璜貴州貴筑人康熙三十三年進士改翰林院庶吉士散館授檢討四十四年充浙江鄉試正考官洊升詹事府詹事時輦下若姜宸英湯右曾顧圖河諸人方以詩古文辭樹幟文壇後進率望而卻步獨起渭以雋才相與角逐嘗作萬佛寺大鐘歌一時推爲傑作史申義嘗贈句云孰與夜郎爭漢大手攜玉尺上金臺其傾倒如此起渭爲詩上自建安下逮竟陵無不研究而尤肆力於蘇軾元好問高啟諸家著有桐野詩鈔

鄭梁 裴連

鄭梁字禹梅浙江慈谿人康熙二十七年進士改翰林院庶吉士散館授戶部主事洊陞郎中三十三年充會試同考官旋出知廣東高州府總督欲開碭州檄梁議梁謂碭州在海外最險阻開之不足爲利將來鯨鯢出沒爲患滋大議遂寢三

十五年大旱設壇建醮十餘日不雨梁弛屠沽之禁具特牲自爲文禱於社稷城隍卽日雨如注已而民復苦雨又爲文禱之雨遂止踰年郡城徧揭帖言某日賊且至屬吏倉皇入報梁曰第去無虞頃之呼道人孔姓者至曰署中多鬼煩汝厭之道人授筆作書書訖梁出揭帖示之曰此非汝筆耶道人惶恐伏罪逐之郡內以安蓋梁於祈雨設醮時已預知其人有奸宄狀故瞬息間擿伏如神屬吏皆服性至孝守高二載卽陳終養比得所請而父溱已歿哀毀特甚溱與黃宗羲交最密嘗命梁師事宗羲梁以陳師道年三十一見黃魯直盡焚其藁而學焉今見宗羲時亦三十一故詩文皆以見黃藁爲冠宗羲歿後梁建二老閣設位其中歲時祀之家中藏書甚富與范氏天一閣相埒學有心得詩近陳獻章文類歸有光宗羲極稱之嘗以曉行詩得名晚年右體不遂以左筆驅染跌宕文史如平時著有寒村詩文集三十四卷 裘連字殷玉亦慈谿人生而孤露天才過人能爲詩古文及樂府詞對客據几立盡數紙家故有玉湖樓藏書數千卷罔不鉤元提要年未壯著作等身康熙二十六年纂修大清一統志總裁徐乾學訪士於黃宗羲宗羲舉連時與修者十四人皆海內耆碩連以後輩得與所纂志成工且速乾學覽

而偉之歎曰昔人十六國春秋安得如此整齊慎覈乎聖祖南巡連獻迎鑾賦康熙五十一年六旬萬壽復獻昇平樂府五十四年成進士聖祖取連卷親閱有對策甚好字亦端楷之褒列二甲第一名改翰林院庶吉士時連年踰七十遂乞身歸里徜徉鴛湖交溪西冷橋李間以山水自娛著作日益富雍正七年卒年八十六所著有復古堂集天尺樓古文述先錄橫山文集詩集玉湖詩綜明史崇禎長編

儲欣從孫大文

儲欣字同人江蘇宜興人康熙二十九年舉人少孤率兩弟苦讀博通經史弱冠後萃里中友十二人約曰非聖賢之書勿視非其行勿緜不幸有過必面責改然後止又約曰文之課月有三合而課者一爲書之藝七離而課者二爲書之藝五論表判策詩賦古文辭諸體胥備行之七八年寒暑不輟由是負東南文望年六十始領鄉薦一試禮部不遇遂杜門著書所選唐宋十家文全集錄五十一卷以明茅坤選本祇爲經義計乃於八家外增李翱孫樵書出風行海內乾隆中御選唐宋文醇蓋因其本而增益之御製序亦稱欣用意良美云欣自謂於先秦兩漢

班馬唐宋諸大家之書多成誦嘗做非國語著曲臺疑八十篇有奇爲文謹潔明暢有唐宋家法而於蘇軾爲近其宗旨見所作蜀山東坡書院記慈谿姜宸英亟稱之曰自南渡後此道寢絕今乃得之宜興儲氏詩五言雅淡可追唐風性和易不可干以非義館於澁商或屬以資緣毅然曰吾雅不識資緣事拂衣歸教諸子有方及門多達者康熙四十五年卒年七十六著有春秋指掌三十卷前事一卷後事一卷在陸草堂集六卷 大文字六雅欣從孫康熙六十年進士改翰林院庶吉士散館授編修父方慶康熙六年進士官山西清源縣知縣有循聲工古文辭十八年舉博學鴻儒著有遯庵集大文少聰穎十歲從父之官所過險阨睥睨指顧初以制藝名後肆力爲古文從從祖欣遊讀書九峰樓數十年欣賞稱之爲東坡化身姜宸英見其文亦驚嘆曰曠代異才也其爲文徵引典博間有隸事太繁之失後頗自悔嘗論南豐文稱爲峻絕又謂文尙簡然必衷於道而後能簡蘇氏之文人美之曰暢然文忠至黃州而益簡至惠州昌化軍而又益簡世以爲知言歸田後益潛心古學於史家地理與夫山川阻隘邊關阨塞靡不詳究所作荊州論十一篇襄陽論廣陵西城一篇推求古今城郭異地山川異名援據史籍如

繪圖聚米當年進退攻守之要成敗得失之由皆口講而指畫之論者謂國朝二百餘年惟閻若璩明於沿革大文詳於險易顧祖禹方輿紀要考證史文雖極博洽往往以兩軍趨戰中途相遇之地卽指爲兵家所必爭不及二人精覈云所著存研樓文集十六卷論形勢居七卷又二集二十五卷時主東南壇坫者爲長洲何焯吳縣吳士玉二人皆推大文爲祭酒性寬而介家傭或竊其資勿問有里豪占其祖遺產里黨多不平大文曰獨不見東坡買田事乎弗與校嘗送試至省學使致書餽贈堅卻之同年生爲本省大僚手書詢問終不往謁其操守如此又嘗遊安徽之旌陽關呂成公舊學以爲講堂偕其裔日夕論說又應山西巡撫之請購司馬文正集爲多士楷模並爲纂省志三百餘卷後主維揚之安定書院學者翕然宗之

姜宸英 嚴虞惇 性德

姜宸英字西溟浙江慈谿人明太常寺卿應麟曾孫少工舉子業兼善詩古文辭屢躋於有司而聲譽日起聖祖仁皇帝稔聞之嘗與秀水朱彝尊無錫嚴繩孫並目爲三布衣會開博學鴻儒科翰林院侍讀學士葉方藹約侍講韓菼連名上適

方藹宣詔入禁中浹月莢乃獨牒吏部已不及期方藹旋總裁明史薦之入館充纂修官食七品俸分撰刑法志宸英極言明三百年詔獄廷杖立枷東西廠衛之害痛切淋漓足爲殷鑒尙書徐乾學罷官卽家領一統志事設局於洞庭東山疏請宸英偕行宸英在京時大學士明珠長子性德從宸英學明珠有幸僕曰安三頗竊權宸英不少假借性德嘗以爲請宸英益大怒擲杯起絕弗與通安三知之憾甚以故連蹇不得志久之得舉順天鄉試康熙三十六年成進士及廷對進呈名稍殿上識其手書特拔置第三人授翰林院編修年已七十矣三十八年充順天鄉試副考官比揭榜御史鹿祐以物論紛紜劾奏命勘問並覆試舉子於內廷上諭諸生俱各成卷尙屬可矜落第怨謗勢所必有焉能杜絕黜數人餘仍令會試正考官李蟠遣戍宸英坐蟠繫獄事未白病卒年七十二宸英孝友與人交悃悃無城府然遇權貴不少阿常熟翁叔元任祭酒時劾湯斌僞學宸英與叔元舊識遽移書責之生平讀書以經爲根本於注疏務窮精蘊自二十一史及百家諸子之說靡弗披閱績學勤苦至老猶篤故其文閎博雅健有北宋人意魏禧嘗謂侯方域肆而不醇汪琬醇而不肆惟宸英在醇肆之間論者以爲實錄詩兀稟滂

范宗杜甫而參之蘇軾以盡其變書法鍾王尤入神品著有江防總論海防總論各一卷湛園集八卷葦間集詩十卷又筭記二卷皆證經史之語雖小有疏舛而考論禮制精覈者居多 嚴虞惇字寶成江蘇常熟人康熙三十六年一甲二名進士授翰林院編修虞惇生有異稟九經三史幼卽成誦官翰林館閣文字多出其手己卯科場獄興虞惇子姪連售試官蟠與宸英皆其同年友用是置吏議鐫級間居數年聖祖南巡閱河虞惇迎駕毗陵獻詩十章溫旨召問賜御書一幅旋起補國子監監丞轉大理寺寺副寺副權輕位下守故事行文書而已虞惇毅然獨不輕其官論讞奏當必衷至是雖昭以利怵以威不能奪也通倉盜米案有以私怨鍛入人罪者虞惇持不可而止俄有內務府殺人移獄事虞惇先上書本寺少卿邵觀歷指疑狀又出不意執其人訊之吐實讞始定四十八年充四川鄉試副考官五十一年充湖廣鄉試正考官皆稱得人累遷至太僕寺少卿五十二年卒年七十四虞惇著述甚富其讀書質疑三十一卷意在玩味研求於毛朱兩家擇長棄短不存門戶之心並不涉調停之見殊有功詩學爲文鼓吹六籍陶鑄羣言與歐曾爲近詩思沈力厚不苟同於人江蘇人士刻其集以繼明歸有光蓋本

同郡而有光官止太僕名位又適相符也議者頗謂不愧云 性德原名成德字容若納蘭氏滿洲正黃旗人康熙十五年進士授乾清門侍衛少從姜宸英遊喜爲古文辭鄉試出徐乾學之門遂授業焉善詩其詩飄忽要眇絕句近韓偓尤工於詞所作飲水側帽詞當時傳寫遍於村校郵壁生平淡於榮利書史外無他好愛才喜客所與遊皆一時名士晚更篤意經史屬友人秦松齡朱彝尊購求宋元諸家經解後啟於乾學得鈔本一百四十種曉夜窮研學益進嘗延友人陸元輔合訂刪補大易集議萃言八十卷陳氏禮記集說補正三十八卷又刻通志堂九經解一千八百餘卷皆有功後學精鑒藏書學褚河南見稱於時嘗奉使覘梭龍諸羌三十四年卒年三十一歿後旬日適諸羌輸款上時避暑關外遣中使拊其几筵哭而告之以其嘗有勞於是役也著有通志堂詩集五卷詞四卷文五卷淥水亭雜識四卷又有全唐詩選詞韻正略

劉巖 唐孫華 徐葆光

劉巖原名枝桂字大山江蘇江浦人康熙二十五年以諸生貢太學名震京師孝惠章皇后崩詔行三年喪廷臣議以日易月欲使太學生上書而難其首祭酒某

潛列巖名乃著太學生伏闕上書論申明大義反復千餘言士大夫爭相傳誦既不苟仕進因絕意科名大學士張玉書歎曰有才如此詎以布褐老乎勸以易名應試三十八年舉順天鄉試四十二年成進士改翰林院庶吉士散館授編修四十八年充會試同考官以戴名世南山集牽罪吏議當長流旋有旨賜還隸漢軍五十五年卒雍正元年詔赦妻女歸原籍巖幼敏慧精於音律繪事以善奕名同里左文戒之曰子誠以此聰慧用之讀書何書不可讀遂發憤爲學晝夜不倦父禁之則竊油置牀下俟人靜復篝鐙默誦夏畏蚊嚙置鐙帷帳中帳頂成墨嘗謂周禮媒氏仲春之月令會男女於是時奔者不禁奔謂已有媒氏之言而六禮不備者也六禮有一不備猶正名曰奔所以謹男女之別而厚廉恥之防駁震川誤解禮注例以孔子錄柏舟卽春秋表共姬之旨皆有裨世教又以世人說四書多務爲新奇可喜之論深遠難測之說謂朱子格物窮理究極精微未有不全讀朱子之書而能窺四書之精蘊者甘元煥稱其根柢古訓發摛義理粹然儒者之言古文豪宕峭折於歐蘇爲近詩品高潔不尙詞華沈德潛亟稱之老尤好吟咏日賦一詩得八百餘篇性孝友聞繼母疾馳三十里歸親滌溺器生平寡言笑動循

禮法著有拙修齋彙大山詩石橋詩集匪莪堂文集 唐孫華字實君江蘇太倉州人康熙二十七年進士選陝西朝邑知縣會聖祖咨訪實學廷臣以孫華對召試乾清宮稱旨授禮部主事兼翰林院行走尋調吏部三十五年充浙江鄉試副考官以事落職歸少入慎交社有文名徐乾學甚重之明珠聞其名館之家使爲子揆敘師揆敘辨慧過人每以僻事疑義相質難孫華引端竟緒揆敘心厭焉後徐乾學開一統志局於洞庭東山復招孫華往及通籍年五十五矣既歸遂堅臥不出與二三老友登臨遊讌有香山洛下之風聖祖南巡孫華迎駕吳門揆敘私之曰上注意先生先生亦有意復出乎孫華曰吾年七十矣卽在位義猶當退顧且出何所求耶卒謝之孫華天才敏瞻九試冠軍名震江左晚歲肆力窮經所詣益進論詩謂學問性靈缺一不可故所作不趨高超言皆有物生平善養生不服藥亦無疾苦雍正元年卒年九十著有東江詩鈔 徐葆光字亮直江蘇長洲人爲諸生負盛名聖祖仁皇帝南巡伏謁獻詩既舉京兆康熙五十一年試禮部不第特賜一體殿試遂以一甲三名進士授翰林院編修葆光才品爲館閣冠琉球國王嗣位充册封副使賜一品麟蟒服後乞假歸著中山傳信錄六卷居數年詔

起葆光以御史記名會卒時雍正元年也所作古文辭純明峻潔詩尤雄健排冪出入眉山劍南之間有二友齋文集十卷詩集二十卷海舶集三卷

查慎行 弟嗣琛 族子昇 查揆

查慎行字初白浙江海寧人少受學黃宗羲治經邃於易尤工詩方爲諸生遊覽牂牁夜郎以及齊魯燕趙梁宋過洞庭涉彭蠡登匡廬峯訪武夷九曲之勝所得一託於吟咏故篇什最富康熙三十二年舉順天鄉試其未通籍時卽名聞禁中四十一年聖祖東巡以大學士陳廷敬李光地張玉書先後奏薦驛召至行在賦詩詔隨入都直南書房四十二年特賜進士出身改翰林院庶吉士散館授編修時慎行族子昇以諭德侍直內廷且久宮監輒呼慎行爲老查以別之上幸海子捕魚賜羣臣命賦詩慎行有云笠簷蓑袂平生夢臣本煙波一釣徒俄宮監傳煙波釣徒查翰林時以比春城寒食韓翃傳爲佳話會比歲西巡凡幽岨之區甌脫之境爲從古詩人所未歷慎行悉以五七言發之每奏一篇上未嘗不動色稱善又常隨駕木蘭褰衣襜服行山谷間上望而笑曰行者必慎行也其風度如此尋充武英殿校勘官在局二年竣事仍入直未幾假歸遭弟嗣庭案株繫闔門就逮

罪且不測世宗識其端謹且曰慎行詩每飯不忘君杜甫流也特原之放歸田里
雍正六年卒年七十八浙人稱詩者首推朱彝尊慎行湯右曾繼之所著敬業堂
集五十卷合生平所歷各爲一集多至五十三種黃宗羲比之陸游王士禎則謂
奇創之才慎行遜游綿至之思游遜慎行所評良允五七言古體尤近蘇軾曾補
注蘇詩五十二卷其教人爲詩謂詩之厚在意不在詞詩之雄在氣不在貌詩之
靈在空不在巧詩之淡在脫不在易可謂通論蓋自明人喜稱唐詩至國朝初年
嫌其窠臼漸深往往厭而學宋龜直之病亦生焉得宋人之長而不染其弊固當
於慎行屈一指云他著又有周易玩辭集解十卷陪獵筆記黔中風土記廬山遊
記各一卷 嗣璞字德尹慎行弟康熙三十九年進士改翰林院庶吉士散館授
編修洊升侍講性警敏數歲卽解切韻諧聲隨伯兄慎行學爲詩兄唱弟酬斐然
可觀生平游迹徧天下所至與賢豪長者往還題咏無虛日官翰林時名與慎行
相埒亦以嗣庭罪逮謫遣關西雍正十二年卒於戍所年八十二著查浦詩鈔查
浦輯聞南北史識小錄音類通考 昇字聲山慎行族子康熙二十七年進士改
翰林院庶吉士散館授編修入直南書房推輓後進無嫉忮心由諭德庶子陞少

詹事賜第西華門題其堂曰淡遠會疾上以賜第不吉改賜厚載門外四十六年以積勞卒於官年五十八昇詩筆清麗尤工書得董其昌神韻聖祖屢稱賞之著有淡遠堂集 查揆又名初揆字伯葵亦海寧人嘉慶九年舉人官順天薊州知州揆家貧養親讀書抗志少受知於阮元嘗稱以爲詁經精舍翹楚旣鄉薦錢大昕法式善皆寓書於元望其入京其名動公卿如此性通而介恥干謁數往來西湖上不安與人交嘗渡錢塘之甬上之括蒼旅食四方無知之者文筆雄秀冠時每賦一篇必爲傑構詩出入查慎行厲鶚之間而警動過之卓然成家其論詩大旨主乎消納謂嚴滄浪香象渡河羚羊掛角祇是形容消納二字之妙世人不知以爲野狐禪金元以降冗弱之病正坐不能消納云海寧查氏名家疊出揆起於慎行昇後足繼家學著有篋谷文集菽原堂集道光十四年卒年六十五

汪份 弟士鑑

汪份字武曹江蘇長洲人康熙四十三年進士改翰林院庶吉士五十二年散館授編修五十三年充廣西鄉試副考官六十年奉命督學雲南未之官卒年六十七份少嗜學年十四隨大父任山東沂州府大父以官逋繫獄份侍側讀書日夜

不輟獄吏奇之爲文詞氣雄邁與陶元淳何焯俱以文學知名時徐乾學翁叔元方收召後進份與元淳焯俱游其門而自矜持不求親暱以是屢躓其後焯交絕於兩家元淳亦與叔元忤惟份無違言份氣和而性伉直嘗與趙執信會廣坐中執信傲睨人不能堪份忽憤發面數其失執信氣爲之奪又與方苞交最篤苞稱錢謙益文穢惡份初不謂然後卒以爲知言嘗訂四書大全及唐宋八家古文行於世晚歲辨春秋書爵非褒書人非貶爲書三卷義多儒先所未發又著有河防考十卷遄喜齋集弟士鏞 士鏞字文升康熙三十六年一甲一名進士授翰林院修撰官至右中允入直南書房少受學於份與份暨兄鈞弟俠俱知名時稱吳中四汪士鏞善詩古文詞尤工書法與姜宸英齊名號姜汪其論書謂不學古隸不知波折往復之理不習晉帖不知回環牽結之妙不玩唐碑不知古人各自成家之法去其短集其長毋矜奇毋尙險庶幾歸於正而合於古性廉介嘗扈從太原大吏餽翰林人各二百金士鏞言於衆曰彼厚斂於民而以翰林爲口實不可立共卻之又論漕運事謂自古善言理漕者莫如唐之劉晏晏爲江都轉運治船運漕數倍其值人皆以爲浮費晏獨不惜船場旣興人人充足船亦數年不壞後

人反其術工甫畢人皆凍餒船亦隨敗以是知損上益下謂之益惟留其有餘則事可久而功易成其言深中利弊生平著述甚富尤勤於考古陳鵬年出瘞鶴銘於江士鉉爲考一卷時稱詳覈他著又有長安宮殿考全秦藝文志三秦紀聞玉堂掌故華嶽志元和郡縣志補闕近光集餘集四六金桴賦體麗則秋泉居士集

王式丹 吳廷楨 徐昂發 張大受 李重華

王式丹字方若江蘇寶應人康熙四十二年一甲一名進士授翰林院修撰旋以告歸式丹績學嗜古爲諸生有盛名巡撫宋犖極賞之犖嘗取長洲徐昂發顧嗣立吳廷楨泰州宮有鹿繆沅嘉定張大受武進楊倫徐永宣吳縣吳士玉高郵李必恆常熟蔣廷錫華亭王圖炳揚州郭元鈺諸人詩合刻之爲江左十五子詩選而式丹爲之首式丹詩排鼻陡健一洗吳音嘽緩蓋以昌黎爲的而汎濫於廬陵眉山劍南道園之間查慎行俯首下心以兄事之田雯王士禎皆推許焉論者謂士禎朱彝尊後演其詩者惟慎行及式丹年六十入翰林分修皇輿表佩文韻府一統志凡大撰作同館皆推之然不自表褻好獎藉後進有一長津津道之不容口平居寬然若無所別擇至於是非得失關名教節義之大則毅然不可以奪居

官十年吟誦自娛旅況蕭然泊如也歸里後以同年生事牽連對簿久之事得白
僑居郡城與鄉士大夫論文爲樂士多從之遊五十七年卒年七十四著有樓邨
集二十五卷 吳廷楨字山掄江蘇長洲人少負異稟爲文章惟意所適咸渾然
若天成尤工詩康熙三十五年舉人以北籍被黜聖祖南巡廷楨迎駕於郊巡撫
宋犖指以奏曰此吳中才子也上因以巡幸爲題限江韻試之廷楨詩將成上適
以行抵何處問左右答曰已抵吳江廷楨因作結句云民瘼關心忘處所侍臣傳
語到吳江上悅復還舉人入直武英殿四十二年成進士改翰林院庶吉士散館
授編修洊升左諭德四十七年充江西鄉試正考官稱得士臨川李紱其首也吳
中風尙頗急士宦又好以聲名相軋廷楨獨淡然無營居館中凡冊封督學諸優
差皆辭不與開列而專致力於書局嘗纂修佩文韻府月令輯要等書凡一切代
言之作院長必以相屬論者謂宋歐李二王稱臺閣四大家廷楨庶幾媲美竟以
勞卒上聞有學充養粹之褒著有南村集古劍書屋文鈔十卷 徐昂發字大臨
江蘇崑山人原長洲籍康熙三十九年進士改翰林院庶吉士散館授編修五十
三年充福建鄉試副考官五十九年提督江西學政昂發文酒自豪常傾四座未

第時作宮詞百首徧播旗亭酒社間尤長於考證所著畏壘筆記四卷雖不及顧炎武朱彝尊之淹通然持擇矜慎敘述簡潔正舛訂譌足資聞見駢文追蹤六朝詩刻峭清新有透空碎遠之音沈德潛稱其五言古從杜陵出近體得力樊南而能自出面目同時談藝罕與儷者有畏壘山人詩集四卷 張大受字日容江蘇長洲人康熙四十八年進士改翰林院庶吉士散館授檢討五十九年充四川鄉試正考官旋奉命督學貴州秩滿再留任大受生有異才於經史百家之言無不貫串少從學於朱彝尊爲彝尊汪琬韓菼所賞識聖祖南巡嘗召至御舟賦詩因宣入纂修館大受世居吳郡匠門喜誘掖後進四方造門請業者無虛日臨川李紱微時客遊吳中大受器其才獎勵逾格卒成一代名賢既入翰林汲引尤衆有負之者弗與校且若不知也善詩古文尤工駢體清新獨出著有匠門老屋集三十卷 李重華字實君江蘇吳縣人雍正二年進士改翰林院庶吉士散館授編修十年充四川鄉試副考官少有俊才從張大受遊得其指歸其詩宗法在杜韓間嘗謂詩有三要發竅於音徵色於象運神於意三者缺一不可生平遊蹤歷蜀秦齊楚登臨憑弔發而爲詩嶽嶽歷落頗得江山之助時長洲蔣恭棐以古文名

重華以詩名時莫能軒輊也所著詩話二卷或引而不發或金鍼度人沈德潛謂可希風昌穀談藝錄其說經尤長於詩能推求言外之意有三經附義六卷又有貞一齋集

何焯 陳景雲 景雲子黃中

何焯字屺瞻江蘇長洲人先世曾以義門旌焯少讀書數行並下爲文才思橫溢性耿介廉於財雖晨炊未具不計也康熙四十一年冬聖祖南巡駐涿州召直隸巡撫李光地語詢草澤遺才光地以焯薦召直南書房明年賜舉人試禮部下第復賜進士改翰林院庶吉士仍直南書房尋命侍讀皇八子府兼武英殿纂修官及散館得旨再教習三年尋丁內外艱又十年始復以光地薦授編修焯初受知於尙書徐乾學爲忌者所中失歡翁叔元延致之及叔元劾尙書湯斌焯上書請削門生籍天下快焉授編修之明年駕至熱河有構飛語以聞者上還京卽命收繫及所司盡籍其邸中書籍以進上覽之曰是固讀書種子也而其中曾無失職缺望語又見其草藁有辭吳縣令餽金益異之乃盡以其書還之罪止解官仍參書局焯卽趨局校書如故是時諸王皆右文所聚冊府多資焯校之世宗在潛藩

亦以困學紀聞屬焯箋疏焯蓄書數萬卷凡經傳子史詩文集雜說小學多參稽互證以得指歸其校定兩漢書三國志乾隆五年從侍郎方苞請令寫其本付國子監爲新刊本所取正錢大昕嘗稱其考證漢書最有功凡有題識論人必跡其世徹其表裏論事必通其首尾盡其變論經時大略必本其國勢民俗以悉其利病其詳審絕倫如此所見宋元舊槧本一一記其異同又工於楷法蠅頭朱字粲然盈帙好事者得其手校本不惜重價購之其真行書並入能品吳人與汪士鋐並稱汪何上嘗命書朱子四書章句集注奏御嘉獎命卽鋟板焯與方苞論文不甚合然苞有作必問其友曰焯見之否是能糾吾文之短者晚歲益有見於儒者之大原常歎王伯厚雖魁宿尙未脫詞科習氣因歆然自附於不賢識小之徒欲因文見道以探本於儒術今世所傳義門讀書記舊彫本止六卷同邑蔣維鈞嗜何氏學博搜遐訪擴至十數種康熙六十一年卒年六十二上曰何焯修書勤學問好朕正欲用之不意驟歿深可憫惻贈侍講學士賜金給符傳歸喪復命有司存恤其孤門人著錄甚衆吳江沈彤長洲陳景雲爲尤著 陳景雲字少章亦長洲人諸生博聞彊識講求通儒之學年十七睢州湯斌撫吳試士拔第一康熙中

試京兆不遇館藩邸三年以母老辭歸後藩邸再遣使敦促謝不赴少從何焯遊焯歿以名德見推爲中吳文獻輕重者幾二十年性孝友居父母喪每慟必絕與人交有始終外和內剛不因人熱所居老屋數楹朝齋暮鹽人不能堪處之怡然乾隆二十年卒年七十八景雲爲學凡經史四部書丹鉛不離手尤長於史能背誦通鑑舉前明三百年事談之更僕不倦爲文章簡嚴有法著讀書紀聞十二卷綱目辨誤四卷兩漢訂誤四卷三國志校誤三卷韓文校誤三卷柳文校誤三卷文選校正三卷通鑑胡注正誤三卷紀元考略二卷文集四卷子黃中 黃中字和叔諸生少時卽留心史學以經濟自負乾隆元年薦舉博學鴻儒爲大學士海寧陳世倌所知在京師嘗上書論用人理財治兵三大事世倌得書韙其言會詔求骨鯁朴直之士如古馬周陽城者世倌欲舉以應時黃中已去京師招以書辭所著導河書三篇水利邊防諸議援古證今達於當世之務山陰胡天游傲睨當世士鮮當意者顧獨爲黃中屈有所著作必以見示輒爲發其壘別其良未嘗不相視而笑也晚年歸家病宋史蕪雜撰紀傳表百七十卷又著新唐書刊誤二卷國朝證法考三卷殿閣部院年表督撫年表各六卷東莊遺集四卷其卒也貧甚

至不能庀喪具或以金贖者妻張氏固卻之曰奈何以貧故傷夫子義債居以葬之

沈元滄 子廷芳 沈名蓀 名蓀子嘉轍 陳奕禧 汪惟憲

沈元滄字麟洲浙江仁和人康熙四十四年五十六年兩舉副貢生早歲屬文爲毛奇齡萬斯大所賞尤喜爲詩查昇見之妻以女時昇方奉旨纂修佩文韻府元滄爲蒼萃排比進呈輒稱旨尋詔入武英殿書局任事總裁奏請考試上曰沈元滄學問朕素知不必考試又嘗詔廷臣曰沈元滄書法趙董與其外舅正同以議敘授廣東文昌縣知縣在任四年有循聲瓊俗以諸生充里胥作奸犯科不可懲以法又多錮婢事元滄痛治之倣朱子社倉法勸諭貯賑民甚德焉後以牽累註吏議編管寧夏未踰年卒年六十八生平於學無所不窺論史有卓識嘗謂儒者論古第持義理之空言而不能置身其際熟察情勢豈足以服古人之心且非孟子知人論世之法也詩兼宗唐宋朱彝尊湯右曾陳鵬年咸推重之與查慎行相唱和著有滋蘭堂詩集二十卷文集六卷禮記類編三十卷雲旅詞念舊詞奇姓編充安齋雜著今雨軒詩話杜詩補注彙黎岐雜記平黎議 沈廷芳字晚叔浙

江仁和人幼入塾讀楊忠愍傳慕其爲人父宰廣東文昌坐遣戍寧夏母留居嘉善每歲往來省覲忘行路之勞南河總督高斌留參幕事斌喜宋儒書廷芳習聞之因有志勵學乾隆元年由監生召試博學鴻詞授翰林院庶吉士散館授編修旋遷山東道監察御史疏請免米豆稅戶部議行故尙書彭維新起爲侍郎劾罷之俄坐言事不當免高宗命仍舊職補江南道巡視濟寧漕務七年奏崇文門內智化寺明英宗爲逆闖王振營造李賢撰碑稱振豐功大節諛闖亂道觀者髮指乞敕有司毀像仆碑並將英宗諭祭碑移瘞他所得旨如所請行旋授山東登萊青道萊州老儒高鳳起等晦名樂道因加禮焉暇則屏騶從巡視田畝問民疾苦人識所乘白馬見其來曰我使君也遷河南按察使以母老乞退再補山東按察使遂以老致仕歸歸時數千人送至嶺山驛廷芳慰之日暮各流涕散去廷芳少從方苞游窮極載籍所爲文皆準繩墨其詩學出於查慎行而出入漢魏三唐有法度由翰林而諫垣而外任一官一集變而愈工兗州有南池唐杜甫所常遊也廷芳在沛上日建少陵祠立碑爲文記之厲鶚嘗稱其碑詞甚工年七十一卒著有理學淵源十卷十三經注疏正字八十卷續經義考四十卷鑒古錄十六卷古

文指授四卷隱拙齋詩集三十卷文集二十卷盥蒙雜著四卷 沈名蓀字澗芳浙江錢塘人康熙二十九年舉人名蓀起孤生績學能文以家貧親老奔走四方藉館穀爲養年踰四十始舉京兆試五上春官歲丙戌榜前夢羅昭諫見過自是不復試謁選得湖南攸縣知縣復以年老見斥歿於京師少從王士禎游與查慎行朱昆田友善工詩嘗與昆田仿兩漢博聞之例摘取南北史字句之鮮華事蹟之新異者爲南史識小錄八卷北史識小錄八卷論者謂其遺文瑣事足備選用實藝文類聚諸書之比他所著有蛾術堂文集十卷青燈竹屋詩三卷退翁詩一卷筆錄十卷史衡八卷儻錄一卷冰脂集四卷門人趙昱校刊其詩八卷總名之曰梵夾集子嘉轍 嘉轍字樂城諸生能以詩世其家嘗與同里吳焯陳芝光符曾趙昱趙信厲鶚等摺撫南宋舊聞人各爲詩百首成南宋雜事詩七卷其詩萃說部之菁華采詞家之腴潤世甚稱之嘉轍其首倡也嘉轍與鶚交尤密鶚嘗刪定其遺集付梓今不傳 陳奕禧字謙六浙江海寧人歲貢生由山西安邑丞入爲戶部郎中出知貴州石阡府改江西南安知府卒於官少善詩嘗以斜日一川泝水北秋山萬點益門西見賞於王士禎尤工書法專效晉人所藏秦漢唐宋以

來金石甚富皆爲題跋辨證聖祖嘗命其入直內廷世宗亦敕其書勒石爲夢墨樓帖十卷日本國王嗜之海舶載往輒得重值所居官有循聲山西貴州江西皆祀之名宦令直隸深澤時飲泉甘之作亭其上署曰香泉因以爲號論者謂其治績詩名乃爲書所掩云著有金石遺文錄皋蘭載筆益州干役記春靄堂集虞洲集 汪惟憲字子宜浙江仁和人雍正七年拔貢生性好靜有潔癖每大比以場屋汙漬多不終試所居吳山之麓門無雜賓日以文酒爲樂選貢時以疾未赴學使怒遣學官押之入試且謂之曰生若務爲名高不隨牒上計我將以箠扑報生矣惟憲謝不敢然竟以病不出善詩文於書無所不讀詩學松圓清淡粹雅五言尤工論者謂覽其詩乃別見貞白之性文亦力追古作者書法似蘇長公李檀園爲世所稱晚年猶日鈔得意書數十頁賞鑒書畫別真贋甚精得友人佳什輒津津不去口著有尊聞錄積山詩文集十卷

倪璠 王琦 趙殿成 馮應榴

倪璠字魯玉浙江錢塘人康熙四十四年舉人官內閣中書璠見聞博洽長於史學嘗著有神州古史考一百五十卷以無力付梓惟將浙江一省刊行又著有方

輿通志文一卷補遼金元三史藝文志性喜爲駢體文以吳兆宜庾開府箋注合衆手而成頗傷漏略乃詳考諸史作年譜一篇冠於集首又旁採博蒐重爲注釋爲庾子山集注十六卷其哀江南賦一篇引據時事尤稱典核書旣出吳注遂不復行時有王琦趙殿成者生稍後於璠琦著有李太白詩集注三十六卷李長吉歌詩彙解五卷殿成著有王右丞集箋注二十八卷皆有名於時 王琦字琢崖亦錢塘人與齊召南杭世駿友善早鰥杜門著述有林處士風精熟釋典殿成注右丞集時以右丞本通佛理顧起經舊注多未及詳特屬琦助爲之以補所未備 趙殿成字武韓浙江仁和人雍正初舉孝廉方正不就事父母以孝聞父病割股肉以進母歿悲慟右目爲失明又著有古今年譜羣書索隱臨民金鏡錄 馮應榴字詒曾浙江桐鄉人乾隆二十六年進士官內閣中書遷宗人府主事三十五年充湖北鄉試副考官三十六年充順天鄉試同考官洊陞吏部郎中五十一年充順天鄉試同考官尋轉御史遷戶科給事中五十四年充山東鄉試正考官歷官至鴻臚寺卿父浩字養吾由編修官御史嘗爲玉谿生詩評注八卷樊南文集詳註八卷極精贍又有孟亭詩文集應榴夙承家學肆力於詩以蘇詩註本疏

舛尚多因爲合註五十卷附錄五卷所採自正史外凡叢書胥說靡不搜討於古
典之沿譌者正之唱酬之失考者補之輿圖之名同實異者覈之卽友朋商榷之
言亦必標取姓氏其虛懷集益如此錢大昕謂王注長於徵引故實施注長於臧
否人倫查注詳於考證地理惟應榴實兼三家之長又著有學語稿

方燦如

方燦如字若文浙江淳安人康熙四十五年進士官直隸豐潤知縣坐事免乾隆
元年舉博學鴻詞以格於部議不與試後以經學薦不就少受業於毛奇齡博聞
強記經史百家靡不淹貫於漢儒箋注尤能指其訛舛嘗講禘祫郊廟之制暢達
精確具有折衷與同社及門析疑問難能發前人所未發古文奧勁有筆力時與
方苞並稱惟喜雕琢襲積遂成別派不屑屑爲詩然亦清婉有法方苞杭世駿極
推重之鴻詞之徵方苞稱燦如及柯煜龔纓余華瑞四人能無愧怍焉晚主敷文
講席口授指畫有叩卽應儀表豐偉年八十聲如洪鍾世比之歐陽永叔燦如從
奇齡讀書而說經一遵古注義理必折衷朱子亦不效毛氏之排擯也著有周易
通義十四卷尙書通義十四卷毛詩通義十四卷鄭注拾藩一卷離騷經解一卷

集虛齋學古文十二卷又有十三經集解四書口義四書考典讀禮記樸山存藁續藁弟棻如字若芳諸生亦工詩著有緣情詩略

方式濟

方式濟字屋源安徽桐城人康熙四十八年進士官內閣中書父登嶧貢生官工部主事善詩著有依園詩略星硯齋存藁垢硯吟葆素齋集如是齋集以戴名世獄爲所株累謫戍卜魁卜魁黑龍江地也由新城之白都訥渡諾尼江而北乃至其處式濟隨父戍所服勤左右以慰晨昏暇坐土室中羅羣經譌說之又據所見聞考覈古蹟爲龍沙紀略一卷如辨混同江源出長白山土人呼爲松阿里江松阿里江北與諾尼江合流東北受黑龍江又南受烏蘇里江匯注於海因其納三江之大故名混同蓋松阿里自南而北黑龍江自北而南歷二千五百里之遙兩江不能混稱其上游未會時則仍當稱松阿里江此足證金史混同江一名黑龍江之誤又辨金史宋瓦之譌松花又搜討黑龍江源與塞外入江諸小水及精奇尼江諾尼江諸派多盛京通志所未載詩格廉悍樂府尤矯矯不羣沈德潛甚稱之蔡世遠稱爲樂天知命無入不自得君子後與父登嶧並殂塞外著有五經一

得陸塘初稟一卷出關詩一卷子觀承官至直隸總督

顧嗣立吳之振

顧嗣立字俠君江蘇長洲人性嗜書尤耽吟詠弟兄六人皆名滿京國嗣立頡頏其間稱白眉焉兄嗣協構依園嗣立闢秀野園水木亭臺之勝甲吳下康熙三十八年舉於鄉會聖祖南巡有以嗣立名薦者進所撰元詩選上嘉歎焉四十四年車駕復幸江南以宋犖薦召試行在被選至京師給筆札分纂宋金元明四代詩選皇輿全覽諸書以勤勩最議敘內閣中書五十一年會試特賜進士改翰林院庶吉士散館仍留教習五十三年復以薦入武英殿纂輯鳥獸蟲魚廣義會新例當授中書不就五十四年散館改知縣以需次移疾歸六十一年卒年五十四嗣立操履耿介爲錢唐徐旭齡壻旭齡駐節江南嗣立讀書衙齋未嘗一與其屬吏相接及旭齡薨無子爲經紀喪事不遺餘力性復輕財好施與家日貧而風流文雅照映一時素豪飲家有古酒器三做劉景升三雅受十三斤而贏餘各遞殺嘗署門曰凡酒客過門延入與三雅詰朝相見蓋終其身無與抗者尤善詩始得力於遺山虞楊諸家而其後漸近於雄偉變化有昌黎眉山之勝江蘇巡撫宋犖選

刻江左十五子詩中嘗謂詩本天籟人藉以道性情歷千百劫光景常新自明人倡謂唐以後無詩歐陽蘇陸概從芟薙又何論乎大德元貞以還暨玉山鐵崖諸君子哉因銳意蒐輯元人詩集自元遺山而下彙爲百家又廣爲三百家凡四集合千二百卷網羅浩博一一采自本書有元一代之詩以此爲巨觀又箋注韓昌黎溫飛卿二家詩皆極賅洽而詩林韶濩閻邱辨囿二書亦所論定自著有秀野集閻邱集 吳之振字孟舉浙江石門人貢生官中書科中書勇於爲善鄉人多稱之買名園曰黃葉村莊自號黃葉村農有黃葉村莊集康熙初年山林詩之振最有名常刻宋詩鈔一百六卷所采至百數十家多祕本掇拾精華刪除冗贅各以小傳冠集首略如中州集之例而品評考證其文加詳其詩派亦近宋人七言絕句尤足自張一軍課蠶詞十六首推爲絕唱又選國朝施閏章宋琬王士禛士祿陳廷敬沈荃程可則曹爾堪八家詩行世

杜詔樓儼

杜詔字紫綸江蘇無錫人諸生少從嚴繩孫顧貞觀游得其指授工詩尤善填詞康熙四十四年聖祖仁皇帝南巡獻迎鑾詞十二章試列高等特命供職內廷嘗

與同人寫御製金蓮花賦各賦紀恩詩詔獨進一詞拔置第一旋命纂修歷代詩餘及詞譜等書五十年舉人五十一年欽賜進士改翰林院庶吉士以終養告歸詔天才秀逸論詩專主性靈緣情綺靡出入溫李之間嘗選唐詩叩彈集十二卷續集三卷皆中晚之作故生平得力亦在大歷以後詞格近草窗玉田告歸後卜居南垞倡導後進爲騷雅主盟性好山水嘗恣游秦隴江楚閩粵兗豫諸名勝所至賦詩紀游或山僧地主乞爲文以鐫諸石古文亦得廬陵神髓晚與道士榮漣僧天鈞結九龍三逸社有廬山東林風雍正十三年大學士嵇曾筠薦舉博學鴻詞辭不獲命未入都病卒時乾隆元年年七十一生平不喜談人短嘗曰吾能記善不能記惡親友入仕者必贈言曰留有餘於百姓無專事嚴察取快一時有冒詔名受賄者置之不辨曰吾不可居其實耳何妨受其名人以爲長者之言著有雲川閣集九卷浣花鳳髓蓉湖漁笛譜詞彙讀史論略樓儼字敬思浙江義烏人少穎異績學工填詞家貧轉徙雲間康熙四十六年聖祖仁皇帝南巡獻織具圖詩詞特擢第一四十八年奉詔修詞譜以薦與分纂之役書成議敘選廣西靈川縣知縣逆獍負固儼率壯勇越巉巖深箐直擣其巢賊魁就縛巡撫陳元龍上

其功遷廣州理搖同知洊升按察使調江西以告歸其學於詞最深自宋以下詞家原委派別求其指歸與杜詔同館辨析體製考訂源流曾駁正萬氏詞律百餘條最中窾要又以張綆之詩餘圖譜程明善之嘯餘譜及毛先舒詞學全書率皆謬妄錯雜因自訂羣雅集一書以四聲二十八調爲經而以詞之有宮調者爲緯併以詞之無宮調者依世次爲先後附於其下朱彝尊嘗爲之序所論辨有宋詞四聲二十八調考略白雲詞韻考略詞韻入聲考略書吳江沈氏九宮譜後皆可爲後學津梁著有蓑笠軒僅存藁

王澍

王澍字翊林江蘇金壇人康熙五十一年進士改翰林院庶吉士散館授編修充三朝國史治河方略御纂春秋三館纂修官五十七年教習庶吉士六十年考選戶科給事中命稽察錢局以善書法特命充五經篆文館總裁官六十一年升戶科掌印給事中雍正元年上屢詔求言召對內廷蒙貂皮克什之賜是年冬奉旨六科胥隸都察院澍疏言六部事有誤都察院察之都察院有誤六科駁之此祖宗設官意也若隸臺丞爲所管轄給事寢廢科參自是有將順而無匡救所關匪

細語侵臺長上怒立召訊人皆爲澍危澍與同官從容奏對上意解改吏部員外
郎然自是科臣雖隸總憲得封駁如故四年以乞假葬親歸乾隆元年被命起官
以疾不赴四年卒年七十二澍經學宗宋儒傳註言性理一本程朱嘗著大學困
學錄一卷中庸困學錄一卷發揮學問之功其大學補傳第五章辨陸王致知之
誤極爲分明又著集程朱格物法一卷集朱子讀書法一卷排比聯絡融會其意
以救陸王靜悟以讀書爲粗迹之弊又著白鹿洞規條目二十卷分類條析證以
經史百家之語凡更六年三易藁而後成生平孝於親居喪哀毀盡禮與人交無
賢不肖久而彌篤終始無異心古今文雄深樸茂而書法尤一時獨步何焯汪士
鋐率推先之嘗著淳化祕閣考正十卷取米芾黃伯思顧從義三家之說而研究
之以史傳正譌誤以筆蹟辨依託而行款標目以及釋文之類亦一一考覈又別
爲古今法帖考一卷溯閣帖之緣起及諸帖之沿流又自以所得筆法爲一卷并
附於後論者謂其書在米黃顧三家之上其真書入率更之室篆書法李斯尤稱
一代作手告歸後書益工遠近士夫家以金幣請者無虛日然不問家人生產貧
士丐其翰墨以舉火者亦應之不倦金壇良常山館最擅名款署良常王澍世遂

稱王良常云澍鑑別古碑刻尤精所著竹雲題跋四卷於源流同異考證特詳又著有禹貢譜二卷大學本文一卷大學古本文一卷中庸本文一卷虛舟題跋十卷補原三卷

萬承蒼盛際斯 際斯子樂 尙廷楓

萬承蒼字宇兆江西南昌人康熙五十二年進士改翰林院庶吉士散館授編修以康熙六十年主試李紱爲流言所中相累罷官世宗憲皇帝察其誣復原職乾隆元年充廣西鄉試正考官九年充福建鄉試副考官洊陞至侍講學士嘗侍直嗽作屏息不敢發聲溫語垂問賜茶茶膏各一器少喜讀宋儒書與紱友善紱主張陸學於朱子有深文承蒼常戒其偏重紱豪於詩文然見承蒼作未嘗不心折也官京師時與紱共居日偕全祖望相聚講學間或考據史事分韻賦詩麥飯葱湯互爲賓主未嘗藉紱以求進及得罪怡然受之歸後益杜門勵學所著易傳論互體最精一掃宋元林吳諸子之謬又有萬學集孺廬集 盛際斯字成十江西武寧人以選貢入大學授樂平教諭遷吉安府教授少嗜學治經書廢寢食尤深於春秋爲文奇肆出入左史秦漢偶以示人人不能讀嘗與何焯論史焯異之曰

天下才也官教諭時以師道自任進諸生於古有二生以不友聞際斯蹶踏不安
召至述古今孝弟事復自傷教化不明咨嗟太息二生皆流涕頓首謝遂相友愛
終其身性莊靜寡言笑端坐竟日課兒輩以古人學期於有用又不必期於用雍
正七年卒年七十著有春秋心傳清厓集詩藪子樂大謨皆能傳其學。樂字水
賓諸生性聰敏七歲能詩十一歲通經史乾隆元年舉博學鴻詞罷歸以著述自
任楊垕汪軻皆師之詩格高曷不蹈宋人蹊徑於江西詩派外又別樹一幟著有
劍山集大謨字于楚歲貢生以經學薦工古文。尙廷楓字嶽師江西新建人原
陝西興安籍以父濼官浙江提督廕戶部主事乾隆元年舉博學鴻詞罷歸廷楓
有軼才經史諸子靡不旁涉下筆雲飛濤捲莫測涯涘在京師日與萬光泰袁枚
有三異人之目李紱極賞之嘗言於副都御史孫國璽以曠世逸才列薦性詭誕
不羈忽結駟連騎忽布衣藍縷詩骨清曠閒有奇氣工送別言情諸作蔣士銓嘗
以獨標正宗許之著有賀蓮集

陳儀 陳濱

陳儀字子翹順天文安人生而穎異讀書過目不忘嗜古文辭康熙五十四年進

士改翰林院庶吉士散館授編修與修三朝實錄雍正三年直隸大水河泛溢壞民田廬無算命怡賢親王偕大學士朱軾相度濬治王欲得善治河者與俱軾素器儀遂以儀對王延見訪以治河所宜先儀曰朱子有言治河先從低處下手天津上應析木古渤海逆河之會百川之尾閘也今南北二運並漲東西兩淀爭奔駢趨於三岔一口而強潮復來拒之牴牾洄漩而不時下下滿則上溢其勢宜然故欲治河莫如先擴達海之口欲擴海口莫如先減入口之水入口之水減則達海之口寬而北之永定南之子牙中之七十二清河乃得沛然入三岔口而東注矣四年春隨王行視水利軾以憂歸而教令牋奏皆出儀手命儀以侍講攝天津同知儀先疏下流使四出毋壅徐理其上作長隄束之凡四閱月而工成轉侍讀擢庶子五年王奏設水利營田官分四局儀領天津局兼屬以文安大城隄工二邑形如釜底積潦不消秋復大水夾隄內外皆巨浸儀購菰蔣十餘萬束立表下槌以禦險要隄本民工儀言於王請發帑金數萬爲民興修用以代賑隄遂完固南運長屯隄地隸靜海不過數武吏舞法歲調發霸州文安大城民協修百里裹糧咸以爲苦儀除其籍民便之畿輔七十餘河疏故濬新儀所勘定者殆十六七

云八年擢侍講學士時議設營田觀察使二員分轄京東西以督率州縣儀以僉都御史銜領豐潤諸路營田於天津倣明汪應蛟遺制築十字圍三面開渠與海河通潮來渠滿則閉之以供灌溉白塘葛沽之間斥鹵盡變膏腴豐潤玉田多沮洳之區儀教之開渠築圩皆成良田十一年大雨山水暴漲淹沒田廬萬計儀疏聞或以侵官爲疑儀不顧諭總督籌賑命儀董其事全活甚衆轉侍讀學士尋罷觀察使還領史職如故乾隆二年調補鴻臚寺少卿未任歸儀篤於內行先世所遺田數百畝悉推以讓其兄旣仕祿入皆分給諸昆弟歿無餘財七年卒年七十三著述甚富有集十八卷子玉友刻於閩中又有毛詩臆評鄉黨私記學庸私記南華經解蘭雪齋讀離騷廣前定錄天游錄玉友雍正八年進士福建臺灣府知府所至有惠政閩人稱之 陳潢字天一浙江秀水人饒學識爲河督靳輔幕客輔治河多資其經畫聖祖仁皇帝南巡閱工嘗問輔曰爾必有通今博古之人爲之佐輔以潢對特賜潢參贊河務按察司僉事銜兩河旣奠倣古溝洫法爲溝田之制旋以吏議奪職尋卒先是輔過邯鄲見題壁詩異之蹤跡其人則潢也禮之入幕歿後輔再起疏請於朝復其職著有河防摘要論治河要策一曰河性主於

順而利導之二曰審勢謂凡有所患當推其致患之由三曰估計謂工料省其敗速所費較所省尤大四曰任人主於慎選擇明賞罰而歸本在正已率屬五曰源流謂河水本清其淤漲皆由挾他水混流六曰隄防主明潘季馴隄束水水刷沙之說尤以減水壩爲要務七曰疏濬主於潰決之處先固兩旁不使日擴乃修復故道而借引河以注之八曰工料工主於覈實料主於預備九曰因革言今昔形勢不同十曰善守謂黃河無一勞永逸之策在時時謹小慎微而歸重於河員之久任十一曰雜誌述治河之委曲十二曰辨惑駁當時之異議也張靄生追述之爲河防述言一卷

楊椿 子述曾

楊椿字農先江蘇武進人幼穎異端慤如成人弱冠工古文詞爲姜宸英朱彝尊所賞康熙五十七年成進士改翰林院庶吉士散館授檢討分修政治典要雍正初充明史及一統志國史三館纂修官遷左中允擢侍讀學士充日講起居注官兼修三朝實錄高宗御極以祭告使秦蜀還奏途次見聞七事其豁河灘地浮糧及酌給山西佐雜養廉二事議行復纂修憲皇帝實錄乾隆二年以原官致仕家

居兩載特召修明鑑綱目前後居館局二十餘年校理精密三館推重焉尤貫串有明一代事論者謂可匹鄞縣萬斯同淹通經義於易詩書春秋三禮多所撰述嘗與侍郎齊召南論周禮往復十餘書不倦又嘗進經史講義虞書勅天之命章援引傳注略言聖人之於臣惟論其理之是非不計其詞之工拙惟鑒其心之誠僞不問其事之有無皋陶戒舜曰無教逸欲有邦益曰無怠無荒舜豈教逸欲而怠荒者哉二臣言之不以爲忤帝舜受之不以爲非有虞之治所以不可及也卽蒙召對往復推闡一時傳爲盛事晚以子述曾承曾官京師留就養猶日研諸經不輟二子勸少休曰我年視衛武作懿戒時尙遠敢有怠乎卒年七十八著有周易尙書定本詩經釋辨春秋類考周禮訂疑稽古錄水經注廣釋古今類纂毗陵科第譜牒等書所爲古文同時李紱方苞皆極推服晚自刪定爲孟鄰堂集二十六卷別集六卷 述曾字二思少承家學於諸史尤精心貫串椿編纂明史綱目三編時述曾預屬草方苞見之稱爲史才乾隆元年舉博學鴻詞七年以一甲第二名進士授翰林院編修十二年充雲南鄉試副考官十五年充廣東鄉試副考官十七年大考一等擢侍讀充陝西鄉試副考官二十三年再應御試遇足疾降

編修二十四年充通鑑輯覽館纂修官二十八年授右中允二十九年陞侍讀三十年充陝西鄉試正考官三十一年充日講起居注官三十二年通鑑輯覽書成將脫藁而卒年七十始編輯覽時折衷體例書法本末條件總裁一委之又詳訂輿地謬譌彙爲箋釋與朱筠蔣和寧張霽王昶諸人同事發凡起例斷斷不少假及卒大學士傅恆以述曾在事八載實殫心力入告奉旨賞給四品職銜居翰林院時所上經史發明傳注具有家法其釋書大陸旣作因陳畿輔水利論漢書魏相傳因條救荒之策及治淮黃束濬之法大指謂黃河兩岸之壩宜塞南岸而開北岸則漲流可消民居可捍皆有裨於實用事親以孝聞與人交不爲媁媁曙比而通懷接物後進皆樂就之詩宗杜韓蘇然不多作有南圃文藁二十卷

厲鶚符會 吳穎芳 嚴遂成

厲鶚字太鴻浙江錢塘人康熙五十九年舉人少貧性孤峭不苟合始學爲詩卽有佳句於書無所不窺所得皆用之於詩故時多異聞軼事內閣學士李紱典浙江試闈中得鶚卷閱其謝表曰此必詩人也亟錄之計偕至京尤以詩見賞於侍郎湯右曾試禮部報罷右曾欲止而授之館比遣迎之則已襍被出都矣十餘年

間再上公車乾隆元年浙江總督程元章薦應博學鴻詞科試日誤寫論在詩前
又報罷而年亦且老值部銓期近思得薄祿養親復入京行次天津舊友查爲仁
留之水西莊同撰周密絕妙好詞箋遂不就選而歸十八年卒年六十二鶚搜奇
嗜博館於揚州馬曰瑄小玲瓏山館者數年肆意探討所見宋人集最多而又求
之詩話說部山經地志爲宋詩紀事一百卷南宋院畫錄八卷又著遼史拾遺採
摭羣書至三百餘種常自比裴松之三國志注又著秋林琴雅東城雜記湖船錄
諸書皆博洽詳贍先世本慈谿徙居錢塘故仍以四明山樊榭名其居所著樊榭
山房集二十卷幽新雋妙刻琢研鍊尤工五言取法陶謝及王孟韋柳而別有自
得之趣同時以博學鴻詞徵者有胡天游全祖望論者謂鶚之詩天游之文祖望
之考證求之近代罕有其比其詩餘尤擅南宋諸家之勝鶚無子歿後栗主委榛
莽中何琪見之取送黃山谷祠酒埽一室供之侍郎王昶屬同人於忌日薦酒脯
焉 符曾字幼魯亦錢塘人以大理卿汪澂薦累官至戶部郎中乾隆十二年舉
博學鴻詞值父憂不與試詩脫手清便氣韻尤高陳撰沈德潛皆推服之嘗與同
里沈嘉轍吳焯陳芝光趙昱厲鶚趙信等同撰南宋雜事詩人各百首採摭浩博

足資考證查慎行名之曰七君子爲之序而廣其傳著有春鳧小彙半春唱和詩
吳穎芳字西林浙江仁和人少端重沈默寡言笑幼赴童子試爲隸所訶以爲
大辱自是壹志稽古終身不復仕進生平博覽羣籍常怪鄭樵通志務與先儒爲
難於是取六書七音樂略一一尊先儒而探其源成吹豳錄五十卷說文理董四
十卷音韻討論四卷文字源流六卷金石文釋六卷晚年名益著通政使雷鉉視
學兩浙武進莊存與典試浙江皆鳴騶訪之索所著書而去少與厲鶚善鶚甚之
學詩每一篇成必數改而後定故存詩雖少而格彌精家素封有桑竹園池之勝
客至則探筒拈賞花釣魚圍棋賦詩鼓琴吹笛等各一事必盡歡乃去精通內典
凡緇廬幽邃之區每過必流連忘返年八十卒有臨江鄉人詩集四卷 嚴遂成
字崧瞻浙江烏程人雍正二年進士官山西臨縣知縣乾隆元年舉博學鴻詞未
試丁憂歸後補直隸阜城縣知縣遷雲南嵩明州知州調鎮雄州以事罷復以知
縣就補雲南而卒歷官燕晉滇南開兔坡險道剏鳳山書院治河決獄所至有聲
遂成天才駿發始爲詩示厲鶚未之許也後益肆力不屑苟同昔人雄奇綺麗二
者兼有工於詠物讀史詩尤雋嘗自負爲詠古第一論者謂朱彝尊查慎行後能

自成一家著有明史雜詠四卷持論允當人以詩史目之袁枚稱其詠張魏公云傳中功過如何序爲有南軒下筆難冷峭蘊藉恐朱子在九原亦當乾笑他著有詩經序傳輯疑二卷海珊詩鈔十一卷補遺二卷

車騰芳許遂 韓海

車騰芳字圖南廣東番禺人少失恃事父至孝或出授徒間日必歸省康熙五十九年舉人乾隆元年薦博學鴻詞與里人許遂同徵親老辭不赴知縣親臨其門趣治裝至京後期卽乞養歸主邑講席二十餘年生平敦志行嚴取予粵大商知騰芳與齷使厚乘間以事屬爲之請酬金數千峻拒不納新會何洪築室城南將歸江門效古推宅之誼亦固辭公車時泊舟淮清有爲夏之蓉護眷入都者舟夜漏裝盡溼騰芳以己裝資之及夏之蓉督學來粵以書屢邀皆堅謝不往後官海豐教諭兼主講惠陽書院會稽梁國治爲惠潮道時與過從傾倒備至吳鴻視學至惠雅重騰芳從容問兒孫應試者幾人騰芳以失學對吳益歎異贈詩有眼青敢謂因吾輩頭白何期識此翁之語其爲名流心折如此論者謂羊城有道德能文章者以騰芳爲最在官七年乞休卒年八十四著有螢照閣集十六卷 許遂

字揚雲亦番禹人康熙三十五年舉人性警敏讀書淹貫爲文豪放自喜尤長於詩授江南清河知縣力請上官蠲逋賦凡興作便民者輒爲之以事里吏議去職杜門著作名益起會開博學鴻詞科巡撫楊永斌薦之格於部議不得與試歸過清河清河人士留讌久之去官久而民尤愛慕不衰詩格律高古得太白神似著有真吾閣前後集 韓海字偉五亦番禹人生而敏慧尤肆力詩古文詞是時嶺海文社數百人推梁佩蘭執牛耳海以後進居末座佩蘭顧獨與海言詩成輒稱善坎珂場屋二十餘年居無聊乃爲詩俯仰呻吟以舒其胸中噫嗟之氣性不喜酒而託興甚豪嗜游至羅浮登飛雲絕頂觀日出自言天風一吹幾欲駕兩翼去雍正元年舉於鄉年近五十矣十一年成進士官封川教諭初到任集諸生諭敦實行崇古學學舍一新會舉博學鴻詞總督鄂彌達巡撫楊永斌欲首薦海再三徵至命賦五色瑞露及夏蓮詩海有云欲待移根歸太液須尋十丈藕如船蓋寓言也鄂彌達覽詩愕然遂不復強而海疾亦作矣越數日卒於家年六十著有東皋詩文集二十卷

馬維翰

馬維翰字默臨浙江海鹽人康熙六十年進士雍正二年選吏部主事遷員外郎補陝西道監察御史遷工科給事中轉戶科以出丈四川田畝留任建昌道總督構之維翰直揭部科解職赴部質尋復原官乾隆二年授江南常鎮道以憂歸生而器識宏達九歲能詩文官吏部時始視事發胥吏奸予杖銓政肅然攝他司益整暇其清丈川南東也糧浮於田必請減相要害改黎州千戶所爲清溪縣兌占桑昂邦等跳梁焚掠及烏蒙大兵會剿維翰駐打箭鑪供糗糧芻茭絡繹不絕與廝養同飲食甘苦捐俸佐軍需西夷旋平涼山地震維翰疾馳勘災散賑得實建昌人感之三渡水摩些蠻織廠夫大吏謀進剿維翰力陳營兵不輯開廠病蠻狀得請罷廠撤兵誅止其魁全活無算性伉直登進士後值內大臣驗看諸人皆跪維翰不可隆科多呵之維翰夷然不爲動隆科多笑曰不料渺小丈夫乃風骨如許答曰區區一跪尙未見維翰風骨也及赴部質時親王總部事捧令免冠維翰不肯問故曰旨解職非革職也所著詩文精悍如其人入蜀後所詣益進同時浙西稱壇坫者舉莫之及詩宗杜韓以縱橫排奐爲長然神鋒太儻者居多沈德潛謂其莽莽蒼蒼縱筆揮霍雖未神來已梯隋險五年卒年四十八著有墨麟詩十

二卷續十卷古文十卷舊雨集二卷

盧見曾

盧見曾字抱孫山東德州人父道悅康熙九年進士官河南偃師縣知縣著有公餘漫草清福堂遺藁見曾康熙六十年進士雍正三年出爲四川洪雅縣知縣邑庶而貧獄訟繁興見曾除雜派清積牘一以儉勤爲治四年以憂歸服闋九年補安徽蒙城縣知縣遷六安州知州州豪戶多占水塘爲田歷訟不決見曾大興勸墾督飭檄旁午謗者四起不顧塘至今爲賴十二年調亳州知州州有龍鳳溝已淤塞見曾倡開之水患遂除十三年擢江南江寧府知府未逾月調安徽潁州潁有西湖宋歐陽修嘗築塞白龍溝注水湖中灌溉腴田以爲民利明季湖廢見曾欲復之或難之曰是湖之盜田者衆埂界難明奈何見曾語於衆曰盜湖爲田利止湖旁數十家耳然水大至蕩嚙害田廬若復湖則水有蓄洩利及一州而又免淹沒之患衆皆曰善自是湖乃復見曾又葺歐陽修晏殊呂公著蘇軾四賢祠以宋僉書趙令時明通判呂景蒙配享示有功於湖者不敢忘也尋以薦擢江西饒九南道乾隆元年擢兩淮鹽運使淮南商習驕蹇疾見曾整峻中以蜚語遂被吏議

五年奉詔戍臺九年起謫戍補直隸灤州知州逾年擢永平府知府洋河自塞外入經撫寧之東北境康熙時河身東徙至是水暴漲嚙且及城見曾與知縣錢鋆端木長汝議築壩挑引河上圖議於總督那蘇圖以聞上報可自是患遂息見曾短小精悍有吏才那蘇圖特薦之謂其人短而才長身小而智大十六年遷長蘆鹽運使十八年復調兩淮鹽運使揚州地故瀕海土薄水淺溝道久湮見曾釀貲浚之場城遂無水潦患又修小秦淮紅橋二十四景及金焦樓觀以備宸游後以告歸三十年高宗南巡賜御書德水耆英扁額時年七十六矣見曾勤於吏治所至皆有殊績然愛才好士官鹽運時四方名流咸集極一時文酒之盛金農陳撰厲鶚惠棟沈大成陳章等前後數十人皆爲上客嘗校刊乾鑿度高氏戰國策鄭氏尙書大傳李鼎祚周易集解及子史等書又補刊朱彝尊經義考皆有功後學又采山左諸人詩仿中州集例系以小傳爲山左詩鈔足備鄉邦文獻青浦王昶謂其愛才好事百餘年來所罕見所著雅雨堂詩八集文十餘卷其出塞集一卷先已刊行餘燬於火後人采掇刊之爲文四卷詩二卷

蔣恭棐 朱桓

蔣恭棐字維御江蘇長洲人康熙六十年進士改翰林院庶吉士散館授編修生而慧敏四歲通四聲十歲爲文章有奇氣時江左文多矜奇異恭棐獨守先正矩矱李光地見而歎曰今之思泉震川也及入翰林充玉牒館纂修官制誥典冊多出其手後復充大清會典五朝國史館纂修以休致歸乾隆十六年上南巡吳中恭棐侍直宮門蒙溫旨垂問賜內府緞匹歸後主講安定書院十九年卒年六十五生平湛深經學詩尙唐音於文愛廬陵臨川錢陳羣嘗與張照屈指當代古文咸推恭棐云藏書數千卷皆手評數過著有西原草堂文集 朱桓字勛爲江蘇宜興人雍正十一年進士改翰林院庶吉士散館授編修充八旗志書館纂修日講起居注官乾隆三年充順天鄉試同考官乞養歸高宗南巡迎駕拜緞匹之賜優游林下二十餘年卒年六十七生而穎敏十五歲隨父世勳官京師與之講經義輒多疑悟工詩古文辭殫精著述性樂施與邑有善舉知無不爲所著有歷代名臣言行錄自秦漢迄明凡二十四卷又有多識類編十二卷行遠類編一卷毛詩名物略十卷

鄭方坤 兄方城 責任

鄭方坤字則厚福建建安人雍正元年進士知直隸邯鄲縣舉卓異擢知景州調河間同知遷山東登州府知府時禁人口出海抵奉天而未入籍者悉勒還本土方坤言於大吏以爲司牧者但當嚴奸宄之防不得閉其謀生之路遂奏請弛禁調武定府歲大饑方坤請移登萊穀八萬石濟之且請發帑銀截留武定等縣漕米五萬石以備賑大吏入告上從之無何兗州饑調方坤治之釋貧民之奪富室穀而誣爲盜者百餘人旋以足病自免方坤記誦廣博其詩下筆不休有凌厲一切之概尤力攻嚴羽詩不關學之非故雖好馳騁不甚規規於法然才華旣富有眞意以驅之自非塗澤者所及又雜采前人說部中說經之文爲經稗凡易書詩春秋各一卷三禮共一卷四書共一卷以多摭諸說部之中故名稗言猶正史外別有稗官其書薈萃衆說部居州分論者謂其於考覈之功深爲有裨他著有補代詩話十卷全閩詩話十二卷國朝詩鈔小傳二卷嶺海叢編共百卷蔗尾詩集十五卷文集二卷方坤與兄方城友于最篤競爽齊名有卻埽齋倡和集方城字則望雍正十一年進士官四川新繁知縣有惠政以蜀閩磨勘罷官大吏延主講錦江書院未幾卒所自著曰行炙集 黃任字莘田福建永福人康熙四十

一年舉人官廣東四會知縣任工書好賓客口如懸河一座盡傾官四會時舊隄
絲亘數十里將就堙任相度土宜畚築厚且堅不而月歲事值歲饑爲粥以食餓
者全活無算有硯癖自號十硯老人罷官歸壓裝惟端石數枚詩束兩牛腰而已
其詩源出溫李刻露清新不墮澀體絕句尤綺靡與同郡內閣學士謝道承順天
府丞余甸周紹龍奉天府丞陳治滋御史吳文煥南安知府游紹安行人劉敬與
同知郭啟元通判林正青舉人郭雍等數唱和乾隆二十七年重赴鹿鳴宴鄉里
榮之其詩初名十硯齋集繼曰秋江詩集最後總名香草齋集

王峻 王延年

王峻字良齋江蘇常熟人少敏慧與同里宋顧樂並受業於陳祖范一時稱爲王
宋雍正二年進士改翰林院庶吉士散館授編修七年充浙江鄉試副考官十年
充貴州鄉試副考官乾隆元年充雲南鄉試正考官二年補江西道監察御史遇
事敢言拜官甫三日劾左都御史彭維新直聲震都下遭母憂去官遂不出主講
安定雲龍紫陽書院以古學提倡後進所賞識後多知名性剛褊視時俗依阿齷
齷畏蕙者流不欲與爲伍而人有一節之長則稱賞不置嘗修蘇州府志有明季

大僚曾污僞命者其子孫賂千金求更一二字終不許尤精地理之學談九州山川形勢曲折向背雖足跡所未到咸瞭如指掌嘗謂水經正文與注混淆欲一一釐定之而唐以後水道之變遷地名之同異酈注所未及者則據正史及傳記小說近代志乘以補之名曰水經廣注手自屬藁未成惟成漢書正誤四卷於何焯陳景雲二家之說多有采取詩宗尙兩馮參以趙執信何焯之說不獨前後七子深加擯斥卽王士禎亦多未愜然集中黔行詩最爲清矯刻削轉似蜀道集古文直抒性靈不加雕琢書法樵李北海所書碑碣盛行於世他著有良齋詩文集十六年卒年五十八 王延年字介眉浙江錢塘人雍正四年舉人乾隆元年舉博學鴻詞後官國子監學正十七年會試以年逾耄臺擢司業加翰林院侍講銜延年精史學嘗以建安袁氏作通鑑紀事本末不言田制則度地居民之法亡不言漕運則鑿渠引河之利塞不言府兵則耕牧戰守之功隳至於耶律鴟張遼海而陳邦瞻不究其終黨項虎視河湟而薛應旂不稱其始紹建安者又如此爰鈎較抉擿成補通鑑紀事本末一書仁和杭世駿序之比延年於唐杜君卿宋劉原父云又嘗應總督李衛聘修浙江通志沿革離合表分晰特詳遂爲全志之冠大學

士蔣溥劉統勳嘗以延年經學薦俱稱其老成敦樸潛心經史晚年進呈所撰書
屢荷恩遇尤爲稽古之榮

張鵬狎孫致彌 金兆燕

張鵬狎字天扉江蘇嘉定人幼多疾資素鈍年十七忽開悟讀經史如宿習作文
及詩下筆數千言立就雍正五年進士改翰林院庶吉士散館授編修十三年充
雲南鄉試正考官鵬狎早擅詩名才思敏贍嘗客松江府署刻寸燭賦詩二十首
於京邸作雁字落葉七律自晨至午上下平韻俱就又工繪事尤長山水興會所
至槃礴淋漓書復蒼潤勁秀時稱三絕乾隆二年大考二等試日未亭午已納卷
其受上特知始此旋進萬壽聖德詩百章經史法戒詩五十章又陳十慎箴皆稱
旨六年擢侍講充河南鄉試正考官遷詹事府右庶子充日講起居注官七年擢
詹事府少詹事九年陞詹事鵬狎嘗進所作春林澹靄圖並題七言絕句六首上
依韻賜和繼進日長山靜畫扇賜詩六章復命和太液池泛舟詠雪示詞臣張鵬
狎韻澄海樓望海禁體詩屢詔御前作畫御題秋夜讀書圖秋湖夜泛圖俱用恭
進詩韻又賜御畫枇杷折枝圖松竹雙清圖最後賜御書雙清閣額皆有詩恭紀

其他經進及諸臣同和者尙數百篇前後賞賚無算其爲詩又手擊鉢頃刻卽成每有敕和先成以進者必鵬翀故上愛其才不次拔擢十年以省墓乞假歸御製五律一章賜白金百兩寵其行道抵臨清以疾卒遺疏入上爲惋惜十一年召內閣學士沈德潛對便殿論詩上曰爾詩以風格勝然不如張鵬翀敏捷咨嗟久之鵬翀修髯鶴立人比之東方朔蘇軾自署南華山人所著有進呈集賡韻集傳宣集雙清閣集南華詩鈔南華文鈔 孫致彌字松坪亦嘉定人明登萊巡撫元化孫幼貧力學工書得董其昌筆法詩跌宕流逸康熙初被薦召試稱旨十七年頒孝昭皇后諡於朝鮮以太學生賜二品服充副使命采東國詩是年舉順天鄉試二十七年成進士改翰林院庶吉士因邑民漕折事牽累去官久之得雪以原官用四十一年充山西鄉試副考官庶常典試始此尋授編修累遷至侍讀學士卒致彌詩自言從劉隨州劉賓客入然五七言古體絕似蘇陸常熟馮班題其集曰蠶吐五采雙雙玉童樹覆寶蓋清談梵宮謂絕好宋詩也彙散佚鵬翀得其寫本選而刊之爲杖左堂集六卷詞四卷續集三卷 金兆燕字鐘越安徽全椒人乾隆三十一年進士官國子監博士改揚州教授兆燕幼稱神童與張鵬翀齊名工

詩詞尤精元人院曲王昶嘗稱其游黃山諸作奇崛可喜偶作旗亭畫壁記盧見曾愛而刻之性不耐靜坐多言笑時日爲喜鵲官揚州時開壇坫號召名士每風月佳夕聯舫於紅橋白塔間吳錫麒謂其分箋角勝落筆如飛蹴躡追之不能及也著有棕亭古文鈔十卷駢體文鈔八卷詩鈔十八卷詞鈔七卷總名國子先生集

陳兆崙

陳兆崙字星齋浙江錢塘人幼聰慧七歲就傅日誦書百餘行輒通曉大義年十五畢十三經旁涉子史以博聞強識稱於時雍正八年成進士以知縣分發福建閩浙總督郝玉麟器之延主鼇峰講席兼領通志局事十三年入都適內閣中書懸缺例得入試遂以第一名授中書兼撰文充軍機章京乾隆元年召試博學鴻詞授翰林院檢討二年充世宗憲皇帝實錄館纂修兼三朝實錄館校對六年充湖北鄉試正考官七年充日講起居注官累充大清會典明紀綱目續文獻通考纂修官十七年二月上御經筵以撰擬講義稱旨擢左春坊左中允六月大考二等一名擢翰林院侍讀學士十八年遷太僕寺卿充續文獻通考總裁十九年擢

順天府府尹值歲大水所在告災兆崙苦心規畫撫綏安集無不得所畿輔役繁民力疲敝舊設官車議簽富戶以代兆崙奏罷之時西路出師徵發禁旅與索倫兵兆崙經畫宿頓儲蓄條理井井軍民晏然復冒雪送之居庸關外時時下馬相勞苦軍中見之莫不懽呼踴躍二十一年遷太常寺卿二十三年上謁陵迴鑾以同官迎駕失儀降太常寺少卿尋命入直上書房遷通政使司副使三十二年復授太僕寺卿前後恭和聖製進呈所著詩文屢拜御製御書書籍硯墨文綺豐貂之賜三十三年乞假歸三十五年假滿仍直上書房三十六年卒年七十有二兆崙精六書之學尤長經義於易書禮均有論述不專主一家其爲詩文不以氣炫才不以詞害志醇古澹泊清遠簡放適如心所欲出始成進士觀政海疆非其好也每發爲詩歌以自灑濯暨尹京兆而意致蕭散有山澤間儀京師士大夫奉爲文章宗匠嘗自言吾書第一文次之梁同書亦謂我朝不以書名而書必傳者兆崙也著有紫竹山房文集二十卷詩集十二卷

商盤 童鈺

商盤字寶意浙江會稽人雍正八年進士初以知縣用特旨改翰林院庶吉士習

國書散館授編修尋以養親乞外補授同知累官至雲南元江府知府以大兵進征緬甸跋涉戎行遂於乾隆三十二年病卒年六十七盤自幼工詩初效樊南既而出入元白蘇陸閒樂府歌行尤瑰麗縱恣跌宕自喜少讀書於土城山之質園舊傳爲句踐教西施歌舞處亭臺花竹甲於一郡盤束髮受書卽婆娑其下因以名集才情富贍所爲篇什甚多後經刪汰尙存三千首爲集三十二卷尤精音律工談笑所至必傾倒名士其風流儒雅論者比之溫岐杜牧云 童鈺字二如亦會稽人少棄舉業專攻詩古文客大梁最久性豪俠不事家人生產與同郡劉文蔚沈翼天姚大源劉鳴玉茅逸陳芝圖結社聯吟稱越中七子嘗往棲鳧村月中行吟得一詩縮一結記之比曉已二十四結矣善畫尤長於梅畫成輒題一詩有萬樹梅花萬首詩之句時稱二絕生平與袁枚未嘗相見而極爲傾倒好聚書典衣鬻婢易之無少惜所藏幾逾萬卷又好金石書畫館穀所入用以卹戚鄰有餘則悉以購焉河南巡撫阿思哈聘修省志凡三十六縣分疏總校條例謹嚴人多稱之卒後袁枚爲編其詩爲十二卷

何夢瑤 勞孝輿 羅天尺 蘇珥

何夢瑤字報之廣東南海人雍正八年進士官奉天遼陽州知州夢瑤以博雅著凡天文術數樂律算法醫學無不究心少與順德羅天尺蘇珥結南香詩社一時稱盛元和惠士奇視學廣東夢瑤與天尺珥及南海勞孝與吳世忠順德陳世和陳海六番禺吳秋有惠門八子之目出宰粵西治獄明慎宿弊革除民稱神君大吏將以博學鴻詞薦辭不赴晚年與杭世駿耿國藩交契朋樽談讌酬唱極歡嘗慨音樂不明於世謂蔡元定律呂新書本原九章訓釋以教門人顧明其理而不得其器則無所考證乃取聖祖仁皇帝御製律呂正義研究八音協律和聲之用述其大要又取曹廷棟所著琴學參覈之謂曹書折衷前賢琴論其說甚辨而於正義似有未合正義本管子淮南子之說以琴三絃爲宮而曹以一絃爲宮管律生聲之理正義謂氣旋折出至管口而得聲而曹謂出管口尙須加分乃得聲此其不合者也然旣旋相爲宮則一絃二絃無非宮矣絃音全半相應管則下一律乃相應固無異說則亦不害其爲同矣爰取曹書刪註合前所訓述二書爲編時稱其決擇精當又以數學與推步之術我朝咸推宣城梅氏然梅氏所著之書叢脞凌雜始末不能明備聖祖仁皇帝欽定數理精蘊及欽定曆象考成窮方圓之

微渺會中西之異同伊古以來未有此鴻寶鉅典也因著算迪一書由梅氏之書而通之筆算籌算表算方程句股開方帶縱幾何借根方諸法皆述梅氏之學至於割圓之八綫六宗三要二簡及難題諸術本之梅氏而又闡精蘊考成之旨甘泉江藩極稱之謂近日爲此學者知法之已然不知立法之所以然知之者惟夢瑤也生平富於著述尤以詩名鍊不傷氣清不入佻南海詩人之藪而夢瑤爲之魁其矧芳園詩鈔杭世駿爲之序他著有矧芳園文鈔莊子故皇極經世易知錄醫碚傷寒論近言紺山醫案三角輯要移橙餘話國朝二百年來粵人論撰之富博極羣書精通藝術未有踰夢瑤者 勞孝輿字阮齋亦南海人雍正十三年拔貢生少好游渡瓊登羅浮絕頂浮江觀衡嶽著作日富受知學使惠士奇名大起雍正八年詔修一統志孝輿與纂粵乘發凡起例多出其手會稽魯曾煜爲總裁亟稱之乾隆元年舉博學鴻詞報罷以拔貢廷試第五人出爲貴州知縣時苗亂始定民未安居孝輿初至奉檄委治古州屯務使經理三堡遂入苗山由二嶺至山婆踰圭翁斗巴直達琴臺措置八堡屯田足繭萬山者七月將去屯之民蟻行盤路而下攀轅曰公衣食我忍未及覩飽煖而去也皆泣下歷錦屏清鎮清溪畢

節諸邑以文學飾吏治布政使陳德榮深與投契所上勸民開墾養蠶種樹諸說德榮多採納檄行諸郡至今民以爲便補龍泉不欲以催科見長毀嘉靖舊碼易爲今制輸糧者獲羨歸民大悅爲建勞公書院尸祝之最後調鎮遠卒於官年五十孝與才氣豪放學亦博瞻著有阮齋文鈔四卷詩鈔六卷春秋詩話五卷讀杜識餘五卷 羅天尺字履先廣東順德人少以淹雅聞年十七應試日竟十三藝元和惠士奇按試廣東拔之大加稱許手錄其荔支賦珠江竹枝詞示諸生聲望蔚起乾隆元年舉博學鴻詞以親老不就是秋舉於鄉一上春官卽歸奉母後卒於家天尺篤友誼纂粵乘時同事勞孝與以忤俗橫被口語天尺力白其誣衆論帖然又與何夢瑤交密郵詩招隱殆忘形迹所居里曰石湖因以自號世稱後石湖謂前有范石湖也著有五山志林其博覈足媿廣東新語詩文曰瘦暈山房集 蘇珥字瑞一亦順德人性脫略不羈篤於學詩有別趣惠士奇稱之曰南海明珠性嗜酒無日不飲然篤於內行執親喪三年一勺不入口人餉以珍異必焚香薦於寢而後敢嘗會薦舉博學鴻詞大吏上其名南海勞孝與同被徵約與俱珥曰予有母八十不畏碧玉老人見晒乎乾隆三年舉於鄉無計偕意母促之乃行

及南返不復出爲文長於序記與其書稱二絕皆見重於時所著宏簡錄辨定筆山堂類書前明登科入仕考皆散佚惟安舟遺藁傳於世

林蒲封 楊仲興

林蒲封字桓次廣東東莞人雍正八年進士改翰林院庶吉士散館授編修乾隆十年充會試同考官十二年十五年兩充順天鄉試同考官洊升侍講學士尋奉命提督江西學政未到任卒蒲封經術湛深於天文律呂靡不研究侍從二十年性恥奔競退食之暇閉戶著述蕭然如寒素嘗採唐魏徵十思十漸李德裕丹扈六箴宋司馬光五規括其大意作保業惜時遠謀重徵務實五箴以獻屢和御製詩稱旨纂修國史凡有舛誤侃侃正論編纂皇朝文穎校刊經史三通無不精當兼工書法卒後命馳驛歸葬著有讀史錄十四卷鼇洲詩文集 楊仲興字直庭廣東嘉應州人雍正八年進士授福建清流縣知縣以罍吏議去後復起江西興安縣知縣累遷至湖北按察使復奪職改官刑部郎中以疾乞歸仲興精力過人手披口答五官並用所至山川阨塞民食緩急與夫學校書院興廢必盡心力規畫尤工古文辭袁枚嘗稱其古奧深峭浸淫兩漢非止規撫昌黎著有性學錄讀

史提要觀察紀略四餘偶錄文集

彭端淑 弟肇洙 遵泗

彭端淑字儀一四川丹稜人生而穎異十歲能文與弟肇洙遵泗讀書紫雲山下相爲師友如是者六年雍正十一年進士授吏部主事遷員外郎郎中乾隆十二年充順天鄉試同考官二十年出爲廣東肇羅道肇羅爲三江要口五州之屏藩重地也端淑至省察政治黜陟能否每按部騶從不過一二人罷州縣送迎餽犒吏民稱歌又延名宿何夢瑤主講端溪書院暇復選開敏有才者親自飭厲成就甚衆時州縣積案三千餘端淑權情事輕重依律斷理旬月之間積案爲清大吏由是深相倚重後運米粵西歸道失足落水援救得免歎曰人於宦途不滿意輒以咎人此誰擠之者今不葬魚腹天於我厚矣復何望焉遂請告歸家居十餘年主錦江書院講席以實學課士年八十一卒端淑博洽工詩文詩學漢魏文學左史皆詣極精微官京師時與弟肇洙遵泗俱知名一時有三彭之目蜀詩自費密父子後奉節傅作楫銅梁王恕繼之皆能步武唐賢古文則罕問津者惟端淑爲崛起云著有白鶴堂文集雪夜詩談晚年詩藁 肇洙字仲尹與端淑同榜進士

由刑部主事歷官至河南道監察御史有撫松堂文集 遵泗字磐泉乾隆二年進士改翰林院庶吉士散館授兵部主事後官同知詩由小杜追蹤少陵有丹溪遺藁

黃之雋

黃之雋字石牧江蘇華亭人原籍安徽休寧少聰穎讀書過目成誦康熙六十年進士改翰林院庶吉士雍正元年奏中元祭聖祖仁皇帝文稱旨越日召見授編修充日講起居注官奉命提督福建學政二年遷中允三年巡撫毛文銓劾之雋庇護生員命回京四年降編修五年復以浮開廩冊革職乾隆元年尚書徐本薦試博學鴻詞時之雋年逾七十試日屬藁成以日昃不能就燭下作書遂納卷出罷歸又十餘年卒之雋倜儻自喜初罷官歸囊無餘資惟嗜蓄書著日者二萬餘卷其爲學排陸王而尊程朱持論甚正而綜覽浩博才華富贍下筆不能自休撰述甚富手編唐堂集五十卷又補遺二卷續集八卷嘗纂修江南通志時人比之范成大梁克家詩別開生面仍復不失正軌嘗集句爲香屑集十八卷凡古今體九百三十餘首十首中句無重出一中首人無疊見且有疊韻不已至於倒押前

韻而對偶工整意義通貫排比聯絡渾若天成又集唐人文句爲之序亦二千六百餘言組織工巧一一如自己出雖非正格實爲唐宋以來所未有云

周宣猷 陳長鎮 易宗滸

周宣猷字辰遠湖南長沙人雍正十一年進士選浙江桐廬知縣調海鹽遷鹽運司運判以事罷官乾隆十六年高宗純皇帝南巡獻詩復原銜卒年六十一宣猷居官有異政桐廬敝俗民無後者得典人妻生子年限滿而無子則價贖如其數宣猷痛切申誠此風遂革海鹽多奸民猾吏持官府短長宣猷勝以嚴威滯案一空邑有虎災爲文牒蘆茨鄉之神三日獵人報獲虎甚衆患寢息松江海溢宣猷督賑不以勞瘁自惜胥役無所容奸遇疑獄一訊輒服運判故美官宣猷不以脂膏自潤暇則與士大夫文酒唱酬兩司分校才士多出其門既罷貧無以養親乃就館維揚少工詩文與全祖望厲鶚交最契詩得大歷十子之遺晚走吳越燕趙南抵黔陽凡所遊歷一寓諸詩妻萬氏亦能文工隸法所著有柯椽集一卷雪舫鈔八卷又有史斷史記難字南北史禪眠雲集禾中雜韻風鈴餘韻等書 陳長鎮字宗五湖南武陵人幼好學有篤行雍正初舉孝廉方正不就乾隆元年復舉

博學鴻詞時舉主爲湘潭陳樹萱或以同姓爲嫌因報罷多羅平郡王慕其學行強致其母諭以要之甚見敬禮十三年成進士改翰林院庶吉士告歸道聞母喪嘔血數升至家數月卒詩學昌谷出入於少陵昌黎間文亦奇奧自成一家言著有白雲山房集 易宗浚字公申湖南湘鄉人國子生父貞言以孝行旌嘗遇寇棄子負祖父入密篠中獲免宗浚生有至性遵父行敦孝友居母喪廬墓三年少好學博極羣書與兄宗瀛有機雲之譽乾隆元年兄弟同舉博學鴻詞多羅慎郡王慕其名並延致邸中教習甚見禮遇宗瀛以選得曹娥場鹽大使王以詩送之宗浚居王邸七年及歸贈世孝二字以寵其行宗浚遂於經術所著七政六宗三江九河諸論實能貫穿羣言折衷至當有半霞樓詩文集歷代名人賢媛齒譜年逾九十卒宗瀛字公仙貢生天資明敏詞藻翩翩有翠濤書屋集

汪師韓

汪師韓字韓門浙江錢塘人雍正十一年進士改翰林院庶吉士散館授編修乾隆元年翰林院掌院學士奏直起居注記注之有協修自師韓始入直數月聞母病假歸旋丁母憂服闋尙書張照爲武英殿總裁疏薦校勘經史師韓承詔任事

未嘗一詣照第八年充湖南學政降調入都大學士傅恆薦入上書房復授編修任館職故事保舉者稱舉主事以師禮師韓曰古人譏拜爵公朝謝恩私室公賢者我何得循俗例以薄待公也未幾復落職客遊畿輔直隸總督方觀承延主講蓮花池書院講席會奉旨核天下書院院長觀承因以入奏上猶記憶以好學問稱之師韓聞而感涕作詩四章紀其事師韓少以文名四方時稱爲近代之劉貢父王厚齋兼工詩通籍後習國書賦龍書五十韻臨川李紱見之歎異攜入八旗志書館館中見者多不知其辭所出中年以後壹意窮經諸經皆有著述於易尤邃著有觀象居易傳箋十卷孝經約義一卷韓門綴學五卷續編一卷談詩錄一卷詩學纂聞一卷上湖紀歲詩編五卷上湖分類文編十卷又有詩四家故訓春秋三傳注解補正文選理學權輿等書

顧我錡 柯煜

顧我錡字湘南江蘇吳江人諸生幼負異姿復沈潛好學酷嗜文選每夜必手錄五篇錄訖輒成誦性至孝日侍親側卽閭里亦罕往還以是學日益進嘗隨其師陳其凝視學山東渡黃河縱遊泰岱孔林諸名勝意有感觸一寄於詩其凝與高

大立皆詩壇宿老我錡與之唱和成海岱吟四卷鄂爾泰任江蘇布政使時以古學延訪人才得五十三人我錡爲冠後辟修通志以水利藝文二志屬之與任啟運等質疑辨難原原本本諸家莫及工詩文生平晨夕編摹筆不停揮其所選輯者有古詩編略十五卷唐音匯鈔二百卷宋詩選十卷元詩選四卷青邱集選四卷所自著者有綱目志疑二卷三餘筆記六卷堪著齋雜誌十卷邑乘備考四卷浣松軒文集六卷詩集六卷外集十卷後鄂爾泰奏應博學鴻詞檄至而我錡已歿鄂深歎息焉 柯煜字南陔浙江嘉善人康熙六十年進士以磨勘名黜雍正元年復成進士官湖北宜都知縣改衢州府教授煜祖聳父宏本皆以詩名叔父崇樸維楨康熙十八年並舉博學鴻儒煜濡染家學見聞殫洽又嘗受業於朱彝尊工詩詞駢體所爲詩兼有錢謙益汪琬兩家之長大學士王頊齡嘗以山林績學薦引見充明史纂修官乾隆元年方苞薦舉博學鴻詞煜時已病喟然曰方君此舉使海內窮士聞之一鳴咽耳俄卒年七十一著有石菴樵唱七卷月中簫譜

詞

江昱 馬榮祖

江昱字賓谷江蘇儀徵人江都諸生少有聖童之日安貧嗜學與弟恂著述酬唱怡怡然雷鋹劉藻沈德潛皆以國士稱之尤精尙書著尙書私學四卷嘗與程延祚辨論尙書古文至晡忘食袁枚目爲經癡通聲音訓詁之學仿宋人押韻析疑之例分別字義異同著韻歧四卷長於詩與厲鶚陳章相倡和最工詠物絕句似李庶子劉賓客其論詩不拘宗派以本諸性情止乎禮義爲主深闢歷下公安之非而斥王李尤力好南宋人詞作論詞詩十八章厲鶚等爭相歎服弟恂以拔貢生官湖南知縣昱奉母就養不與公事惟眺詠山川著瀟湘聽雨錄八卷嗜金石文字辨衡山岫巖一碑出近時僞撰足祛千古之惑他如石鼓銅柱其考究爲博雅諸家所未及又著清泉縣志體例嚴潔一洗舊志之陋乾隆四十年卒年七十他著有松泉詩集六卷養洲漁筴譜疏證草窗集外詞疏證山中白雲詞疏證藥房雜志不可不知錄唐律頌珠集精粹詩鈔恂子德量字成嘉著有泉志三十卷馬榮祖字力本江蘇江都人雍正十年舉人乾隆元年舉博學鴻詞罷歸以選授河南闌鄉知縣闌鄉城廢不修者三百年請於大府重新之設荆山書院親爲諸生講授研鞠獄訟務得情實四境大治繼補鹿邑縣治如在闌鄉旋告歸卒年

七十六少負異才淹貫史學時江淮間多治詩榮祖獨治古文嘗擬劉彥和爲文頌百首又爲演連珠箴百首窮探窈邃奧衍橫驚見稱於時著有亭雲堂石蓮堂等集

蔣衡

蔣衡字湘帆又名振生江蘇金壇人少爲諸生試輒不利幡然曰吾不能習世俗骯髒之文以詭遇乃益肆力於古受文法於婦翁王源而峭利堅削時或過之時吳中書家推楊賓衡師之復博涉晉唐以來各家名蹟積學既久名噪大江南北性好遊足跡半天下所至賦詩作書歌嘯不能自己嘗入關年羹堯招至幕下衡長揖傲睨日借臨劇蹟妙拓以自驗所學絕不干預他事偶遊碑洞觀諸石刻慨然曰十三經皆當時經生所書非歐虞筆也中有舛謬且殘缺當今崇儒重道必校正一手重書庶足佐聖天子右文之治遂矢志鍵關蠲吉張筵祀先聖先書左傳禮記計歷一紀至乾隆三年十三經次第畢成揚州馬日瑄爲出白金二千緡裝潢成三百册五十函四年總督高斌特疏進呈御覽藏懋勤殿奉旨授國子監學正衡當寫經時以恩貢選英山教諭又舉博學鴻詞皆力辭不赴其專精如此

八年卒年七十二卒後五十年上命將衡所書十三經刻石太學御製序文以垂萬世生平論書謂不能爲人宗祖亦當與古人弟昆有拙存堂臨帖二十八卷著有易卦私箋二卷拙存堂詩文集子驥字赤霄能傳其家學

劉大櫟 吳定 王灼

劉大櫟字才甫安徽桐城人貌豐偉而性直諒嗜讀書工爲文章以布衣遊京師時內閣學士同邑方苞以古文辭負重名大櫟持所業謁苞苞一見驚歎告人曰如苞何足算耶邑子劉生乃國士爾聞者始駭之久乃益信雍正七年十年兩舉副貢生乾隆元年苞舉應博學鴻詞科爲大學士張廷玉所黜旣乃知爲大櫟深惋惜十五年廷玉特舉大櫟經學又報罷出爲黟縣教諭數年去官歸四十四年卒年八十二大櫟雖遊方苞之門所爲文造詣各殊苞擇取義理於經所得於文者義法大櫟並古人神氣音節得之兼集莊騷左史韓柳歐蘇之長其氣肆其才雄其波瀾壯闊常著觀化篇奇詭似莊子其他言義理者又極醇正詩能包括前人鎔諸家爲一體著有海峯文集八卷從遊者多以詩文鳴而姚鼐吳定爲最著吳定字殿麟安徽歙縣人敦品勵學事親謹三年之喪如禮自期功及師友喪

飲食起居必變於常少與姚鼎同受古文法於劉大櫟尤相友善定爲文嚴於法雖鼎所爲文亦常斷斷持不可也家本貧至老貧益甚屢試不售嘉慶初舉孝廉方正人以其爲不愧晚年專力經學歛學者自江永戴震輩皆主考據定獨銳意深求義理卒年六十六著有周易集注十卷紫石山房文集十二卷詩集六卷集中所論冠婚喪祭諸作鼎皆以爲有益於人心風俗云 王灼字賓麓安徽桐城人乾隆五十一年舉人官東流縣教諭灼講學窮經自漢唐宋諸家無不穿穴貫通而折衷於義理少從劉大櫟遊大櫟稱其初試落筆已脫世俗語言數十輩古文步趨大櫟雅潔可誦記傳尤有精采詩沈雄雅健絕句得古樂府遺意同時如鮑桂星張惠言皆折行輩推與之著有悔生詩文鈔

明安圖 劉湘燧 邵昂霄

明安圖字靜庵蒙古正白旗人諸生官欽天監監正受數學於聖祖仁皇帝精奧異人曾預修御定曆象考成後編御定儀象考成因西士杜德美用連比例演周徑密率及求正絃正矢之法知其深藏而不可求甚解積思三十餘年著割圓密率捷法四卷一曰步法於杜氏三法外補創弧背求通弦求矢法仍杜氏原法但

通加一四除又弦矢求弧背並通弦矢求弧背六法合杜氏法共成九術二曰用法以綫度求八綫及直綫弧綫三角形邊角相求共設七題謂今之法所以密於古者以其能用三角形也然三角形非八綫表不能相求惟用此法以之立表則甚易以之推三角形則不用表而得數與用表者同三四兩卷曰法解皆闡明弦矢與弧背相求之根書未成而疾革授子新及門下士陳際新張肱共續成之論者謂北齊祖冲之以綴術求割圓密率至今推爲最允安圖所著近乎綴術之遺可卽謂之明氏新法云新字景臻能承其家學際新字舜五宛平人諸生官靈臺郎肱字良亭寶應人諸生由博士升夏官正終戶部主事 劉湘燿字允恭湖北江夏人性穎悟負奇氣於書無不窺少工書法未幾舍去獨喜顧炎武梅文鼎諸家之書作六書世臣說六書者日知錄通雅曆法天學會通方輿紀要曆算叢書也初湘燿聞文鼎以曆算名當世鸞產走千餘里受業其門湛思積悟多所剏獲文鼎得之甚喜與人書曰金水二星曆指所說未徹得劉生說而知二星之有歲輪其理確不可易因以所著曆學疑問屬之討論湘燿爲訂補三卷又謂曆法自漢唐以來五星最疏故其遲留伏逆皆入於占至元郭守敬出於是五星始有推

步經度之法而緯度則猶未備西法舊亦未有緯度至地谷而後知有推步五星緯表已在守敬後矣曆書有法原法數並爲曆法統宗法原者七政與交食之曆指也法數者七政與交食經緯之表也故曆指實爲造表之根今曆所載金水曆指如其法而造表則與所步之表不合如其表以推算測天則又與天密合是曆官雖有表數而猶未知立表之根也乃作五星法象編五卷文鼎深契其說摘其要自爲五星紀要湘燿又欲爲渾蓋通憲天盤安星之用以戊辰曆元加歲差用弧三角法作恆星經緯表根一卷及月離交均表根黃白距度表根一卷皆以補新法所不及自是名以日著大將軍年羹堯禮致幕下甚見親重然知其必敗去之至河南上時務條議四通於巡撫皆如其言行及在江南或請總督引涂水自張家堡鑿九里山由宣化橋入江不復由瓜步湘燿作江浦開河議以正其誤其學於輿地河漕食貨兵防無不通貫而曆算尤精所著又有曆象之學儒者所宜深討論曆學古疏今密論日月食算彙各一卷各省北極出地圖說一卷答全椒吳荀淑曆算十問書一卷湘燿死無子其友陶士僕編序其書目及自注其作書之旨其遺書無一存者胡虔嘗歎爲曆算之學知之者難故其書不復見寶貴云

邵昂霄字麗寰浙江餘姚人雍正十三年拔貢生乾隆元年舉博學鴻詞精曆算之術嘗以漢晉以來天官家言及歐羅巴之說參以已論爲萬青樓圖編十六卷分十四目曰天體曰儀象曰宮度曰二曜曰五緯曰雲氣曰輝氣曰經星曰曆案曰曆理曰曆數曰測時曰定時又創爲量天景尺及漏碗諸法歐人見者皆服其精巧身後詩文散佚有萬青樓詩文殘編一卷

胡天游

胡天游字稚威浙江山陰人少有異才於書無所不窺雍正中兩舉副榜貢生乾隆元年禮部尙書任蘭枝薦舉博學鴻詞天游以持服未與試二年服闋補試試日鼻衄大作遂投卷出方是時四方文士雲集京師每稠人廣坐天游輒援筆數千言落紙如飛縱橫奧博見者嗟服於文工四六得燕許之遺所作若文種廟銘靈濟廟碑安頤先生碑任御史趙總兵兩墓志遼國名臣贊序柯西石宕記論者謂皆天下奇作古文自言學韓愈在儲大文方苞李紱之上然澀險處乃似唐劉蛻元元明善非其至也詩亦雄健有氣性耿介未嘗一刺干公卿一統志成大學士鄂爾泰張廷玉屬表於檢討齊召南召南推天游鄂驚歎其文欲招之召南曰

天游奇士豈可招耶卒不至十六年舉經明行修復報罷二十三年客遊山西卒於蒲州年六十三著有石筍山房文集六卷

周長發 陳士璠

周長發字蘭坡浙江山陰人會稽籍雍正二年進士改翰林院庶吉士出知江西廣昌縣改樂清教諭乾隆元年召試博學鴻詞授翰林院檢討累遷侍讀學士以事降侍講少刻勵爲詩文才華敏捷時比張鵬翀曾賦覺生寺大鐘歌應制稱旨兩奉使祭告嵩華吳山江淮等處歸時詩必成帙論者謂其富瞻有餘而微傷於快焉博聞強記嘗與修綱目皇朝文穎校刊遼史續文獻通考詞林典故諸書令廣昌時邑久雨山水暴漲城垂沒長發朝服登城禱籲雨霽水消民甚德之家藏賜書百數十種嘗乞假省親恩賜內緞豐貂歸爲母壽極儒臣之榮遇所著有賜書堂集詩數千篇後汰存十之一爲八卷 陳士璠字魯齋浙江錢塘人諸生乾隆元年召試博學鴻詞授翰林院庶吉士散館改戶部主事三年充順天鄉試同考官六年充四川鄉試副考官洊陞郎中出知江西端州府二十一年卒於官年六十七士璠持躬廉介官戶部時清案牘豁拖累不與同官立異亦不曲徇上官

善醫上官或以醫召曰吾知爲郎官不知爲醫謝不往守瑞州有惠績暇輒與諸生講文藝卒之日家無餘財詩謹守繩墨而氣骨頗遒早年追蹤漢魏步趨三唐晚乃出入白蘇黃陸有夢碧軒詩鈔十卷文鈔十卷使蜀集孫鴻壽字子恭拔貢生官至江南海防同知博學工詩阮元嘗以陳文述陳甫並稱爲武林三陳著有種榆山館詩集

夏之蓉周大樞

夏之蓉字芙蓉江蘇高郵人雍正四年舉人官鹽城教諭十一年成進士乾隆元年召試博學鴻詞授翰林院檢討九年充福建鄉試正考官十年提督廣東學政十三年復督學湖南卒年八十八之蓉天才宏放通經史善詩文於風騷之旨能究其源流正變之所在方苞稱其古文可方侯魏嘗與苞刪定唐宋八家文往復辨難再三不輟詩以杜韓蘇三家爲宗沈雄雅健長於論古歌行尤跌宕淋漓生平虛懷樂善尤好甄拔寒峻官教諭時會諸生考其所業爲興藝錄督學廣東湖南於治經外示以古文之學錄其尤爲汲古編樂寧侗朱仕琇茹敦和周大樞皆其所取士也足迹半天下所至題詠唱酬無虛日歸後主講鍾山麗正書院盛名

耆德爲海內所矜式嘗作三不忽詩紀熊賜履天下無可忽之人世間無可忽之事此生無可忽之言語以代書紳著有讀史提要錄半舫齋偶輯半舫齋詩文集周大樞字元牧浙江山陰人諸生乾隆元年舉博學鴻詞罷歸十四年復以經學薦十七年舉順天鄉試官平湖教諭博學多才究心經籍尤嫻於易說易不取宋儒所傳圖位謂邵子先天八卦卽從後天圖演出不過取其一畫交易則各成乾坤乃道家抽坎填離之法不合聖經之旨生平與胡天游萬光泰交最深天游詩鬪奇騁異故大樞亦如之工七古沈鬱似杜奔放似蘇與光泰並工詩餘嘗自序其調香詞及爲光泰作樊隣詞序風豔不減三唐文於蒼莽中見清勁時稱傑出晚年境益窮吟益苦鄉舉時年近六十阿里哀愛其才延爲上客每公餘輒令講通鑑數則著有周易并觀十二卷居侯堂彙存吾春軒詩鈔

齊召南

齊召南字次風浙江天台人雍正七年副貢生乾隆元年召試博學鴻詞改翰林院庶吉士散館授檢討八年大考擢右中允洊升至侍讀學士充日講起居注官十三年充會試同考官入直上書房大考一等一名授內閣學士兼禮部侍郎歷

充大清一統志會典明鑑綱目續文獻通考纂修及副總裁官高宗得寧古塔古鏡以詢廷臣召南具析原委款識以對上大悅曰是不愧博學鴻詞矣侍直西苑御射十九矢中的顧尙書蔣溥及召南曰不可無詩隨進詩四章上俯和之十四年自圓明園歸馬驚墮傷腦上立賜藥遣蒙古醫療治病少愈屢邀天語垂問旋乞養歸高宗四次南巡迎鑾召見獻詩疊拜文綺筆硯之賜三十二年族子周華以黨呂留良遣戍歸刻其書呈巡撫熊學鵬誣列召南十罪詔磔周華逮召南至京當籍沒上鑒其無他僅予革職歸尋卒年六十六召南天才敏慧幼稱神童十二歲登巾子山賦詩識者卽以公輔器目之新城何世璠嘗稱於衆曰此我朝奇士當以王姚江一輩相待也性聰強讀書日寸行下一覽終身不忘嘗借異書八冊觀之明日持還主人曰已閱訖矣隨抽一二冊詰召南不差一字主人大驚日光炯炯能矚一二十里登杭州鳳凰山視隔江西興渡人皆歷歷可辨清晨望雲能尋其根隨所尋掘之得雲根石多花草鳥篆形自謂腦裂後記性頓減前後如兩人歸後累主葢山書院成就甚衆上南巡時問天台雁蕩古蹟於召南以未經遊覽對上詢其故對曰山勢峯客谿深流險臣有老母孝子不登高不臨深是以

不往上適奉孝聖皇后南來聞召南言遂不復幸浙東歿時語不及家事惟云濱於死者二皆賴聖主得以生全生生世世宜如何圖報也生平詩文援筆立就晚喜集句李杜韓蘇若出一手嘗臨蘭亭帖卽序中去其複字做千文體成三言詩十七章客有以閣帖三百字求跋者卽因其字集成五律十二首其敏捷如此尤精三禮地輿之學廷臣奉使烏喇巴哈伊犁輒詣問道里堠驛召南與一冊數萬里外若掌上紋毫忽無訛或異之曰不過漢書地理志熟耳嘗謂酈道元水經注明於西北闕於東南著水道提綱三十卷其源流分合方隅曲折統以今日水道爲主又著尙書禮記春秋三傳考證史記功臣侯表五卷考證漢書百卷後漢書郡國志五卷隋書律曆天文五卷舊唐書律曆天文二卷史漢功臣侯第考一卷歷代帝王年表十三卷後漢公卿表一卷

杭世駿 周京 陳撰 汪沆 金志章

杭世駿字大宗浙江仁和人 家貧力學假書於人窮晝夜讀之 父母禁止輒篝火帳中默誦與同里名人輩結讀書社五日一相聚互爲主客問難以多聞見者勝世駿尤強記同輩推服雍正二年舉人乾隆元年召試博學鴻詞授翰林院編修

校勘武英殿十三經二十四史纂修三禮義疏世駿性伉爽能而責人過同官皆嚴憚之有先達以經說相質一覽便稱某事見某書某說見某集拾唾何爲學子有欲受教者問其所業以一經對則以經詰之復以一史對又以史詰之皆窮乃曰某於西晉末十六國事差能詳耳復問汝知是時有慕容垂乎垂長若干尺得年幾何其人慚沮去值亢旱高宗思得直言及通達治體者特設陽城馬周科試翰林等官世駿預焉日未中條上四事數千言語過戇直又言滿州人官督撫者過多上怒抵其卷於地者再復取視之時世駿試畢方趨同官寓邸忽傳言罪且不測同官恐促世駿急歸世駿笑曰卽罪當伏法有都市在必不污君一片地也不測尋放還其論直省藩庫宜有餘款存留以備不虞亦篤論然已削藁語多不傳罷歸後杜門奉母益併力肆志發揮才藻與同里厲鶚周京符曾陳撰趙昱趙信汪沆吳穎芳丁敬等皆爲密友近賓言懷敘權各有搆屬平日通禮學有請復漢儒盧植從祀議又議師當制服可以立師道厲澆季朋友不當制服防不肖者貢媚權勢賢者結怨流俗時論甚以爲洽尤深於詩嘗曰吾遇杜韓當北面若蘇則兄事之刻嶺南集詩風格適上最爲當時所稱後高宗巡幸塞外天雨新霽馬

上吟迎風葦露清於染過雨山痕澹入詩二句顧謂從臣曰此杭世駿詩也惜其沒福耳嘗作方鏡詩二十四首一時輦下傳誦和者幾及千家晚主講揚州粵東書院以實學課士子嘗有商人獲罪澁使非世駿莫能解夜半走世駿所乞救并置重金案上世駿擲出之後迎駕西湖賜復原官三十八年卒年七十六所著續禮記集說一百卷石經考異二卷史記考證三國志補注補晉書傳贊北齊書疏證續方言經史質疑續經籍考兩浙經籍志詞科掌錄詞科餘話兩漢書蒙拾文選課虛道古堂集鴻詞所業榕城詩話亢宗錄晚年欲補金史特構補史亭成書百餘卷有御史祝德麟疑世駿不得意或有誹訕訐奏之上以書並無違礙聽其流傳 周京字西穆浙江錢塘人廩貢生乾隆十二年舉博學鴻詞至京稱疾不就試內行惇篤婦賢而不得於姑卒困悴以死京事母孝不敢有幾微見於顏色然私憐其婦終身不娶以報之有弟已析產乘京出遊鬻其居京歸更僦屋不以一語及也夙以詩名常徧歷秦齊晉楚所至公卿皆倒屣迎之晚息影蓬廬與里中諸詩人爲吟社醉墨淋漓得者以爲鴻寶著有无悔齋集十五卷 陳撰字楞山浙江鄞縣人毛奇齡弟子修行讀書嚶然古處乾隆十二年以布衣舉博學鴻

詞辭不赴詩意冲逸高簡雖未及古要能離俗家有玉几山房蓄書畫最富精賞
鑑畫格尤高爲時人所寶著有玉几山房吟卷 汪沆字西顛浙江錢塘人諸生
早歲能詩與杭世駿齊名爲學博涉無津涯乾隆十二年舉博學鴻詞報罷遊天
津客查氏水西莊南北稱詩者奉爲圭臬大學士史貽直將以經學薦以母老辭
性至孝昆弟未嘗析箸惠周戚黨前後葬三十餘棺喜引翼後進年八十一卒沆
好爲有用之學自農田水利邊防軍政靡不條貫屢爲大府所招晚年自定撰著
多通達治體可見施行著有湛華軒雜錄讀書日札新安紀程全閩採風錄蒙古
氏族略識小錄泉亭瑣事汪氏文獻錄槐堂詩文集 金志章初名士奇字繪甫
亦錢塘人雍正元年舉人由內閣中書遷侍讀出爲直隸口北道清才淵雅耽詩
與杭世駿厲鶚齊名館龔翔麟家故多藏書志章盡讀之日與討論唱酬爲樂旣
從翔麟遊粵西比歸本柳州意成始遊集四卷官口北時續兩鎮三關志歸田後
輯吳山志援引賅博以其家不戒悉燬於火後搜輯記憶存有江聲草堂詩集八
卷所爲詩豪情盛氣勃勃紙墨精悍之色時見於疏秀中性閒曠山行終日不厭
人目爲煙霞水石間客子焜文淳俱稟家學能詩文乾隆元年兄弟同舉博學鴻

詞焜字以寧雍正十三年舉人官至禮部司務著有蠡測錄妙明書屋詩濃蘭詞文淳字質夫乾隆四年進士官至直隸順德府知府深於經營做王伯厚困學紀聞爲蛾子錄三卷又著有讀史卮言

馬曰瑄弟曰璐 金農 丁敬 陳章 姚世鈺

馬曰瑄字秋玉安徽祁門人原江蘇江都籍諸生候選知州性孝友篤於學與弟曰璐互相師友俱以詩名時稱揚州二馬比之皇甫子浚伯仲家有藏書樓見祕本必重價購之或世人所願見者不惜千百金付梓藏書甲大江南北四庫館開進書七百七十六種優詔褒嘉賜古今圖書集成一部並平定伊犁金川詩得勝圖好結客有園亭曰小玲瓏山館四方名士過者輒款留觴詠無虛日全祖望符曾陳撰厲鶚金農陳章姚世鈺皆館其家結邗江吟社時擬之漢上題襟玉山雅集高宗南巡幸其園賜御書及詩海內榮之性耽山水京口三山中吳洞庭林屋之勝足跡幾徧詩纏綿清婉沈德潛以爲峭刻得山之峻明淨得水之澄乾隆二十年卒年六十八著有沙河逸老集十卷嶰谷詞 曰璐字佩兮國子生候選知州乾隆元年舉博學鴻詞不赴試曰璐與兄並擅清才博覽旁稽沈酣深造曾編

有叢書樓書目一時名流交相傾倒生平親賢樂善惟恐不及方聞之士過邗溝者以不踏其戶限爲闕事詩筆清刻著有南齋集 金農字壽門浙江錢塘人嗜奇好古收金石文字千卷詩格高簡有奇氣與同里丁敬相唱和嘗與諸名士集盧見曾署中觀虹橋芍藥農詩先成衆爲閣筆好爲山水遊走齊魯燕趙秦晉楚粵足跡半天下性逋峭世多以迂怪目之書出入楷隸本國山及天發神讖兩碑年五十始學畫涉筆卽古乾隆元年舉博學鴻詞不就晚歲寄食維揚幾二十年賣文自給歲得千金隨手散盡著有冬心集四卷三體詩畫竹記各一卷 丁敬字敬身亦錢塘人與金農同舉博學鴻詞詩造語奇崛秀異遜於農然長篇鋪陳終始農亦不能逮好金石工篆刻爲時所稱著有龍泓山館詩鈔 陳章字授衣亦錢塘人布衣乾隆元年舉博學鴻詞以親老力辭不就精於詩尤工楷法詩文屬彙不作行書弟皋亦工詩有陳氏二難之日時馬曰瑄及運使盧見曾喜招名士章與皋僑寓揚州以領袖稱其詩上規陶韋下則錢郎王昶謂非江湖小集所可並論云著有孟晉齋詩集二十四卷文集二卷皋字對鷗穎悟絕人詩格高潔搖筆立就著有吾盡吾意齋集對鷗漫語 姚世鈺字玉裁浙江歸安人諸生少

嗜學負俊才與弟汝金有二陸雙丁之目詩古文清雋高潔全祖望嘗稱爲今世有用之材生平學問以何焯爲宗貫穿經史有所考訂必詳核精當性嗜山水好交遊與金農厲鶚稱莫逆少偕姊婿王豫同學二人讀書皆能冥搜神會豫遭奇禍逮繫西曹五年釋後數年卒世鈺亦窮阨以終年五十五有孱守齋遺藁四卷汝金原名世鍊字念慈副貢生乾隆元年舉博學鴻詞罷歸後官湖南長沙縣丞詩吐屬微婉兼有寄託著有中州紀略孤笑集五臺山遊草

趙昱子一清 弟信 沈炳巽

趙昱字功千浙江仁和人諸生母朱山陰祁氏甥也嘗舉曠園東書堂籤軸之盛以勸諸子昱迺與弟信旁鈔博購每得書則致之母更番迭進以爲嬉笑築小山堂藏之不二十年插架之盛幾與曠園埒時錢塘吳焯亦好藏書每得一異本昱必鈔存校勘爲之跋語性復好客同學之士借讀其家則解衣推食以鼓舞之昱信並工詩與杭世駿厲鶚全祖望等相唱和嘗與沈嘉轍七人各賦南宋雜事詩百首爲海內所稱說一時有二林之目二林者昱號谷林信號意林也乾隆元年昱信並舉博學鴻詞既罷臨川李紱欲留昱共修三禮昱以母老辭歸後讀書自

娛築春草園疊石疏泉有池館之勝與諸名流觴詠其中山陰金埴詩人也館老友鄭性家一日昱遇之江上問何之曰之楚曰八十老人盛暑爲二千里之行非情也因留止之俄而埴病昱醫藥之死復殮之呼其從子而歸其櫬以葬之性聞埴死爲之慟及聞昱之竟其後事也又爲之流涕其篤於朋友如此詩結體清醇無凡語絕句時似中晚唐人著有愛日堂集十六卷卒年五十九子一清 一清字誠夫國子生少稟父昱教學於全祖望從事根柢之學一時詞章之士莫能抗手酈道元水經注傳寫舛譌其來已久諸家藏本互有校讐而大旨不甚相遠歐陽元王禕諸人但稱經注混淆而已於注文無異詞也祖望始自稱得先世舊聞謂道元注中有注本雙行夾寫今混作大字幾不可辨一清因從其說辨驗文義離析其注中之注以大字細字分別書之使語不相離而文仍相屬又唐六典注稱桑欽所引天下之水百三十七江河在焉今本所列僅一百十六水考崇文總目載水經注三十五卷蓋宋代已佚其五卷今本乃後人離析篇帙以合原數此二十一水卽在所佚之中一清證以本注雜採他籍得滄洛漳沱派滋伊瀍澗洛豐涇汭渠獲洙滌日南黑弱十八水於灤水下分灤餘水又考驗本經知清漳水

濁漳水大遼水小遼水皆原分爲二共得二十一水與六典注原數相符著水經注釋四十卷又取朱謀埠箋隨讀隨正遺漏者補其缺紕謬者正其訛鱗次櫛比各具本元成水經注刊誤十二卷直隸總督方觀承嘗言一清撰直隸河渠志一百三十二卷後戴震刪爲一百二卷蓋趙草創而戴刪改云所自著有東潛詩文集 信字辰垣國子生少時與梁詩正唱和編有同林唱和集李紱見其詩欲以博學鴻詞薦信讓之昱其後亦爲通政使趙之垣所舉時稱其賢詩融冶超詣絕句尤移人情沈德潛極賞之著有醯酪秀硯齋吟藁 沈炳巽字澤旃浙江歸安人炳震從弟先是炳震嘗有事於水經注未就以授炳巽炳巽乃著水經注集釋訂譌四十卷其書據明嘉靖間黃省曾所刊水經注本而以己意校定之多所釐正又以道元徵引之書極爲博瞻傳寫旣久譌誤相仍因徧檢史記漢書志表及諸史各志取其文字異同者錄於下方以備參考其無他書可校者則缺之間附以諸家考訂之說凡州縣沿革則悉以今名釋焉歷九年而成書丹鉛矻矻手自點定初未見朱謀埠本後求得之而所見大畧相同其用心之勤如此工詩著有讀唐詩話一百卷全宋詩話一百卷

張庚 沈冰壺 祝維誥

張庚字浦山浙江秀水人乾隆元年以布衣舉博學鴻詞少孤事祖母及母盡孝及長研究經史不爲科舉業爲文簡老樸實詩亦新穎五七言古體頗見古人堂奧兼精六法所作山水氣韻深厚不亞王原祁以負米故奔走四方足迹半天下所至多與賢豪長者交客睢陽十餘年人重其學所著通鑑綱目釋地糾繆六卷補注六卷極精審他著有畫徵錄三卷續錄二卷強恕齋文鈔五卷五經臆蜀南紀行略短檠瑣記強恕齋詩鈔瓜田詞 沈冰壺字玉心浙江山陰人歲貢生乾隆元年舉博學鴻詞性孤峭寡諧常有古人不見我之憾喜博覽家貧無書恆借閱熟精子史尤諳勝國諸人軼事詩善於論古嘗擬古樂府一卷桑調元攜入都以是知名著有古調獨彈集抗言在昔集考證文史學識頗爲拔俗如辨永王璘之非反李贊皇之非黨何平叔之不父曹瞞爲孝不從司馬爲忠崔浩之死非因毀佛袁枚亟稱之惟其意主駭俗欲以莊子配易管子配書荀子配禮老子配論語未免流於放誕云 祝維誥字宣臣浙江海寧人原秀水籍乾隆元年以諸生舉博學鴻詞部駁不與試三年舉於鄉官內閣中書維誥清才淵雅詩文皆得家

法在京師時與錢載萬光泰等交最契時相唱和公卿皆爲延譽詩清麗芊絲尤工樂府嘗隨扈灤河遼海間其風景數見於詩李鐸沈德潛全祖望諸人亟賞之淳郡王禮爲上賓著有綠溪詩藁

李鐸曹寅

李鐸字鐵君漢軍正黃旗人祖恆忠以侍衛事太宗文皇帝賜名宜哈納官至正黃旗副都統父李輝祖湖廣總督鐸娶大學士索額圖女家世貴顯澹於榮利泊如也性友愛兄伊山獲譴遠戍鐸往省彙月乃歸兄祈山官閩罷歸無家鐸以屋授祈山凡先業之美者悉讓兩兄並售己產代償逋負嘗仕爲官庫筆帖式旋棄去乾隆元年薦試博學鴻詞報罷十五年詔舉經學大臣交章論薦鐸以老病辭少時雅好山水足迹徧天下客江南艤舟采石旣夕江月上鼓櫂中流命琴客彈大雅扣舷以應其節水宿者皆起視以爲狂又嘗北游犯雨雪獨行谿谷中豺虎迹縱橫不顧也苦嗜茗爲鐵鑄瓦缶使奚負以從鐸旣以屋予兄乃築室盤山廡青峰下閉戶耽吟旣老歲一至城中一二日卽歸人罕見其面居盤山二十載以歿其詩古奧峭削自關門徑高者可比杜甫次亦不愧孟郊所著有睫巢詩集十

卷曉巢文集十卷原易三卷春秋通義十八卷尙史七十卷 曹寅字子清漢軍正白旗人父璽官工部尙書寅官通政使江寧織造兼巡視兩淮鹽政性嗜學校刊古書甚精嘗刊音韻五種及棟亭十二種工詩出入白居易蘇軾之間著有棟亭詩鈔八卷又好騎射嘗謂讀書射獵自無兩妨又著有詩鈔別集四卷詞鈔一卷

鮑鈐 朱孝純 舒瞻

鮑鈐字冠亭山西應州人隸漢軍祕書院大學士鮑承先裔由貢生歷官浙江長興知縣海塘通判乾隆十二年署嘉興海防同知鈐工詩文在長興時構一舫取唐張志和語顏曰往來苕霅間與金農臨汎命工寫爲雙溪詩話圖時傳爲佳話生平無日無詩胥吏見其搓手注目神采如有所得輒私相語曰老子詩魔至矣李衛督浙治尙綜覈聞鈐癖賦詩謂湖州守曰長興今日賦詩吾將列之彈章矣守以戒鈐爲度筆硯者三日旣謂其客曰下官忍不可忍矣惟大吏罪之賦詩如故然百事修舉部民交頌衛徐察之亦不怒也後撫浙者爲常履坦耳其名禮遇殊於羣吏然落落未嘗自昵後履坦敗鈐高枕自如相歎爲不可及好士有負之

者重來待之如初曰我愛其才也長興諸生王豫緣事被逮爲經理其家歿後又爲雕其集詩宗王士禎豐瞻流麗著有亞谷叢書稗勺道腴堂詩文集 朱孝純字子穎漢軍正紅旗人先世居山東歷城父倫瀚官都統孝純乾隆二十七年舉人由四川簡縣知縣擢敘永同知重慶府知府移守山東泰安遷兩淮鹽運使以風痺解職歸少承家學工詩文詩伉壯雄豪有幽燕氣紀昀嘗過古北口愛旅舍壁上詩惜不知姓名及爲同考官得孝純卷賞其試律逮見以詩爲贄乃知題壁詩卽孝純也昀甚稱譽之王文治以八音論詩謂袁枚如琵琶孝純如金鐘其推重如此性倜儻作令四川獨遊峨眉經旬乃返後以迴避量移他省時方討金川孝純單騎赴營觀戰鬪久之乃去晚官揚州創梅花書院培植士類與王文治姚鼎交最契嘗招致大江南北諸賢爲文酒之會鼎謂其不可一世之氣勃然動於紙上文治亦謂其豪宕感激之意屢見於詩云善畫嘗繪泰岱全圖爲世所稱嘉慶六年卒年六十七著有海愚詩鈔十二卷 舒瞻字雲亭姓他塔喇氏滿洲正白旗人乾隆四年進士歷官浙江桐鄉平湖海鹽知縣有賢名詩尤麗逸沈德潛謂詩品在元白之間近情處迴不易及少日曾以性愛登臨同謝傅志存溫飽愧

王曾句得名性樸厚屏居委巷不異寒素以文學飾吏治廉明風雅浙人爭頌之嘗預修八旗滿洲氏族通譜著有蘭藻堂集十卷

屈復 吳鎮 楊鸞 胡鉞

屈復字見心陝西蒲城人年十九試童子第一忽棄去走齊楚吳越間轉徙至京師以詩學教授弟子居僧廬坐臥土牀中與客約不迎不送不作寒暄語諸貴人以問奇至趾相錯也出則高杖四童扶持與客講論詩文源流諸史興亡陳迹以及關河扼塞兵馬漕鹽天文律曆諸事愷切詳明言之鑿鑿嘗注楚詞自以新意疏解之頗得騷人言外之旨說李義山詩一洗穿鑿附會常談論詩於賦比興之外專以寄託爲主謂陶之飲酒郭之遊仙謝之登山左之詠史皆自有所以傷心之故而借題發之未可刻舟而求劍其詩渾勁樸質獨開生面託意不凡鄭方坤王昶甚稱之乾隆元年舉博學鴻詞不赴試舉主楊超曾未見復復亦不謝沈德潛謂復以布衣遨遊公侯間不屈志節固是有守之士無子妻死不再娶時比之林和靖著有楚詞新注八卷李義山詩箋弱水集江東瑞草集 吳鎮字信辰甘肅狄道州人乾隆三十三年舉人官至湖南沅州府知府少不羈家本素封嘗發

憤負笈求師四方滋陽牛運震留之署中學業益進比歸生計蕩然而詩名滿人間始官山左後調湖南所至放浪山水篇什愈多三原劉紹攷謂其與建安大歷諸子揖讓一堂王鳴盛亦謂秦中詩派自孫枝蔚李因篤王又日後惟鎮爲絕倫云著有松花庵韻史松崖詩錄同時關中以詩鳴者有楊鸞胡鈇 楊鸞字子安陝西潼關人乾隆四年進士歷官四川犍爲湖南醴陵長沙邵陽知縣學詩於屈復初做西崑晚益瑰麗蒼堅極中晚之勝兼工古文詞著有邈雲樓詩文集 胡鈇字靜庵甘肅秦安人貢生官東臺訓導與吳鎮同學於運震相得極歡工詩文劉紹攷稱三人相鼎足也

翁照 潘高 許廷鏢 李果

翁照字朗夫初名玉行江蘇江陰人國子生乾隆元年舉博學鴻詞以疾不與試十四年再以經學薦亦不遇照負美才受學於毛奇齡朱彝尊工詩嘗詠蓑衣有風雨一身秋句以此得名時吳中詩人最著者潘高許廷鏢李果盛錦照與之埒性聰敏一過目終身不忘少患失血至老不少息當病作時千詩百賦接踵酬應精氣奕奕如常時中歲研經兼採漢宋謂漢儒博而覈宋儒約而精所爲說經之

文穿穴牢固搜擇幽滯類能自伸獨見生平醇謹不作妄語過神祠及名賢祠墓必展謁不敢咳唾有謙癖遇三尺童子加禮讓故交雖歷四五十年每相見拜跪端拱如初雖僕隸下人不衣冠不見也事上接下以誠以禮當代公卿咸敬禮大學士嵇曾筠高斌並稱老友曾筠非照相唱和不吟詩人呼爲詩媒尤工章奏往來江淮燕豫間大吏爭延至幕篤友誼嘗寓朱家後其人逋賦歲暮被繫照適經其地出修脯代償歸橐罄如弗恤也晚約沈德潛結廬吳之采葑溪未遂而卒年七十九著有賜書堂詩文集 潘高字孟升江蘇金壇人貧而工詩五言學韋柳陳維崧嘗寫其詩寄王士禎士禎稱其清真古澹與邢昉王庭相頡頏以是有名於時應督學試列下等怡然自得或謂之笑曰邢孟貞不得專美於前矣金陵詩社賦秦淮曉渡詩諸名流咸集高曰我年老才盡止絕句二十字其詩云潮長波平岸鳥唳月過街一聲孤櫂響殘夢落清淮衆見之皆歛手著有南邨集子玠亦工詩著雙清集句溪集 許廷鏞字子遜江蘇長洲人康熙五十九年舉人官福建武平知縣少英敏論古今史事慷慨激發精弓馬刀槊徧遊四方交海內知名士居官有善政去後人益歌思之詩才綺麗始學杜牧之王仲初繼規模何大

復徐昌穀嚴於唐宋之界五言律七言絕句尤工少緘詩謁王士禎士禎歎爲後來之畏高其倬每對客誦其佳句有作輒與商榷藝林兩賢之晚居長洲郭外之陳墓河水雲千頃花藥數椽與沈德潛王昶相往來猶以詩自遣著有竹素園集李果字實夫江蘇長洲人布衣艱苦力學忍飢誦經衡門兩板竟日條然客至取一錢就茶肆撥茗共啜之樵蘇不繼怡然自得陳鵬年羈管京口果投詩造謁鵬年遂與定交或欲任以鹽筴果力卻之後任事者皆罹禍人服其有識晚年文譽靄鬱過吳門者爭識其面時以魯靈光目之巡撫雅爾哈善嘗過侍御王峻訪以吳中隱君子峻以惠棟及果對遂造訪焉避而不見果之論文謂弇州北地文古而患乎似義烏延陵文真而患乎淺欲救似與淺之弊惟在讀書窮理故所爲文力守矩矱詩格蒼老有一二字未安屢改不倦會詔徵經學總督黃廷桂以果薦焉著有在亭叢藁十二卷詠歸亭詩鈔八卷石閭集

鮑皋子之鍾 余京 張會 周準

鮑皋字步江江蘇丹徒人國子生生而穎異有奇童之日年十七隨父往皖江過采石上太白樓所至發爲詩歌輒驚其長老壯遊姑蘇武林益奇縱其爲詩出入

騷選胎息六朝而折衷於盛唐諸大家音節蒼勁有北地信陽之風而丰致過之
沈德潛嘗稱皋及余京張曾爲京口三詩人客淮揚間邗上諸大賈爭延致爲上
客尹會一轉運兩淮日以國士器之乾隆元年舉博學鴻詞以疾辭不赴三十年
卒年五十八著有海門集三十卷外集十卷華陽瘞鶴銘考一卷京口文獻錄一
卷筆耕錄一卷子之鍾及三女皆能詩一門風雅爲時所稱 之鍾字稚堂少負
儁才文采秀逸以初月賦爲諸城劉墉所知高宗南巡獻詩賦召試第一授內閣
中書乾隆三十四年成進士四十八年充貴州鄉試副考官五十一年充廣東鄉
試副考官由宗人府主事洊陞戶部郎中詩有家法在京師時與洪亮吉吳錫麒
趙懷玉唱酬最密法式善稱爲詩龕四友晚年流連詩酒以汲引寒峻爲已任著
有論山詩藁 余京字文圻亦丹徒人三歲而孤母張守節食貧課之讀少好爲
詩稍長以筆傭養母而吟詠不輟偶得疾母取其藁焚之自是廢詩者十年母歿
自傷貧賤末由表揚常飲憾後獲旌典爲之感泣時稱孝子沈德潛遊焦山見其
詩遂與定交柏鄉魏荔彤亦愛其詩欲令往見辭曰往役義也以詩爲羔鴈非禮
也荔彤益重之詩格意俱高尤長近體時潤州詩人多尙宋格京不專一體晚年

境益老學益醇從遊者日衆四方詩人過潤州者必造其廬達官當路每以余布衣一至爲重卒年七十餘著有江干詩草 張曾字祖武亦丹徒人布衣詩筆清華嘗客吳與諸名士讌於勺湖亭每一篇出咸服其才沈德潛稱其詩風格似鮑皋造句似余京遊京師館大學士英廉家三載然恃才傲物酒酣輒罵座以是卒受困著有石帆山人集 周準字欽萊江蘇長洲人諸生少好讀書絕嗜慾寡交遊陳鵬年訟繫京江往從受業年二十慕鹿門峴山之勝裹糧攜筇上溯沔漢盡探其奧而歸不謁一人每聞佳山水必恣遊晚之京師不交權貴志節皎然人或以迂誚之益自喜因號迂村時有就高僧問京師人物僧曰一爲名一爲利迂村超然名利外京師祇有三箇人其見推如此嘗厲浙西靈隱寺遇沈德潛論詩合遂莫逆與德潛編輯國朝諸家詩爲別裁集王昶謂德潛門下承其指授者以準及盛錦顧詒祿陳魁爲最詩宗唐音五言古七言絕尤善著有迂村詩鈔八卷迂村文鈔虛室吟藁瓢中鶴阜玉楮人海黃海等集

清史列傳 卷七十二

文苑傳三

趙青藜 在越

趙青藜字然乙安徽涇縣人生穎異九歲能文乾隆元年進士改翰林院庶吉士散館授編修三年充浙江鄉試副考官五年遷江西道監察御史六年充浙江鄉試副考官旋丁母憂歸服闋補山東道監察御史十年充湖南鄉試正考官青藜居御史臺前後五年有直聲能持大體不爲激切之語章疏凡數十上如請清屯田歸運丁弛米禁濟民食耗羨歸公興西北水利所言皆關利病又劾總督高斌侍郎周學健奏開捐例謂此風一開將見言利之徒接踵而起爲害甚大上嘉其有所見其合糾協辦大學士彭維新奪情一事議尤侃侃十三年奉命查賑山東還京以耳疾乞休上南巡伏迓道左蒙存問者再年八十餘卒生平以不欺爲主接人外和而內嚴不可干以私爲古文受義法於桐城方苞故風格似之苞稱及門有所祈嚮而可信其操行之終不迷惟青藜爲最詩自漢魏及宋元靡不畢貫

獨宗仰杜甫晚乃歸於韓愈性喜遊往來黃山白嶽間見諸歌詠蕭然自適著有
漱芳居文集十六卷詩集三十二卷尤長於史所作史論有特識著讀左管窺二
卷於二百四十二年事鱗次櫛比穿穴甚深先是青藜同郡以史學稱者推南陵
汪越 汪越字季超安徽南陵人康熙四十四年舉人所著詩古文辭沖淡典博
有綠影草堂集其讀史記十表謂史家有表經緯相牽可以考證而不可以誦讀
學者往往不觀因排比舊文鈎稽微義訂訛砭漏所得殊多其後記一篇稱越初
成此書以書抵其友徐克范克范爲商榷補之故考校特爲精密克范字堯民越
之同里也時郡邑守令頗折節於越而越不妄干謁行社倉於里中請官給印簿
而自謹其出入可爲後人法式焉

鄭燮 王鳴韶

鄭燮字克柔江蘇興化人乾隆元年進士官山東范縣知縣調濰縣以請賑忤大
吏乞疾歸少穎悟讀書饒別解家貧性落拓不羈喜與禪宗尊宿及期門子弟游
日放言高談臧否人物以是得狂名及居官則又曲盡情僞壓塞衆望官濰縣時
歲歉人相食燮大興修築招遠近飢民赴工就食籍邑中大戶令開廠煮粥輪飼

之有積粟責其平糶活者無算時有循吏之日善詩工書畫人以鄭虔三絕稱之詩言情述事惻惻動人不拘體格興至則成頗近香山放翁書畫有真趣少工楷書晚雜篆隸閒以畫法所繪蘭竹石亦精妙人爭寶之詞弔古摠懷尤擅勝場或比之蔣士銓內行醇謹幼失怙恃賴乳母教養終身不敢忘所爲家書忠厚懇摯有光祿庭誥顏氏家訓遺意晚年歸老躬耕時往來郡城詩酒唱和嘗置一囊儲銀及果食遇故人子及鄉人之貧者隨所取贈之與袁枚未識面或傳其死頓首痛哭不已云著有板橋詩鈔 王鳴韶原名廷諤字夔律江蘇嘉定人兄鳴盛入儒林傳鳴韶濡染家學善詩工書畫治古文以清簡爲上鳴盛奇其才責以制舉業曰兄愛我良厚然人情各有所好不可彊也鳴盛入翰林鳴韶獨侍二親顏其堂曰逸野旁闢一室懸篋笠以見志嘗搜集邑中文獻考證異同以補志乘之闕與錢大昕姻婭相善大昕視學廣東邀與俱往遇名勝必往游又走趙魏梁宋遍覽瀟湘洞庭諸勝所至紀以詩著有逸野堂文集十卷春秋三傳考十三經異義祖德述聞竹窗瑣碎詩宗眉山劍南鳴盛選江左十二子詩次鳴韶其中論者不以爲私乾隆五十三年卒年五十七

袁枚 程晉芳 王友亮

袁枚字簡齋浙江錢塘人幼有異稟年十二爲縣學生後至廣西省叔父於巡撫幕中巡撫金鉞一見異之試以銅鼓賦立就甚瑰麗乾隆元年開博學鴻詞科鉞舉枚應詔時海內舉者二百餘人枚年最少及試報罷旋舉三年順天鄉試四年成進士改翰林院庶吉士掌院學士史貽直奇其才命擬奏疏一通曰通達政體賈生流也散館改知縣分發江南初試溧水調江浦流陽再調江寧寧故巨邑難治時尹繼善爲總督知枚才枚亦遇事盡其能事無不舉嘗言爲守令者當嚴束家奴吏役使官民無壅隔則百弊自除其爲政終日坐堂皇任吏民白事有小訟獄立判遣無稽留者多設耳目方略集鄉保詢盜賊及諸惡少姓名出所簿記相質證使不能隱則榜其姓名許三年不犯湔雪之奸民皆斂迹方山谿洞外兩岷爭地無契卷訟久莫能斷枚至檢案牘山積笑曰此左氏所云宋鄭之間有隙地玉暢頓邱是也訟久則破家吾當爲若了之乃盡去舊牘別給符卷使各開墾升科聞者皆歎服有賈人販布江行舟觸戰船溺一兵死衆兵縛控舟子兼及客枚心知過失殺無罪而累客必傾貲乃令乘風張帆作觸舟狀縱之去以埋葬錢發

兵完案侍郎尹會一督學試江寧有兩騎衝其前麾且嫚罵稱某親王家奴他縣尹不敢問枚立擒治則爲大將軍投書制府者也搜其篋得關節書十餘封悉焚之重杖遣去十三年江南災銅井民運米至吳門以被劫告枚以荒政當弛刑召其魁詢之乃土人遏糶非劫也諭以情法追米還主者初枚涖溧水迎養其父父慮子年少無吏才試匿名訪諸野皆曰吾邑有少年袁知縣乃大好官也父喜乃入官舍在江寧嘗朝治事夜召士飲酒賦詩市人以所判事作歌曲刻行四方旣而引疾家居再起發陝西以知縣用上總督黃廷桂書萬餘言不省尋丁父艱歸遂牒請養母卜築於江寧之小倉山號隨園聚書籍爲詩古文如是五十年終不復仕枚崇飾池館疏泉架石釐爲二十四景遊人闐集自皇華使者下至淮南賈販多聞名造請交歡然枚詼諧跌宕自行胸懷未嘗爲勢要牽引年逾六十猶獨遊名山嘗至天台雁宕黃山匡廬羅浮桂林南岳瀟湘洞庭武夷丹霞四明雪竇皆窮其勝又篤於友誼不以窮通生死易心嘗爲亡友沈鳳司祭埽三十年如一日編修程晉芳死負枚五千金枚往弔焚其券且撫其孤見人善稱之不容口後進詩文一言之美枚必能舉其詞爲人樂道所爲詩文天才橫逸不可方物然名

盛而膽放才多而手滑後進之士未學其才能先學其放蕩不無流弊焉其神道碑墓志銘諸文紀事亦多失實惟駢體最工論者謂抑揚跌宕深得六朝體格云枚仕雖不顯而備林泉之清福享文章之盛名百餘年來無及者著有小倉山房詩文集七十餘卷詩話尺牘說部之屬凡三十餘種嘉慶二年卒年八十二子通字蘭村工填詞 程晉芳字魚門江蘇江都人家山陽業鏐於淮乾隆初兩淮殷富程氏尤豪侈晉芳獨悒悒好儒罄其貲購書五萬卷招致方聞綴學之士與共探討束髮時讀戢山劉宗周人譜見其論守身事親大節輒心慕之故以戢園自號又問經義於從叔廷祚學古文於劉大櫟與商盤袁枚唱和詩文並擅其勝江淮老宿咸與上下其議論南游金陵愛栖霞牛首之勝憑眺山川考證今古所至傾其坐人乾隆七年召試授內閣中書十七年成進士補吏部主事遷員外郎四庫館開以薦爲纂修官書成擢翰林院編修晚歲家貲盡官京師至無以舉火四十九年乞假遊西安將謀諸畢沅爲歸老計抵關中一月卒年六十七晉芳學無所不窺經史子集天星地志蟲魚考据俱能研究晚與朱筠戴震游乃治經究心訓故其卒也京師爲之語曰自竹君先生死士無談處魚門先生死士無走處謂

朱筠及晉芳也其聲華之盛如此著有周易知旨編三十餘卷尙書今文釋義四十卷尙書古文解略六卷詩毛鄭異同考十卷春秋左傳翼疏三十二卷禮記集釋諸經答問十二卷羣書題跋六卷勉行齋文十卷葢園詩三十卷 王友亮字景南安徽婺源人乾隆四十一年舉人官內閣中書軍機章京五十六年成進士改刑部主事遷員外郎轉山東道監察御史擢禮科兵科給事中累遷通政司參議太僕寺少卿通政司副使卒年五十六友亮官刑部決獄多平反晚年巡視南漕撫卹運丁寬嚴有體漕船之行速於往日少在金陵有金陵雜詠及巡視南漕有視漕小草以詩名海內者三十年詩格與袁枚相近其爲文議論正大敘事有法亦似程晉芳著有雙佩齋集六卷

葉西

葉西字書山安徽桐城人乾隆元年由國子生薦舉博學鴻詞四年成進士改翰林院庶吉士散館授編修充三禮館纂修官九年充河南鄉試副考官十二年提督貴州學政十七年提督湖南學政洊陞至左庶子以事降補編修西少不喜爲科舉之文家貧嘗爲童子師志行堅確不妄與人交讀書奮發冬寒夜靜每依燈

火坐門外雪深不輟尤邃於經學師同里方苞苞著春秋通論西亦著春秋究遺十六卷其書雖宗苞說而亦稍有從違於胡傳苛刻之論及公穀附會之例芟除殆盡左傳亦多所糾正論者謂其精識駕於啖趙其曰究遺者用韓愈贈盧仝詩春秋三傳束高閣獨抱遺經究終始語也又謂中庸爲漢儒所撰非子思作孔孟山東人故論語孟子皆稱東山漢都長安華山在焉故引山稱華嶽論者亦謂其讀書得間喜詩督學湖南歸值高宗有謁陵及平西夷大典西賦詩彙而顏曰日下草酉與沈德潛袁枚同舉詞科又爲鄉會試同年友枚嘗以德潛善詩西善說經尤所心許罷官後居石頭城下花欄水窗婆娑翰墨與枚益以文字相親他著有詩經拾遺十三卷

邵齊燾 王太岳

邵齊燾字叔山江蘇昭文人幼異敏甫受書能曉大義乾隆七年進士改翰林院庶吉士散館授編修居詞館十年纂修書局者再九年十七年兩充順天鄉試同考官嘗獻東巡頌時稱爲班揚之亞羣公爭欲致之門下齊燾落落寡合年三十六卽罷歸自顏其室曰道山祿隱三十年高宗南巡詔在籍詞臣試闕下以母老

辭齊燾意度夷曠章草入晉人室善爲駢體文意欲矯陳維崧吳綺章藻功三家之失故所作以氣格排奐色澤斑駁爲宗秀水鄭虎文云今古駢散殊體詭製道通爲一本朝惟齊燾一人而已然齊燾謙謙自以爲不足常用陳思王語僕常好人譏彈其文八字鐫爲小印與王太岳書自言根柢疏薄智力凡弱詞不副意意不逮見其虛心如此主常州龍城書院黃景仁洪亮吉皆從受學卒年五十二有玉芝堂詩文集九卷同時爲駢體文者有武進劉星煒錢塘袁枚吳錫麒陽湖洪亮吉孫星衍曲阜孔廣森南城曾煥其後全椒吳鼐合選爲八家四六云 王太岳字基平直隸定興人乾隆七年進士改翰林院庶吉士散館授檢討十五年充日講起居注官十八年充江南鄉試副考官十九年授侍講轉侍讀充會試同考官二十年補甘肅平慶道二十三年調西安督糧道三十三年擢湖南按察使三十六年調雲南按察使三十七年擢布政使是年以審擬逃兵寬縱落職四十二年命在四庫全書館爲總纂官四十三年仍授檢討四十七年擢國子監司業後三年卒年六十四太岳生有至性每言及古來忠義事輒爲感慨流涕卽觀劇亦如之二十六歲喪父事母色養四十年如一日官轍所至必與板輿俱比居喪年

已六十一哀毀一如少壯性好朋友與邵齊燾鄭虎文顧汝修諸人尤善寓書往復率以文章道義相劇切每別必泣涕不自已言經兼訓詁論學兼取陸王詩宗魏晉下及唐人純古淡泊時稱高格初好爲駢體文見齊燾作歎爲天授遂輟不作而規史漢及韓柳氣格高簡卓然名家尤有志於經世之務所至必爬梳剔抉據今考古咨民之疾苦而考論之在平慶及西安皆有惠政又留心水利著涇渠志三卷在雲南閱銅政之弊於是旁搜博訊指利害所由來其言銅政之要必寬給價給價足然後廠衆集廠衆集然後開採廣探則銅多銅多則用裕又言雲南山高脈厚出產礦砂誠使加以人力穿峽成堂則初闢之礦入必不深而工亦不費兼地僻林萃炭亦易得論尤切中當時補救釐剔厥功甚偉滇人祀之七賢祠著有清虛山房集芥子先生集凡二十四卷

鄭虎文 王右曾 沈叔埏

鄭虎文字炳也浙江秀水人乾隆七年進士改翰林院庶吉士散館授編修三充順天鄉試同考官尋遷贊善二十一年充河南鄉試正考官二十二年充會試同考官二十三年提督湖南學政二十四年提督廣東學政虎文少孤有至行於學

無所不通尤工詩文乾隆十年得元至元二年玉甕置承光殿南御製玉甕歌命廷臣賡和時以虎文之詩爲最歸後主徽之紫陽書院十年主杭之紫陽崇文兩書院五年家有盛湖草堂詩酒之會一舉彌月性不苟取囊篋每空家人以告笑曰姑强支持寒餓當共之吾寧苦身無以病吾心也素以經濟自負嘗願爲知縣謂縣令親民知疾苦一令賢一縣治天下令賢天下治時以爲知言著有吞松閣集 王右曾字穀原亦秀水人乾隆十六年高宗南巡召試授內閣中書十九年成進士改禮部主事遷刑部告歸後十餘年卒右曾在都下極爲陳世瑄汪由敦所推許釋褐後皆以爲當得上第既入三甲人猶比之朱彝尊以王儀曹稱之工詩與錢載齊名時號錢王其詩專務沈靜畢沅稱其削膚廓而見性情能自成一 家歸後飄泊江湖閒東南大吏爭相延攬性豪放談笑風生賦詩飲酒無虛日著有丁辛老屋集 沈叔埏字埴爲亦秀水人乾隆三十年高宗純皇帝南巡召試一等賜舉人授內閣中書充方畧館一統志通鑑輯覽分校及歷代職官表協修官又充四庫全書武英殿分校成五十二年進士授吏部主事諸總裁方引以自助而叔埏以母老到部未十日卽乞養歸築室錦帶寶帶兩湖閒學者稱雙湖先

生主魏塘講席尤久教士多有成者嘉慶八年卒年六十八著有頤采堂集十五卷弟珏字景崔少受叔埏之學詩爲錢陳羣所激賞附刊於香樹齋續集中乾隆五十九年獻賦南巡行在列二等著有聖禾鄉農詩四卷

許伯政

許伯政字惠棠湖南巴陵人乾隆元年舉博學鴻詞七年成進士知四川彭縣有惠政值金川用兵供費浩穰伯政善措置軍給而民不擾內擢禮部主事陞員外郎遷山東道監察御史年未六十以告歸伯政學問該洽討論故實必援引剖析使無遺義歸後家居數十年不履城市究心經傳往往出己意爲論著有易深八卷春秋深九卷詩深十六卷尤精步算之學有全史日至源流三十二卷謂天周宜用三百六十度日法宜用九十六刻宮次非恆星一定之居歲實奇零積久始覺損益不宜概爲四分日之一其論皆爲確當惟用邵康節皇極經世元會運世之說合於御製考成之法頗嫌附會又著有事三堂文集益青閣詩集

汪憲 朱文藻 吳騫

汪憲字千波浙江錢塘人乾隆十年進士官刑部主事遷員外郎以父母老乞養

歸憲博雅好古於經尤長於易嘗謂學易期於寡過欲過之寡惟在知悔悔存而凶吝漸消可日趨於吉因以存悔顏其齋又取易上下經爲之說解著易說存悔二卷性好蓄書丹鉛多善本求售者雖浮其值不與較家有靜寄東軒具花木水石之勝朱文藻嘗介嚴可均見憲憲卽館之東軒偕同志數人日夕討論經史疑義又悉發所藏祕籍相與校讐稍暇則投壺賦詩爲娛樂嘗以徐鍇說文繫傳四十卷世罕傳本好事者祕相傳寫魚魯滋多或至不可句讀憲所得雖屬宋影鈔本然已譌不勝乙因參以今本說文旁考所引諸書證其同異著說文繫傳考異四卷又屬朱文藻採諸家評論繫傳之辭及鍇兄弟軼事爲附錄二卷其書縷析舊文徹首徹末論者謂其有功小學詩文不多作作必精詣一字未當往往沈想經時必愜意始脫彙著有振綺堂彙又苔譜六卷憲卒後值四庫館開購求遺書憲子慎選善本經進恩賜佩文韻府並擇其精醇者御製題詠仍俾珍藏以爲好古之勸云 朱文藻字暎濬浙江仁和人諸生少嗜學漁獵百家精六書自說文以下及鍾鼎款識無不貫串源流又通史學凡紀傳編年紀事通典諸書輒能考其缺略審其是非王杰督學浙江延訪之至京師佐校四庫全書復奉敕在南書

房考校嘗游山左阮元孫星衍與之商訂金石成山左金石志後復爲王昶修西湖志纂輯金石萃編大藏聖教解題等書詩在劉夢得張文昌之間嘉慶十一年卒年七十一著有續禮記集說說文繫傳考異碧谿草堂詩文集碧谿詩話碧谿叢鈔東軒隨錄東城小志東皋小志青烏考原金箔考苔譜萍譜 吳騫字槎客浙江海寧人諸生生負異稟過目成誦篤嗜典籍遇善本傾囊購之校勘精審所得不下五萬卷築拜經樓藏之錢大昕爲之序謂所藏百氏皆具獨言經者統於尊也尤喜搜羅宋元刻本如陶淵明謝元暉諸集皆取而重梓之學者珍爲祕寶嘗得宋本咸淳臨安志刻一印曰臨安志百卷人家其風致如此兼好金石以所藏商鳥篆戈吳季子劍等作拜經樓十銅器詩少與陳鱣講訓詁之學所爲詩文詞旨渾厚氣韻蕭遠晚益深造不屑爲流俗之作性慈善嘗買一婢詢之良家女也撫爲己女嫁之一時咸頌其厚德著有國山碑考一卷桃溪客語五卷小桐溪吳氏家乘八卷蘇祠從祀議一卷拜經樓詩話四卷論印絕句二卷又有愚谷文存拜經樓詩集嘉慶十八年卒年八十一

李中簡 戈濤

李中簡字廉衣直隸任邱人少受知於督學錢陳羣與瀋陽戴亨講論詩法乾隆十三年成進士改翰林院庶吉士散館授編修二十一年充山東鄉試正考官二十二年入直上書房尋擢中允遷侍講二十四年提督雲南學政二十八年陞侍講學士充日講起居注官三十三年充湖南鄉試正考官三十五年充湖北鄉試正考官三十六年提督山東學政以罷吏議罷官賞給編修乞疾歸中簡博學工詩文在詞館時與同里朱筠兄弟及紀昀齊名然杜門著述不標榜聲氣交獻縣戈濤以古道相勗勵濤死爲修緦服禮其爲學本之孝弟以厲文行視學所至必察土風便宜陳奏刊布應讀書日以教諸生詩五古宗漢魏盛唐七古專學大蘇陸燿嘗稱其詠懷古風諸什溫柔敦厚原本忠孝尤徵學養之粹紀昀懷人詩云廉衣振高節神龍誰得控又云古道良足希一官非所重其推挹如此趙懷玉師事之卒年六十一著有應制詩二卷賦頌二卷就樹軒詩十七卷雜體文六卷戈濤字芥舟直隸獻縣人少穎異讀書志氣激發慨然與古人哀樂然性介特不爲苟同從瀋陽戴亨學詩受知於督學錢陳羣弱冠舉於鄉任河南嵩縣知縣緣事解官遊京師五年學益老名益立薦經學乾隆十六年成進士改翰林院庶吉

士散館授編修十八年充江西鄉試副考官二十一年充雲南鄉試正考官尋遷御史轉刑科給事中三十三年充福建鄉試正考官官御史時數上封事會京察當事欲置一等辭曰御史言事職也豈可以此階榮進哉聞者服其言而止擇交尤嚴以文章道義相切劘者邊連寶李中簡一二人而已詩格律嚴整綺語理語皆所切戒於唐宋諸大家實能登堂而躋其闕陶樑謂畿輔詩人以濤爲巨擘古文師魏禧疎宥有奇氣著有坳堂詩集十卷畿輔通志坳堂雜著戈氏族譜獻縣志

郭起元 蕭正模

郭起元字復齋福建閩縣人諸生少肄業鼇峯書院蔡世遠稱其品芳潔能文章乾隆元年舉博學鴻詞弗就督學周學健以賢良方正薦授安徽舒城知縣下車釋冤獄數十人調桐城又調太湖疏陂塘建義學未踰年又調盱眙攝泗州知州值河淮汎濫居民蕩析起元經營相度凡五載悉其利害形便盱眙舊城於永樂閒廢至是創議建置曰盱眙阻山帶淮東至海南抵江洛汴繞其北汝潁會其西鎖鑰毫壽屏蔽淮揚自古未有不得盱眙而能東下江左西窺中原者若以山盱

爲城淮水爲池則一城之建勝屯十萬之師惟舊制四山在外狹隘不足守今宜於上龜山觀星臺天臺山戚家山象山頂築垣補其缺下至水濱疊石築堞隨勢高下爲門以包羅山下市廛則扼其險要安危皆有所恃後如所議遷宿虹同知大吏詢以治盱眙策起元曰自潘季馴治河主蓄淮敵黃後人奉爲定論不知蓄淮必於泗州則泗州不免爲壑今欲救盱眙惟將黃河分路洩水下源之洩旣多上游之流自暢又慮清口不能敵黃須洩黃水入湖以助湖水使出清口敵黃則盱眙泗自無屯積洶湧之虞矣起元又以國家修隄無寧歲皆由官司不察致夫役侵蝕於是力除積弊築工堅且久歷大汛無潰決大吏以爲能會任盱眙以失察被議遂乞歸起元熟於史所著漢晉唐宋諸論能獨舉興亡治亂得失之大嘗論劉晏理財謂後世有主於流通天下之財以濟國用者其間利害不一惟晏能權萬貨之重輕使天下無甚貴甚賤而物價常平官盱眙時嘗以身所閱歷者成水鑑六卷爲文有志復古浸淫史漢八家詩清和妍麗似梅都官紀行諸作又胎息少陵著有介石堂詩文集 蕭正模字端木福建將樂人諸生工古文辭耿精忠爲亂匿深山中亂定始出巡撫張伯行開館延士纂修朱子書屬正模總編焉

貢太學一至京師而返深於史學自漢訖五代爲史論十八卷多糾舊史之謬號爲精核又爲讀東林筆記五篇大旨本春秋責備賢者之意傷門戶所由起辨三案之是非而歸罪奸相追論明社雖墟猶食講學之功以扶綱常而歎息於崇禎之蹈覆轍爲不知人之禍也詩滔滔自運不喜齊梁體有深谷詩文集四十卷

朱仕琇 兄仕玠 魯九舉

朱仕琇字梅崖福建建寧人年十五補諸生博通經傳諸子從南豐汪世麟學爲古文嘗代人作書求文於副都御史雷鋹鋹歎爲近古大家旣而知出自仕琇亟稱之名遂著乾隆十三年進士改翰林院庶吉士散館以知縣用選山東夏津縣緣足疾改福寧府教授歸主鼇峯講席者十年四十五年卒年六十六仕琇治古文自晚周以迄元明百餘家究悉其利病而一以荀況司馬遷韓愈爲大宗嘗與人論文云經濟其源史覈其情諸子通其指文選辭賦博其趣左氏太史勁其體孟荀揚韓正其義柳歐以下諸子參其同異汎濫元明近世以極其變歸諸心得以保其真要諸久遠以俟其化又云爲文在先高其志使其心有以自置則我心猶古人之心也以觀古人之言猶吾言也然後辨其是非焉察其盈虧焉究其誠

僞焉定其高下焉如黑白之判於前矣於是順其節次焉還其訓詁焉沈潛其義
蘊焉調和其心氣焉久則自然合之又久則變化生之於是文之高也如桑土之
成臺如鴻漸之在天有莫知其所以然者時治古文者多尊桐城方苞仕琇獨病
其膚淺故或謂其矯枉過正鄰於艱澀然淳古冲澹大興朱筠特推其斬斬自成
一家著有梅崖文集三十卷外集八卷兄仕玠仕玠字筠園乾隆十八年拔貢
生授德化教諭調鳳山以艱去服闋補尤溪陞河南內黃知縣未之官卒年二十
二幼敏慧通經史百家與弟仕琇相切劘仕琇攻古文仕玠遂專業詩其論詩稱
宋嚴氏尤以溫柔敦厚爲本游京師時沈德潛見其存彙許爲得選詩神理黃叔
琳方苞張鵬翀皆一見推許叔琳嘗曰王士禎沒後不見此調久矣仕玠方壯時
嘗涉黃河游太學以震發詩之意氣歸後授徒谿西之草堂谿水出建寧百丈嶺
至仕玠所居曲如環地多楊木風雨至拉雜有聲仕玠樂之所詣益進著有谿音
十卷音別四卷仕琇稱其得於溪山之所助者蓋多他著筠園詩彙三卷刪彙三
卷和陶三卷和紅蕉山房詩錄一卷鴻雁集一卷賦鈔一卷又有小琉球漫志十
卷龍山漫錄二十卷魯九皋原名仕驥字絜非江西新城人乾隆三十六年進

士家居養親十餘年乃出選山西夏縣知縣有惠政以積勞卒於官九皋嘗至建寧謁仕琇而受其爲古文之法復與桐城姚鼐友善鼐稱其文沖淡和易而有體雖本於仕琇而自傳以己之所得持論尤中正其書蘇轍請罷青苗狀後云論青苗法多矣綜其要不出四害之說嘗推言之朱子社倉之法行之不善與青苗無異蓋青苗所放者錢小民當穀貴領錢買穀穀賤又賣穀還錢是徵數倍之息矣若夫社倉所放者穀穀貴時借穀穀賤時仍以穀還雖多取息以錢計之與無息等利一荒年患無穀有社倉蓄積之民得借貸以食利二春耕時農視穀如珠禾稼登場或不免狼戾有社倉以收儲無耗散之虞利三然自官行之則抑配一害也胥役橫索二害也放時得賄而給借歛時按籍而追逋民不能堪三害也卽自民行之而不善亦不免於害惟夫曲體人情深悉民隱當借而弗吝不當借者靳而弗與獎勤而警惰寓激勸於其中及歛之也又視歲入之豐凶以陰行其寬嚴之意則利興而害免矣九皋里居時授其學於子弟及鄉之僑者又授於其甥陳用光新城古文之學其源始九皋著有山木居士集

顧奎光 子敏恆

顧奎光字星五江蘇無錫人乾隆十五年進士官湖南瀘溪縣知縣決獄無滯囹圄一空徽商與瀘民訟厚賂不得入則託監司力左右之奎光不爲動值歲歉設法救荒徵收悉除火耗又蒐考文獻著瀘溪縣志巡撫陳宏謀嘗曰顧瀘溪今之元道州也在任五年調桑植奎光謂苗疆俗悍當使之由禮於是遇事道以孝友睦嫻勸農桑修學校集諸生講學及葦苗猺肅然嚮風俗爲之變尋卒於任奎光博學多識於經尤長春秋嘗謂春秋例從義起非義從例生又謂春秋有達例有特筆然須理會大處不可苛細繳繞又謂春秋時天子僅守府方伯亦失職說者乃於小國見伐責其不告不足以服其心又謂春秋將以治世之無王者而胡氏於宰咺歸贈則曰貶而書名於榮叔歸含及贈則曰王不稱天如此則無王自春秋始矣又謂說春秋者自相矛盾旣云爲賢者諱又曰責賢者備旣曰隱公爲攝又曰桓公爲篡何者爲是其說皆深中春秋家苛刻迂謬之弊生平砥行勵學時稱其爲人有三不惑曰酒色財居官有三不愧曰清慎勤政暇輒博覽羣書或問之曰學所以補吾政之不及也著有春秋隨筆二卷然疑錄六卷詩文集二十卷子敏恆 敏恆字立方乾隆五十二年進士官蘇州府教授天才俊拔善讀書好

吟詠與同里楊芳燦齊名時比之顏謝吳翌鳳嘗與其鄉人論梁溪詩人推敏恆爲第一詞筆婉麗駢體文尤古豔少遊貴池代人撰昭明太子廟碑袁枚見之以爲六朝高手既知爲敏恆作拊掌曰此文令我懷疑十年今得之矣性喜簡默不欲以議論勝人然一義偶抒彌形雋永官教授時問字者履滿戶外卒年四十五著有笠舫詩藁古文辨體等集

梁同書 王文治

梁同書字元穎浙江錢塘人父詩正官至大學士自有傳同書生而穎異性端重詩正命後其兄啟心啟心素嚴少不可意輒箠楚同書怡然順受無怨容乾隆十二年舉人十七年特賜進士改翰林院庶吉士散館授編修二十一年充順天鄉試同考官二十二年充會試同考官二十三年大考二等擢侍講尋充日講起居注官是年啟心卒同書嚴寒跣奔坐羊頭車失足落河岸幾殆服闋以足疾不復出及詩正卒於邸第同書復由里奔喪時子姪無侍側者邸中物多失亡或請治其事同書曰此何時乃念財物耶一無所問嘉慶十二年重宴鹿鳴恩加侍講學士銜二十年卒年九十三同書內行修飭家居不作佛事雖老祭祀必躬親子弟

年少見長者不敢嬉情有事必先白有教勿敢違杭人稱家法者皆曰梁氏性清約一冠一服終身不易不宴客不受餽遺畢沅自楚贈大硯不納強委之而去越數年仍附友還畢工書法少學顏柳中年用米法七十後愈臻變化純任自然爲當世獨絕與劉墉王文治並稱於時嘗奉詔與梁國治秦大士莊培因繕錄昭明文選日本國王有王子好書以其書介商船求評定琉球生徒自太學期滿歸求見不得乃言來時王命必一謁見乞書一紙以復命其名揚海外如此詩多雅音集杜句尤妙合自然文亦清峭拔俗論者稱其爲書名所掩云著有頻羅菴遺集凡詩三卷集杜二卷文四卷題跋四卷直語補證一卷日貫齋塗說一卷筆史一卷 王文治字禹卿江蘇丹徒人乾隆二十五年一甲三名進士授翰林院編修二十七年充順天鄉試同考官二十八年充會試同考官大考一等第一名擢侍讀旋出爲雲南臨安府知府以事免歸文治天才豪縱眉宇軒舉少有國士之稱爲文尙瑰麗至老歸於平淡詩雄傑宏亮不愧唐音時袁枚壯年引退以詩鳴江浙聞文治繼其後聲華相上下書法尤秀逸得董其昌神髓梁同書自謂不如也高宗南巡覽文治所書錢塘僧寺碑大賞愛之嘗渡海至琉球琉球人傳寶其翰

墨兼精音律歸後買僮教之度曲行無遠近必以自隨或諫之不聽然客去樂散默然禪定嘗自言其詩及書皆有禪理嘉慶七年卒年七十三著有夢樓詩集

王元啟 萬光泰 沈大成

王元啟字宋賢浙江嘉興人乾隆十九年進士官福建將樂縣知縣在任三月而罷然其釐訟獄禁博塞設十家牌平鹽價立排糶之法禁質庫重利疏濬溝渠修築橋梁道路諸實政悉殫心力爲之邑人以爲抵作令者數十年之功罷官歸前後歷主講席所成就之士以學行文藝顯者數十百人其論學以程朱爲宗於文則法韓歐諸大家其考古也一本於論世知人之識確乎有以辨其真僞而精心密察爬梳抉摘不使有片言隻字之疑訛著有惺齋雜著其正史記之譌者爲律書一卷曆書一卷正漢書之譌者爲律曆志二卷又專業曆算以算法始於句股撰句股衍一書因繁求簡最爲明晰書分甲乙丙三集甲集衍原三卷乙集綱要二卷丙集析義四卷甲集首卷通論衍原末及開平方法爲句股因積求邊張本二卷專論立方因及平方法三卷專論和數開立方所以盡立方諸法之變乙集兩卷爲相求法百三十二則之綱要丙集四卷卽相求法逐則分晰其義專取發

明立法之意其後嘉定錢塘讀其書謂爲獨絕云晚歲專於易病革時猶補注周易下經卒年七十三著有周易四書講義曆法記疑角度衍九章雜論讀韓記疑惺齋論文祇平居士文集 萬光泰字循初浙江秀水人乾隆元年薦舉博學鴻詞是年舉於鄉光泰才思富贍篇什頗多舉詞科時方弱冠讀書能穿穴經傳詣極精微於小學音韻皆有所得其卓然獨絕者周髀之學上自注疏旁及諸史以至明之三曆駁正龐利之說布算了了識者歎其神妙梁詩正續修通考延光泰董其事侍郎齊召南以爲其學精進人未見其比卒年三十九所著有轉注緒言二卷漢音存正二卷遂初堂類音辨一卷其詩文爲柘坡居士集 沈大成字學子江蘇華亭人父喬堂官直隸青縣時河工欲盡用民力遂自經死以護青人大成壯年耽心經籍通經史百家之書及九宮納甲天文樂律九章諸術嘗謂西法出於周髀周髀者蓋天也蓋天者渾天之半渾天者蓋天之全又謂其入中國也唐高祖時已然不始自明之末造而徐光啟之徒未嘗讀書從而尊奉之甚矣其惑也其說引通典職官爲證能發人所未發初以父卒官爲受代者所窘家遂中落自是屢就幕府徵由粵而閩而浙而皖前後四十年然性勤敏舟車往來必以

四部書自隨晚年借惠棟寓官梅亭益以學業相砥礪其校定十三經注疏史記前後漢書南北史五代史杜氏通典文獻考昭明文選說文玉篇廣韻顧氏音學五書梅氏曆算叢書尤爲一生精力所萃古文刊落粗獷別有幽光於震川獨得神解能詩初學黃之雋繼而出入唐宋不名一體後館於江春家手編詩文五十八卷爲學福齋集卒年七十二無子江春爲刊以行世

沈業富 施朝幹

沈業富字方穀江蘇高郵人乾隆十九年進士改翰林院庶吉士散館授編修二十五年充江西鄉試副考官二十七年充山西鄉試副考官三十年出知安徽太平府在任十六年興利除害有惠績值荒災勸富家糶濟密檄官圩禁轉掠總督嘗下其法於他郡行之四十六年擢河東鹽運使時河東以蒙古鹽病商滋弊業富謂鹽池自古爲利不當革若聽民自販必致蒙古鹽內侵商人之力不在寡在不均其弊有三商棄瘠據肥一也費浮地遠夥攬其利二也簽代之期貧富倒置三也乃立均引順路之法總三省引地以三等均之復以道路相近者順配爲五十六路路各一籤令各商均分籤掣之於是賂絕而弊不行旋以乞養歸其後廢

商運蒙古鹽復內侵至嘉慶十一年仍復舊制性醇厚篤於朋友黃景仁卒於署中經紀其喪並哀其遺稿家居後士大夫南北往來必造門請謁業富以耆宿提倡風雅香山洛社之風賴以不墜十二年卒年七十六著有味鐙齋詩文集 施朝幹字培叔江蘇儀徵人乾隆二十八年進士官至太僕寺卿六十年充山東鄉試正考官撤闈後奉命督學湖北卒於任性廉介居邗上不屑與齷客往還及官京師敗車一輛老屋數椽忍飢誦經罕接賓客爲御史數上封事上嘉納之輒下部議行少以詩名王鳴盛刻吳中十子詩以朝幹居首王昶稱其樸質清真不尙才藻得之孟東野梅聖俞爲多錢大昕則謂其氣格在高岑李王之閒古文亦簡潔有法度著有六義齋集正聲集

曹學閔 折遇蘭

曹學閔字孝如山西汾陽人乾隆十九年進士改翰林院庶吉士散館授檢討轉河南道監察御史遷刑科給事中轉吏科擢光祿寺少卿遷通政司參議太僕寺少卿以事降鴻臚寺少卿扈駕熱河上召見知其樸誠尋遷內閣侍讀學士會創建辟雍告成將行臨雍禮上念學閔爲御史時曾以此事入告特旨嘉獎令吏部

於應陞缺出請旨擢用五十年正月賜千叟宴學閱年六十七得與有御製詩刻及鳩杖文綺之賜尋擢宗人府府丞以告歸五十二年卒年六十九學閱和平靜穆言訥訥如不出而見義必爲官翰林時司院事會有八九英俊爲蜚語所中將登白簡同事相歎咤莫敢申雪學閱獨奮起詣院長婉白之事遂止其後八九人皆致通顯學閱終身不言紀昀甚賢之在臺垣八年所陳奏於民生吏治皆有裨益性耽山水暇輒與知己出國門游覽往來吳越間縱觀東南諸名勝與朱珪交最摯珪詣其齋蔬食清淡儉約如諸生生平不臧否人物而胸中涇渭分明嘗曰人各有所偏但當棄短取長否則無一人可交矣晚年講求性命之學泊然宵默幾於靜得所作多心得近道之言詩文摠寫性情不事藻飾議論英特見重於時賢著有紫雲山房詩文稿 折遇蘭字佩湘山西陽曲人乾隆二十五年進士官至廣東揭陽縣知縣篤學工詩其古詩開奧少陵七律得李何餘響袁枚甚稱之嘗告人曰吾此行至粵得二人一李憲喬一折遇蘭二人詩有風格學具根柢風塵中之麟鳳也其推挹如此著有看雲山房詩草

余慶長 段嘉梅 程大中

余慶長字庚耦湖北安陸人乾隆十五年舉人由雲南通海知縣遷他郡通判再補維西通判擢大關同知以憂歸金川用兵總督富勒渾巡撫李湖以慶長練習軍事奏調入川補成都府同知尋丁母憂服闋用廣西同知署樂平府知府所至有惠政生平不以趨走爲長而一切案牘皆能默識而強記之上官咸服其才大軍征緬甸令總糧臺慶長迺里設站站設夫所需皆立辦兵役不戢自安其在四川亦如之幼敏慧沈靜寡欲喜崑山顧炎武之學詩文亦相似尤深於宋元經說治事悉倣經義行之著有十經攝提易識五翼義階易義識疑周書章段春秋比事集訓春秋大義春秋傳辨禮記通論盤庚淺說月令啟蒙大樹山房文彙壬癸詩鈔登仕一紀錄未信存逸緬舌編略墨池紺珠習園叢談德貽堂家訓凡二十二種爲五十一卷古文清深簡潔詩工隸事告歸後雲南巡撫譚尙忠聘主五華書院時王昶官雲南慶長爲編次銅政全書八十卷嘉慶五年卒年七十七 段嘉梅字孟和湖北漢陽人生而穎異七歲十三經成誦九歲爲文驚其宿老與吳邦治齊名時稱漢陽雙鶴數奇不售絕意進取以詩文著述自娛生平好遊足跡半天下所至爭相延攬粵撫馮光裕黔撫元展成先後賓禮之桂林陳宏謀尤深

相倚重嘗謂嘉梅才識品望罕與倫比四川布政使呂耀曾延至署與論詩耀曾父謙恆嘗典試湖北以未得嘉梅爲憾官光祿卿時會有詔命內外臣工各保舉一人謙恆將以薦於朝嘉梅力辭歸後與同邑彭湘懷相唱和其詩自抒胸臆不專一家甫脫藁卽傳誦海內所著卮言九十首雜詠百首梅花百詠諸詩尤膾炙人口莊親王嘗取其詩刊入選集性狷介道義之交堅於金石所居爲明王章袵水明樓故址乃袵築以待公安三袁者袁伯修詩所謂浪花影裏看春山者也年八十三卒 程大中字拳時湖北應城人乾隆二十二年進士官蘄州學正大中殫心稽古淹通經史嘗採輯諸書之文與四書相發明者或集注已引而語有舛誤或集注所未發而義可參訂皆爲之箋其出處著四書逸箋六卷論者謂其書雖不及閻若璩四書釋地然較張存中之通證詹道傳之纂箋要無所讓其論史謂史記秦子嬰降之歲書漢元年漢書去漢字殊非正始之義又謂三國志荀彧傳彧以憂薨明年太祖遂爲魏公陳壽意使人知操少自安者蓋憚彧而不敢爲如此之類皆爲特識所著測言二卷名論尤多詩非專長有靜細語著有在山堂集甲乙存藁餘事集

蔣士銓 楊屋 汪軻 趙由儀

蔣士銓字心餘江西鉛山人家故貧四歲母鍾氏授書斷竹蔑爲波磔點畫攢簇成字教之父堅有奇節十一歲父縛之馬背遊太行讀鳳臺王氏藏書旣長工爲文喜吟咏金德瑛督學江西奇其才以孤鳳皇稱之拔冠弟子員乾隆十九年由舉人官內閣中書二十二年成進士改翰林院庶吉士散館授編修二十七年充順天鄉試同考官旋以乞假養母歸會裘曰修以士銓及彭元瑞薦高宗召見元瑞問士銓何在元瑞以母老對上賜元瑞詩有江右兩名士句士銓感激恩眷母服除力疾入都補官逾二年記名以御史用未幾仍以病乞休四十九年卒年六十一士銓長身玉立眉目朗然志節凜凜以古賢者自厲趨人之急如恐不及乞休後主紹興蕺山書院時越中富家池三江閘日久堙廢士銓力請於大府借帑營治日事雖非山長責然食越人粟則視越人如一家也偶埽墓歸鉛山則爲邑人建壩濬渠以通水利有駱生者負鹽課客死士銓漏夜作十三札飛遞嶺南俾其孤孀扶六櫬歸其所爲詩氣體雄傑得之天授變化伸縮能拔奇於古人之外至敘述節烈讀之使人感泣少時與武定汪軻南昌楊屋南豐趙由儀有四子之

日後與袁枚趙翼稱袁蔣趙三家枚嘗以第一人自命而以第二位置士銓然論者謂袁詩多可驚可喜蔣詩則多可味不能軒輊其詩古體勝近體七言尤勝高麗使臣嘗餉墨四笏求其樂府以歸古文亦雅正有法詞尤獨絕著有忠雅堂文集十二卷詩集二十七卷銅弦詞二卷子知廉知讓俱善詩知廉字修隅由拔貢署山東臨清州州同以履勘振濟得疾卒年四十有弗如室詩集知讓字師退由舉人官河南唐縣知縣有妙吉祥室詩集 楊屋字子載江西南昌人本天全六番招討宣慰使孫雍正初改土歸流安置江西乾隆十八年拔貢生楊氏雖世以武功顯而父子兄弟以詩文相師友數世有集爲世所稱屋六歲解吟詠九歲以詩名與汪軻相伯仲時稱兩才子其詩清超深渾自成一家新樂府諸作尤獨出冠時卒年三十二著有恥夫詩鈔 汪軻字輦雲江西武寧人優貢生官吉水訓導少孤貧向學從同邑盛謨遊謨治古文有聲軻獨好爲詩古體追漢魏近體師太白襄陽皆尙高格嘗與魯仕驥客寧化雷鉉幕中鉉重之曰兩生志學非時賢可及蔣士銓因屋以交軻三人者相視如昆弟軻性贍直尙氣誼與趙由儀交尤契晚自放於酒醉則痛哭呼由儀不置年五十七卒所作詩凡二千餘首曰魚亭

詩鈔 趙由儀字山南江西南豐人乾隆六年舉人五歲涉經傳史漢一見了了稱奇童既閉戶十年沈酣載籍才思益壯縱談天下事慷慨自喜而尤工於詩年二十三卒著有漸臺遺草

陳奉茲 孫世慶

陳奉茲字時若江西德化人乾隆二十五年進士授四川閬中縣知縣擢茂州直隸州知州大軍征金川主礮局及修飭橋路崎嶇山谷閒勞績甚著三雜土司地當進攻之路其長卓爾碼婦人也謂且伐之閉道不通將校譁言三雜畔請先攻奉茲曰此未知國家意耳非畔也請往察而諭之將軍從其策卓爾碼即散守者具狀上謝大軍過奉伺維謹詔加其封號曰賢順卓爾碼以陳公活我又予我以榮名也益德之旋晉嘉定知府及建昌道擢按察使在蜀二十年調河南又調江蘇遷江寧布政使官江南九年熟習民情馭以簡靜吏民愛戴謂得大臣體奉茲好士樂善獎掖如不及天才高邁詩專法少陵論者謂樸厚之氣殆堪媲美洪亮吉甚稱之喜桐城姚鼐之文所作皆有古法著有敦拙堂集十三卷孫世慶世慶字聰彝諸生詩文絕俗吳嵩梁賞愛之妻以次女女亦能詩世慶依嵩梁居京

師鮑桂星見其詠鶴詩大賞之呼爲鶴秀才名大起咸豐三年粵匪逼潯陽避兵撫州踰歲卒年五十九著有九十九峰草堂詩鈔

李文藻 李維寅

李文藻字素伯山東益都人乾隆二十五年進士選廣東恩平知縣調潮陽擢廣西桂林府同知文藻天資俊朗年十三隨父游曹家亭作記一篇仿赤壁賦見者以爲神童及長從錢大昕游窮經志古肆力於漢唐注疏聚書數萬卷皆自校讐丹鉛不去手聞王昶有惠氏易漢學諸書揮汗借鈔不以爲苦生平樂道人善表章潛德嘗訪張爾岐惠棟江永諸遺書刻之名貸園叢書德州梁鴻翥窮老篤學文藻爲之延譽名遂起官嶺南士子以文就質無虛日獨稱馮敏昌胡亦常張錦芳黃丹書呂堅而於黎簡尤爲傾倒嗜金石崖洞寺觀搜羅必盡詩文自據所見不傍前人門戶居官以廉白強幹稱懲盜牛止械鬪釋冤獄粵人頌之大吏嘗下其法於所部去之日囊橐蕭然惟拓光孝寺貫休畫羅漢四軸歸曰此吾廣南宦橐也錢大昕嘗謂文藻欲以文學顯而世反稱其政事云年四十九卒著有恩平潮陽桂林諸集 李維寅字春旭順天大興人乾隆三十九年舉人官至廣西龍

州廳同知少篤學威儀倣儻初知廣西義寧縣事以勸墾興學爲務調宣化值安南用兵舟車供張什倍他邑維寅措置裕如而民不擾福康安廉其賢薦擢左州知州嘉慶二年西隆州苗變上書總督吉慶謂苗不足憂當安民民遭焚掠無所容且從賊而賊勢成矣古稱徵兵滿萬不如招募數千蓋以募爲賑民心安則賊氣奪況其急私讐悉敵情者乎又謂苗不能盡剿宜主撫然不可不先威以撻伐博引宋明征苗前事繪地圖山川夷險攻守形勢辯論數千言吉喜檄維寅督辦糧臺嘗率勇入山剿苗奪七隘礮碎馬前蓋不爲動縱馬亂流進衆奮呼從之擒賊酋歸紅水江者黔粵之限苗恃以爲險者也維寅夜使人泅過江盡斷苗舟纜獲船以濟師賊驚潰遂渡江解册亨州圍大軍凱旋維寅與總兵穆克登布留寨招撫餘衆歲盡戡功旋染瘴卒年五十一維寅居官二十年不名一錢好急難獎拔後進士民稱之工詩原本少陵出入白蘇多雄渾激壯之氣銅鼓歌及西隆從軍諸篇尤激昂慷慨波瀾橫溢著有廉餘詩集二卷

朱休度 張雲璈

朱休度字介裴浙江秀水人乾隆十八年舉人官嵯縣訓導俸滿膺薦選江西新

喻知縣調山西廣靈縣始至值大荒疫招集流亡以次漸復親履原畝使丁糧歸地無曠土無逋負尤善決大獄大同馮良純兄爲里長催繳料草笞恚而死良純控於郡郡守檄休度鞠之至則俯首聽乃縱之歸適大吏欲提問休度遣一家丁往良純卽出曰我不難逸去第不忍負朱侯耳性慈惠嘗曰南方案多法輕情重北方案多法重情輕稍忽之失其情矣能無慎乎官廣靈七年民有訴曲直者數語剖決輒悅服去囹圄爲空暇乃考縣之壺泉爲周禮之嘔夷川謂鄭注良是酈道元以涑水當之者誤也於是築巽妙軒壺山上與僚友及鄉老人學宮弟子風詠其間署其橐曰壺山自吟索明阿至縣聞百姓皆呼良心官甚重之尋引疾歸縣人懇留不得乞休度壺山垂釣小像勒諸石追送至蔚州去後垂三十年縣人思之祀名宦休度博聞通識於書無所不窺在嵬時嘗采遺書四千五百二十三種上之四庫其說經集諸儒之言而疏通之不自立一說時皇侃論語義疏始出因著皇本論語經疏考異偶患心疾不能觀書則考金石文字自娛著石藥記歸後主講剡川書院選史漢以來文章類要以教士會將舉南巡盛典大吏屬撰三天竺志成十六卷獻之行在詩深於南宋排比聲律最精著有小木子詩三刻爲

詩一千八十首又有學海觀瀾錄紫荆花下閒鈔游筆嘉慶十七年卒年八十一
張雲璈字仲雅浙江錢塘人乾隆三十五年舉人選湖南安福知縣調湘潭尋
謝病歸雲璈博學雄才於書無所不窺尤長於詩居官有惠政湘潭地當衝劇審
理積訟時以爲能暇乃輯縣志表彰節孝瘞無主屍於義山治潭五載人呼張佛
子亦呼張青天歸後以著述自娛年七十猶步至湖上或登吳山與文士賦詩談
笑無異少年詩憑衿發詠無寒苦穠纖之習嘉慶九年卒年八十三著有簡松草
堂詩集二十卷蠟味小彙五卷歸艤草一卷知還草四卷復丁老人草二卷又有
文集十二卷金牛湖漁唱一卷三影閣箏語四卷選學膠言二十卷選藻八卷四
寸學六卷垂綏錄十卷

張遠覽

張遠覽字偉瞻河南西華人乾隆十八年拔貢生十九年舉鄉試選授正陽教諭
幼孤力學讀書日記誦數千言事母盡孝母卒廬墓三年大興黃叔琳一見其器
之官教諭時課諸生以敦行學古遠近爭來就學庠舍至不能容弟子經指授成
材者甚衆畢沅撫豫聞其名調攝開封教授至則以金石文字相質贈以金幣遠

覽受幣反金強之終不受尋以卓異薦選授貴州鎮遠知縣侍郎王昶爲序送之謂其必能以博雅之學播循良之治鎮遠古夜郎地苗民雜處犷悍難馴遠覽禁奢靡罷供給結以恩信皆帖服舊俗子女多者父母往往忍不舉遠覽諄諄勸諭苗民感動俗遂變調署下江通判下江環山爲城缺處補以輒價十倍於石遠覽以石易之歲省工價無算山有虎患出資製火器令武弁日習之虎屏迹苗民以安居四月以疾乞歸歸之日老幼涕泣相送生平沈酣經史旁及百家工詩古文詞吳德旋稱中州以經學著聲其後並爲循吏者惟武億及遠覽云歸後值西華民束玉林謀不軌迹且露與邑大夫密謀擒治之又躬率門人子弟晝夜巡察其遇事奮發有爲如此嘉慶八年卒年七十七著有詩小箋春秋義略春秋主臣錄古詩錄碑幢聞見錄直方堂詩草桐岡文存

趙翼

趙翼字耘松江蘇陽湖人生三歲日能識字數十十二歲爲文一日成七篇人皆奇之以直隸商籍舉乾隆十五年鄉試十九年中明通榜用內閣中書入直軍機處進奉文字多出其手每扈從出塞戎帳中無几案輒伏地起草頃刻千百言不

加點大學士傅恆汪由敦尤重之二十六年以一甲三名進士授翰林院編修任
撰文修通鑑輯覽明年京察記名以道府用二十七年充順天鄉試同考官二十
八年充會試同考官三十一年復充會試同考官尋授廣西鎮安府知府府境極
邊民安訟簡而常平倉穀有出輕入重之弊粵民償穀以竹筐以權代概有司因
購馬濟滇軍別製大筐斂穀事罷遂以爲常民苦之翼開府倉聽民用舊筐自權
以納穀於是民持羨穀以去權聲溢闐闐屬城有控橫斂者則縛其監倉奴及書
吏痛懲之鎮安民由是感激每出行爭肩輿過其邨謂我公至矣奉酒食爲恭敬
所至皆如之先是鎮民與安南民入雲南土富州爲好事發捕獲百餘人而其魁
農付奉顧逸去前守以是解職已而付奉死於安南獲其子並獲其尸驗之良是
總督李侍堯疑其爲前守道地不之信翼申辨侍堯怒劾之值緬甸用兵命翼赴
滇贊畫侍堯乃追劾疏還是時將軍明瑞征緬甸失事殉難及大學士傅恆來滇
經略兵事議以大兵渡憂鳩江進剿卽金沙江上流也令提督以偏師五千從
普洱進遙爲聲援翼謂憂鳩普洱相去四千餘里大兵旣渡憂鳩之西則偏師宜
由江東岸近地進取猛密夾江而下造船以通往來庶兩軍可以互應遂如翼言

入告其後渡憂鳩之兵觸瘴氣多疾病而阿桂所統江東岸一軍獨完又以此兵敗賊於蠻暮老官屯卒以蕝事時三十四年也明年調廣東廣州府先是侍堯固欲調翼使他守諭意翼不可曰鎮安天子所授吾受上司恩調善地他日何能自行其志至是人服其能自立在廣州府決獄平獲海盜百八人按律皆死翼詳讞分別殺三十八人餘遣戍三十六年擢貴西道威寧水程兩鉛廠舊由糧道管轄官吏恆視爲利藪及侵虧事覺巡撫以下多罹重辟迺改令貴西道經理翼視事凡短發工價運費諸弊剔除略盡大吏方以是爲翼功旋因廣州讞獄舊案部議降級奉旨送部引見翼遂以母老乞歸不復出五十二年臺灣民林爽文作亂李侍堯赴閩治軍事道出常州邀翼偕往時兵將雲集成謂不日蕩平翼獨請侍堯密調粵兵爲備旣而總兵郝壯猷敗遁遊擊鄭嵩死之賊勢大振而粵兵適至人心始定當是時總兵柴大紀守臺城數月以易子析骸入告上得大紀奏憐臺民死守飛諭大紀以兵護遺民內渡命侍堯拆閱仍封發侍堯以詢翼翼曰明公尙欲封發耶柴總兵久欲內渡畏國法故不敢一棄城則鹿耳門爲賊所有全臺休矣且以快艇追敗兵澎湖其可守乎大兵至無路可入則東南後此不可問宜封

還此旨翼已代繕摺矣侍堯悟從之翌午接追還前旨之諭及批摺回李膺殊賞而大將軍福康安續至遂得由鹿耳門進兵破賊皆翼策也事平欲奏起翼堅辭晚歲以著述自娛主講安定書院日與朋游故舊賦詩爲樂兩江總督費淳漕運總督蔣兆奎皆翼門下士每過存咨詢風土言不及私兩人益欽重之同時袁枚蔣士銓與翼齊名而翼高才博物既歷清要通達朝章國典尤邃於史學家居數十年手不釋卷所撰廿二史劄記三十六卷鈎稽同異屬詞比事其於前代弊政一篇之中三致意焉又撰陔餘叢考四十三卷甌北詩集五十三卷皇朝武功紀盛四卷檐曝雜記六卷唐宋十家詩話十二卷其詩與袁枚蔣士銓齊名枚稱其忽奇忽正忽莊忽俳稗史方言皆可闌入士銓則謂其奇恣雄麗不可偪視人以爲知言嘉慶十五年重宴鹿鳴賜三品銜十九年卒年八十六

曹仁虎 趙文哲 吳泰來 褚廷璋

曹仁虎字習庵江蘇嘉定人少讀書辨悟通達年十六補諸生學使崔紀目爲異才時同里王鳴盛才氣豪邁儕輩中少敢當者獨稱錢大昕與仁虎爲二友乾隆二十七年高宗南巡召試列一等特賜舉人授內閣中書二十八年成進士改翰

林院庶吉士散館授編修遷右中允進侍講轉侍讀遷右庶子擢侍講學士每遇大禮高文典冊多出其手五十一年督學廣東遭母憂以哀毀卒年五十七仁虎於學無不通而於詩尤妙絕一世神明變化一洗粗率佻巧之習論者謂其雄秀宕逸最近李于鱗與王鳴盛王昶趙文哲吳泰來錢大昕黃文蓮唱和稱吳中七子傳至日本其國相高樸爲七律人贈一章寄估舶以達人豔稱之所著有宛委山房春檠瑤華唱和秦中雜稿轅韶鳴春諸集又有蓉鏡堂文稿二十四氣七十二候考轉注古音考 趙文哲字升之江蘇上海人乾隆二十七年高宗南巡召試獻詩賜舉人授內閣中書入直軍機處大學士劉統勳劉綸于敏中皆奇其才坐與紀昀王昶泄漏兩淮運使盧見曾事奪官會尙書阿桂總督雲貴請以文哲掌書記詔許之尋從副將軍阿里袞進征緬甸降之方撤兵而大小金川不靖尙書溫福代阿帥師入蜀進剿仍以文哲行復起爲內閣中書小金川平論功擢戶部主事三十八年進兵木果木師潰殉難年四十九文哲天才英敏於文無所不工論詩以王士禛爲主從軍滇蜀所見殊方絕徼可驚可愕狀一發之於詩瑰璋絕特著有媿雅堂媿隅等集 吳泰來字企晉江蘇長洲人少由副貢生選校官

愛松滋山水勾留竟歲以病免歸泰來襟期清曠家有遂初園藏書數萬卷寢饋
凡十餘年詩大指本王士禎王昶嘗謂吳中自沈德潛外無能抗手乾隆二十五
年成進士後車駕南巡召試賜內閣中書不赴官巡撫畢沅延主講關中書院後
隨至河南主講大梁書院與洪亮吉錢泳諸人飲酒賦詩無虛日時比之許元度
劉真長五十三年卒著有硯山堂淨名軒等集 褚廷璋字左義江蘇長洲人高
宗南巡召試授內閣中書乾隆二十八年成進士改翰林院庶吉士散館授編修
三十五年充江西鄉試副考官四十二年充山西鄉試正考官四十八年充福建
鄉試副考官官至侍講學士以事降主事乞歸廷璋敏慧絕倫有荀令謝郎之目
爲沈德潛弟子少與曹仁虎趙文哲等結社以詩鳴官翰林院充方略館纂修於
準夷回部山川風土最爲諳悉奉敕纂西域圖志又纂西域同文志並通等音字
母之學性直鯁以大學士和珅非科目出身不以先輩待之既降官終身不謁銓
選曰此膝不爲權貴屈也詩初學青邱既學元白旨遠詞文卓然大雅所賦西域
詩尤見稱於時著有筠心書屋詩鈔

檀萃 鮑倚雲 方正澍

檀萃字默齋安徽望江人乾隆二十六年進士選貴州青谿縣知縣旋丁父憂服闋補雲南祿勸縣知縣興學勸農政聲大著以不阿里吏議罷官後主雲南五華書院講席滇人多師之萃幼不敏年二十始知力學博極羣書以淵雅稱其詩恣肆汪洋近體尤爲錘鍊所著有大戴禮注疏穆天子傳注逸周詩注儷藻外集楚庭稗珠錄滇海虞衡志滇南詩話滇南文集又有武定州祿勸縣番禺縣各志及書法十卷 鮑倚雲字薇省安徽歙縣人優貢生少工詩吳瞻泰試以紅豆歌使和之援筆立就出入漢魏唐宋諸家清微雅健一洗雕章琢句之陋高宗南巡召試以病未就坐臥一小樓吟詠自娛足迹不出戶者六載晚往來江淮間所至皆有詩著有壽藤齋詩集三十五卷卒年七十一 方正澍一名正添字子雲亦歙縣人國子生寓居金陵學詩於何士客閉門索句與袁枚激揚風雅爭長詩壇於時詞客罕有頡頏枚論詩絕句與士客陳毅並稱爲金陵詩人畢沅選吳會英才集以正澍爲第一謂其忘情仕進樂志衡門今之賈閔仙羅昭諫也工於體物一聯一語唐人得之皆可名世其推挹如此著有伴香閣詩

李調元 弟鼎元 驥元

李調元字羹堂號雨邨四川綿州人乾隆二十八年進士改翰林院庶吉士散館授吏部主事三十九年充廣東鄉試副考官尋遷考功司員外郎四十一年以議稿塗押爲舒阿填入浮躁上詢其故尙書程景伊以對上曰司官有不安於心者向例原准不畫押如何便填大計因詢居官何如景伊以辦事勇往對奉旨仍以員外郎用卽日到任旋奉命督學廣東任滿回京擢直隸通永道以劾永平知府爲所訐罷官遣發伊犁尋以母老贖歸少聰敏好學父化枏宦浙中調元往省徧游浙中山水遇金石卽手自摹搨購書萬卷而歸由是益奮於學自經史百家以及稗官野乘靡不博覽羣經小學皆有撰述性愛奇嗜博以蜀揚雄多識奇字明楊慎亦有奇字韻之纂乃博稽載籍凡字之奇而名不經見者依類錄之爲奇字名十二卷以王象之蜀碑記多闕略著蜀碑記補十卷又以王士禎五代詩話遺佚頗多因廣爲採輯於姓氏下綴以小傳著全五代詩一百卷生平宦蹟所至輒訪問山川風土人物其有爲古人所未誌者卽筆錄之以爲談資官通永道時值四庫館開每得善本輒遣胥錄之因輯自漢迄明蜀人著述罕傳祕籍彙刊之名曰函海其表彰先哲嘉惠來學甚爲海內所稱所爲詩文天才橫逸不假修飾少

以春蠶作繭詩受知於錢陳羣又嘗作南宋宮詞百首論者謂不亞於厲鶚朝鮮使臣徐浩修見其詩以爲超脫沿襲之陋而合於山谷放翁極爲敬服因作啟求其他著述而去又愛才若渴人有一聯片語之佳者輒爲采錄罷官後家居二十餘年益以著書自娛蜀中撰述之富費密而後厥推調元云著有易古文二卷尙書古字辨異一卷鄭氏尙書古文證訛十一卷詩音辨二卷童山詩音說四卷周禮摘箋五卷儀禮古今考二卷禮記補註四卷月令氣候圖說一卷夏小正箋一卷春秋左傳會要四卷左傳官名考二卷春秋三傳比二卷逸孟子一卷十三經注疏錦字四卷己齋璣錄十二卷通詁二卷剿說四卷諸家藏書簿十卷諸家藏畫簿十卷賦話十卷詩話二卷詞話二卷曲話二卷六書分毫二卷古音合三卷談墨錄十六卷制義科璣記四卷蔗尾叢談四卷樂府侍兒小名錄二卷唾餘新拾十卷續十六卷補十二卷井蛙雜記十卷南越筆記十六卷然犀志二卷出口程記一卷方言藻一卷粵風四卷蜀雅二十卷粵東皇華記四卷童山詩集四十二卷文集二十卷蠶翁詞二卷童山自記一卷羅江縣志十卷從弟鼎元驥元俱有詩名時稱綿州三李 鼎元字墨莊乾隆四十三年進士改翰林院庶吉士散

館授檢討改授內閣中書嘉慶四年充冊封琉球副使官至兵部主事鼎元天才奇偉筮仕後以索米不足遠遊江海所過名山大川每藉吟詠以發其抑鬱無聊之氣所爲詩風骨高峻奉使諸作尤推豪健兄弟中稱白眉焉青浦王昶見其詩亦以爲三吳士大夫莫能或之先也著有師竹齋集 驥元字鳧塘乾隆四十九年進士改翰林院庶吉士散館授編修六十年充山東鄉試副考官遷左春坊左中允入直上書房以勞瘁卒官年四十五驥元性情篤厚學務根柢未弱冠有文名會試出獻縣紀昀門昀謂人曰吾今科所取皆讀書人而首推者實雨邨之弟驥元也其爲時所推重如此文簡古學韓柳詩學大蘇有奇逸氣時謂與鼎元可稱二難著有雲棧詩稿

姚鼎 姚範 劉開

姚鼎字姬傳安徽桐城人乾隆二十八年進士改翰林院庶吉士散館授兵部主事轉禮部三十三年充山東鄉試副考官三十五年充湖南鄉試副考官三十六年充會試同考官累遷至刑部郎中記名御史四庫館開以大臣薦爲纂修年餘乞病歸鼎少家貧體羸多病而嗜學時侍郎方苞以古文鳴當世上接震川同邑

劉大櫪繼之稟世父範與大櫪友善範嘗問稟志曰義理考證文章闕一不可範乃以經學授稟而命稟受古文法於大櫪然稟本所聞於家庭師友閒者益以自得不盡用大櫪法也所爲文高簡深古尤近司馬遷韓愈其論文根極於性命而探原於經訓至其淺深之際有古人所未嘗言稟獨抉其微而發其蘊論者以爲辭邁於方氏而理深於劉氏焉稟爲學博集漢儒之長而折衷於宋嘗與人書云秦漢以來諸儒說經者合與離固非一途程朱出多得古人精深之旨而其生平修己立德又實足踐行其言爲後世之所嚮慕故元明皆以其學取士自利祿之途開爲其學者以爲進趨富貴而已其言有失奉而不敢稍違其得亦不知所以爲得斯固數百年來之陋習今世學者乃思一切矯之專宗漢學以攻駁程朱爲能倡於一二專己好名之人而相率而效者遂大爲學術之害夫漢人之爲言非無有善於宋而當從者也博聞強識以助宋君子所遺可也以將跨越宋君子則不可也又送錢坫序略云孔子沒而大道微漢儒承秦滅學後始立專門各矜師受久之通儒漸出貫穿羣經擇其長說其敝也雜以讖緯亂以怪僻猥碎魏晉之閒空虛之談興以清言爲高以章句爲塵垢自是南北乖分學術異尙五百餘年

唐一天下兼採衆長定爲義疏而所取或是或非未有折衷宋之時真儒乃得聖人之旨羣經略有定說元明守之著爲功令明末至今學者頗厭功令所載爲習聞又惡陋儒不考古而蔽於近於是專求古人名物制度訓詁書數以博爲量以闕隙攻難爲功甚者欲盡舍程朱而宗漢枝之獵而去其根細之蒐而遺其鉅夫豈非蔽與又曰說經古今自有真是非勿徇時人之好尙如近年海內諸賢所持漢學與明以來講章諸君何以大相過哉夫漢儒之學非不佳也而今之爲漢學乃不佳偏徇而不論理之是非瑣碎而不識事之大小曉曉聒聒道聽塗說正使人厭惡耳且讀書者欲有益於身心也程子以記史書爲玩物喪志若今之爲漢學者以搜殘舉碎人所少見者爲功其爲玩物不彌甚耶同時袁枚紀昀頗詆宋儒鼎嘗直斥其非翁方綱向鼎乞書鼎曰諸君皆欲讀人閒未見書鼎則願讀人閒所常見書耳生平虛懷善取在揚州與吳定居最久有所作以示定定所不可輒竄易至數四必得當乃已所編古文辭類纂言文之體類十有三而所以爲文者八神理氣味文之精也格律聲色文之粗也學者於古人必始遇其粗中遇其精終則御其精而遺其粗論者謂自明以來言古文者莫詳於鼎鼎與方苞劉大

樾皆籍桐城世稱之爲桐城派詩從明七子入而以融會唐宋之體爲宗旨嘗倣王士禎五七言古體詩選爲今體詩選人皆謂爲精當云稟色怡而氣清接人極和藹無貴賤皆樂與盡懽而義所不可則確乎不易其所守世言品學兼備推稟無異詞自告歸後主講江南紫陽鍾山各書院者四十餘年諄諄以誨迪後進爲事嘉慶十五年重赴鹿鳴宴恩加四品銜二十年卒年八十五所著有九經說十九卷三傳補注三卷老子章義一卷莊子章義十卷惜抱軒文集十六卷文後集十二卷詩集十卷書錄四卷法帖題跋一卷筆記十卷姚範字已銅稟世父乾隆七年進士改翰林院庶吉士九年充順天鄉試同考官十年散館授編修充三禮館纂修官後以告歸卒於里範之學沈究遺經綜括精粹每讀書輒著所見於卷端經史子集丹黃雜下詞繁者裁短幅紙書之無慮數千百條稟嘗載數則於經說中其儀禮首條及論語奧竈說四飯說是也所爲詩文不主家法必達其意絕去依傍自成體勢性坦而介里居時有同年生爲桐城令範屏跡自遠有以洲地訟者懷千金求一言力卻之富家子欲其一過門爲重卒不往立身行己一準程朱鄉後進咸師尊之其曾孫瑩哀其遺集爲援鶉堂筆記三十四卷古文集五

卷詩集七卷 劉開字孟塗亦桐城人生數月而孤年十四上書同邑姚鼐鼐曰此子他日當以古文名家方劉之墜緒賴以復振因從鼐學其爲人落脫不羈喜交游與人談論輒罄肺腑家貧不能養奔走公卿閒無干謁態嘗謂姚元之曰吾鄉多佳山水使有菽水資迎母居龍眠杉渡閒手一編且不去母左右其樂何如而顧爲是僕僕哉然亦習舉子業試輒不利遊浙時有候門者要至家具盛饌稱夢其父語以劉先生當過門非先生文不能傳爾孀母宜固請之既復與遊山至一古墓所有碑題曰宋處士劉開之墓因日開爲處士後身開懷然知己將終不能貴以顯也道光元年亳州聘修邑乘寓佛寺中陡得疾而卒年四十一母老子幼妻倪復以身殉聞者悲之工詩及駢體文其詩集十卷先已刊行歿後姚瑩訪其家得後集十二卷文十卷駢體二卷因並刻焉

張九鉞 弟九鍵 九鑑 九鐔

張九鉞字度西湖南湘潭人父垣山西河曲知縣九鉞生有異稟七歲能詩九歲通十三經及史鑑大略乾隆二十七年順天鄉試舉人選知縣分發江西歷宰南豐峽江南昌以母憂歸服闋復出知廣東始興縣歷保昌海陽所至有治聲攝南

豐時歲歉請平糶部例大縣存七糶三九鉞驟半之上官嚴檄切責幕僚以爲病九鉞曰倉儲民命也豈能墨守舊制坐視民餓死耶倉米絀則勸邑紳捐助又驟買鄰境米全活者衆南昌西北濱彭蠡秋潦爲災九鉞力請賑親履勘散給晝夜駐墟上凡六閱月動帑十二萬有奇水際積骸纍纍捐廉購棺瘞之豫章諸水循城下勢甚急潦則衝齧爲患城內有湖恆汜濫唐觀察使韋丹築捍江隄疏爲斗門以洩內外水曰十門九津宋時開長溝登以輒石曰豫章溝明寧藩奪民地爲苑囿溝盡塞後爲豪猾所踞水患益鉅九鉞屢請疏濬新城陳守訓願捐私財修復九鉞喜曰此百世利也而豪猾輩百口阻撓當事幾游移九鉞以十二利九鉞抗爭於臺使者卒賴其力成鉅工在保昌時有希大吏旨爲民蠹者九鉞擒治之同官惴惴九鉞不爲動尋以海陽案牽連落職徧遊嵩洛偃鞏閒舉生平磊落抑塞之氣一洩之於詩晚歸湘潭主昭潭書院久之乃卒年八十三九鉞才名震一時詩學太白而得其真氣落想浩然年十三登采石磯賦長歌人呼爲太白後身乾隆中西師奏捷朝廷行郊勞禮方觀承時總督直隸築郊勞臺九鉞爲賦樂歌大書其上復爲良鄉居民賈戶作凱旋勝帖千餘紙一夕立就詩文宏博浩瀚縱

其力之所至而一軌於正歸田後畢沉重其名迎之節署集名流爲東坡生日修祀酒再巡九鉞援筆爲長歌四座歎服著有陶園文集八卷詩集二卷詩餘二卷歷代詩話四卷峽江志偃師志永寧志鞏縣志晉南隨筆弟九鍵九鎰九鐔 九鍵字石園乾隆六年舉人官直隸隆平知縣亦工詩著漱石園詩集 九鎰字橘洲乾隆五十二年進士官至四川川東道性伉直嘗發夔州府知府侵蝕關稅狀尋引疾歸築園曰退谷著有退谷詩鈔 九鐔字竹南乾隆四十三年進士官翰林院編修年六十矣館中以耆宿相推內行敦篤居京師二十二年蕭然一身應官外閉戶著書而已嘗病註疏家以攻擊朱子爲名高於羣經多所辨證考據精覈其詩春容大雅不矜尙詭異自然名貴著有笙雅堂集

余集 沈亦然 王宗炎

余集字蓉裳浙江仁和人乾隆三十一年進士候選知縣三十八年喪曰修薦修四庫全書授翰林院編修時同薦入翰林者邵晉涵周永年戴震楊昌霖人稱五徵君五十一年充湖北鄉試正考官五十九年充四川鄉試副考官累遷至侍讀學士後以大考左遷尋丁母艱歸服闋入京補原官嘉慶九年駕幸翰林院與宴

有書硯楮幣之賜尋乞歸集工詩古文詞少學左傳體爲文同里嚴誠見之曰非凡才也生平吟詠甚富嘗著百衲琴一卷論者謂曹劉鮑謝奔赴腕下無組織之迹歸後出主大梁書院八年日以文藝自娛旁涉六書算數篆刻之學善畫山水尤工人物道光二年重宴鹿鳴年八十五矣性淡漠崖岸自高不妄干顯貴遇窮交故戚恭讓尤好引掖後進所著述多散佚歿後龔麗正刊其梁園歸權錄憶漫庵牘稿二冊詩詞雜文皆載其中 沈亦然字韞山亦仁和人原德清籍乾隆三十三年舉人官直隸豐潤縣知縣赤然居官廉罷後閉戶著書不問外事時徜徉山水閒與吳錫麒章學誠相切劇工詩古文辭以詩稱武林者二十年錫麒謂其窈深而閎遠宰豐潤時所作多懷歸行役憫農憂旱之篇文以辭遠爲主不失體裁著有五硯齋詩鈔二十卷文鈔十一卷公羊穀梁異同合評四卷寄傲軒讀書隨筆十卷續筆六卷三筆六卷寒夜叢談三卷 王宗炎字以除浙江蕭山人乾隆四十五年進士學問淹博性尤淡退家有中人產纔足溫飽旣通籍遂杜門不出築十萬卷樓以文史自娛子履端入詞林卽貽書曰我已知足汝當知止毋戀浮名而失眞業工古文詞根柢經史能言所欲言嘗謂宋藝祖以受禪開基通鑑

自不得以魏爲纂高宗以宗支再造綱目自不得以蜀爲僞讀書論世其說甚精又言文以有濟實用爲貴作是文必有所以作之故其持論皆有關於世道人心王引之嘗稱其文詞質而義醇尤好誘掖後進湯金釗從之游積四十年指引不倦著有晚聞居士遺集九卷

彭紹升 注籍 羅有高

彭紹升字允初江蘇長洲人父啟豐官至兵部尙書自有傳紹升乾隆三十四年進士選知縣不就始讀儒先書喜陸王之學及與汪縉羅有高薛起鳳游乃閱大藏經究出世法絕欲素食禮佛不下樓者四十年嘗與袁枚往返辨論死生之說不能勝也好作盛德事鳩同人施衣施棺恤嫠放生鄉人多化之工古文辭宗法震川熟於國朝掌故所著名臣事狀良吏述儒行述信而有徵其論學之文紀律森然談禪之作亦擇言爾雅嘗謂善爲文者莫若守一家之書凝神壹志句倣而字爲之始得其似繼得其真斯爲古人之文而非復吾之文矣及其久而與之化斯爲吾之文而不復有古人之文矣若乃游談無根師法蕩然非鄙則倍此不足以言文也其解大學格物訓格爲度量本之倉頡篇又作讀古本大學說謂大學

爲古聖人傳心之學本陽明之說而推廣之皆有裨經傳又有論語集注疑大學章句疑中庸章句疑孟子集注疑四篇詩克承家學蔣士銓亟稱之有刻苦如諸生曾閱同經營之譽汪縉亦謂其束心於規矩之中游神於言象之外肫然至妙充然有餘收弄金石文字甚富閒作漢隸啟豐歿後習靜深山中欲參究向上第一義作夢語示諸兄子久之復家居嘉慶元年卒年五十七著有二林居集二十四卷測海集六卷又有一行居集觀河集 汪縉字大紳江蘇吳縣人諸生少不善記誦逮弱冠試爲文數百言立就詩宗陳子昂杜少陵袁枚盛稱之時有僧不二本滕縣諸生厭棄世法出家傳磬山宗隱於吳一日見縉虎邱題壁詩詫曰此白衣大有根器縉後見寒山拾得詩喜其從性海流出因是爲學務通儒釋與彭紹升往來最密所爲古文覃思奧曠其出儒入佛之作言思離合不可思議紹升許之曰噓氣成雲王鳴盛亦云讀大紳文十洲三島悉在藩溷閒矣嘗謂趙宋以來儒與佛爭儒與儒爭軻轄紛紜莫能是正乃統其同異通其隔閼倣明趙大洲二通之作著二錄三錄以明經世之道又著讀書四十偈私記以通出世之法著讀易老私記以貫穿天人之際主建陽書院昌明正學既歸閉戶習靜不復應制

舉作無名先生傳云先生講學不朱不王先生著書不孟不莊先生吟詩不宋不唐先生爲人不獯不狂先生處世不圓不方又作撞庵先生記自稱學无牆壁行无轍迹其孤往如此晚年與彭紹升書論孤往之趣曰天之高也不附於天地之厚也不附於地古今之寥闊也不附於古今孤往而已矣人物孤往也交游孤往也著述孤往也名海中人老死不相往來矣紹升歎爲自莊屈以來述作相望具此心眼者曾無幾人云乾隆五十七年卒年六十八又有汪子文錄 羅有高字臺山江西瑞金人乾隆三十年舉人少慕馬周張齊賢之爲人負氣睥睨習技擊讀兵書聞雩都宋昌圖有迂怪名往見之自陳所學昌圖愀然曰非儒者之急務也則述張子見范文正言兵法文正弗善箴之授以主敬持一二銘有高翻然悔悟介昌圖受業於鄧元昌因徧讀先儒書後見雷鋹鋹戒之曰子太聰明如水銀瀉地吾懼其流也初以優行貢京師及歸忽登樓縱火自焚家人驚救得不死狂走入山數月後迹得之服沙門服跌坐與人言孝弟歌泣無時旣渡錢塘揚子江過甬東多託迹佛寺中及鄉薦出彭啟豐之門與其子紹升友善因相勗爲性命之學兼參竺乘汪縉一見而心折之爲文章絕去依傍務抒其所獨契有與紹升

書言道必以文傳詞甚辨謂文與道一而已修之於身措之事業者道也修之於身而次第其功候節目之詳明其甘苦得失之故措之於事業而條布其治蹟敷悉其德產精微涵綵之極致彰往察來相協倫類出於憂患同民不得已之誠其言奇正不同其氣之行止節族之長短高下抗隊疾徐壹順法象之自然而不與以私智以其燦著陳修能之矩昭事爲之則烜照心目物察倫章則文命焉豈得歧於道而二之也又與法坤宏論春秋大旨南宋諸儒所以諍論之故謂聖人作春秋東規西矩南衡北權中繩五則不爽萬物就裁其本在於學易學易之本在於謹彝倫慎言行約之於禮人之彝倫言行壹於禮則性復仁全措之正施之行變化生而經緯天地之事起此聖人所自盡而願天下萬世同歸而無歧者也南宋諸大儒所爲固持堯舜孔孟之道於國事倥偬之會者此春秋之義也孟子述唐虞三代於戰國擾攘之時朱陸陳誠正義利之辨於南北交訐之日其揆一也南宋諸大儒之所諍論天經也地義也人行也烏得而不斤斤也縉見其書歎曰上帝臨壇萬靈拱肅世尊下降諸天震動於此文見之矣紹升亦稱其文華梵交融奏刀砉然傾倒甚至又嘗見戴震於京師爲訓故之學著有釋蠡一篇晚益歸

心淨土閉關七旬讀楞嚴謂東西二聖人權實互用門庭迥別其歸宿名相離言思絕一且不立二復何有惟自證者知之非可以口舌爭也四十四年卒年四十六卒之日盡焚其所著書紹升輯其遺文爲尊聞居士集八卷

嚴長明 子觀 吳卓信 莊沂

嚴長明字道甫江蘇江寧人幼有奇慧年十一李紱典試江南見之隨舉子夏命對卽應聲曰亥唐紱大奇之謂方苞曰國器也可善視之遂從苞受業尋假館揚州馬氏盡讀其藏書乾隆二十七年高宗南巡以諸生獻賦召試賜舉人授內閣中書旋入直軍機處在軍機七年通古今多智又工於奏牘大學士劉統勳最奇其才戶部奏天下雜項錢糧名目煩多請去其名而以其數併入地丁徵收長明日今之雜項古正供也今法折徵銀若去其名他日吏忘之謂其物官所需必且再徵是使民重困也統勳曰善乃奏已之大金川事起大學士溫福往督師欲長明從行長明固辭退有咎長明者答曰是將敗沒吾若何從之人頗甚長明言旣而溫福卒致軍潰以死隨往者皆盡生平所行多可喜可愕而於羅浩源事爲尤奇浩源雲南糧道也分償屬吏虧銀有詔逾期卽誅浩源繳不如數期過十日矣

乃牒請弛限上命軍機大臣會刑部議之其時大學士劉統勳主禮部試秋曹無任其事者長明時值軍機因撾鼓入棘闈見統勳曰浩源事急矣第所追乃分償屬吏汪某金也今汪已捐復將曳絨綬出都而浩源乃駢首東市於義未協按法宜令汪某分繳以活浩源始昭公平統勳曰具疏稟乎曰不具稟不敢見也振其袖出之詞義明析統勳喜卽畫諾奏聞上是之獄遂解其他事亦多類此人至有圖長明像以祀者是時軍機有數大案賴長明在直任其勞獲成議云三十六年擢侍讀嘗扈蹕木蘭大雪中失橐駝並所裝物越日有牽駝至且謝罪者則故軍機吏坐事遣戍者也長明問何以知爲吾物曰軍機官披羊裘者止君一人問旣竊何復還曰恐君寒耳長明勞而遣之長明治事衆中獨勤辦然以是頗見嫉後連遭父母喪服終遂不復出閒遊秦中大梁居畢沅所爲定奏詞還主廬陽書院乾隆五十二年卒於合肥年五十七長明聰強絕人於書無所不讀或舉問無不能對爲詩文用思周密和易而當於情嘗語學者曰士不周覽古今載籍不徧交海內賢俊不通知當代典章遽欲握筆撰述縱使信今亦難傳後其自命如此其在軍機時朝趨入直暮入文酒之會若甚暇者然或以事就之謀必得其當乞歸

後築室三楹曰歸求草堂藏書二萬卷金石文字三千卷日哦其中嘗歷充通鑑
輯覽一統志熱河志平定準噶爾方略纂修官所著書曰歸求草堂詩文集西清
備對毛詩地理疏證五經算術補正三經答問三史答問淮南天文太陰解文選
課讀文選聲類尊聞錄獻徵餘錄知白齋金石類籤金石文字跋尾石經考異漢
金石例五嶽貞珉考五陵金石志平原石蹟表吳興石蹟表又嘗撰西安漢中二
府志子觀 觀字子進嗜學長明藏書觀丹黃幾滿好金石文字著江寧金石記
備載存佚極爲精博又嘗以元和志今有闕佚取唐書及通典補之孫星衍爲附
刊李書之後今所行本是也 吳卓信字頊儒江蘇昭文人於書無所不窺尤好
典章經制之學奮然欲追杜鄭馬王而起獨不喜爲詩文年二十餘猶困童子試
合河康基田陳臬江蘇寓意邑令拔置第一補諸生自是益厭棄舉業思壯游以
證所學客淮徐閒最久又嘗一至秦中覽其山川邊塞古今成敗形勢盡拓漢唐
金石以歸晚年手定其文四十篇凡稍涉泛應者悉刪去所著書甚多有讀詩餘
論儀禮筭記若干卷釋親廣義二十五卷漢三輔考二十四卷漢書地理志補注
一百卷三國志補志六卷補表六卷澹成居文鈔四卷附喪禮經傳約一卷而喪

禮一篇尤善云 莊炘字景炎江蘇武進人乾隆三十三年副貢生就職由州判補陝西咸寧知縣擢漢陰通判遷邠州知州歷署興安鳳翔榆林府知府時川楚教匪起總督宜綿以炘練於兵事倚以爲重炘策楚賊渡漢遠涉西鄉紫陽地方遼闊焚掠無所得必遁檄沿漢諸縣斂舟舶入港守以重兵使賊不得南向又以川賊若潰非東走夔州卽北走通江興安當南北之衝全陝安危所係賊據險要則兵餉俱絕於是圖畫山川形勢戰守機宜上之當道修城練勇賊不敢犯後以老乞歸嘉慶二十三年卒年八十四幼聰穎大父嘗以珍玩賜諸孫炘無所取獨乞舊本蘭亭大父器之旣與洪亮吉孫星衍趙懷玉張惠言共爲漢學於聲音訓詁尤深嘗校刊淮南子一切經音義詩文謹於法度生平著述以舟行漢江爲水所淹惟存文六卷詩七百餘首

鮑廷博 黃丕烈 秦恩復

鮑廷博字以文安徽歙縣人諸生幼而聰敏事大父及父以孝聞父嗜讀書乃力購前人書以爲歡旣久所得益多而精遂喪然爲大藏書家性復彊記每一過目卽能記其某卷某頁某論字有持書來問者凡某書美惡所在意旨所存見於某

代某家目錄經幾家收藏幾次鈔刻真偽若何校誤若何無不矢口而出按之歷歷不爽乾隆三十八年四庫館開廷博命長子士恭進家藏善本六百餘種大半宋元舊板寫本又手自校讐爲天下獻書之冠蒙御賜古今圖書集成高宗南巡迎鑾獻頌復蒙賜大緞二疋又疊賜伊犁得勝圖金川圖廷博念一介儒生無以圖報遂以所藏善本付之梨棗嘉慶初御製內府知不足齋詩有齋名沿鮑氏闕史御題詩集書若不足千文以序推之句注云鮑氏藏書最爲精夥內唐闕史一書曾經奎藻題詠嗣後其家刊刻知不足齋叢書以唐闕史冠冊用周興嗣千文以次排編每集八冊今已十八九集可爲好事之家矣至八年上復問浙撫方受疇鮑氏續刊何經受疇以第二十六集進上諭鮑廷博於乾隆年間恭進書籍其藏書之知不足齋仰蒙高宗純皇帝寵以詩章朕於幾暇亦曾加題詠茲復進所刻知不足齋叢書第二十六集鮑廷博年逾八旬好古積學老而不倦著加恩賞給舉人俾其世衍書香廣刊祕籍時年八十六矣逾年卒廷博勤學耽吟不求仕進嘗作夕陽詩甚工袁枚阮元呼之爲鮑夕陽性寬厚篤友誼朋友之貧而好學者每以全部叢書贈生平蓄積爲刊書所罄或遇未見之書必典衣購之著有花

韻軒小彙二卷詠物詩一卷 黃丕烈字蕘圃江蘇吳縣人乾隆五十三年舉人
官主事丕烈博學瞻聞寢食於古好蓄書尤好宋槧本書嘗構專室藏所得宋本
名之曰百宋一廬自稱佞宋主人顧廣圻爲之賦謂其馳香嚴與芳茶思計日而
取儻範屋室於衛荆姑掩而一慙香嚴者同郡周錫瓚書屋名芳茶者歸安嚴
元照堂名皆藏有宋槧本其後丕烈復收得宋本數十種自喜以爲符掩而之頌
而二百也尤精校勘之學所校周禮鄭氏注夏小正國語國策皆有功來學好刻
古籍每刻一書行款點畫一仍舊本卽有譌踏不敢擅改別爲札記綴於卷末錢
大昕段玉裁甚稱之謂可以矯近世輕改古書之弊嘗著汪本隸釋刊誤一卷謂
洪文惠密於考史而疏於證經婁彥發長於體勢而短於音訓大昕以爲知言他
所著有盲史精華百宋一廬賦注百宋一廬書錄蕘言等書 秦恩復字近光江
蘇江都人乾隆五十二年進士改翰林院庶吉士散館授編修讀書好古所居五
笥仙館蓄書萬卷丹鉛不去手尤精校勘延顧千里於家共相商榷手校刊陶宏
景鬼谷子注盧重元列子注及隸韻諸書時號秦板阮元撫浙時聘主詁經精舍
性喜填詞每拈一調參考諸體必求盡善無一曼聲懈字著有享帚詞三卷與人

謙抑口不談學問以是世無知者卒年八十四他著有石研齋集

曹庭棟 吳文溥

曹庭棟字六圃浙江嘉善人諸生少嗜學工詩中年後絕意進取於所居累土爲山環植花木奉母以娛老名曰慈山因自號慈山居士時或彈琴賦詩寫蘭石摹篆隸以抒其閒寂後益耽著述不下樓者三十年所坐木榻穿而復補嘗以宋詩鈔漏略尙多且刊刻未竟往往有錄無書因搜採遺佚爲宋百家詩存二十八卷論者稱其書足補吳之振之闕生平最愛賀鑄詩升以弁首故所爲詩大似北宋人袁枚稱其專主性情庭棟復書亦謂老人生平苦心被君一語道破性曠達晚自營生壙手植梅花成林卒年八十五著有易準四卷昏禮通考二十四卷孝經通釋十卷逸語十卷琴學內篇一卷外篇一卷老老恆言五卷產鶴亭詩集七卷庭棟書齋中有產鶴亭故以名集集中詠鶴詩亦最多 吳文溥字博如浙江嘉興人貢生工詩嘗西入關中南游臺海詩格益上直逼古人阮元督學浙江見其詩定爲浙中詩士之冠因招入幕中使校訂輜軒錄彙元嘗出其先大父征苗刀示之文溥走筆作歌震奪一席古文駢體能集六朝唐宋之大成尤精韜略嘗佐

湖北巡撫幕論兩湖戎事瞭如指掌著有南塾堂筆記十二卷師貞備覽所見錄南塾堂集

李懷民 弟憲喬

李懷民名憲疆以字行山東高密人諸生早孤與兩弟憲屬憲喬相師友以詩鳴時稱三李懷民嘗與憲喬依主客圖例蒐集元和以後諸家五律辨其體格奉張籍賈島爲主朱慶餘李洞以下客焉名曰重訂中晚唐詩主客圖其言曰張籍天然明麗不事雕鏤而氣味近道學之可以除躁妄祛矯飾賈島力求嶮奧不吝心思而氣骨凌霄學之可以屏浮靡卻熟俗貞元以後近體詩略分兩派又謂中晚人得盛唐之精髓無宋人之流弊嘗舉梅宛陵發難顯之情於當前留不盡之意於言外二語以爲道盡古今詩法後復以己及憲喬所作爲二客吟密之旁邑數百里閒言詩者咸宗焉張維屏謂懷民生王士禛趙執信後而能獨標宗旨岸然自異其五言樸而腴淡而永苦思而不見痕迹用力而歸於自然實非易易云著有十桐草堂集憲屬字叔白諸生有定性齋集 憲喬字子喬懷民弟乾隆三十年拔貢生四十一年召試舉人官廣西歸順州知州少受詩於懷民而規模較闊

文亦簡勁有法度袁枚見其詩文歎曰今之蘇子瞻也性狷介不能隨俗俯仰與臨川李秉禮以風節相砥礪秉禮從受詩法憲喬卒於官秉禮以千金送其喪著有少鶴詩文集秉禮字敬之官刑部郎中詩學韋蘇州有韋廬集

錢灃 曹錫寶 謝振定 管世銘

錢灃字東注雲南昆明人少從師以立品爲教嘗曰立品必自慎獨始於人所共知者而猶不檢獨中豈可復問人禽之界混則雖讀破萬卷適取罪聖賢耳生平剛正之學實本於此乾隆三十六年進士改翰林院庶吉士散館授檢討四十五年充廣西鄉試副考官明年擢江南道監察御史疏劾署陝甘總督畢沅於冒賑諸弊瞻徇畏避請治罪得旨查辦畢沅降三品頂戴仍留巡撫任是時和珅秉政竊張威福朝士恥趨其門者世已貴之而灃獨侃侃訟言其失山東巡撫國泰和珅私人也灃奏其貪縱營私並劾布政使于易簡罪高宗立召對灃力陳東省虧空狀乃命尙書和珅左都御史劉墉往按之並令灃偕往始受命灃先期行微服止良鄉見幹僕乘良馬過索夫役甚張迹之則和珅遣往山東齎信者也灃詳審其貌未幾僕還道遇灃灃叱止之搜其身得國泰私書具言借款填庫備查事中

多隱語灃立奏之灃在道衣敝和珅持衣請易灃辭和珅知不可私干故治獄無敢傾陂比到省盤庫則和珅先言不用全數彈兌第抽盤數十封無短絀可也和珅遽起回館舍灃請封庫次日澈底拆封則多圓絲雜色銀是借諸商家以充數者因詰問庫吏得實迺諭召諸商來領大呼曰遲則封庫入官矣於是商賈紛紛具領庫藏爲之一空復改道易馬往盤他處亦然案遂定和珅亦無如何也於是國泰遂伏法覆命上持示國泰私書曰朕早悉其詳無待覆奏矣灃以直聲震海內累遷通政司副使尋充湖南學政每試士危坐廳事日炯炯終日不倦然優於待士數年中未嘗褫一諸生士之服其教者謳頌弗衰歲大旱巡撫陸燿燿以禱雨得熱疾卒代者至將稱觴爲壽聞者請餽灃曰前巡撫方以死勤事今遽舉觴稱慶耶命餽燭二挺藕數斤巡撫聞之懼而止後緣事降三級旋遭艱歸服闋補主事高宗知灃直更擢爲御史使直軍機處時和珅爲軍機大臣與大學士阿桂不和常不在直灃疏略曰伏覩我朝設立軍機處向來大臣與其職者萃止其中地一則勢無所分居同則情可共見卽屬寮白事署彙亦得有定所法至善也乃近日惟阿桂一人入直大學士和珅或入止於內右門內直廬或入止於隆宗門外

近造辦之廬大學士王杰尙書董誥則入止於南書房尙書福長安則入止於造辦處每日僅召見時聯行而入退卽各還所處雖或暫至軍機處而事過輒起屬官白事署橐未免趨走多歧皇上乾健離明大小臣工決不至因此遂分朋黨然欲萬事無弊莫如率由舊章蓋自世宗憲皇帝以來及皇上御極之久軍機大臣萃止無渙未嘗纖芥有他由前可以律後不應聽其輕更況內右門切近禁寢向來因有養心殿帶領引見之事須先一二刻豫備恩加大臣不令與各官露立是以設廬許得暫止不應於未辨色之先一大臣入止而軍機司員皆從之爲日既久不能不與內監狎熟萬一有如從前高雲從者雖立正刑辟而所絀已多杜漸宜早至南書房原備幾暇顧問俟軍機事畢後入直未遲何必入於未辨色之先致諸弗便若隆宗門外直廬及造辦處則應差人衆皆得覘聽於外大臣於中辦事亦屬過褻敢請敕諸大臣仍照舊規同止軍機處庶匪懈之忱各伸五夜協恭之雅共勵一堂至圓明園辦事亦同一體近日和珅福長安止於如意門外直廬王杰董誥止於南書房並請敕改正疏入上韙其言由是有稽查軍機處之命和珅益嘽灑而高宗知其賢不可譖則凡軍機勞苦事多以委灑灑家貧衣裘薄夜

入暮出積勞感疾以殞著有南園集書法逼近平原嘗與酣畫馬識者珍之如拱璧云同時伉直忤和珅者有御史曹錫寶謝振定 曹錫寶字鴻書江蘇上海人乾隆六年舉人考授內閣中書直軍機處二十二年進士改翰林院庶吉士丁憂歸遘瘍疾將十年手鈔經史古詩文華嚴皆成部疊架作詩尤長於五古有陶謝韋孟真意三十一年散館授刑部主事遷員外郎三十五年充河南鄉試副考官擢郎中三十六年充會試同考官尋充山西學政四十年授山東督糧道以旗丁鬪毆命案罪吏議以部員用在四庫全書處行走書成議敘以國子監司業用五十年與千叟宴特旨授陝西道監察御史劾大學士和珅家人劉全衣服車馬房屋踰制或竊知其事飛書告和珅乃星夜毀其迹於是留京王大臣奉旨勸查僭妄蹤迹竟不可得錫寶馳赴熱河待詢高宗純皇帝召入諭之曰爾讀書人不讀易歟君不密則失臣臣不密則失身錫寶叩頭流涕而出部議降三級特旨改革職留任五十三年掌陝西道監察御史充順天鄉試同考官五十七年卒年七十四嘉慶四年仁宗親政和珅下獄尋賜死上追念錫寶慷慨敢言不媿諍臣之職且其事亦非失實贈副都御史並廕其子爲中書錫寶胸懷瀟灑早歲隨巡侍直

時有篇章流傳日下中歲後頗好小學爾雅注疏校勘再三詩遂不多作云 謝
振定字一之湖南湘鄉人乾隆四十五年進士改翰林院庶吉士散館授編修五
十三年充江南鄉試副考官尋擢御史嘉慶元年巡視東城時和珅用事權燄甚
張有寵奴常乘珅車以出人避之莫敢當振定遇之怒命卒曳奴下笞之遂焚燒
其車曰此車豈復堪宰相坐耶九衢人聚觀歡呼曰此真好御史矣事聞有詔令
指實則車已焚無左驗竟坐罷官自此直聲震天下性好山水爲東南汗漫游歷
五茸三泖過嘉禾至西湖又渡曹娥江攬鑑湖葢山之勝所至士大夫倒屣迎之
酒痕墨瀋中獲其寸紙珍爲拱璧其爲文磊落雄爽稱其爲人論文不矜言載道
惟曰達情蓋南雷黃氏之宗旨也四年和珅敗特旨以主事起用應詔陳言卽條
上時務數事尋遷禮部員外郎九年充陝甘鄉試正考官出視通州坐糧廳勇於
任事革陋規釐別叢弊以勞瘁卒官先是振定以御史巡視南漕入瓜儀糧艘阻
風禱於神得濟請建風神廟嗣是渡江風輒順人呼爲謝公風及視通州坐糧廳
夜半漕船火親率僕從往救火遂熄康家溝向苦鼃患振定鎮以鐵釜爲文祭之
隄乃合所修張灣故道開果渠温榆河皆利漕運著有知恥堂集 管世銘字絨

若江蘇陽湖人乾隆四十三年進士改戶部主事充軍機章京累遷郎中擢御史世銘會試出于敏中門敏中好士所援引或數年陟卿貳世銘未嘗獨求見敏中卒和珅寢用事世銘憂憤形詞色會謝振定焚和珅車王鍾健希意劾罷其官世銘誚之曰謝公失官王公失名和珅微聞之而阿桂方倚世銘爲右臂莫能中傷旣擢御史構疏彙未成得旨留軍機世銘自言愧負此官阿桂慰之曰報稱有日何必急以言自見耶蓋期世銘大用不欲以擊奸獲譴也一日世銘與友人酒坐坐中多譽和珅世銘曰諸君奚爲者吾方有封事衆駭愕是夕世銘歸邸舍遽卒詩朗健深厚生平不服袁枚有寸心自與康成異不肯輕身事馬融之句尤精古文深於經術著有韞山堂詩文集

楊于果

楊于果字碩亭甘肅秦安人乾隆四十年進士官湖北長陽縣知縣擢荊州通判歷署漢川枝江棗陽南漳穀城知縣告歸卒年六十六于果幼聰敏年十四作白鶴詞見者驚異篤志力學工詩古文詞於書無所不窺尤喜史記嘗謂九經而外獨太史公胸中無文字之見亦且不欲以文字自顯其所撰述皆弮積於中而不

可遏不得已而發爲詞章故欲汎埽一切卓絕千古所爲文不矜奇奧清氣往來肖其爲人著述甚富自星算陰陽壬遁珠珞青烏靡不研究嘗用陰陽家言推其意爲禱雨法行之湖北輒效其令枝江也值劉宏鐸倡亂賊黨被獲輒誣良民自脫于果窮詰得實省釋三百餘人大軍四集儲峙無缺事竣民不知疲輿蓋所臨賊輒避之曰勿犯清官也去南漳數年民有互訟於府者府勘之曰此汝前令楊所判願欲翻案使令于吏議乎皆愕然持牒去總督吳熊光駐節通漳于果條上教養便宜事援引經義指陳時弊熊光大異之嘗謂從古無不弊之法此亦時勢使然非盡州縣奉行不力也蓋法欲其易避而難犯今則科條繁多有齟齬卽于吏議雖有能治之才願治之心不能自行其意故莫不苟且其心思爲自全之計宜舉一切無謂之例悉爲蠲除令州縣寬然有餘專以教養斯民爲急務又謂州縣之職貪酷而外不惟庸懦者不勝任卽廉靜者亦難集事是以周官弊吏特以廉著其概不以廉竟其用也于果前後官楚幾三十年所至有聲性清儉不攜眷屬非其分一介不取少師事胡鉞在楚與彭淑邢澍惲敬相友善大學士松筠治軍南漳深器之一日徒步訪于果官舍蕭然拊其背笑曰數十年老州縣顧一

寒至此耶取筆大書澹然二字扁其堂留贈千金弗受以佐軍儲歸日貧無行資門人陳預飲助之所著有羣經析疑廿一史史概史漢箋論審巖詩文集

吳錫麒 吳彝 樂鈞 劉嗣綰 吳慈鶴

吳錫麒字聖徵浙江錢塘人乾隆四十年進士改翰林院庶吉士散館授編修四十九年五十五年兩充會試同考官擢右贊善入直上書房轉侍講侍讀陞國子監祭酒生平不趨權貴然名著公卿間在上書房時與成邸尤莫逆得一帖一畫必共題跋禮遇之盛同於諸城劉墉嗜飲無下酒物以書代之自少至老未嘗離筆硯性至孝以親老乞養歸里至揚州主講安定樂儀書院所拔多績學礪品之士天姿超邁吟詠至老不倦浙中詩派自朱彝尊查慎行後二十餘年杭世駿厲鶚起而振之兩人殂謝嗣音者少錫麒詩才超越直繼朱查杭厲之後京師釣魚臺桃花崇效極樂法源三寺海棠牡丹菊花澄懷園淨業湖荷花檀石桂花皆稱極盛錫麒喜遊必有詩紀之尤工駢體文吳彝選四六與邵齊燾王太岳劉星煒袁枚洪亮吉孫星衍孔廣森稱八家晚養疴江上四方乞詩文者履戶外滿著有正味齋集七十三卷藝林奉爲圭臬高麗使至出餅金購之兼工詩餘論者謂

可與吳偉業厲鶚抗衡云嘉慶二十三年卒年七十三子清皋清鵬能世其學清皋字鳴九嘉慶十八年舉人由內閣中書官至江西南昌府著有壺庵遺詩二卷駢體文二卷清鵬字程九嘉慶二十二年進士由翰林院編修官至順天府丞著有笏庵彙二十卷 吳彝字山尊安徽全椒人嘉慶四年進士改翰林院庶吉士散館授編修八年三月大考以一等二名陞侍讀九年充廣西鄉試副考官洊陞侍講學士彝所作駢體沈博絕麗大興朱珪愛其文謂合任昉邱遲爲一手奏御文字多命其屬彙故其名達於九重詩以韓孟皮陸爲宗鬪險盤空句奇語重五言長古尤足以推倒一世晚以母老告歸主講揚州寓紅橋之西園曲水與其鄉人士酣嬉文酒跌宕林泉道光元年卒年六十七著有夕葵書屋集 樂鈞初名宮譜字元淑江西臨川人嘉慶六年舉人鈞秀氣孤秉少日喜爲駢儷之文嗣之京師遊吳越無所遇家貧奉母僑江淮間南城曾煥招寓題襟館中由是所學日進詩古文辭務追古人不傳之隱煥嘗謂鈞所長不惟詩諸體之文靡不綺麗然其爲詩每驚儕輩嘗賦綠春詩二十章又續賦三十章江西詩家蔣士銓後推樂鈞及吳嵩梁兩人同爲翁方綱弟子論者謂嵩梁詩名盛於鈞然不如鈞多內心

云著有青芝山館詩文集 劉嗣綰字芙初江蘇陽湖人協辦大學士於義元孫嘉慶十三年會試第一試卷進呈上曰朕久知其名可謂得士矣廷試改翰林院庶吉士散館授編修嗣綰少穎異識量過人早遊京師知名當世通籍時將及五十矣年六十丁母憂以毀卒爲人和平安雅見義無不爲雖屢空宴如也其詩及駢體文少作多明豔中年則以沈博排奡勝晚更清適駿邁以快厲之筆達幽隱之思著有尙綱堂集 吳慈鶴字巢松江蘇吳縣人父俊乾隆三十七年進士官至山東布政使著有榮性堂集慈鶴少隨父宦遊粵東濟南所爲詩規倣徐庾孟韓爲時流所重嘉慶十四年成進士改翰林院庶吉士散館授編修二十四年充雲南鄉試副考官道光二年督學河南五年督學山東生平喜遊覽使車所至山水爲緣而悉以發於詩與彭兆蓀交最契兆蓀貽書稱近日詩歌有五弊三惑能掃弊祛惑者厥惟慈鶴又言慈鶴詩瑩澈靈府發輝高致經萬辟千灌而成純鈎由聲聞緣覺而入悲智推挹甚至所作駢體文亦不亞於兆蓀官至翰林院侍講道光六年卒年四十九所著有蘭鯨錄鳳巢山樵求是錄岑華居士外集

黃景仁 吳嵩梁

黃景仁字漢鏞一字仲則江蘇武進人四歲而孤伯兄繼卒家甚貧母屠督之讀所業倍常童常熟邵齊燾主講常州龍城書院與同郡洪亮吉偕受業焉邵卒聞秀水鄭虎文賢謁之於杭州鄭愛異之居月餘泫然辭曰景仁無兄弟母老家貧居無所賴將遊四方覓升斗爲養耳乃爲浪遊攬九華涉匡廬泛彭蠡歷洞庭登衡嶽觀日出過湘潭酹酒招魂弔屈原買誼作浮湘賦以寄意悲慨傷懷時湖南按察使定興王太岳故名士負其才及見心折每有所作必持質黃秀才定可否自湖南歸詩益奇肆大興朱筠督學安徽招入幕三月上巳爲會於采石磯之太白樓賦詩者十數人景仁年最少著白袷立日影中頃刻數百言徧示座客咸輟筆時八府士子以詞賦就試當塗聞學使者高會畢集樓下至是咸從奚童乞白袷少年詩競寫一日紙貴焉生平於功名不甚置念獨憾其詩無幽并豪士氣嘗蓄意欲遊京師乾隆四十一年上東巡召試名列二等以武英殿書籤例得主簿時陝西巡撫畢沅見都門秋思詩奇其才速其西遊厚貲之乃由西安入都入貲爲縣丞寓京師法源寺銓有日矣爲債家所迫抱病逾太行出雁門將復遊陝次解州病殆卒於河東鹽運使沈業富署年三十五友人洪亮吉持其喪以歸景仁

體羸長身伉爽性高邁好遊盡觀江上諸山水每獨遊名山經日不出值大風雨或暝坐崖樹下牧者見之以爲異人詩宗法杜韓後稍稍變其體爲王李高岑卒其所詣與李白最近乾隆間論詩者推爲第一曲阜桂馥以宋鑄山谷詩孫銅印贈之駢體文絕似六朝工書擅山水皆極古質晚號鹿菲子著兩當軒詩文集竹眠詞凡二十二卷子乙生通鄭氏禮行不違其言早卒 吳嵩梁字蘭雪江西東鄉人嘉慶五年舉人由內閣中書官貴州黔西州知州詩才與黃景仁埒弱冠入都王昶翁方綱法式善盛相推重自是徧交海內名士未有或先之者袁枚自負其盛亦心折其詩江西自明以來稱詩者衆而無卓然傑出號大家者自蔣士銓後二十餘年嵩梁繼之體沿六朝而規格則似唐之溫李其清婉處又與長慶爲近而下匹吳偉業日本賈人賣其詩扇首得四金高麗使臣得其所著詩稱爲詩佛因築一龕供之傍種梅花萬樹其見重如此道光十四年卒年六十九著有香蘇山館詩鈔

祁韻士 許鴻磐

祁韻士字鶴舉山西壽陽人乾隆四十三年進士改翰林院庶吉士散館授編修

五十五年擢右春坊右中允逾年大考翰詹改戶部主事洊陞郎中充寶泉局監
督嘉慶九年局庫虧銅事覺遣戍伊犁未幾赦還韻士穎特善屬文自幼喜治史
於疆域山川形勝古人爵里姓氏靡不記覽少館於靜樂李氏李氏多藏書韻士
寢饋凡五稔益博洽在翰林時充國史館纂修官時奉旨創立蒙古王公表傳韻
士通覈立傳體例計內札薩克四十九旗外札薩克喀爾喀土謝圖汗車臣汗札
薩克圖汗賽音諾顏若青海若阿拉善若土爾扈特多至二百餘旗以至西藏及
回部均應立總傳分傳羌無故實文獻莫徵雖有鈔送旗冊雜亂糾紛卽人名難
卒讀無可作據乃悉發大庫所藏紅本督閱搜稽凡有關於外藩事蹟者概爲檢
出以次覆閱詳校每於灰塵全積中忽有所得如獲異聞積累既久端緒可尋於
是按各部落條分縷析人立一傳必以見諸實錄紅本者爲準又以西北一帶山
川疆域必先明其地界方向乃以皇輿全圖爲提綱其王公等源流支派則覈以
理藩院所存世譜訂正無訛如是者八年而書始成卽今著錄四庫之欽定外藩
蒙古部王公表傳也又撰藩部要略十八卷先以年月日編次條其歸附之先後
叛服之始終封爵之次第以爲綱領蓋傳仿史記而要略仿通鑑武進李兆洛序

之謂如讀遼皇之書觀鴻濛開闢之規模云及戊伊犁則創纂伊犁總統事略厥後大興徐松再事纂修將軍松筠以其書奏進賜名新疆事略韻士又別山川疆里爲西域釋地一卷西陲要略四卷條分件繫考古證今簡而能覈蓋生逢聖代當敷天砥屬之時閱歷萬里如履閨闔固非昔人潛行竊視依稀影響者所能及也韻士性耿介不與時爲俯仰同時朱珪王杰阿桂紀昀等皆器重之戴衢亨那彥成松筠尤服其才識有大事必咨斷焉其充寶泉局監督也故事交卸憑冊籍不盤盤有期韻士不及盤期而案發故得罪及赦還一以著書授經爲事二十年卒年六十五他著萬里行程記己庚編書史輯要珥筆集袖爽軒文集覆瓿詩集濛池行稟西陲百詠訪山隨筆子篤藻大學士宿藻江寧布政使自有傳 許鴻磐字漸達山東濟寧州人少負俊才博涉羣籍乾隆四十六年成進士官指揮改安徽同知擢泗州知州所至有聲公暇卽著書嘗作方輿考證一書謂方輿一途不博考於古則無本不切證於今則無用不洞悉郡縣沿革名同而實殊則不免南北移向山川易位向欲用顧氏方輿紀要作原本然細閱之其援引歷代之事悉據通鑑而不據正史且不免疏漏舛錯之處金元事蹟尤屬略而不詳因更閱

二十一史旁探羣書自立門戶於是以禹貢爲祖下逮諸史地理志水經注元和郡縣志太平寰宇記元豐九域志元一統志等書以考諸古以皇朝一統志爲宗旁及兩京十八布政司各通志水道提綱行水金鑑等書以證諸今凌廷堪嘗謂人曰海內輿地之學以鴻磐爲第一專家其會通今古精審之處不減梅磳戴敦元嘗與江藩共觀其書歎曰鴻磐曾官指揮當時以俗吏目之失鴻磐矣錢林亦謂其書善言地理胡渭顧祖禹之亞也又著有雪帆雜著一卷尙書札記彙四卷六觀樓遺文二卷

章學誠 章宗源 吳蘭庭 葉維庚

章學誠字實齋浙江會稽人乾隆四十三年進士官國子監典籍性耽墳籍不甘爲章句之學從山陰劉文蔚童鈺遊習聞蕺山南雷之說言明季黨禍緣起奄寺亂政及唐魯二王本末往往出於正史之外秀水鄭炳文稱其有良史才自遊朱筠之門筠藏書甚富因得遍覽羣書日與名流討論講貫嘗與休寧戴震江都汪中同客寧紹台道馮廷丞署廷丞甚敬禮之震論修志謂悉心於地理沿革則志事以竟侈言文獻非所急務陽湖洪亮吉嘗撰輯乾隆府廳州縣志其分部乃以

布政司分隸廳州縣學誠均著論相諍所修和州亳州永清縣諸志論者謂是非斟酌非兼才學識之長者不能作云所自著有文史通義八卷校讐通義三卷其中倡言立論多前人所未發大抵推原官禮而有得於向歆父子之傳故於古今學術之原輒能條別而得其宗旨自謂卑論仲任俯視子元未免過詡然亦夾漈之伯仲也又著有實齋文集 章宗源字逢之順天大興人祖籍浙江乾隆五十一年舉人聰穎好學積十餘年采獲經史羣籍傳註輯錄唐宋以來亡佚古書盈數笈撰隋書經籍志考證其彙已佚僅存史部五卷 吳蘭庭字胥石浙江歸安人乾隆三十九年舉人稽古讀書多所纂述凡地理職官沿革建置鈎稽探索盡得其條貫爲章學誠及嘉定錢大昕所推重嘗以宋吳縝著有五代史記纂誤因更取薛居正舊史參覈益以昔賢緒論并時人所正及者錄而次之其已具薛史考正及通鑑考異者概不復及爲五代史記纂誤補四卷附錄系之又取薛史新舊唐書宋史遼史並短說雜記及五代時事而語歧出者別爲五代史記考異同邑丁杰邃於經蘭庭熟於史故一時有丁經吳史之目少以文名吳越壯游燕趙多蒼深清健之作年六十餘流寓京師與仁和吳長元齊名時號二吳嘉慶元年

與千叟宴賜御製詩集杯緞藤杖時人榮之他著又有考訂宋大中祥符廣韻讀通鑑筆記南霽草堂集長元字太初著有宸垣識略十六卷 葉維庚字雨垞浙江秀水人嘉慶十九年進士改翰林院庶吉士散館授知縣歷任江西新喻江蘇寶應江陰縣知縣擢泰州知州在寶應時高家堰隄工爲風所破黃水挾淮而下維庚計請帑不及立捐備饘餅蘆席自乘舟按視隨宜給發全活無算肆力史學有所疑逢人輒問著有紀元通考十二卷又三國志地理考鍾秀山房詩文集

馮敏昌 趙希璜 李符清 莫元伯

馮敏昌字伯求廣東欽州人年十二補諸生乾隆四十三年進士改翰林院庶吉士散館授編修四十九年充會試同考官大考改官主事補刑部河南司主事性至孝除夕前一日聞父喪痛不欲生大雪嚴寒已徒跣竟日矣翁方綱責其傷生非孝乃稍抑哀及丁內艱廬墓六年遂不復出尤篤於師友在都聞秀水錢載訃痛哭啜粥數十日後復哭於墓張錦芳卒懸其所畫松爲位哭至咯血生平徧遊五嶽足迹半天下嘗登岱至絕險處擘窠書馮敏昌來遊廬阜觀瀑布抵華嶽攀鐵絙躋幢峽大鐫蒼龍嶺三字其上在河陽時親歷芒碭王屋太行諸山條其疆

域又以北嶽去孟縣不千里騎駿馬直造曲陽飛石之巔窮雁門長城而返最後宿南嶽廟升祝融諸峯觀雲海故其詩牢籠百態包羅萬有嘗論詩曰詩者心聲也高下抗隊擘緩焦殺各有一偏惟天下之中聲流於人心而發於詩其中聲必有元氣詩者元氣所爲非一切區區格調之謂能知元氣之鼓萬物者之謂大家其詩由昌黎山谷上追李杜粵東自曲江後諸子或存偏方之音惟敏昌力追正始歸然爲一大宗古文受之朱筠錢大昕性嗜金石陽湖孫星衍階州邢澍撰寰宇訪碑錄嘗就訂正前後主講端溪越華粵秀三書院學者稱魚山先生著有孟縣志華山小志河陽金石錄小羅浮草堂詩鈔文鈔師友淵源集 趙希璜字渭川廣東長寧人少讀書於羅浮山嘯吸雲煙故其詩無塵土氣受知於學使李調元補諸生與順德黎簡友善日相酬答乾隆四十四年舉人官河南安陽縣知縣有仙吏之目時縣志久未修希璜延偃師武億與之商榷考據經史旁求金石爲圖表志傳記凡十四卷錄凡十二卷河間紀昀極推重之謂其體例多合古法而未所附金石錄尤精確云著有四百三十二峯草堂詩鈔 李符清字仲節廣東合浦人乾隆四十八年舉人選直隸滿城縣知縣簿書之暇輒偕邑人士登山賦

詩尋宰天津兩宰獲鹿皆有聲卒官開州知州符清詩思俊逸迥出塵表性豪邁喜交遊愛書畫所藏有杜少陵贈衛八處士詩墨蹟因署所居曰寶杜齋著有海門詩鈔 莫元伯字台可廣東高要人乾隆四十四年舉人官番禺訓導工詩與馮敏昌張維屏相唱和詩品清真五言近陶時臻獨到性狷而和負笈其門者歲嘗數百人或以非義干輒毅然拒之每春秋佳日招友人登臨覽觀銜盃賦詩廉俸所入營甘旨以奉九旬老母餘悉以周貧乏喜讀史以學行聞於時著有柏香齋詩鈔

法式善

法式善字開文蒙古爾濟氏隸內務府正黃旗乾隆四十五年進士改翰林院庶吉士散館授檢討擢司業五十年高宗純皇帝臨雍禮成賞賚有差移左庶子本名運昌命改今名國語言竭力有爲也五十一年遷侍讀學士五十六年大考不合格左遷工部員外郎次年大學士阿桂薦補左庶子五十八年陞祭酒以讀書立品勗諸肄業知名之士一時甄擢稱爲極盛嘉慶四年坐言事不當免官俄起編修遷侍講尋轉侍讀七年遷侍講學士會大考復降贊善俄遷洗馬十年陞侍

講學士坐修書不謹貶秩爲庶子在館纂皇朝文穎復纂全唐文旋乞病家居養
疴法式善官至四品卽左遷名盛數奇似有成格顧泊如也所居在地安門北明
西涯李東陽舊址也背城面市一畝之宮有詩龕及梧門書屋室中收藏萬卷閒
以法書名畫外則蒔竹數百竿寒聲疏影翛然如在巖谷閒時海內稱詩者多追
逐於沈德潛袁枚兩家法式善獨無所倚毗用王士禎三昧之說主王孟韋柳性
極平易而所爲詩則清峭刻削幽微宕往無一語旁沿前人居翰林時凡官撰之
書無不編校因是所見益博所撰清祕述聞槐廳載筆詳悉本朝故事該博審諦
尤喜獎藉後進得一士之名聞一言之善未嘗不拳拳也海內名流投贈諸作輒
投詩篋中作詩話復取諸師友詩略以年代編次爲湖海詩六十餘卷又著有存
素堂詩集三十八卷十八年卒年六十二

汪學金 楊倫

汪學金字敬箴江蘇鎮洋人乾隆四十六年一甲三名進士授翰林院編修五十
一年充江西鄉試副考官尋以艱歸嘉慶四年召修純廟實錄擢中允五年陞侍
讀充文淵閣校理日講起居注官上在潛邸知其能詩至是召對乾清宮稱好學

問者再游陞左庶子以病乞歸學金生而穎奇八歲能詩十二隨父廷璵之聞學政署朱珪見其文曰此子筆有仙才廷璵因命師事珪其爲學儒修禪悅兩相融浹嘗謁珪安徽撫署侍談卅月歸珪曰何所聞而來何所見而去耶曰所見大進一談一笑無非天理性廉介而好爲利濟功德誠二子曰毋虐取失先人之寬厚毋奢用改先人之清白晚歲營靜厓小築水竹彎環梵磬龕燈儼然世外嘗謂年已半百享受無幾盡此長物藉結善緣云著有井福堂文集彙十卷靜厓詩初彙十二卷後彙十二卷續彙六卷輯婁東詩派二十八卷 楊倫字西禾江蘇陽湖人乾隆四十六年進士官廣西荔浦縣知縣倫博極羣書早傳聲譽生平論學以不欺爲本德氣溫醇望而知爲儒者晚主講江漢書院七年門下多尊信之詩得力於少陵與孫星衍洪亮吉徐書受輩唱酬最富所著杜詩鏡詮二十卷王昶謂其能照見古人心髓足與朱鶴齡相上下時袁枚論詩不分唐宋倫謂高升卑降繫於世風學者當戒歧途慎趨向唐宋不分其論殆未公云有九柏山房集

師範 袁文典 周於禮

師範字端人雲南趙州人乾隆三十九年舉人官安徽望江知縣生有異才於書

無不窺下筆千言立就法式善稱其負聲若折鐵抽筆如縑絲時以爲篤論嘗侍父石碑場大使署中題詠甚多去後人競寶之性果毅任事指陳古今洞中機要尤熟於水利邊防官望江時以整勵風俗爲己任搜刻望江諸先輩遺文以風後進事上不受貶屈總督委員過境索需範而呵之又杖藩司廝役之不法者邑有大獄多所矜全喜誘掖後進與諸生講學朝夕不倦四方之士以文字就正者無虛日在任八年公明慈惠甚著賢績士民謳歌之以疾乞歸旋卒於官舍家無餘財惟存書籍千卷所著滇繫百卷劉開謂爲西南不可無之書又有金華山樵詩文集 袁文典字儀雅雲南保山人官廣西州學正以母老乞養歸文典端品績學所爲詩問津少陵氣格高卓時多傑作小詩尤有遠神青浦王昶甚稱之嘗與弟文揆搜集滇南詩文自漢迄國朝爲詩略文略八十餘卷論者謂爲三池六詔文獻功臣所自著曰陶邨詩鈔 周於禮字綏遠雲南嶠峨人乾隆十六年進士改翰林院庶吉士散館授編修二十三年充會試同考官二十四年充四川鄉試副考官尋遷御史二十五年充四川鄉試正考官三十一年充會試同考官洊陞至大理寺少卿三十九年充順天鄉試同考官性明敏在諫垣時言皆持大體及

官大理決獄必準情法多所平反耽吟詠嘗與諸名士題畫碧桃白頭翁援筆立成座客歎服書法東坡文章簡質有法度所居聽雨樓藏宋元真蹟尤多嘗取褚顏蔡蘇黃米六家勒於石著有敦彝堂集

宋大樽 朱彭

宋大樽字左彝浙江仁和人乾隆三十九年舉人弱歲刲股愈母疾終身不治生讓財其弟嘗爲國子監助教以母老引疾歸居鄉里凶年煮粥活人隆冬施衣絮倡義學入貧苦子弟置水器禦災纖悉爲之治天文占驗及形家言又善鼓琴然非其好也所好者獨爲詩於東南諸名勝若天台雁宕黃山之屬無不窮探深入意欲精其詩以成名中年專學太白有逸氣晚更追漢魏而上之嘗言孔氏之門如用詩則漢之古歌辭升堂十九首入室廊廡之間坐陶杜人躋其言青浦王昶稱其詩埽淨一切足使李滄溟輩變色失步惟五言近體迪功靈一稍堪把臂晚年歸老西湖一日湖樓晨起呼肩輿遊龍井輿人至已端坐而逝如蛻化然著有茗香詩論學古集牧牛村舍詩鈔 朱彭字青湖浙江錢塘人歲貢生卽以詩稱於時阮元視學浙江與談名物掌故皆有所得嘉慶元年詔舉孝廉方正郡縣以

名聞固辭不就家素貧著書不輟徵文考獻爲武林談藪南宋古蹟考皆燬於火乃益刻勵爲吳越古蹟考南渡寓賢錄書畫所見集杭自厲鶚杭世駿後詩不振者數十年彭獨倡唐音一字之疵不憚百改四方名士過武林者無不出所業就正嘉慶八年卒年七十三著有抱山堂集

楊芳燦 弟燦 余燦慶

楊芳燦字蓉裳江蘇金匱人工詩文少卽華瞻學使彭元瑞大異之由拔貢應廷試得知縣補甘肅伏羌縣回民田五爲亂起石峯堡縣民馬稱驥應之未發芳燦先期募鄉勇設防會馬映龍以賊謀告芳燦立捕殺稱驥賊遽至與映龍等登陴守五日圍解映龍稱驥甥也初蘇四十三之亂獄詞連伏羌人皆大恐芳燦請於提刑曰馬得建饋銀在蘇四十三未爲亂以前與從逆者有閒於是家屬得免緣坐及石峯堡事平賊首張文慶子泰憾映龍洩其謀曰映龍故與文慶通共助守城欲於五日後獻城也阿桂逮映龍至靜寧芳燦曰映龍果欲獻城曷爲以謀告且伏羌無兵勇皆烏合衆亦無俟五日後力始竭阿桂曰彼非馬得建子耶芳燦曰彼固以得免緣坐思得當以報公也阿桂悟立出之獄芳燦治縣温温若不任

事坐堂皇訊事罷輒手一編就几讀人笑之而其應變敏決乃若是以功擢知靈州會仲弟揆授甘肅布政使例迴避顧不樂外吏入貲爲員外郎居戶部與修會典公餘擁書縱讀益務記覽爲詞章尤工駢體嘗語其友新城陳用光曰色不欲其麗氣不欲其縱沈博奧衍斯駢體之能事也詩則取法於工部玉溪閒填詞亦兼有夢窗竹山之妙守伏羌時王昶統師長武嘉其偉節賦二律飛達重圍芳燦卽有和章並上伏羌紀事詩百韻其整暇如此丁母憂貧甚鬻書以歸主衢杭及關中書院數年入蜀修四川通志主錦江書院嘉慶二十年卒年六十三著有真率齋稿十二卷芙蓉山館詩詞稿十四卷駢體文八卷 揆字荔裳生而聰穎卽涉獵史事九歲時塾師以蘭是衆香祖屬對卽應聲曰梨爲百果宗問何出曰南史張敷傳也長老異之彭元瑞視學江左聞其才妻以兄子乾隆四十五年召試賜舉人授內閣中書五十五年充文淵閣檢閱入軍機處行走五十六年福康安出征衛藏奏揆從行五十八年擢內閣侍讀旋授四川川北道六十年授四川按察使嘉慶二年授甘肅布政使四年調四川布政使其從征廓爾喀時海蘭察爲參贊最知兵聞揆謀畫輒云與我意合任川北道時與福康安合攻下苗寨殲擒

賊日任四川布政時值賊擾道梗總督魁倫調度失宜賊躡渡潼河焚掠三臺中江成都戒嚴揆撫難民誦姦宄旬日閒流亡畢集人心以安在蜀五年經畫雷波馬邊夷務及時蔽功以積勞卒於官贈太常寺卿揆少與兄芳燦有二難之日所作駢體文沈博絕麗下筆千言廓爾喀平福康安屬爲文勒石番藏卽署揆銜名詩初學長慶出塞後歷日月山星宿海諸勝異境天開格律亦因之而變著有藤花吟館詩文集衛藏紀聞 徐鏐慶原名嵩字朗齋亦金匱人乾隆五十一年舉人官湖北蘄州知州初以知縣投效川楚軍營歷權黃梅崇陽縣事時川陝難民聚楚境軍務倥傯鏐慶傳檄草奏發粟賑撫爲大帥所倚重巡撫畢沅亟稱之鏐慶爲乾學後人文筆高華詩雄健有少陵遺風少遊秦隴伊涼與楊芳燦兄弟顧敏恆齊名嘗遇數人論詩爭唐宋優劣鏐慶曰論詩祇論工拙不論朝代譬如金玉出於今之士中不可謂非寶也敗石瓦礫傳自洪荒不可謂之寶也論乃定所爲詩不拘一格能道其所歷著有玉山閣集歿後阮元刊行之

何道生

何道生字立之山西靈石人父思鈞乾隆三年進士官翰林院檢討嘗充四庫館

總校官與宴文淵閣下拜文綺之賜少從姚鼐遊章學誠顧九苞程瑤田汪元亮皆主其家年六十六卒道生乾隆五十二年進士歷工部主事員外郎郎中遷御史視漕山東出知江西九江府以病告歸尋丁父憂服闋出爲甘肅寧夏府知府嘉慶十一年卒年四十一道生初官工部以習料估冠其曹友人欲界其牆庭有亂輒道生蹴其輒縱橫步之曰得矣及牆成而輒適盡其敏達多類此爲御史值仁宗親政言事頗施行及官九江地瘠俗敝又有送迎勞道生毀資以成其廉勤事以成其能不逾年忠信慈惠之聲大著少受經學於顧九苞及長從吳張墳遊善爲詩思鈞持家嚴非醇謹好學士不令入門道生以詩求友天下與法式善張問陶楊芳燦等倡和諸人皆歛手避之一時文酒讌集道生詩傳誦尤多長洲王芑孫嘗館其家道生以詩質芑孫有所譏彈應時改定不自滿假也其詩疏爽雄健出入昌黎劍南之間青浦王昶謂山右自陳廷敬吳雯以來詩多清妙其排募則不及道生云著有雙藤書屋詩集十二卷

高澍然 張紳

高澍然字雨農福建光澤人父騰乾隆四十二年舉人官福鼎縣訓導以漢經師

說訓士著有漢學咫聞二卷古今文二卷穀音初集二卷澍然嘉慶六年舉人官內閣中書未幾以告歸少與同里何長詔長載兄弟以詩歌相應和桐城姚瑩官閩時與澍然友善生平於世俗嗜好一不繫懷擅稽濟時之略好治古文辭既交建寧張紳所學益進四十六歲以前文皆請紳刪定其爲文體潔而氣粹不以張皇爲工致力韓文出入必挾以行而所得和易乃近歐曾於近人盛稱朱仕琇論者謂仕琇以外入澍然以內出其於本原始高云深於春秋著春秋釋經十二卷陳壽祺稱其以經求經不苟阿三傳能一掃諸家繳繞苛細之習他著有詩音十五卷論語私記二卷福建歷朝宦績錄四十卷閩水綱目十二卷圖一卷光澤縣志三十卷韓文故十三卷習之文讀十卷抑快軒文集七十三卷 張紳字怡亭福建建寧人諸生少慕豪傑之行及長病瘵自分必死遂棄人事習靜三月而病已由是折節爲儒恂恂溫謹肆力詩古文詞醇古冲澹而孕奇氣同邑李祥賡傳古文業於朱仕琇獨推重紳姚瑩亦稱紳文視仕琇猶習之之於昌黎性耽山水所至忘返嘗浮彭蠡游漢沔以歸所著益富道光九年總督孫爾準聘紳及澍然共修省志十二年卒著有怡亭文集二十卷詩集六卷

伊秉綬 薩玉衡

伊秉綬字組似福建寧化人父朝棟乾隆三十四年進士官刑部主事由御史五遷至光祿寺卿少受業於雷鋹通程朱之學爲蔡世遠所稱卒年七十九著有南窗叢記八卷賜硯齋詩鈔四卷秉綬乾隆五十四年進士改刑部主事擢員外郎嘉慶三年充湖南鄉試副考官出知廣東惠州府以吏議去官旋授江蘇揚州知府丁憂歸二十年服除再至揚州疾作卒年六十二秉綬幼稟庭訓又從陰承方遊獲聞鄉先正李光地蔡世遠緒論講求立心行己之學工詩古文詞受知於朱珪紀昀亦甚器重之延課其孫初入刑曹爲阿桂所賞試任以綜覈秋讞守惠州懲治豪猾滅海盜脅從死罪建豐湖書院課諸生以小學近思錄民爭頌之嘗修朝雲墓於蘇文忠祠沼中得德有鄰硯人謂文忠以貺賢守者博羅陳爛屐四謀倡亂秉綬知之屢請於總督乘其未發時以兵掩捕提督阻其行亂遂作秉綬憤恚陳狀觸總督怒謫戍軍臺惠人號訴乞還者千百不能得方在詔獄時人皆爲之憂危秉綬灑然若無事東坡生日招宋湘諸名士設祀堂中賦詩飲酒極歡時歎其無升沈得失之念會總督自裁新督倭什布以狀聞上知其寃免遣在揚州

時值淮南大水親歷高郵寶應諸縣率屬賑貸錙銖必覈吏無所容其奸復勸富商巨室捐輸六萬餘金邑各置粥廠四存活甚衆北湖有湯家泮者盜藪也毒害商民汎兵莫敢誰何秉綬檄縣懸賞嚴捕懲巨魁數人餘黨駭散其再至揚州也寓黃氏園與一時名流倡和人得其一詩一字奉爲至寶卒後揚人感其德附祀宋歐陽修蘇軾及國朝王士禎三賢祠中秉綬政事文學皆卓有表見尤服膺宋五子書性孝營秋水園供母游憩未成母卒改爲家塾家居凡有利桑梓者率力爲之又捐義田二百石以贍族人工分隸與同時桂馥齊名所著有留春草堂詩七卷又有坊表錄攻其集修齊正論 薩玉衡字檀河福建閩縣人乾隆五十一年舉人官陝西洵陽縣知縣值劇賊薄城火攻救援不至玉衡與其長子宗甫竭力守禦相持七晝夜賊竟去已而總督坐失機罪玉衡亦以賊越河論戍後援贖免歸玉衡工詩沈雄瑰麗不亞於吳偉業朱彝尊閩中自明林鴻以後世稱閩派入國朝則黃任伊秉綬諸人先後爭長壇坫玉衡頡頏其間自關塗徑足以震揚一代同縣陳壽祺稱其詩尤爲雄特又言其入秦以後詩無怨尤語得溫柔忠厚之旨玉衡故酒狂然天真夷曠博聞強記嘗著經史彙考八卷小檀弓十二卷傳

子補遺續鄭荔鄉全閩詩話金淵客話曲江雜錄後燬於火有白華樓詩鈔四卷

黎簡 張錦芳 張錦麟 黃丹書 胡亦常 呂堅 李士楨

黎簡字簡民廣東順德人十歲能詩歸里益肆力於古與同邑張錦芳黃丹書番禺呂堅交名日起益都李文藻令潮陽見其詩曰必傳之作也造訪之勸令出試學使李調元得其擬昌黎石鼎聯句詩大詫異拔補弟子員因又號石鼎逾十載膺選拔尋丁外艱得氣虛疾故足不踰嶺所居曰百花村有亭曰衆香閣曰藥煙簡徘徊其閒視花鳥若友朋以筆墨爲耒耜海內詞人想望丰采名流來粵者咸折節下之簡故自慎不輕作應酬浙人袁枚負盛名探羅浮至粵介所素習者爲招簡答書卻之性好山水屢入朱明洞天窮其幽勝朋儕罕當意者惟與德清許宗彥無錫孫爾準最契其詩由山谷入杜而收練於大謝取勁於昌黎取幽於長吉取豔於玉溪取僻於閩仙取瘦於東野錘鑿鍛鍊自成一家似非經營慘淡不能成一語者顧才思絕敏無論長篇短什援筆立就爲文雜莊騷不屑八家軌範嘉慶四年卒年五十二所著有五百四峯草堂詩文鈔二十五卷藥煙閣詞鈔一卷芙蓉亭樂府二册 張錦芳字榮光亦順德人乾隆五十四年進士改翰林院

庶吉士散館授編修錦芳魁梧倜儻然事親能測意指恭畏愛慕常若童穉昆弟相依爲命學問博洽敦崇經術通說文喜金石文字於詩所詣尤深與欽州馮敏昌同邑胡亦常稱嶺南三子論者謂其可接武曲江在京聞伯兄訃乞假歸養行抵江西覆舟兩手急持王元章墨梅及舊端硯餘不暇顧也其雅癖如此年四十七卒著有南雪軒文鈔二卷逃虛閣詩鈔六卷南雪軒詩餘一卷 張錦麟字瑞光錦芳弟乾隆三十三年舉人幼絕慧有雋才十歲通經能詩以碧天如水雁初飛句得名時呼爲張碧天及長性孤介與錦芳並爲大興翁方綱所賞有雙丁兩到之日其詩標新領異不拾人閒唾餘而無不合於古又與同邑胡亦常齊名所作太白樓詩亦相伯仲南園以後諸子視之蔑如也著有少游草年二十九卒黃丹書字廷授亦順德人天姿秀穎讀書過目不忘年十三應童子試輒冠其曹學使李調元見其詩歎曰抗風軒之不墜其在丹書輩乎貢優行廷試歸築聽雨樓隱居養親若將終身居本生父憂哀號終夜恆失聲服闋猶素衣疏食乾隆六十年舉於鄉會試後朝貴爭延之辭不就語人曰貧與富交則損名賤與貴交則損節大興朱珪撫粵尤加器重晚官教諭所學彌粹士林尊之兼工書畫時稱三

絕著有鴻雪齋詩鈔八卷文鈔一卷胡桃齋詩餘一卷 胡亦常字同謙亦順德人抗志希古不欲爲一鄉一國之士年二十五卽以詩名乾隆三十六年舉人入都後交錢大昕既下第南歸與休寧戴震同舟手錄震所著書將刊之致書大昕欲壹志於經術以多噉瓜果解渴得胃寒疾抵家病卒亦常性至孝父傑歿時亦常年尙少卽能刻厲以殖其學事母何有郭外田數十稜最其歲入悉以奉母甘旨亦常終歲爨粗糲所爲詩妙悟天成能於南園諸子外自成一家著有賜書樓詩集 呂堅字介卿廣東番禺人歲貢生性兀岸自異家貧篋瓢屢空笑傲自若益都李文藻見其詩奇之朱珪莅粵堅與黎簡尤見稱許顧贈蹬名場老而不遇所爲詩文幽豔陸離奇情鬱勃不肯作一常語著有遲刪集六卷 李士楨字廣成亦番禺人嘉慶六年拔貢生少負異才朱珪嘗以國士期之工詩與黎簡游簡以爲畏友其詩鏤刻心肝不肯作一庸語駢體文亦爲吳慈鶴所稱家貧餬口四方惠潮嘉道胡克家延之幕府著有青梅巢詩鈔青梅巢外集

張問陶

張問陶字仲冶四川遂寧人大學士鵬翮元孫乾隆五十五年進士改翰林院庶

吉士散館授檢討詔選翰詹三十人各書扇五柄又選十二人分書養心殿屏間陶皆與焉嘉慶五年六年兩充順天鄉試同考官遷御史有直聲尋改吏部郎中十四年充會試同考官旋出爲山東萊州府知府與上官牴牾遂乞病遊吳越時往來大江南北十九年卒於蘇州年五十一問陶幼有異稟讀書過日成誦所爲古文辭奇傑廉勁同時名輩皆斂手下之而於詩尤工嘗作寶雞題壁詩十八首指陳軍事得老杜諸將之遺一時傳誦焉在都與洪亮吉羅聘相唱和無虛日後往見袁枚枚謂之曰所以老而不死者以未見君詩耳其推重如此書法險勁畫近徐青藤著有船山詩文集論者謂國朝二百年來蜀中詩人以問陶爲最兄問安字亥白乾隆五十三年舉人性孝友澹於榮利家居奉母圖史自娛詩才超逸與問陶有二難之日著有小瑯環詩集

葉繼雯 喻文鑿 陳詩

葉繼雯字桐封湖北漢陽人乾隆五十五年進士官內閣中書嘉慶三年五年兩充順天鄉試同考官六年充山東鄉試副考官轉宗人府主事洊陞戶部郎中掌山東道監察御史擢刑科給事中以事左遷員外郎尋卒繼雯以孝行著親歿哀

毀盡禮廬墓三年扶母柩南歸至韓莊聞溜擊舟裂抱柩大號聲振河岸既遇救鬚髮盡白環觀數千人皆嗟異居憂時園樹經年不華及釋服枯木重榮巢燕互乳漢水澄清彌月人以爲孝應生平績學嗜古深於三禮官內閣時進奉文字多出其手爲阿桂所賞識大學士王杰劉塘咸倚重焉歷充會典館玉牒館纂修官先後在館二十餘年於掌故尤諳悉嘗撰毓慶宮聯句序稱旨上獎異以比彭元瑞賜文綺又擬進敕越南國王文上曰此必出葉繼雯其典試山東也副劉鳳誥以行上嘗召見鳳誥語之曰副汝典試者葉繼雯也是好翰林聞者榮之詩縱橫跌宕集選集杜集蘇諸作尤極才人能事著有劄林館詩集讀禮雜記朱子外紀喻文鰲字冶存湖北黃梅人貢生官竹谿縣教諭少嗜詩長益力學既復遍游江淮齊魯歸而詩愈工所爲詩縱橫變化不可方物秦瀛初彭齡亟賞之黃岡王鑾謂文鰲曰君詩遠宗漢魏近亦取法盛唐萍鄉劉鳳誥嘗攜其集至塞外同戍者見之狂喜遠近奔走聚觀爭相購致高麗人尤重其詩兼工古文奇崛處得力昌黎集中論保甲鄉勇論社倉利病說吏說民諸篇皆深悉原委總督耳其名屬友人招致之力辭不赴年七十二卒著有考田詩話紅蕉山館詩文鈔 陳詩字

觀民湖北蘄州人乾隆四十三年進士官工部主事學問醇博嘗著質疑錄自天神地祇人鬼以至道釋鬼神一一考其原委以詩文附之又有姓氏書以姓爲經氏爲緯宋韻合鈔取廣韻集韻合爲一編而以三十六字母次第之又著有湖北舊聞湖北文載詩載叢載歷代地理志彙纂等書專記山川沿革嘗與章學誠修湖北通志其學具有淵源冥讀晨鈔罔間寒暑工詩嚴於格律駸駸入古乞養歸不復出主楚北書院數十年士咸宗之葉繼雯喻文鏊尤爲推服又著有大桴山人詩文集四書類考四書人物考事類叢鈔朱子年譜六律正五音考歷代紀元閏朔考史外叢談敬遠錄

石韞玉

石韞玉字執如江蘇吳縣人乾隆五十五年一甲一名進士授翰林院修撰五十七年充福建鄉試正考官旋奉命提督湖南學政嘉慶元年充日講起居注官三年入直上書房尋出爲四川重慶府知府兼護川東道寬明敏斷有循績五年賊過嘉陵江將犯重慶韞玉嚴兵防守嘗率精兵擊賊於土沱誅其渠又立團練法習技勇分班訓練更番休息有警一呼卽至境內遂安經略勒保知其才調使赴

營時賊方議聚川陝楚三省間其渠樊人傑別爲十號分路肆掠廷議用兵殲一股盡再剿他賊韞玉謂勒保曰今兵僅三路而賊股至數十若專剿一路餘無兵掩捕勢且益熾爲今計莫若分兵四出有一股賊卽以一路兵迎捕使無暇劫掠賊不得食當自潰勒保曰善卽屬草疏陳之七年三月始定分兵策兼用堅壁清野法作守砦方略十二則檄行川東北自是賊漸解次第就擒先後奉旨加道銜賞戴花翎十年擢陝西潼商道值歲洊饑晉尤劇石米值金十七八或請遏糶韞玉曰晉人亦朝廷赤子吾不能坐令饑餒遂縱之晉人得食關中人亦獲厚利在任四月擢山東按察使時寧陝新兵滋事韞玉入覲召見言必及軍務事歲一如所陳奏後以事被劾革職仁宗念川省軍務勞績賞給編修以足疾乞歸生平律身清謹未達時見得罪名教書卽焚之家置一紙虛名曰孽海然性和易近人不立崖岸所爲文貫串古今尤長於經世之學詩破除唐宋門戶援筆立成著有獨學廬詩文集卒年八十二

惲敬 陸繼輅 繼輅兄子耀通 毛燧傳 趙懷玉 董士錫

惲敬字子居江蘇陽湖人乾隆四十八年舉人以教習官京師時同郡莊述祖莊

獻可張惠言海鹽陳石麟桐城王灼先後集京師敬與之爲友商榷經義古文而尤所愛重者惠言也會教習期滿以知縣用選授浙之富陽銳欲以能自效矯然不肯隨羣輩俯仰大吏憚其風節欲裁抑之令督解黔餉敬曰王事也怡然就道返役遭父喪歸服闋選授山東平陰縣知縣引見改授江西新喻新喻吏士素橫敬至懲創之人疑敬爲治過猛已乃進其士之秀異者與之講論文藝斷事不收聲必旣其實士民懷德畏威翕然大變嗣調知瑞金縣瑞金在萬山中俗好訟素稱難治敬張弛合宜吏民成就約束瑞金諸生某以富凌人成巨案願進千金求脫罪敬峻拒之後屢邀人關說至以萬金相啗敬曰吾作令以來苞苴未嘗至門今乃有此豈吾有遺行耶卒論如律敬廉名素著至是人益信之以卓異薦擢南昌府同知然敬爲人負氣矜尙名節所至輒與上官忤上官以其才高每優容之而忌者或銜次骨最後署吳城同知爲姦民誣告家人得贓遂以失察被劾士大夫之賢者咸惋惜之嘉慶二十六年卒年六十一敬少好爲齊梁駢儷之作稍長棄去治古文四十後益研精經訓深求史傳興衰治亂得失之故旁覽縱橫名法兵農陰陽家言較其醇駁而折衷於儒術將以博其識而昌其詞以期至於可用

而無弊會張惠言歿敬聞之慨然曰古文自元明以來漸失其傳吾向所以不多作古文者有惠言在也今惠言死吾當併力爲之先是惠言與仁和湯金釗同講宋儒之學是時敬究心於黃宗羲明儒學案有所見輒筆記之未暇與惠言辨論往復也及歿敬爲書與金釗其略曰濂洛關閩之說至明而變至國朝康熙間而復其變也多歧其復也多仍多歧之說足以眩惑天下之耳目姚江諸儒是也多仍之說足以束縛天下之耳目平湖諸儒是也二者如揭竿於市以奔走天下之人故自乾隆以來多愍置之愍置之非也揭竿於市亦非也彼此之相詈前後之相搏益非也夫所謂濂洛關閩者其是耶其揆之聖人猶有非是者耶其變之仍之者是非其孰多耶知其是非矣何以存其是去其非蓋敬嘗自言其學非漢非宋不主故常故其說經能發前人所未發宜興吳德旋謂以敬之才而循乎先聖賢之規矩繩墨則橫渠康節之流也其文得力於韓非李斯與蘇洵相上下近法家言敘事似班固陳壽而敬自謂其文自司馬遷而下無北面其論文曰典曰自己出曰審勢曰不過乎物論者謂國朝文氣之奇推魏禧文體之正推方苞而介乎奇正之間者惟敬苞之文學者尊爲桐城派至敬出學者乃別稱爲陽湖派云

所著有大雲山房文稿詩集歷代冠服圖說其治獄別有子居決事四卷 陸繼
輅字祁孫亦陽湖人九歲而孤生母林氏實長而成之嘗閉置不令出外年十七
應學使者試識丁履恆吳廷敬歸告母母察之以爲賢遂縱繼輅結客先後交憚
敬及莊曾詒張琦洪飴孫學日進與兄子耀適齊名人稱二陸繼輅儀幹秀削讀
書夙成吐辭雋婉常傾座人當代先達有人倫鑒者爭羅而禮焉嘉慶五年舉人
官合肥縣訓導甚得時譽俸滿保知縣以修安徽省志敘勞選江西貴溪縣三年
以疾乞休十四年卒年六十一是時常州一郡多志節卓犖之士而古文巨手亦
出其間憚敬張惠言天下推爲陽湖派與桐城相抗繼輅及董士錫所爲文亦拔
戟自成一隊而繼輅於詩致力尤深著有崇百藥齋文集四十四卷合肥學舍札
記八卷 耀適字劭文繼輅從子縣學生詩醞釀深至人亦韜精斂采黯然可思
遇事侃侃無所疑畏橐筆遨遊尤長尺牘嘗客陝西巡撫朱勳幕會教匪反滑縣
命陝甘總督那彥成至河南過長安求士於朱朱言耀適知兵事卽請見爲陳機
宜緩急數十事因屬具草以上入奏多見施行道光元年舉孝廉方正試二等以
教諭用選授阜寧縣教諭之任百日卒年六十三性嗜金石文字隨所至搜輯摹

拓暇卽伏案考證補青浦王昶金石萃編所未備者成續編四卷他著有雙白燕堂詩文集十六卷 毛燧傳字洋溟亦陽湖人諸生少治古文喜先秦太史公書日與二三同志講求古作者義法武昌守張璿見其文聘主勺庭書院舊肄業士纔數十燧傳至歲增至數百人楚中自大府而下皆欲得其文以爲重嘗自喜其行文善敘事憾不得奇節偉行書之見人不解作寒暄語人有過輒面斥之武進陽湖縣志布政使祖之望屬排纂嘉慶改元以來兵事草創未竟而卒年五十六著有味蓼居文稿十八卷 趙懷玉字億孫江蘇武進人戶部尙書申喬四世孫乾隆三十年春高宗純皇帝四巡江浙懷玉奏賦行在四十五年復南巡召試賜舉人授內閣中書出爲山東青州府海防同知署登州兗州知府丁父憂歸遂不復出李廷敬延葺宋遼史詳節阮元伊秉綬復延葺揚州圖經後主通州石港講席六年諸生極愛戴之性坦易胸無城府嘗自言不敢好名爲欺人之事不敢好奇爲欺世之學工古文詞持論侃侃憚敬謂其文不惑於貴勢不率於朋友故集中所存無有雜言詖義離眞反正者詩與孫星衍洪亮吉黃景仁齊名時稱孫洪黃趙著有亦有生齋文集五十九卷續集八卷 董士錫字晉卿亦武進人副貢

生幼就外傳讀諸經史悉能通解家貧客游公卿間南河總督黎世埏知其才聘修續行水金鑑士錫以爲傳澤洪書詳於考古略於徵今續之者宜詳於徵今略於考古如永定河之工程今增於古幾十倍而前書未詳尤宜備載因草例十數條以上世埏歎服士錫因爲之輯著數載乃成懷遠令聘李兆洛修縣志未成而去亦延士錫續修焉少從其舅氏張惠言遊惠言以文學伏一世士錫承其指授於虞仲翔易義最深賦詩詞俱工而古文尤精妙著有齊物論齋集文六卷賦二卷詩八卷詞三卷外編三卷遁甲通變錄形氣正宗賦

吳德旋 呂璜

吳德旋字仲倫江蘇宜興人諸生自桐城方苞以古文法授劉大櫟大櫟授姚鼐鼐授諸弟子益廣且遠獨德旋於姚鼐在師友之間德旋名位雖不顯然同時如惲敬陸繼輅呂璜周凱輩莫不拱手推重以古文名天下幾二十年呂璜更師事之嘗以親承指畫手纂成編爲古文緒論一卷其論國朝諸家之文頗有微辭惟推服姚鼐謂鼐之文以韻勝時許其知言所自喜在敘事文字雜著及書序記之文猶自謂不逮歸方其自抑如此詩亦高澹絕俗著初月樓文鈔十卷緒鈔八卷

詩鈔四卷聞見錄十卷續聞見錄十卷道光二十年卒年七十四 呂璜字月滄
廣西永福人嘉慶十六年進士官浙江知縣累遷海防同知時稱循吏所斷千餘
獄無能翻異者民皆廟祀之尤嚴於檢身嘗服膺其鄉先哲陳宏謀學問須看勝
我者境遇須看不及我者二語以自治卽以誨人晚年歸里以古文名大吏聘主
秀峰講席先是吳德旋嘗受古文之法於姚鼐璜師德旋聞其緒論故德旋所著
初月樓彙中與璜書論文極詳至同時朱琦龍啟瑞王拯皆步趨德旋及璜而益
求廣其術於梅曾亮故桐城宗派流行於廣西璜文於紆回百折之中復有峻嶒
離合之勢著有月滄小集

王芑孫

王芑孫字念豐江蘇長州人乾隆五十三年召試舉人官華亭教諭芑孫幼有異
稟年十二三能操觚爲文客京師館董誥梁詩正王杰劉墉彭元瑞家爲諸人代
削草其後充教習又出而與館閣之士遊故雖未挂朝籍而朝廷有大典禮文章
之事未嘗不操筆竊與其間身短而瘠負氣甚高不屑從諛一介不苟取遇公卿
若平輩或病其狂實狷也久困場屋益肆力於詩古文其詩以五言古體爲最工

閒與法式善何道生張問陶楊芳燦輩琴歌酒賦故爲南北時望所推嘗選宋元八家以廣唐宋八家又謂元潘昂霄金石例王行墓銘舉例所載多未備因撰碑版廣例十卷書仿劉墉具體而微所自著有淵雅堂集嘉慶二年卒年六十三

舒位 王曇 孫原湘

舒位字立人順天大興人十歲下筆成章十四隨父翼官粵之永福讀書署後鐵雲山因以自號安南入貢位隨父迓使者賦銅柱詩相贈答傳誦外商弱冠中乾隆五十三年舉人王朝梧之黔聘使偕行值南籠狃苗不靖威勒侯勒保統兵征之朝梧在行間位爲諭黃砦文檄苗人識字者讀之皆哭拜解散勒保見而器之恆與計軍事賊中黃囊仙者妖女也旗鼓最盛時檄調雲南土練有龍么妹者年十八美麗善戰矛槍所及槩一斃十黃不能軍擒歸本道營位以美言甘之降者遂不叛勒保欲爲么妹執柯歸位位婉言卻之狃苗平巡撫議以軍府辦事賓僚列請議敘位辭時論高之勒保移督四川與位約從遊時翼已歿以母老辭歸家吳中以貧故恆負米湘湖間嘉慶二十年聞母喪戴星而奔不納勺飲者彌月遂以毀卒年五十一位性情篤摯好學不倦於經史百家無不究而一發之於詩嘗

謂人無根柢學問必不能詩無真性情卽能詩亦不工故其詩必出新意不沿襲古法而精力所到佗人百思不及著有瓶水齋詩集十七卷皋橋今雨集二卷法式善以位與王曇孫原湘爲三君作三君詠 王曇字仲瞿浙江秀水人乾隆五十九年舉人好游俠兼通兵家言善弓矢上馬如飛慷慨悲歌不可一世嘗謂其友錢泳曰吾死後必葬我於虎邱短簿祠側乞題一碣曰晉故散騎常侍東亭侯五十三世孫王曇之墓其好奇如此侍郎吳省欽曇座主也館和珅家時和珅方怙勢曇三上書省欽請劾和珅不聽乾隆六十年王以錮榜發高宗以臺官參劾命御前進卷別選一榜曇名與焉旣而榜復如舊仁宗亦素聞曇名嘉慶六年諭軍機云若王曇來京會試朕欲親見其人先是曇從大喇嘛章佳胡圖克圖者遊習其遊戲法會川楚匪起吳省欽薦曇精五雷法可制邪朝士聞之遂薄曇因是屢躡南宮卒潦倒以死生平於學無所不窺尤工駢體文所作西楚霸王廟碑竇光鼐歎以爲二千年來無此手筆未歿時自爲虎邱山窳室誌敘所著述三百餘卷然多散佚今所傳者煙霞萬古樓文集六卷詩選二卷仲瞿詩錄一卷 孫原湘字子瀟江蘇昭文人三四歲卽知讀詩口詠指畫若能通曉成童後從其父鎬

官奉天山西所歷名山大川風物奇險皆以歌詠發之年才弱冠名噪都下嘉慶十年進士改翰林院庶吉士充武英殿協修官假歸得怔忡疾遂不出歷主毓文紫琅婁東游文諸講席多所成就視鄉鄙疾苦若痛在膚有水旱賑卹事必先爲經畫之其論詩之旨以爲一人有一人之性情無性情不可言詩無風韻不可言詩若徒以格律體裁規模唐宋則失己之本來面目而真性情亡矣有真性情然後涵泳於經史百家以爲立言根柢自然獨關町畦足爲一代正聲自古名家大家何嘗不以學力勝要必從性情中來也其詩瀏離麗逸獨以風韻勝沈鬱不及張問陶而無其叫囂敏贍不及袁枚而無其遊戲虞山詩人以才氣寫性靈獨開生面者原湘一人而已著有天真閣集三十卷續集及古文駢體三十二卷

張士元 張海珊 張履

張士元字翰宣江蘇震澤人乾隆五十三年舉人七應禮部試卒未遇在京師館大學士富陽董誥第中誥兩主會試欲令士元出門下不能得也歸安姚文田督學江南士元與有舊禁諸子勿應試老而需次當爲教諭耳贖不肯就或勸之謝曰國家設學校使師弟子相從講學豈漫以廩祿振貧士哉吾自惟不能仕也苟

利焉而往不可性抗直董誥待士元素厚多有規諍浙撫阮元聘主諸暨書院一日飲縣署中令謂客曰張先生廉甚我饋之食物不受士元曰此皆民膏民脂也令起謝晚歸老爛谿之上以著述自娛道光四年卒年七十士元好爲古文辭師震川歸氏歲正陳其集於几北面拜之尋又得震川所評史記用其法上推之左氏下逮韓歐無不合者由是深造自得生平澹泊寡交獨與長州王芑孫無錫秦瀛新城陳用光以古文相切劘而尤爲桐城姚鼐所激賞以爲擬之震川無愧色云著有嘉樹山房集二十二卷 張海珊字越來亦震澤人道光元年舉人榜發已前卒海珊抗志希古不屑屑舉子業每觀一書輒融徹大意論學以程朱爲歸而不廢陸王嘗謂儒道之不可行乃迂疏無用者之過故凡自農田河渠兵制天下形勢所在卽當世漕糧胥吏諸利弊無不悉心討論三吳亢旱漶港盡涸一日北風大作水入諸漕皆滿糾衆築隄儲之歲以有秋先是蘇松水災作採荒私議以爲吳淞之塞久矣水留而不去莫若大濬吳淞江而以請賑勸捐所得給役食凡圩岸溝渠卽令所在之人修治之後十餘年大吏果奏開吳淞云論文則謂最難在實如食之必可飽衣之必可煖藥之必可去病著有小安樂窩詩一卷文四

卷日記一卷喪禮問答一卷火攻祕錄一卷 張履原名生洲字淵甫亦震澤人嘉慶二十一年舉人官句容縣訓導少從張海珊游講程朱之學於諸經尤精三禮善古文辭其議禮之文往往以今之情酌古之禮犁然有當於人心非訓詁名物之學也詩刻意洗濯不爲理語而理趣自深同時顧莼曾煥魯一同潘德輿俱極賞之嘗與張海珊遊南池自以爲有春風沂水之樂成南池唱和詩一卷他著有積石文彙十八卷積石詩存四卷

歐陽輅 周有聲

歐陽輅初名紹洛字念祖湖南新化人乾隆五十九年舉人博學多通書過目不忘少孤貧非其力不食有梁伯鸞徐孺子風旣屢試春官不遇乃南走粵北遊燕代性野逸敝衣垢履岸然公卿大夫間劇談豪飲旁若無人人亦多暱就之與法式善錢楷謝啟昆曾煥諸人相倡和其溼鬱剛介嚴凝之氣一寓於詩當時名流少能頡頏嘗言作詩當自寫胸中之天不期而與古人合早年出入於義山少陵昌黎東坡晚乃跌宕昭彰自出一隊其考詩極嚴鉤核瑕疵酷若申韓不少假同里鄧顯鶴嘗出詩互證每難之卒無以易其言也著有礪東詩鈔十卷顯鶴所輯

沅湘耆舊集本朝稱詩老者惟張九鉞及輅云晚年躬耕閉門不復出奉母以終
周有聲字希甫湖南長沙人乾隆六十年進士由內閣中書揀發貴州知州借
補清江通判擢大定知府歷知思州思南貴陽三府以失察小錢落職旋以河督
百齡保奏發南河補用歷署江蘇松江蘇州二府總理下河工務以勞瘁卒於官
年六十六有聲鄉試出姚鼐之門又嘗從蔣士銓游學有本原辭尙體要與秦瀛
交最契瀛嘗謂楚南詩人周錫溥孫起柎唐仲冕皆其舊交然其詩無踰於有聲
者爲人伉爽有智略官貴州時戢豪猾懲奸狡清理積案黃平知州某以訟失民
心洵洵將亂上官檄有聲攝其事至則寘首亂法而答其附和者人情帖然又破
走銅仁亂賊與鳳凰廳同知傅鼎會議增兵設礮以制苗民時當道以銅仁屬黔
地宜專責黔守備楚中可不復設有聲力爭謂黔以彈丸界楚地脫有警楚無兵
必不能救是坑黔卒也且黔楚皆國家版圖不宜各分疆界卒從其議有聲恂恂
一書生未嘗以文學才知先人而遇事超然遠覽所至俱以敏幹稱百齡贈詩云
凡事要須攻我短此生安忍負君言其矜寵如此著有東岡詩牘十四卷

黃文暘 喬載錄

黃文暘字時若江蘇甘泉人貢生工詩古文辭通聲律之學乾隆時兩淮鹽運使設詞曲局延爲總裁中歲奔走齊魯吳越間嘗館闕里衍聖公家車服禮器得縱觀覽又從阮元於杭州元甚重之返里後運使曾燠招入題襟館中與時流相倡和詩清越高潔稱其爲人性愛古錢得上古至今數百品一一摹之而繫以說爲古泉考六卷又好葫蘆門庭牆溷皆有之大小纍纍如貫珠壁上畫水墨葫蘆無數著葫蘆譜又著有通史發凡三十卷隱怪叢書十二卷曲海埽垢山房詩鈔十二卷 喬載繇字止巢江蘇寶應人諸生生而穎異髻鬣卽工五七言詩以詞賦見賞於學使莫晉性澹進取年三十卽不與秋試與同邑吳曰鼎方文炳相唱和日益肆力於詩自唐上泝漢魏下逮國朝諸家靡不窺究宗尙唐律多優柔中正順成和動之音曾燠謂其得新城神髓古文亦醇雅尤工倚聲謂兩宋以來詞體割裂有明三百年惟劉基不骫於正我朝自小長蘆芟纖刈仄集長短句之大成詞學昌明罕有倫比其崇尙浙西如此嘗和朱彝尊洞仙歌十餘闋家藏詞本甚富晚得汲古閣初印六十家詞伏案苦研不少輟著有妙華仙館詩二卷學讀齋詩二卷裁雲館詞二卷

陳鶴周濟

陳鶴字鶴齡江蘇元和人嘉慶元年進士官工部主事鶴生而穎悟始能言卽能讀杜詩居本生父憂瘠甚降服三年要經不除博學工文而篤於行誼爲嘉定錢大昕所重少有高世之志與朋友交侃侃直言輒以古人相規勸學宗宋儒與棲霞牟昌陽山鄭士超有工部三君子之目通政顧蒨常以禪語題其齋鶴曰有意爲之耶無意爲之耶蒨矍然立撤之操行修潔不屑奔走競進出無車馬入直則假之於人嘗著法先王論云孟子曰遵先王之法而過者未之有也荀卿子曰欲觀聖王之迹則於其粲然者矣後王是也太史公曰法後王何也近已而俗變相類論卑而易行嘗試論之夫有治本有治迹治迹者閱一時而輒變者也雖起先王於今日猶將究時之宜而爲之況後王乎記所謂得與民變革者是也治本者亙古不易者也雖更歷後王其變至於不可紀極而其本未嘗不與先王同稍一忽之而大亂輒隨其後此豈可以卑論儕俗之見擬議其間乎記所謂不可得變革者是也故孟子荀卿子言各有當而史公第舉其偏則過矣雖然聖賢之爲說恆鄭重於其本而不輕言其迹以爲得乎其本而有變有革猶之夏葛冬裘飢食

渴飲隨其宜而已無容心也苟不得乎其本而徒取先王之迹循之則不變革之禍有甚於變革者矣是之謂變其所不當變而不變其所當變變其所不當變而不變其所當變雖循先王猶有禍患況重以易行之卑論近已之俗變哉且荀卿子亦既明言聖王之迹矣而史公從爲之辭則所以滋後世之疑而開後世之弊者自此言始且夫後世之變固有甚不得已者矣井田之爲賦稅也封建之爲郡縣也此豈先王之法然而而是二者猶其迹也井田賦稅不同其所以因民之產使之相生相養者未嘗不同封建郡縣不同其所以作民之牧使之相導相齊者未嘗不同也今之治猶古之治也封建必得賢君郡縣必得賢有司而後民被其治繼世者不能皆賢先王以爲此無如何也是故爲之九伐之法變置之制以防之郡縣之黜陟有較之變置尤速者非其善法先王者乎先王則不徒恃其後之有所防而獨恃其始之有所導是故爲之胄子之教使天下萬國皆加意於所當爲治之人而一範之以正心誠意之學而又推其教化以行乎井田之間使農皆可以爲兵兵皆可以爲士後之有天下者苟詳明乎教士之法使皆自得乎所以出治之本而慎審於舉之之際則於先王之法思過半矣故法先王者亦法其意而

已矣古之治出於一後世之爲治出於二出於一則本立出於二則多爲之制度而莫循其本法先王者法其本不法其迹法其教化不法其制度以教化馭制度則天下之情僞固有出於制度之外者矣因其情僞之日出而又爲之制度以救之古之制度愈不可復而古之教化亦若果無所益求天下之治豈可復得此不信聖賢之過也三代而下所爲治亂之迹備矣凡其治之弊者皆其不法先王者也凡所以成一代之弊不致遽見其弊者必其猶有得乎先王之遺意者也雖致亂之主未有不思救一時之弊惟其不法先王故愈變而弊愈甚賢君不然卽救弊之際而本之以法先王之意故變而不失其治故曰與治同道罔不興與亂同事罔不亡此必然之理也制度雖詳要以教化爲本其他文大旨皆類此鶴熟悉史事於前明治亂得失多所考鑒嘗著明紀一書原本正史而參以王氏彙此外說部野史間有采摭必旁證覈實而後著之凡新異詭誕之說置不錄論者以爲有良史風其書凡六十卷手輯至五十有二卷而卒後八卷則其孫克家續成之克家道光二十四年舉人官內閣中書少爲桐城姚瑩所器重婁縣姚椿稱爲唐魏文貞公一流人詩學黃庭堅後入提督張國樑幕咸豐十年殉難詔贈知府銜

世襲雲騎尉 周濟字保緒江蘇荆溪人九歲能屬文稍長深沈有遠志與同郡李兆洛張琦以經世學相切劘好讀史尤好觀古將帥兵略暇則兼習騎射擊刺藝絕精嘉慶十年成進士或迎謂之曰子必得大魁對策語幸無過激濟曰此乃士人進身之始敢欺君乎廷對縱言天下事字數逾格以三甲歸班選知縣改就淮安府學教授時淮安府知府王穀丁祭至學宮禮畢將就殿門外升輿濟力拒之穀不懌去濟遂引疾歸是秋山陽縣知縣王仲漢冒賑事發穀與所屬吏皆得罪濟以先去獨免已而授經吳門寶山縣知縣鉅野田仲衡聞濟名延爲子師與縱論天下事互以才武相推許相得甚歡仲衡虧官帑四千餘兩母喪不得歸檄追甚急濟自鬻田宅抵之事始釋丹徒知縣屠倬患居民訟洲田不得其實濟親爲丈量還至署令束取所記用開方法乘除之謂倬曰此特以測遠法用之方田耳幕友如言覈之盡得其實案乃定兩江總督孫玉庭以淮南北鹽梟充斥聘濟屬以緝私事令所在營弁得聽指揮濟以兵法部勒擒擊防撫畢當一日與梟衆相持梟自後將發巨礮濟怒抽矢射之中其巨指礮不得發獲百十人濟曰賊務不治其本而徒緝私不可勝緝也遂謝去與涇縣包世臣訂交時吳中士有裨世

用者推世臣及濟濟蘊蓄既深鬱不得展一日翻然悔盡屏豪蕩技藝復理故業
豪士過門概謝不見前後如兩人與包世臣問難竟日歸取其舊藁悉焚之持灰
燼示世臣請盡言因發憤撰述先成說文字系四卷韻原四卷古今體詩二卷詞
二卷雜文二卷最後乃成晉略八十卷體例精深識議英特諸論贊中於攻取防
守地勢必反覆曲折俾覽者得所依據蓋以寓平生經世之學借史事發之遐識
渺慮非徒考訂而已也晚復任淮安教授湔除豪氣更慥慥爲篤行儒采其地之
孝貞節烈者盈千人牒諸大府旌其閭庠中樂久廢濟遴童子之秀者教以舞蹈
詠歌及釋奠觀禮者盈千人一時稱爲盛事漕運總督周天爵移督湖廣邀濟偕
行濟猶冀有所遇去官從之抵夏口疾卒年五十九

宋湘 吳蘭修 溫承恭

宋湘字煥襄廣東嘉應州人九歲見諸伯叔爲文會卽取片紙學爲文下筆有奇
氣嘉慶四年進士改翰林院庶吉士散館授編修十二年充四川鄉試正考官十
三年充貴州鄉試正考官十八年出爲雲南曲靖府知府所屬馬龍州地瘠民貧
湘捐俸購木棉教婦女紡織不期年比戶機杼聲相聞州人利賴之名曰宋公布

尋署廣南府城內地高飲水艱湘爲度地鑿東西二塘權池西道所屬大饑捐俸賑恤署永昌府有灣甸者所屬土州也土知州某死未有嗣親支景祥護印有景在東者遠族也乘景祥孺謀襲土職招匪黨千餘將攻保山縣湘恐爲前明二莽續乃激厲民夷使協攻賊賊據温坂山險以拒湘與僚屬游栖賢山從容賦詩賊偵之備少弛一日歸時已晡忽集鄉兵數百連夜兼行遲明抵温坂賊出不意驚潰又以計散其黨羽獲在東斬之邊隅以靖郡人德之塑生像祠焉道光五年遷湖北督糧道明年卒年七十一湘負絕人姿又肆力於古爲文章醇而後肆詩沈鬱頓挫直逼少陵粵詩自黎簡馮敏昌後推湘爲巨擘著有不易居齋集豐湖漫草續草燕臺滇蹠諸集紅杏山房詩鈔 吳蘭修字石華亦嘉應州人嘉慶十三年舉人官信宜訓導生平枕經茹史構書巢於粵秀書院藏書數萬卷自榜其門曰經學博士又以桑梓之邦數典宜覈乃撰南漢紀五卷別爲地理志以補諸家之遺舛爲金石志以搜當時之軼聞皆詳而有體覈而不華兼擅算學撰有方程考末載通御附辨二門有功九數他著有端溪研史三卷荔村吟草桐華閣詞温承恭字靖聞廣東德慶州人貢生少孤九歲見崔鴻十六國春秋讀之喜遂徧

覽諸史學使李調元奇其文令默寫史事數十條皆不誤亟賞之性倜儻有大志慕陳同甫王景略之爲人嘉慶初川楚用兵入蜀依華陽令徐念高時方奉檄購軍米齎大營承恭請行經夔州聞賊將薄城急謁夔守周景福曰孤城無援非固守不可宜截收所齎糧爲持守計遂中道交割而還夔藉以安過武昌遇漢陽人張瑤習知兵傾蓋論交握手至鸚鵡洲爲文祭禰衡墓相與大哭久之客松潘歷窮筭廢砦備悉險要著松潘防守議數往返蜀中無所遇其激昂慷慨之氣時露於詩嘗謂粵東理學經濟文章皆大有人惟英雄一輩頗少如熊飛何眞袁崇煥或庶幾耳晚授徒自給家貧親舊告貸必力應之嘉慶二十五年卒年五十八著有補迂集六卷雜論偶記一卷莊亭詩文集二卷隨得錄

573259

文獻通考卷之九十四

清史列傳

清史列傳卷七十二終

二

104-1038



21101000158033